

**PALEMENE XIII  
2001-2006**

**Susuga AIONO TILE GAFA**



**Itumalo Faaalalafaga:**

*Aana Alofi Nu.1*

**Filifilia:**

*27 Novema 2004*

**Faatauto:**

*20 Tesema 2004*

**Lauga Faataupou:**

*14 Iuni 2005*

E faaluaina le faafetai e pei ona saunoa lau Afioga i le Fofoga Fetalai i leni afiafi ina ua sao i alo se faasiliga malosi i le taumafataga foi aua le paia o le Fonotaga mamalu a le Palemene. Ae gase ia i le uo le toaga i Mulivai aua le pau o Tiafau i leni afiafi i le Fono a le atunuu ae momoli atu le agaga faafetai i lau Afioga i le Fofoga Fetalai, o lea e tapule ma topule aua se avanoa aua se sao foi o leni usugafono le Itumalo o Aana Alofi Nu.1.

Ae ou te le soona tapoina le fala matasoo aua Samoa, aua ua papaga ma menamena i tafua ou aneanea ma ou sasa Samoa i ou paia ma ou mamalu i lau faafofoga tapuai aua leni afiafi. I le ee tapuai ma le faafofoga tapuai mai a lau Afioga Mamalu Le Ao o le Malo Samoa, lau tapuaiga le leoa, lau Susuga i le Malietoa, e te ee i lou talaga na atoa ma lou nofoa vaevaeloloa, lou fala na folaloe e faalogo ia te oe Samoa. A outou Afioga i Sui Usufono o le Fono a Sui Tofia ma a outou Masiofo i lo outou sa seetolu, e faatulou atu.

E faatulou atu foi i lau Afioga i le Faamasino Sili, le Ofisa o le Faamasinoga a Samoa faapea foi leni maotaga, i lau Afioga i le Palemia, aemaise le paia ma le mamalu o le Kapeneta. E faatulou atu i lau Afioga i le Fofoga Fetalai o le Maota e te Taitaifono aua le Fono mamalu a Samoa, aemaise leni saofaiga aua sui usufono o le Palemene.

E faatulou atu foi i le faafofoga mai a le Aufaigaluega Paia a le Atua i fatafaitaulaga e fia, o taitai o Ekalesia eseese i totonu o le atunuu - malo le galulue, faafetai tatalo. Ia ae a la outou galuega tautiga aua Faauluuluga o Matagaluega, Faauluuluga o Pisinisi ma Faalapotopotoga Tumaoti a le Malo, aemaise o tatou uso mai fafo o lo o galulue soosootau aua se manuia o Samoa.

Ou te faatulou atu foi i le faafofoga aua Aiga ma Tama, Tama ma o latou Aiga, le tapuaiga ia Tumua ma Pule, Aitufanua, Ituau ma Alataua, Aiga i le Tai ma le Vaa o Fonoti ma le paia o Samoa.

E le faagaloina se leo o tatou uso i Sasa'e i lau Afioga i le Kovana ma lau Faigamalo, le paia i le Faleagafulu ma le nofo a Maopu, Sua ma le Vaifanua, Fofu ma Aitulagi, Saole ma Saleaamua ma le Launiu na Saelua. E faatulou atu foi i le Laau na Amotasi, alii Faatui ma tama o le Vaimagalo aua Tootoo o le Faleula tau tagata. O ou paia na ma ou mamalu Samoa. E le tuutiitia ifo i le loto, e fia tautala pea, aua o paia e tumau, e leai se malosi po

o se televave na te mafai ona toe suia, e amata mai i le Faleniua i le Matasaua seia paia le Faga o Tapaau ma le Alalagafa - o paia na faataotooto o Samoa.

Ae i le agaga o le faafetai ou te fia tautala ai aua le nofo tapuai mai foi a lo matou Itumalo e pele i le agaga o Faleasiu ma Fasitoota. I le paia aua Aiga e Tolu, Aiga o Mavaega, Aiga Sa Tuala ma le Aiga Taulagi, Tamaaitu ma le Maugafa ma Alo o Tamaalelagi o le Aloalii ma le Matua ae polapuipei e le fetalaiga i le Faletolu ma Fuaifale. E faapea foi i le paia o le Aiga Sa Tuala, Aiono ma Leaupepe, Sua ma Toleafoa ma le Taauso, lau Tofa i le Tuua ma le mamalu o le Falefitu ma lau Tofa i le Igoamatua. Le tapuaiga aua le Aufaigaluega Paia a le Atua i so o se fatafaitaulaga i totonu o Aana Alofi Nu.1 o Faleasiu ma Fasitoota. Lau Susuga i le Toeaina aua le Matagaluega a Malua Sisifo aemaise o le aufaigaluega a le Atua.

E avea ia leni avanoa e momoli atu ai le agaga faafetai e faaleo atu i le Malo se lagona fiafia aua leni ono masina o leni tausaga ua tuanai. Faafetai atu le tatalo faafetai tapuai, malo i la outou galuega. E le faagaloina i se faamatalaga le agaga faafetai aua le pule na lua o faletua ma tausi, o saoo ma tamaitai e oo lava i aumaga, o alo ma fanau o e o lo o galulue aua le atiaeina o si o tatou Itumalo. O le Atua o lo o silasila, o ia e faamanuia i galuega o lo o fitaituga i ai, tuli se ai aua lo ta Itumalo e lagolagosua aua le atiaeina faatasi o Samoa aoao.

Ou te fia tautala i le Tala Faatatau o le Tupe e pei ona ua talanoaina nei ma folasia i luma o le Laulau a Fono a le Palemene, e avea ai lou leo Aana Alofi ma lo tatou Itumalo e faaleo so tatou lagona ma so tatou sao aua le tamaoaiga o Samoa ua folasia nei. E muamua ona ou momoli le faafetai, e momoli atu le agaga faamalo i le paia o le Malo i lau Afioga i le Palemia ma le Kapeneta. E i ai lava upu masani o Samoa o le atunuu o upu ma tala - Ioe, a alu se folauga ona faapea lea o upu a tautai o le vasa, o le manu o le gogosina o le manu faausi e tuli i ai le ia a le tautai matapalapala. O le Tala Faatatau o le Tupe 2005/2006, o le auga o aute aua le manuia o Samoa. O lea ua faitau atu ua tepa i ula ua tagai i ula malo faafetai le faasoasoa, faafetai le agalelei ia Samoa.

E momoli atu le faafetai, e le fuatasi se leo i la outou nofoaiga, le paia o le Kapeneta, ua outou fai ua mafai, ua outou galulue le faalogologotiga aua le atinaeina o Samoa - ua lava ma totoe le faasoa. E maitau atu e ui lava ina tele upu ma tala, a o le tagata galue lava ia ma punou ifo, galue ma le le faalogologotiga, o lo o i le Atua le tau e fesoasoani mai i ana taumafaiga vaivai, ae a Samoa ma ona tagata lautele - faafetai atu i le faasoa.

E amata mai se faamatalaga i le Polenisia - i leni lava mataupu i le faafofoga a Samoa, ua tele i ai tala ua tele i ai faaupuga, sao pe sese, e leai o lo o galulue lava, o lo o galulue lava. Aua e mo ai ea le Polenisia? O le Polenisia ea mo ai? E tusa lava pe faaletonu, e tusa lava pe alu ai tupe a le Malo. O le vaalele lava mo Samoa, o le vaalele lava o lo o tautua aua tagata o si o tatou atunuu. E le o omai fua isi vaalele e tautua tatou, o lea lava e ifo tonu le fuiniu i le lapalapa. E ui lava ina alu ai tupe, e ui lava ina tele i ai tala, e leai se mea e maua ma se faigofie. E tatou te saili i le manava o le elele e saili le auro, saili mea

lelei, e maua ma le tiga, tatou te olioli pe a tatou afugia ma laina ma timuia. Ia tatou onosaia, tatou galulue faatasi aua se manuia o Samoa.

Faafetai atu i le Matagaluega o Aoga, Taaloga ma Aganuu i lau Afioga i le Minisita i le tulaga o le atiaaina o aoaoga ma le lumanai o Samoa, aua o i o lo o faitau i ai le gasologa ma le lumanai o Samoa ma ona atinae. A aoaoina lelei ma popoto le fanau, e faapena ona manuia nuu ma atunuu, e faapena ona sologa lelei aiga ma mautu lona tamaoaiga. Malo faafetai, tau ina ia faamanuia le Atua i fuafuaga ma lavasiga e pei ona fuafuaina mo lenei tausaga faaletupe.

Lau Afioga i le Minisita mo le Soifua Maloloina, e lagona le agaga faafetai, ae ui ina faitau pea ma maitau i le faalogo ma le vaai e lafo atu upu ma faamatalaga a o le tagata e alu ma loto maualalo - e fua lana vaai i luma ma tua ma fua i le alofa ae punou ma le faamaoni e galue ma atiae - o le tagata lena e alofa i ai le Atua, o le tagata lena e fesoasoani ma faamanuia le Atua i ana taumafaiga.

E le o po se lilo i le vaavaai, vaai ma le mautinoa, vaai ma le agaga faafetai ma le agaga fiafia i le atinae aua le tausiga o le soifua maloloina o si o tatou atunuu i le faaleleia o le falemai, e le gata i totonu o le taulaga ae faapena i nuu i tua ma Itumalo. Atonu o lo o agai pea i luma le folauga aua nisi o galuega o lo o totoe e fia faaleleia, malo faafetai.

Fai se faamatalaga i lau Afioga i le Minisita mo Galuega e avea ai lenei avanoa aua e le uma pea le agaga faafetai o lenei Itumalo i galuega faaleleia e pei ona ua maea - malo fai o le faiva, faafetai le vaai lautele ua le fua i le tasi ae ua lautele le vaai ma le silasila aua Samoa aoa ma lona lumanai ma ona atinae. O lea ua i ai le auala i Fasitoouta - faatana lelei - taligalu ma le tele o nisi o fuafuaga, malo faafetai. Pau lava o lea lau Afioga i le Minisita, ioe o lo o faafofoga si ou Itumalo o le talosaga vaivai o le Suavai aua o la le le ua faataatia mai le paipa i gauta a o lo o pagatia pea i tuamaota o afioaga i Faleasiu ma Fasitoouta i le leai o se suavai. Lenei vaitau ma lenei vaitaimi, e le o po se lilo i le silafia ua mita a tatou suavai ma ua faigata ai ona alu le isi aiga e utu vai i le paipa o le isi aiga aua foi ua mita ma ua totogi i tupe. O lo o i ai foi tanevai ua uma ona fausia i fesoasoani, peitai e le timu pea aso uma - e moomia le fesoasoani. Ua autausaga, o le upu lava lea ma le leo - alofa ua matou fia maua se fesoasoani ua pagatia i le tauamo mai i tai o suavai e faaogaina i lea aso ma lea aso. Ioe, o le talosaga vaivai i lau Afioga i le Minisita - pe e tefa le tauala e tau ina taatia atu e fai ai le fua e lau afioga. E le tauanauina ae vaai ma le alofa lea ua atagia ma taoto ata o Taulelei aua le Tala o le Tupe i lenei tausaga faaletupe. O se talosaga vaivai lena i tulaga o le suavai o si o matou Itumalo. E ui lava i nisi o tulaga e pei foi ona silafia lau Afioga, o lo o ua faatana le aualatele i Faleasiu e tau i le faleaoga, ae peitai o le tuaoi lea ma Tufulele. A na faapea lava o ogatotonu o Faleasiu ia ua talosaga foi o le a le fuafuaga a lau Afioga ma le Malo i le ala e pei ona i ai le falesa o le Lotu Taafili i Tauoo. E ala ona ou taua ona o le toatele o nai aiga ua fai i uta aua le atinaeina i faatoaga ma tulaga faapena.

Tau ina ia taatia atu e pei ona talanoa atu e faaleo atu so matou leo. O fea lava e i ai le finagalo o le faasoaa, e pule lau Afioga ma le Malo, ae matou talia lupe o maunu, o le a se aso ma se taimi e talia ma le agaga fiafia.

O le isi lava lea tulaga e pei ona lagona ai le agaga fiafia i le Malo mo lenei vaitau i le tulai mai o le Ie Samoa, lau Afioga i le Taitaifono aemaise le paia o e o lo o i ai i le Komiti ma lenei fuafuaga tataua, lea ua ou vaavaai atu \$100,000 o lo o faataatia aua fuafuaga fai mo le Ie Samoa. E lagona lava le agaga faafetai aua a tatou fua i ai i le vaai ma le maitau i aso o le faalelegapepe a Salafai ma Tumua nei e lagona le agaga faafetai. Ioe, aua sa maua sa ave le fua e fua ai le Ie Samoa a o le maitau i lea aso se ua le gata mai - ua ave i laau tulou. O le agaga fiafia o Tina o Samoa, o le agaga faamaopoopo, o le agaga talisapaia ma fuafuaga fai a le Malo.

E i ai foi nisi o Komiti sa maitauina e le i lesitalaina i fuafuaga o le Ie Samoa, peitai ua omai lava latou ua latou tapena ua omai e faamaopoopo ina ia faaalua lo latou agaga faamaopoopo ma lo latou agaga lagolago i le tulaga i le fuafuaga, o le faamamaavega aua Samoa ma lenei vaitau. O le agaga faafetai lea, e talitonu foi le taofi e le faaititia ai le agaga faafetai i le vasega o pulenuu, aua e pei o i tonu e ui lava i le fuafuaga a le Malo ma le Komiti ma le Taitaifono ae pei lava o i o lo o faaauala atu ai ina ia galulue faatasi ma Tina ma tamaitai o le atunuu aua le atinaeina o ona vaega. O lea ua ou maitauina ma le agaga faafetai, e momoli ai le faafetai i le Afioga i le Taitaifono aemaise foi le vasega o pulenuu. Ia ae a le Malo e, lau Afioga i le Palemia ma le Kapeneta pe e le i alagataua ea, e a pe a tuu ia i le lima tausaga e lagolagosua aua galuega ma feau a le Malo i taimi o le tofi pulenuu? Ioe, e faapena lava ona vaavaalua Matagalalua ma Tiafau nei, e fesili i ai e limataumataua i ai aua le atiaaina o nuu ma alaafaga lea o lo o tolu tausaga ae na ona taatia atu e fai ai le fua e silasila totoa i ai, e taoto i ai le tofa o fea, matagofie e saili aua le lumanai o Samoa aua lea itu o le tatou Malo.

E momoli le faafetai, talitonu tatou te agai pea i luma, tuli pea i luma so tatou ai. E pei lava ona eseese itutino e faamalalalama e le Aposetolo o nuu ese ae galulue lava mo le mea atoa - tuufaatasi mo se manuia auiluma o Samoa atoa, lea e momoli le agaga faafetai.

O nisi o tulaga o le atinae o Samoa ma le Tala Faatatau o le Tupe, e pei ona ou talanoa atu aua le paia o le Kapeneta, lau Afioga i le Palemia - malie, malie ma le atoatoa i le vaavaai atu i tulaga uma ua oo i ai le faasoaa ma le faataotoga aua le fuafuaga a le Malo. Malo faafetai e talitonu lele ua galulu Samoa; o le uiga o lau tala ma lau upu ua oo i ona ooooga le faasoaa a le Malo aua e le gata i le Tala Faatatau o le Tupe 2005/2006, a o le penisione a le aumatutua - ua oo lava i itu e fia o Samoa.

A o le vaavaai foi i le siitaga o totogi o le Malo - oka se matagofie. E leai lava se isi o le afaigaluega e le talanoa i ai, e le faaalua lo latou agaga faafetai. Ua loa taimi ua loa tausaga, lea ua vaavaai ma le mautinoa ua ni ufi e tutupu e faatalitali a o fea le taimi a o fea le aso, o lea la e momoli ai le agaga faafetai, lo matou leo i lenei

Itumalo e le faaalaloa, pau ia o lagona, pau ia o so matou manatu.

E i ai nisi mea o lo o i ai nisi o Tootoo aua lo tatou Palemene ma lana Fonotaga e a foi se faafofogaaga i le paia o le tatou Palemene aemaise o le faafofoga mai a Samoa ma lou Itumalo - a i ai se gagana ua sala, po o se upu ua laaloa ia faamagalo mai. O le agaga moni ia tatou galulue faatasi aua Samoa ma lona lumanai; ae a Aana Alofi Nu.1, si o tatou Itumalo, tau ina matau pea le tatou Sa i le Atua ma ia tatou faamoemoe i le Atua ina ia sao i manu le folauga a Samoa i masina o totoe o lenei tausaga - faapalepale mai ma faaloaloa mai le paolo o ona aao ina ia tatou maua pea lona filemu.

Ma le agaga faaalaloa, ia manuia le Fono.

## Tofa APULU PEPE METAI



### **Itumalo Faaalalafaga:**

*Aana Alofi Nu.1*

### **Filifilia:**

*12 Mati 2001*

### **Faatauto:**

*15 Mati 2001*

### **Lauga Faataupou:**

*18 Iuni 2001*

Lau Afioga i le Fofoga Fetalai, atonu ua uma ona oo atu se lagona o lou nei tagata i le avea o lau Afioga i le Fofoga Fetalai ma lou nei tagata e fai ma Sui Usufono o lo ta itumalo aemaise le tofiaina o lau Afioga e faafoeina le Palemene o Samoa i lenei vaitau. O le a oo atu foi se lagona o lo tatou itumalo e avea ai au ma sui e tau molimoli atu se lagona o le faafetai, lagona o le faamalo ina ua toe filifilia lau Afioga e fai ma Fofoga Fetalai o le Maota. E le au maua ni tofiga faapenei, ae afai o le valaauina o oe e le Atua mo le manuia o Samoa, o le faafetai lena a lo ta itumalo.

Ua ou manatu e le toe faateleina ni ou lagona e tusa ma le paia o le Maota Fono nei ae ina ne i fai foi ma lape o lauga pe a ou le oo i lea tulaga. Ona ou aveatu ai lea o le agaga faamalo, faafetai tele i lau Afioga i le Palemia ma le Kapeneta i mea uma ua faia mo le lelei o Samoa mai aso ua mavae seia oo mai foi i lenei vaitau o le soifuaga. E faapena lava le tulaga o le soifuaga i totonu o le Maota Fono nei, e avatu aumai, ae talitonu o le tuitui atu o lenei Itu e mafai ai ona maua ni auala lelei e fai ai le Malo.

Ona ou oo atu ai lea lau Afioga i le Fofoga Fetalai i le tapuaiga a Le Ao Mamalu o le Malo, le Sui o le Fono a Sui Tofia, le paia i le Faamasino Sili ma le paia i le Matagaluega o Faamasinoga. O ou moomooga ia tumau pea le lagi e mama i a outou Afioga ma maua le toafimalie e taputapu mai ai a o alofaiva le paia o le Palemene e tusa ma le faafoeina o le Malo.

Lau Afioga i le Fofoga Fetalai, e fia oo atu foi sa'u faamatalaga i tulaga o le faaleaganuu aemaise le paia i Aiga ma a latou Tama, o Tama foi ma o latou Aiga, le Usoga ia Tumua ma Pule, Ituau ma Alataua, Aiga i le Tai ma le Vaa o Fonoti i la outou taputapu mai i aiga a'o alofaiva outou sui usufono mamalu aua le faasoaina o tupe e faagaioia ai le Malo i lenei tausaga.

Ou te manatu lau Afioga i le Fofoga Fetalai, ina ne'i ou le oo foi i le Faigamalo i Tutuila ona tasi lea o lona. Faamalo le tapuai e le gata i le Kovana Sili, a'o le Kovana Lutena ae faapea foi le Fofoga Fetalai o le Maota ma le Palemene o Amerika Samoa. Ou te talitonu o le paia lava lea ia Sua ma le Vaifanua, o Fofoga ma Aitulagi, Saole ma Saleaamua ma le Launiu na Saelua, le Laau na Amotasi, Faatui o le Motu ma upu i le Tui Manua a'o alofaiva Samoa ma ona sui usufono i Fonotaga i lenei vaitau. Ona ou manatu lea lau Afioga i le Fofoga Fetalai, ina ne'i umi tele ni upu ona ou le oo lea i le tulaga ou te fia oo i ai, ae leaga ua uma foi ona avatu se lagona i lo tatou itumalo. Pe a tusa ma lou finagalo, ia avea ia au e fai ma o ta sui.

Le paia i Aiga, Aiga o Mavaega, le paia o Satuala ma le paia i le Taulagi; le afio o alo o Tuiaana Tamaalelaga, le paia i lau Afioga Mailo ma Mailo. O outou o uluai alii o lo tatou nuu, le paia i le Tamaaitu ma le Maugafa e pola puipui e le Faletolu ma le Fuaifale.

E faapea foi ona oo atu se lagona i le la itu o le vai i le afifio o le paia ia Satuala, afio le Afioga Leaupepe e faaao i ai paia o Satuala, le Taofia a Sa Aiono o le Alii o Aiga, le paia ia Sua ma Toleafoa ma le paia o le Taauso. O le agaga o lenei itula o le agaga o le faafetai.

E muamua lava ona ou faafetai atu i le paia o le nofo a faafeagaiga i lo tatou nuu o Faleasiu ma Fasitoo. Faafetai tele i a outou talosaga o lo o ma lagonaina e oo mai i le aso lenei tulaga o a outou tatalo i lena aso ina ia maua e Samoa atoa aemaise lava lo tatou itumalo se faiga palota toafimalie. E ui lava la ina lagilagia le aso o le faiga palota ae o lena sa outou tagai i ai i le matagofie, e toafilemu mea uma.

O la ma faafetai ma le Fofoga Fetalai i a outou afioga, malo le tatalo. O o ma moomooga ia tumau le mau e tele, ia lagi e mama i a outou Susuga i faafeagaiga i so o se fata faitaulaga aemaise le valaau ua valaauina ai outou uma i totonu o Faleasiu ma Fasitoo ina ia galulue e tusa ma le finagalo o le Atua. Ia manuia tele lo outou faafaletuluia ai i le Afioga o Aiga, le Faletolu ma Fuaifale, po o Aiga foi, le Falefitu ma Tauauvea ma upu ia Fasitoo.

O lau faafetai faapitoa e fia momoli atu i nai ou matua faale Agaga, lau Susuga Eti Tamati ma le tina o le galuega ia Kuinimeri. Faafetai mo le tatalo mo au ua mafai ai ona ou oo i nei tulaga maua luga.

Ua faafetai tele le agalelei Faleasiu ma Fasitoo. E leai lava se manatu ia i maua e toe oo mai i lenei tulaga. Faafetai i le Afioga i le Fofoga Fetalai sa mafanafana lava ia; a o au faafetai lo outou agalelei Faleasiu, faafetai tele ia te outou aiga, Sapulu, ta te manatu ina ne i le oo ni ota lagona i ou paia ona tasi lea o lona; a o le agaga o lo o ia te au se o le naunau i le taimi ona e i ai nai nisi o tulaga taua tate fia tautala i ai. E ui i lea o le a le afaina lea.

Sapulu i lau fetalai Apulu ma le taupulega, faapea foi lo oulua toalua Suafoa ma Tautai, le mamalu maua luga Salevao ma Fesolai o lo o tatou fai pitonuu i Sapulu. Faafetai, o la outou pule lea.

Sa o ma tatalo atu lava ma le Fofoga Fetalai se i ou tuu alolofa aumai maua, na ou iloina lava e le mafai ona le

palotaina mai le Fofoga Fetalai, ae sa ou tatalo atu foi i lo tatou fuaiuala, se aumai ma ta ita. O lenei la ua ou taunuu mai, faafetai tele lava Apulu, Salevao ma Fesolai ma le igoa matua. A na leai outou ou te le mafai ona ou nofo atu, faapea foi le alaalatai o Salevao ma Fesolai, faapea aiganofaalii ma le mamalu i le igoa a matua. Salevao ma Fesolai, sa ou iloa lelei e toatele nisi o lo outou fuaiuala e gafatia le tulaga lenei e fai ma fofoga taumomoli o lo tatou nuu, ae sa ou iloa atu lava lo outou agaga e faatafatafa outou mamalu aumai au e o mai ma le Fofoga Fetalai. O le agaga faafetai lea, faafetai le saili Malo, faafetai le agalelei, o la outou pule lea.

Ona ou oo atu ai lea i nai ou tama. Le paia i le Aiga o Mavaega, Maiava ma Maiava ma Maiava. O outou o faasaosao o le aiga, afio Tuitama ma le mamalu o Fuaifale. O au lava lenei o se atalii ia te outou. Sa outou aoao ia te au i lou tuputupu ae, sa outou finagalo e avea au ma se isi o taulealea matua e faatoeaina aumaga a outou aumaga, sa ouotu ote mai ma aoai aemaise lava le tulaga o lou savali ma lau tautala. Ai o le ala lea ua outou finagalo ai e palota mai au i le Palemene o le mea e afifio ai tupu ma aiga. Faafetai tele Maiava ma outou aiga, faafetai Leaupepe ma le tatou aiga, faafetai Tuitama ma Tuitama ma outou aiga i lo outou agalelei.

Ona ou liliu ane lea i lea itu e afifio ai Mailo ma Mailo. Ua ou iloa lelei e leai lava se isi o outou e le i palota ia te au. Ona pau lava lea o se faiga palota ua ou iloa ai ua tutu faatasi lo tatou nuu mo au lenei e sau. O lenei ua ou sao mai, faafetai tele le agalelei. A o le a se mea ou te tau ai? E leai ni tupe, pau lava lea o le agaga ia alofa le Alii ma aumai ia te au ni manatu lelei mo le manuia o le itumalo.

Ae faapea foi ona ou oo atu i Fasitoo uta aemaise lava le aufaifaatoaga. Fafetai tele Lepale ma le nofo a faafeagaiga o lo o i ai aemaise le Epikopo ma le paia ia te outou o faafeagaiga. Ou te talitonu o la outou lagolago e tele lava. Faafetai tele le agalelei. O se taimi ona ou toe oo atu lea e momoli atu le agaga o le faafetai.

Lau Afioga i le Fofoga Fetalai ina ne i tele naua, ae i ai lava nai mea taua tate fia laga i le Tala o le Tupe. O lea ou te sau lau Afioga i le Fofoga Fetalai ma le talitonuga o lou valaauina lea se i ou tilotilo e fai ai au ma ou sui lau Afioga i le Fofoga Fetalai ma le mamalu ia Faleasiu ma Fasitoo, e tilotilo i lenei Tala o le Tupe po o tau maua ai ni tulaga se i tau foia ai le mafatia o lo o feagai ma nai tagata. O le mea moni o lo o ou talitonu, o le soifuaga o lo o tatou i ai o se soifuaga e ia i lava manaoga taua muamua o le tagata (basic needs) o le tagata; meaai, fale, vaitaumafa ma mea uma ina ia ola le tagata. Ou te talitonu o la ua tofu foi tatou ma fale. O nisi fale e mananaia ae toatele lava tagata la e nonofo i nai faleoo ona e le lava ni tupe e fai ai ni fale lelei. E le gata foi la i lea a o le tualga o meaai o i ai nei e le gafatia ina ia ola maloloina. E le gata ina ia ola maloloina ae ia mafai ona savali atu ma fesootai atu i isi tagata. O le mea moni ua faigata; ua faigata ona fesootai atu i le taugata o le soifuaga aemaise lava lau Afioga i le Minisita o Tupe, o le soifuaga lenei e le aoga ona na ona ola ae ia ola ma aoaoina, ia malamalama i mea o lo o siosiomia ia lona soifuaga. O le mea moni, o le atiina ae

e tatau lava ona muamua tilotilo, o a mea o faaletonu ai? O a faafitauli ia e feagai ma tagata? Ou te le ma e tau atu a outou Afioga. E le o se mea e tau faaleleaga ae na ona ou tau atu ma le faamaoni, ta fia ola e i le toatele o tagata la e oi, oi e le gata o mea e fai ai faalavelave aemaise le maluu ma le oti, aemaise o tupe e fai ai taulaga i totonu o falesa. Ua le iloa pe o le a faapefea ona fai. O le a le tatou mea o fai nei se i tau faamalilie ai le mativa la e i ai? Ou te fai atu lava lau Afioga i le Minisita, o le matua mativa lava le mea o lo o i ai nei.

Ua ou tilotilo ifo nei i le tulaga i le atiina ae e faapea ua 7 ma le afa pasene ua siitia ai le atiina ae i le tausaga lenei mai le tausaga ua alu. Ona e nofo lea ma e faapea ane, e tusa le vaegatupe lea pe a e faatusatusa i le 1994 e maua ai le tupe e faapea e \$4,000 a le tagata e toatasi. E pei e foliga mai i lau faitau, o se faamanuiaga lea mo tagata lautele ona o le lelei o le atiina ae. O lou talitonuga lau Afioga i le Minisita e le sao. O le tau lea e i ai le siitaga ona o lea ua e nofo ma vaevae i se tulaga e faaliu tupe ai mo tagata taitoatasi o le atunuu, ua na o ni tau o ni fale na fai, ua na oni tau o paipa sa fai ai galuega o le vai i lenei tausaga. O mea uma la na ua faatupe ona vaevae lea i le aofaiga o tagata ona faapea ane lea, e \$4,000 le tupe muamua a le tagata Samoa i le tausaga. O le \$4,000 lau Afioga i le Fofoga Fetalai e le talafeagai.

O le aofai o aiga lea e i Samoa nei e tusa ma le faitauga lea talu ai nei, e tusa ma le 20,000. Afai la o le 20,000 lona a o tagata i totonu o le aiga e tasi e tusa male toavalu tagata, a 8 faatele i le \$4,000, e le toe oi se aiga Samoa pe afai e i ai uma tagata ia. O isi o pepe o i ai, e matua lelei ai lava le tamaoiga, ae ou te fai atu e leai leaga o la e faafofoga mai Samoa ma tupe ia e le sao. Ona ou talosaga atu lea i lau Afioga il e Minisita o Tupe, atonu o se isi faauigaga lona e i ai o le siisii lava o le tamaoiga, ae o faaliutupe, e le sao le faaupuga lea e faapea e \$4,000 le tupe a le tagata e toatasi la e maua. Aua ana faapea o le tulaga lona, ou te fai atu au ua manaia tele le tamaoiga. A o lea ou te fai atu, e leai.

Ona ou oo mai ai lea i le tulaga lea i Aoaoga. E le o po se lilo, o Samoa o lo o i lalo o atunuu pe 49 o atunuu e pito i sili ona maualalo lona atiina ae. E ala ona maualalo e tusa ma tuutuuga o lo o i ai ona e faapea mai, e le iloa e tamaiti faitau tusi: "Very low rate of literacy." Le iloa ona tusitusi ma faitau. Ma le tupe e maua a le tagata e toatasi e faapea ane i lalo le... pe na o le \$800 ea i le taimi nei. Na ou faitau ai i tusi.

Faafetai tele i lau Afioga i le Fofoga Fetalai, aemaise le Afioga i le Sui Usufono mo le Vaa o Fonoti na faatuina mai le 5 minute. E pei lava o le ala lea na o ta popole ai aua lau Afioga i le Fofoga Fetalai, o lea ou te tauaveina ma o la ta lauga lava lea e tasi, ia pe aumai ma le isi 30 minute.

E pei la o le agaga lea ia te au aemaise i le tulaga lea o aoga. Aua e pei o le tasi lea auala e ala ai ona tuu i lalo le rating i le tulaga lea e i ai nei. E le gata o le maualalo o aoga, ae ou te ofo foi aua o tupe nei tatou te fai atu e ave i le Ofisa o Aoga, e le o i ai se siitaga. Na ona outou fai mai ua faataua le Ofisa o Aoga ma le Ofisa o le Soifua Maloloina, ou te fai atu e leai se faataua e tasi. E

leai se eseesea o tupe ia ua i ai nei ma tupe ia na i ai i le tausaga lea.

Ae i le itu tau le aoaoga, lau Afioga i le Fofoga Fetalai, ma tua maualalo aemaise le tulaga o le faaleleia o le malamalama o tamaiti i tulaga ua i ai fesootaiga i nei aso. O se mea taua tele ia iloa e tamaiti ona faaoga le computer i mea o lo o i ai nei.

Ou te fesili atu i le Iunivesite ae fai mai e leai ni computer. E i ai computer e 40 e fia aveatu ae le lava se tupe e fai ai potu e tuu ai. O fea la e i ai le faamuamua lea? A o la e foi e toatele faiaoga ua o ese i le le fiafia i le totogi. Se na o faaupuga lava mea ia tatou te i ai, ae le o i ai se aoga.

Tuu ifo i le Ofisa o le Soifua Maloloina, ia talofa! O le isi la lea mea ou te tatalo atu ai ona o lo o mautinoa lava e le falemai tulaga o le aofai o mai la e aveatu e tele ai ona aveatu i tua i le falemai; o le mai suka, toto maualuga.

O le fesili, o le a la se mea o fai e tau faaitiitia ai? Aua o lea e fai mai e 40% i latou e o atu i le falemai ona o mai ia. A o le fesili la, o a ni mea o fai e le falemai lenei, a o faamamafa le aveina i ai o le tupe? O lou talitonuga, e leai se mea o i ai. E leai se mea e tasi a o faamamafa aua na o le mea lea e tatau ona fai. Identify po o a faafitauli, aveatu tupe tuu i ai e fai ai ni polokalame e faaitiitia ai le mea lea ona iloa lea, o la e lelei mea la latou te faia.

O la ua i ai se faaitiitiga o le aofai o e e mai suka aua o lea e i ai polokalame e fai e taumafai e faaitiitia ai; ona faaitiitia lea o mai la e o atu i uta. A o lea ou te vaai i le tupe lea e aveatu na o le tasi lava le vaegatupe lea ou te vaai i ai e \$7miliona la e i lalo o le output muamua a le Afioga i le Minista pei e faufautua ai. \$7miliona? Ae a e tilotilo lau Afioga i le Minisita i faaupuga o performance measures o le output lea, ou te fai atu e leai se mea. Na o le faiga o mea o Lipoti foi ia o Annual Reports. Na o le faiga o Lipoti o Galuega la e fai i tupe aumai mai fafo. Ona pau lena; ae \$7miliona. O le a le mea e le tuu ai le tupe lena i se isi vaega o le Falemai; aemaise le mea lea ou te fai atu ai e faaitiiti ai mai?

E taua ia te au leaga o si ou toalua, o le sefulu lenei o tausaga talu ona oti. E tusa ma le 14 tausaga o vaai e le falemai na iu lava ina oti. Ae fai mai le fomai Korea sa i ai i uta; ia malie e le iloa po o le mea e mafua le toto maualuga ona o fatugao ua leaga, pe mafua ona leaga fatugao ona o le toto maualuga. O mea na e tatau ona suesue, ma e le tau suesue foi e outou. O le la ua tele le mau suesuega i fafo e iloa ai. Ina ne i umi tele lau alu atu i le Ofisa ona le taua lea o nisi itu.

O le Ofisa o Faatoaga, lau Afioga i le Minisita, faafetai. Faafetai tele mo galuega lelei aemaise lau Afioga i le tulaga i le talo lea ua toe lalaga mai. E ui lava ina e le i lelei atoa, ae faamoemoe ia i le lumanai. Pau lava lau faamatalaga leaga sa ou i ina, e lua lava galeuga taua o le Ofisa o Faatoaga. E tolu; na o suesuega, o le extensive ma le Quarantine. A o le mea ua faanoanoa ai, o le tele o tupe ia e aveatu, la le e tuu i i le admiistration ae ua le faatauatele lau Afioga le tulaga o le aveina o faamatalaga i tua i nai tagata.

O tupe nei, o tupe e aveatu mo galuega e faaleleia ai tagata la e i tua, le au fai faatoaga. Ae a e tilotilo i ai i le faiga, e pei ua tele ina loka i totonu o le administration. Totogi ai tagata i ina ae ua leai ni galuega e fai e ave ai ni faamatalaga i tua i tagata la.

Ou te tatalo atu i lau Afioga i le Fofoga Fetalai, sei e silasila i ai i le tulaga lena i le Ofisa o Faatoaga. Ae faafetai tele lava ia te ouotu o uso a faigaluega i le taimi ua sola ma le tatou mafutaga. E i ai ma nai nisi itu nei, aemaise lava le itu o le WSTEC. Sei ou fesili atu lava lau Afioga i le Fofoga Fetalai; o fea ea le tele o povi a le atunuu na i ai? Povi a le WSTEC? Po o le mea ua pepe uma, pe ua ave e se isi? Se o mea ia e tatau ona tatou iloa uma aua afai o le la e faamanuia ai le toatasi, oi sole, se ua le sao tele nei mea. Sa i ai foi le tulaga o le kamupani lea sa faapea e fai lana faatoaga i uta i Mulifanua. Lea foi e tau mai i le Lipoti a le Suetusi, o lea e le i totogiina tupe ma na mea. Ma lau fautuaga mulimuli lau Afioga i le Fofoga Fetalai, ona o lea ou te iloa lau tou Anavatau, ia free le aveina o tupe i kamupani e fia maua. Ia o lea la ua ou vaavaai i ai, pe \$200 ma ona tupu ea miliona la ua ave e fai ai pisinisi. Faapea la au ia o le agaga, o pisinisi nei o pisinisi tetele e mafai ai ona faigaluega nisi, ona toafilemu lava lea o tatou e tofua aiga ma le tagata faigaluega. Ae afai nei e tele le au fai pisinisi ia na o pisinisi i inei, o le mea moni la o la e manuia le aualii na i pisinisi nei. Ae e le o manuia le atunuu. Aua foi na o le aufai pisinisi lava lea ua maua a latou tupe faaune; ae ua le faafaigaluegaina tagata e alu atu ai le tupe i nai tagata i tua.

E pei o le tasi foi lena faitioga se i tilotilo ane i ai. Nei tei ua ave a tatou tupe, ona manuia pito tasi a lea na o le aufaipisinisi ma outou ae matitiva ai lava matou. O lou lava talitonuga o le mea lena lea o lo o i ai. Mo le lumanai, ou te talitonu e pei lava le Malo o le Malo le la e i Asia; e maualuluga fale o tagata maumea, ae fetolofi ma momoe ai tagata i lalo, tutu ai ma fana e vaai o latou fale. O le mea lena e o o i ai tatou. E tupu lava le au milionea ia ma tupe, ae na ona matou pisa atu lava ae matou te matitiva. Se i silasila ifo a outou Afioga.


Lau Afioga i le Palemia ma le Sui Palemia, ou te talitonu o le agaga lena o nai tagata. Afai e tusa ma lo outou finagalo mo nisi Fono, se i aumai se faamatalaga pe fia le % o tagata Samoa uma o lo o latou umia po o le 5% o le tamaoaiga. Ou te iloina pe 5% o tagata la e umia le fia sefulu miliona. A aumai la se ata faapena, ona manaia lava lea o le tilotilo. E le ina ia faapito i se isi, ae mo tagata uma. Fai mai le isi faamatalaga na ou faalogo i ai, e leai lava se isi.... Toe tasi lava lau Afioga i le Fofoga Fetalai, ona uma loa lea. Fai mai le tasi tagata lauiloa,

The best thing e iloa ai le equal share o le wealth level, o le aumai o faamatalaga ia. Pe tofia, pe fia tupe la e umia e le toa 5% maualuluga le total national income o le atunuu, fia le tupe e umia e le isi 15%? Ae fia o lo o umia e le  $\frac{2}{3}$ ? Ona tatou iloa lea o tupe maualuluga, a o le lalolagi, ma o le lalolagi mativa lea e i ai Samoa.

O lau talosaga lena i lau Afioga i le Palemia ma le Sui Palemia ma le Palemene, e le na o i ina pe o i inei. Ae afai a tatou, e manaia le tatou faatasi.

Ia manuia lau Afioga i le Fofoga Fetalai. E faamalulu atu foi i lo outou paia i le Kapeneta pe afai e fai si mamafa atu o sau faamatalaga. Ia alofa le Atua ma molimoli atu le paia o lau Afioga ma le paia o le Kapeneta i le aso a taeao. Ia soifua.

### Afioga ASIATA SALEIMOVA VAAI



**Itumalo Faaalalafaga:**

*Satupaitea*

**Filifilia:**

*12 Mati 2001*

**Faatauto:**

*15 Mati 2001*

**Lauga Faataupou:**

*20 Iuni 2001*

E faatulou atu i le paia o le Maota. Susu o lau Afioga i le Fofoga Fetalai, faapea foi le Afioga i le Palemia ma le Kapeneta, Afioga i le Taitai o le Itu Agai, faapea Sui Usufono o le Maota.

E faatulou atu i le faafofogaaga a Samoa; le susu o Le Ao o le Malo le Susuga i le Malietoa Tanumafili II. Afio foi le Afioga i le Sui o Le fonu a Sui Tofia lau Afioga i le Tamaalefale Mataia Visesio. E faatulou atu foi i le Afioga i le Faamasino Sili faapea le paia i le vasega o Alii Faamasino.

Tainane le tapuaiga a Samoa, Tama ma o latou Aiga, Aiga foi ma a latou Tama, Tumua ma Pule, Itua'u ma Alataua, Aiga i le Tai ma le Vaa o Fonoti. E faatulou atu foi i le faafofogaaga a Tutuila ma Manua, Fofu ma Aitulagi, Saole ma Saleaumua ma le Launiu na Saelua, faapea le Faleagafulu, Faatuiolemotu ma Tama a le Manuatele ma Tootoo o le Faleula.

E faatulou atu i le aufaigaluega paia a le Atua o lo o asuina le vai o le ola i fata faitaulaga e fia i totonu o Samoa

Faatalofa ma fatulou atu i lou Itumalo o Satupaitea i le susu o le nofo fealoaloi a Sa Asiata. Aemaise lau Tofa Levae Asiata Peniamina. Afifio aiga i Samoeleoi ia te oulua Tavui ma le Tofa ia Gafa. Ae tapuai maia ae se i ou faia sa tatou lauga faataupou aua le Maota o Samoa.

E momoli at lau faafetai i lau Afioga i le Palemia faapea lau Afioga i le Minisita o Tupe ma la outou Kapeneta i le Tala o le Tupe aua e le se galeuga faigofie, o le galeuga faigata. O le ala foi lea e aua ai ne i tetena i o outou finagalo ni manatu e faaali atu e fesoasoani ai i la outou galuega.

I le vaiaso ae le i faitauina le Tala o le Tupe, sa saunoa ai le Afioga i le Minisita i le Iunivesite i le Papaigalagala. Na taua ai o lenei Tala o le Tupe o le Tala o le Tupe a tagata o le atunuu. Ae o le vaega ua tulai matilatila i lenei Tala o le Tupe, o le fesoasoani lea i le Polenisia. Ou te talitonu e tele foi Sui Usufono o le Maota ua faaalua o latou finagalo i le tele o lenei fesoasoani ua ave i le Polenisia pe a faatusatusa i isi vaega o le atunuu ma lona tamaoaiga.

O lau fautuaga i lau Afioga i le Minisita faapea foi le Afioga i le Palemia, e tatau ona vave aveese le Polenisia

ma le Pulega faalemalo po o le i ai o a outou Afioga i totonu o le Pulega.

O lea e taua i totonu o le Tala o le Tupe faapea e fuafua e privatise ae le o po se lilo i lena Itu na privatise muamua foi. Ou te talitonu i le agaga o lo o i ai o le Polenisia e avea le fua a le Malo. Ae silasila totoa i le tele o afaina ai o le Tala o le Tupe ma le tamaoaiga o le atunuu. O lea foi e taua i le vaega o le folasaga o le tamaoaiga, i tagata asiati mai ma le au tafafao e faale o tele se siitaga o lo o tulai mai i le lumanai. A tau le \$20 miliona. o se fuainumera tele naunau. E faatusatusa i le \$40 miliona lea e aitalafu e faaatoa ai pe faapaleni ai itu e lua o le Tala o le Tupe, tusa o le 50 pasene o le aitalafu lea e ave ma le Polenisia.

Ona see lea o sau faamatalaga i le Matagaluega o le Soifua Maloloina. O lau faamatalaga e faatatau tonu lava i lo matou itumalo ma le Afioga i le Minisita o le Soifua Maloloina. O le falemai o lea vaega o le atunuu, ou te talitonu e tatau ona tu tonu i Satupaitea aua e ogatotonu i lea vaega o le Motu i Salafai. O lea e talosaga atu ai i lau Afioga i le Minisita o le Soifua Maloloina au fuafuaga mo le lumanai.

O le Matagaluega o Aoga. I le atiaeina po o le uunaiina o le atinae lea o aoga, e taua tele lava le Iunivesite, ma o au lea sa ou i ai i le Iunivesite i tausaga e lua lea ua tea atu. E tele lava le faaletonu i le tulaga o totogi o faiaoga, ma e le i siia lava le tala o le tupe a le Iunivesite latou i nei tausaga e tolu. O le Iunivesite faatoa 17 tausaga. E tele naunau le sao o le Iunivesite i le atiaeina o aoga i totonu o le atunuu.

O le isi vaega o le inforamtion technology po o le auala mai le masini computer. E pei e maitau atu i la matou asiatisiga foi lea na i ai i le vaiaso ua mavae atu nei i le Ofisa o Aoga, e le o atoatoa lava talitonuga o le Matagaluega i le tulaga e tatau ona i ai lea vaega. Ona o se talitonuga, e le o malamalama lelei i tulaga e ono tutpu mai pe afai ua tuai tele masini ma tulaga faapena.

O aoga i nuu i tua ma le faamallosia o le Tulafono mo le faamallosia o le aoga o tamaiti, ou te talitonu ua saunoa ai foi nisi Sui Usufono i galuega ua tatau ona faagaioia e le Matagaluega lenei, ina ia faamallosia ai le faaaoogaina o tamaiti.

O le Matagaluega o Faamasinoga o Fania ma Suafa. Ou te talitonu o le Matagaluega lenei ua suetupe i le ola o le atunuu. E auala lea i tupe nei e totogi pe afai e tolopo se Faamasinoga. O le faiga faavae lava o nei mea o Faamasinoga, a tolopo e se tagata se Faamasinoga, ia manino ma malamalama. Afai e le faamallosia i le mafuaaga e ala ai ona tolopo, ona tuu lea i ai e totogi e ia le tau e fuafua mo le le mafai ona auai mai i le Faamasinoga. O le mea o lo o i ai nei, ou te talitonu o le tausaga lea sa \$300 pe a manao e tolo se Faamasinoga. O le taimi lenei ua \$500.

Na o se fautuaga se i silasila totoa, ia pau tonu lava le samala i le ulu o le fao. O ai lava le tagata lea e... e faapena ona tuu i ai le tupe e totogi ae le faapea o le a totogi e tagata uma o le a manao e tolo le Faamasinoga.

O le Faamasinoga FaaItumalo. O le taimi lenei e na o le toatasi le Afioga i le Faamasino o lo o i ai nei. O lo o auai foi le Afioga i le Faamasino i le faafoeina lea o

Faamasinoga o Faiga Palota. Ou te iloa a uma atu nei, ua matua tele lava le lisi faatalitali o Faamasinoga e pei ona i ai. Atonu e le afaina le Faamasinoga Maua luga o lo o toalua pea alii Faamasino o lo o i ai, a o le Faamasinoga lea Faaitumalo o lo o tulai mai ai le tulaga lea.

O le Matagaluega o Faatoaga. O lo o tulai mai nei se faafitauli i lenei vaitau i le popo ma lona tau; e faapea foi i le fale suauu ma le mafai lea ona vilia po o le faia o suauu, vaeatu le faafofogaaga a le atunuu. O lea e taua i le Tala o le Tupe, e \$1.5 miliona lea e fuafua mo le tulaga lea o le popo. Pau o lea e le o manino mai po o le a tonu le faaaogaina o lea vaegatupe. O nei faaeleeleaga o le popo ma le koko, ua le manuia lava le tulaga ua i ai pe a fuafua i tupe mai fafo na maua i le koko ma le popo i aso ia. A o aso nei, o le popo lea ua pau i lalo le tau o le popo, ae ua le gaoioi foi ia e foi o nisi vaega. A o le koko foi, manatua o le tatou koko o le koko aupito i taugata lea i maketi i fafo.

O lea o lo o faamatala i le Tala o le Tupe faapea o lo i ai le task force lea o lo o tuu i ai le vaavaaiga o le \$1.5miliona lea e faaaogaina. E ui lava o faiga faavae i lenei vaitau i le agaga foi o vaega mai fafo e i ai le IMF ma le World Bank i le faiga po o le faatauina o popo ma koko, e talitonu lava e tataua ona silasila totoa i ai le Malo. Po o le a se faiga e ono fai ai ae ia faamalieina foi ia tuutuuga ma vaega o lo o manaomia i ia vaega o le tamaoaiga o le lalolagi o lo o faapea ona galulue faatasi ma le Malo i le faatinoina o atinae.

O le tau o le soifuaga, o lea e manino lava le Tala o le Tupe e na o le 1%. Pau a lea a fuafua i le pau po o le le siia o tologi, atonu a fetuutuunai i ina le fuainumera e sili atu i le pasene. Tulaga ua faaalua e le Afioga i le Minisita o Tupe i lana Tala o le Tupe faapea e freeze ia siitaga mo lenei tausaga, pau lava lea o siitaga na o vaega o le Malo o lo o aafia i lea fuafuaga. E le ma iloa la po o le a se fuafuaga i tologi o tagata lautele o le atunuu po o e i le private sector. Pau lava le itu atonu e faanoanoa ai le mafaufau, atonu o le sii lea i le amataga o le tausaga ma le tulaga ua i ai nei, o le faaupuga foi lea e tuu atu i le isi lima ae toe sei mai i le isi lima. Atonu a na taatia pea ia le siitaga e faatino lava i lo le faia i lea vaitau, e solosolo lelei lava lea vaega. O le vaitaimi lenei ua i ai le tamaoaiga o Samoa faapea le lalolagi atoa. O lo o taua foi i le Tala o le Tupe ua saofia ai le oo mai foi o kamupani tetele i totonu o le atunuu. O faiga faavae o lo o ua i ai nei, e le faasaina pe taumafai ia faatino tauvaga i va o ia kamupani ma ia kamupani, ina ia faapea ai ona alu ifo i lalo le tau o le soifuaga.

Ou te talitonu foi ua i ai faiga a le Malo e taua ai vaega e le mafai ai ona tauva ma nisi pisinisi mai fafo po o e le mafai ona fai ai ni pisinisi a ni tagata mai fafo, na o tagata Samoa e mafai. O le itu e ao ona silasila totoa i ai le Afioga i le Minisita, o le puipuiga lea o le faipisinisi laiti i totonu o Samoa ma isi faipisinisi tetele. Aua o le mea moni lava o lo o faapena i le lima tausaga ua mavae atu, ua i ai faipisinisi taumafai laiti, pei ua le mafai ona faaauau ona e le mafai ona tauva ma pisinisi lapopoa foi i totonu o Samoa. O lea e aveatu ai se lagona i lau Afioga i le Minisita ina ia silasila totoa lau Afioga i lea

itu, e le gata i le afaina o le aufaipisinisi lava i totonu o Samoa mai le globalisation lea mai fafo, a o le afaina foi o le aufaipisinisi laiti tele i totonu o Samoa mai le aufaipisinisi tau lapopoa ifo.

Ona oo mai lea o sau faamatalaga i tagata Samoa o lo o alaala i fafo. E manino mai lava i le Tala o le Tupe ma se faamatalaga foi o le tamaoaiga, a leai tupe mai tagata Samoa mai fafo, e matua mativa lava le atunuu.

Faafetai i lau Afioga i le Fofoga Fetalai.

A o le i faia le malologa sa tau lau faamatalaga i le mamalu o le atunuu o lo o alaala i fafo. O le tele o tupe faamomoli a i latou ua lelei ai foi le tamaoaiga o le atunuu. O se lagona la, e ao foi ona silasila totoa le Malo i lea itu i faiga e foliga e faaese ai i latou. E fai lau faamatalaga ona o le Tulafono lea o Faiga Palota lea e tolu ai tausaga e tataua ona alaala pe afio se tasi ua manao e avea ma Sui Tauva i totonu o le atunuu.

E i ai lava le lagona vaivai, o le Tulafono o Faiga Palota e le faavae i le mea e nofo ai le tagata, ae faavae i le alaafaga e matai ai. Pe i ai ia...

Faafetai i lau Afioga i le Fofoga Fetalai.

O le talitonuga i le Komisi o lo o tagofia nei ia nisi vaega o le Tulafono lea, e le o silasila i le vaimea lea i tausaga. O le ala lea o lau faamatalaga lau Afioga. Na ou taua foi o le a le ala tonu o le galuega o lo o fai nei e le Komisi.

I le tulaga i le Komisi e i ai i lou lava talitonuga, o tatou Tulafono ua manaomia se iloiloaga lautele ona o le faavae lava o le Tulafono o Faiga Palota a Samoa, ia faavae i le matai ma sootaga o le tagata. Ae peitai ua i ai nei faiga, ua faavae i mea faapea o lo o alaala ai ia lea tagata palota ma lea tagata palota. Atonu ona o le suiga ua i ai nei mai le palota na o matai i le palota o le 21, ua pei ua tele ai tulaga ua aliali mai, ua faapea ai ona faigata ona fai ni fuafuaga i ituaiga agavaa o lea tagata palota ma lea tagata palota. Aua e silafia foi e le mamalu o le Maota, e tele ituaiga palota o lo o faaoga foi e lea vaega o le lalolagi ma lea vaega o le lalolagi, tatou te vaavaai foi i ai, pe ono fesoasoani i le faafitauli o lo o tulai mai nei. Ou te talitonu ua ala foi ona filifili le Komiti ona o le faafitauli o lo o ua i ai nei le palota o tagata mai lea itumalo i lea itumalo.

O le vaega lea o le Offshore Finance Centre. E momoli atu lau faafetai i le Afioga i le Minisita i lana galuega o lo o fai nei i le tetele atu lea po o ni taumafaiga a isi Faalapotopotoga o Malo o Europa, e taumafai ia faaitiitia ai ia ni kamupani e ono faamauiina i lalo o lea faiga o lo o i ai nei, ma faapea ai foi ona faaitiitia ai le tupe e ono maua mai i lea ituaiga atinae. O lo o vaavaai foi i nusipepa i le faaalua o le finagalo o le Afioga i le Minisita, faafetai. Ona pau o le mea o ou mama na i lo outou feagai ai ma ia Faalapotopotoga e matautia foi lo latou malolosi i le atiaeina o o latou atunuu. Ona see mai lea o sau faamatalaga...

Faafetai i le Afioga i le Sui Usufono ua lagolagoina le toe faaopoopoina mai o minute.

O le faatauaina o le tofi Sui Usufono. E i ai lava lou talitonuga o lenei tofi o le tofi taua i le faiga o upu a le atunuu faapea le faiga o ana Tulafono. Atonu e le toe

faia sau faamatalaga i le tulaga foi na i ai le Tulafono o lo o i ai nei o Failautusi FaaPalemene.

O i ina o lo o taatia ai se lagona e ao ona silasila totoa le Malo i le vaega o Sui Usufono. E le ona o se tulaga e faapea o outou nei a o matou taeao, a o le agaga ia faatauaaina le tofi Sui Usufono aua galuega a Sui Usufono i le sailiiliga lea o mataupu tau i le Fono. E faapea foi vaega o Tulafono e manaomia ai ia ituaiga fesoasoani.

Sa i ai le tofiga lenei o le Attorney General po o le faa Samoa sao o lea tofiga o le Loia Lautele. A tuu i ai le Loia Sili e pei ua sese ai le tulaga sao lava o ia ituaiga tulaga i totonu o Faavae.

O le fautuaga i le Afioga i le Palemia. E leai ou te manatu ua tuua foi Faigamalo o le atunuu, o lea o le a 40 nei tausaga talu ona Tutoatasi. Ma ao ona fai se faiga ia ese le loia e fautuaina le Malo e se loia mo le Palemene nai lo le fai uma lava e le loia e toatasi. O i ina e aliali mai ai tulaga e feteenai ia tiute o le e umia ia ituaiga tulaga ma faavae o faiga o Malo. Silasila totoa i ai lau Afioga ma le Kapeneta aua o se suiga e mama ai foi ia galuega ma faapea ona mafai ona ave fautuaga sao lava i se vaega e tasi, i lo i le lua pe tolu ni vaega e ono feteenai e na te fautuaina.

O le isi tulaga o tulaga tofi o le aufaigaluega a le Malo, o le Suetusi Lautele po o le Auditor General. O lea ua ou faitau i le Lipoti a le afioga i le Suetusi ona ua folasia mai i luma o le Maota. Atonu o i ai se taimi ae o se fautuaga i sau faitauga puupuu i ai i lea Lipoti, o lo o folasia ai e le afioga i le Suetusi le faigata o le tulaga ua i ai nei le umi o lona tofiga, ma le tulaga tofi o lana galuega i le Palemene e lipoti mai i ai le afioga i le Suetusi.

O le amataga lea o le Lipoti o lo o faaalai ai le agaga o le alii Suetusi lautele ina ia toe fetuunai le umi o le taimi o le tofiga o se tagata e umia lea tofi, aua lava le faatinoina o lana galuega.

O le folasaga a le Afioga i le Minisita o Tupe i lana saunoaga i le Tala Autu o le Tupe o lo o taua ai le tulaga lea o le 18 tausaga talu ona faafoe e le Vaega Faaupufai a le HRPP le Faigamalo, ma ua manino foi i saunoaga i luma o le Maota galuega ua faatinoina i lea vaiata.

Ou te talitonu e toatele foi vaega e ono toe silasla i ai i le suiga o le Faavae o le Malo ina ia mafai ona i ai se sao, e le gata i Sui Usufono o le Palemene ae faapea le atunuu i uiga e soalaupule lelei ma faapea ona taatia ai le Faavae o le atunuu i tulaga na fuafuaina e o outou tuua ma ni o matou tuua o lo o lagomau mai nei tiasa, aua o le vaavaai i lenei vaiata i ituaiga atinae o lo o ua o o mai Samoa mai atunuu i fafo, e faigofie lava ona galo ai le Faavae o le Malo e ao ona fuafuaina. E aveatu ai se fautuaga i lau Afioga aua na ou vaai foi i le isi Lipoti a le Esetete Tausi o lo o i ai nei, ua leiloa uma povi a le Faalapotopotoga, a ua faatau eleele ma maa e saili ai ni tupe a le Faalapotopotoga. E leai o mea uma lava nei e ao ona silasila pea i ai i tulaga o lo o tulai mai.

Ia ua uma foi ma nai manatu na tusitusi. O au foi lea faatoa ou taunuu mai nei, ana ou le vave mai e le faia lau lauga ae ui i lea, atonu o lona ua momoli atu le fautuaga i le Afioga i le Palemia ma le Kapeneta. Lau Afioga i le

Fofoga Fetalai, e leai, ou te talitonu o lo o i ina le tofa ma le faautaga. Na pau o lea, o le agaga maualuga lava, e leai e te afisia uma lava matou i au faaiuga. E tatau foi ona puipui e lau Afioga le toaititi po o e foi e.... A o le agaga vaivai lea e tali atu ai i lau Afioga i le Fofoga Fetalai.

Ona faapea atu ai lea o sau faamatalaga, ia alofa le Atua ma foai pea le mau i le aufaigaluega a le Atua o loo faafaletulua i le asuina o le vai o le ola i totonu o le atunuu i ona fatafaitaulaga eseese. Ia mama le lagi i le Afioga i le Ao Mamalu o le Malo, ni lagilagia i le Afioga i le Sui o le Fono a Sui Tofia, alofa foi le Atua ma faamanuia i le tapuaiga a Samoa.

Ia manuia lenei Itu o le Maota i lau Afioga i le Palemia ma lau Kapeneta. Ia manuia foi lenei Itu i le Afioga i le Taitai o le Itu Agai. Ia soifua ma ia manuia.

### **Afioga AUTAGAVAIA LAVE**



#### **Itumalo Faaalalafaga:**

*Palauli*

#### **Filifilia:**

*10 Novema 2001*

#### **Faatauto**

*18 Tesema 2001*

#### **Lauga Faataupou:**

*17 Ianuari 2002*

Faafetai mo le avanoa.

E au faatasi ina ua avea lau Afioga e faamua le viiga ma le faafetai i le Atua aua le sololelei o Taulumaga o le Fono Aoa o Samoa. A ou te le i faia se lauga, ua ou manatu o Au o le Sui Usufono fou o lea foi ua taualuga ai o matou Sui Usufono fou, ae e le masani Palauli i se lauga faataupou. O lea o le a ou lauga faataupou ona o le taualugaina o o matou Sui Usufono.

A ou te le i taia Tafaitoga i Utumalama ma utufia le vai na iite i ai le Tuiatua na i Mulinuu ma Sepolataemo, taoto ia faamaege i tai loloto ou paia Samoa mai i le Matasaua i le oneone le ufitia seia paia Fili ma Puletuu na tauiso ai le Malo o Samoa, e mai i le tai samasama a le Tuimanua seia paia le tai ulaula o Nafanua.

O Samoa o le atunuu tofi e le o se atunuu taliola aua e talataua Toga ae talatofi Samoa. E leai lava se poto, e leai foi se vave e mafai ona toe tala le tau i le sa o Samoa lele ua taoto i Tiafau nei. O se ia ua uma ona aisa ae faamanusina i le lauga a Pule ma Tumua ae tau ia ina ou sau i le va ma ou faapoipoi laau tumanu, faaila le lupemua ne i fai ma lape o le lauga a Palauli.

Fati magalo ia le ava nai Taga ae ou te le seutafilia le naa, ae o le a ou seu i matatoaga e faigata e lavelave le vaosa vaofilifili. Faagafua ia lou tulaga ae magalo sou leo se i ou liliu ane leaga e faigata o Samoa o le aomamala - Tulou, tulou, tulou lava.

Tulouna ia lau Afioga i Le Ao Mamalu o le Malo lau Susuga i Le Tapau Faasisina Malietoa Tanumafili II; Tulouna lau Afioga i le Sui o le Fono a Sui Tofia. Tulouna foi lau Afioga i le Faamasino Sili ma le Ofisa o Faamasinoga; Tulouna ia le paia o le Palemene o Samoa, le afio o lau Afioga i le Palemia; Afio lau Afioga i le



Fofoga Fetalai; afio lau Afioga i le Sui Palemia; afifio a outou Afioga i Minisita o le Kapeneta. Liliu le vai o Sinafutuluva, afio lau Afioga i le Taitai o le Itu Agai, ae a le afio o lau Afioga i le Tama a Aiga, afifio le paia maualuga i Sui Usufono filifilia taitasi o Itumalo o Samoa.

Afio lau Afioga i le Failautusi o le Fono, afio Afioga i Faauluuluga o Matagaluega ma Ofisa eseese o le Malo o lo o fita i tuga i le latou tautua aua se manuia o Samoa ma ona tagata.

Tulouna ia le paia maualuga aua le tapuaiga a Ekalesia Kerisiano Soofaatasi a Samoa o lo o laugaina le toetu o Keriso ina ia maua le ola e faavavau aua se manuia o Samoa.

Tulouna ia le paia maualuga aua le afio o Tama ma o latou Aiga, Aiga ma a latou Tama, Aiga o Tupu ma Aiga o Papa ma Aiga o Nofo aua le tapuaiga ia Pule ma Tumua Ituau ma Alataua Aiga i le Tai ma le Vaa o Fonoti.

E le faagaloina foi le tapuaiga ia Amerika Samoa, i le afio o lau Afioga i le Kovana Sili, lau Afioga i le Kovana Lutena, lau Afioga i le Faamasino Sili ma le Ofisa o Faamasinoga, lau Afioga i le Fofoga Fetalai ma Maota e lua, ae a le paia ia Sua ma le Vaifanua, Fofu ma Aitulagi, o Saole ma Saleaumua ma le Launiu na Saelua, paia i le Laau na Amotasi, Faatuiolemotu ma Tootoo o le Faleagafulu ma Tama a le Manuatele.

O ou paia ia Samoa ua taoto ae o se alao; ua taatia foi ae o se ia ua uma ona aisa. Nuunuu atu ia ae faatini o tausala ia Pule ma Tumua la te taus paia o Samoa, ae mapu ane ia i Niafane lafo le taula i malolo Samoa ae se i ou liliu ane e faigata le tapuaiga a si ou Itumalo pele o Palauli na mafua ai ona ou tulai i le Nofoa o lenei Itumalo.

I le afio o Faasisina ma Sa Lilomaiava, alalatai le Levaleva ia Safaletaua, ae a le paia i le alo o le Lilomaiava, Sa-Laulu ma le Matua o Tauvao Fuiavailili ma le Aloalii, Afio le Faasisina Lagaia ma lo outou Aiga o Sa-Lagaia; Tui ma Tapusoa ma le fetalaiga ia Manusina; le afifio o Faasisina ma le Alo o le Lilomaiava, Tei ma Leavaiseeta ma Tupua Malupo, faautautaga ia te oulua tulafalealii Fiso ma Seumanufagai, Moa ma Lafao ma le paia i Aiga i si ou Itumalo pele; i le afio o Faasisina ma le fofoga o Salilomaiava ma le aloalii, ae a le faautautaga ia te oe i le Matua ma le nofoalii ma le Faleao, Vai ma Latu o oe o le Matua, Noa ma Savea Tuimamisa ma Ulumea o oe lava o le muaautau o le Malo Toluono ma le Aiga a le Falelima; Taletaulua ma Tafa ma le Aiga o Sa-Autagavaia. E le gata i lea le tapuaiga aua faletua ma taus ma saoa, le malosi o le Itumalo le aualuma o Lilomaiava.

E le gata i lea le paia maualuga i le Aufaigaluga Paia a le Atua i susuga i Faafeagaiga taulagi a Palauli o lo o latou fai tatalo aua se manuia o le Itumalo ma Samoa.

Ua malo faafetai i la outou faaea i le tofa faatupu, i le tofa ma le faautautaga faatamalii ma faafaleupolu ua outou sapaia ai la outou auauna ua mafai ai ona seei atu i le Nofoa o le Itumalo.

Tapuai mai ia lou Itumalo ae se i ou liliu ane se i fai se sao o le ta Itumalo.

Faafetai mo le avanoa.

Ua uma le faamalositino i le paia maualuga i lau Afioga i le Fofoga Fetalai ua faalape foi le avanoa o lenei Sui Usufono ma ua tele ina galo ai nisi o fuafuaga a le Sui Usufono, ia ae ou te le iloa po o ai e tietie i ai. E ui lava ona o tulafono o le Maota, ia ae pei o se lagona lena. E ui i lea le tapuaiga e i lou Itumalo, ia tapuai mai ia ae se i ou liliu ane aua se sao o le Itumalo i mea o lo o moomia mo le faaleleia o le Itumalo.

O la outou auauna lenei lou Itumalo e le o se tagata potu ma e le tele foi sona tamaoiga; ae o le fatu lava na toto i Palauli i le malae i Vailoa na tupu ae o se tamaiti, tupu ae foi o se taulealea tautua, tulai ae foi o se matai o Palauli, o se Tiakono o le EFKS. Lou Itumalo e, matua iloa lelei mea o lo o moomia mo le faaleleia o le Itumalo.

Lau Afioga i le Fofoga Fetalai o le mea muamua, e talosagaina lau Afioga i le Fofoga Fetalai ae le gata i lea o le Minisita mo le Soifua Maloloina; o le falemai o lenei Itumalo ua leva ona talosagaina se tamaitai tausimai ma ou te le talau atua le tele o afaina ae o le agaga moni lau Afioga i le Fofoga Fetalai e ala atu ai i le Minisita o le Soifua Maloloina, e moomia se tamaitai tausimai e nofomau i le falemai o lenei Itumalo. E lava foi le fesoasoani a le Itumalo aua le faaleleia o le falemai.

Lona lua, o faleaoga. E maitauina i lenei vaega o le tausaga pe a ae aoga e tele alo ma fanau a le Itumalo ua lolofi atu ae le lava faleaoga. E fia faaopoopoina nisi potu aoga aua alo ma fanau a le Itumalo, ae le gata i lea o Savaii ua tele ina tapuni le tele o aoga a o lea ua avanoa faleaoga o lenei Itumalo mo alo ma fanau. O le mea lea e talosagaina lau Afioga i le fia faaopopoina o potu o le faleaoga o lou Itumalo.

O lona tolu, o le taligalu o lenei Itumalo. A oo ina louloua le tau e tele ina afaina nofoaga o lo o nofoia e lenei Itumalo ona e tafia e le galu. O le mea lea i le agaga ma le faaloalo ou te talosagaina ai lau Afioga i le Fofoga Fetalai e ala atu ai i le Minisita o Galuega, ia alofagia e fia faaleleia le taligalu o lenei Itumalo.

O se tasi vaega o malae taalo o lenei Itumalo. Tasi lenei atinae e maitauina pea o lo o faaleleia ai le Malo, ma o le malae lenei o lo o talosagaina e lenei Itumalo e fia faaleleia. O lea ua i ai le malae tapolo i Upolu nei ae ou te manatu tasi lea malae faava-o-Malo a le Malo pe afai o le a tafa le tofa ma le faautaga o le a faaleleia le malae o lenei Itumalo.

Lona fa, e talosagaina faavavau o lenei Itumalo ona e tele lava tagata tafafao maimoa mai fafo o lo o agai atu pea e saili ma fia oo i mea o lo o i ai faavavau o lenei nuu ae faigata e leaga auala. O lea e talosagaina ai lau Afioga i le Minisita se i faalelei auala, faata auala i uta i mea o lo o i ai faavavau. E talitonu foi e tele alagatupe a le Malo ma se faamanuiaga foi mo lenei Itumalo e auala mai i tagata tafafao maimoa mai fafo pe afai o le a faaleleia auala ia.

Ia o se tasi vaega, o le auala lea e i uta i le mea o lo o faia ai le konokarate lea o lo o faia galuega i uta o

faatanoa vai. Ua leva ona uma le auala ae ua afaina tele lenei Itumalo, se i tulou le paia o le Maota, i le pefu.

O lea ua talosagaina ai foi lau Afioga i le Minisita sei ta le auala i uta, ma o lo o tuu atu foi le fesoasoani a lenei Itumalo i le auala lea i le vai aua le faaleleia aua o Savaii atoa e taumamafa ai i le vai o lo o sau i Palauli. E pei o le agaga lea ia alofagia se i faaleleia le auala i uta.

Ma le faaaloalo lava i lenei vaega o le aso, e faamalulu atu afai ua sala foi se upu, sala se gagana i le faafofogaaga lau Afioga i le Fofoga Fetalai ma le mamalu o le Palemene, ia lafo i Fogavaa. O oe lava o le tautai matapalapala. Ia alofagia e le Atua le tofa i lau Afioga i le taitaiina o le Maota aua le Fono a le atunuu. Ia auomanuina lenei aso ia manuia.

## **Afioga FAGAFAGAMANUALII THERESE McCARTHY**



### **Itumalo Faaalalafaga:**

*Aana Alofi Nu.3*

### **Filifilia:**

*12 Mati 2001*

### **Faatauto:**

*15 Mati 2001*

### **Lauga Faataupou:**

*18 Iuni 2001*

Lau Afioga i le Fofoga Fetalai, ua ou tulai atu i le ava ma le faaaloalo tele i luma o le Palemene o Samoa ua potopoto. Ou te taumafai e molimoli atu so matou leo e ave ma sao o lou itumalo faa alaafaga o Aana Alofi Nu.3, i le lauliina o le tofa lau Afioga i le Fofoga Fetalai ma le paia o le Palemene ae tainane le faafogafoga mai o Samoa.

Ou te faatulou atu i paia o Sui Usufono mamalu o le Palemene, ua mamalu ai le Malae lenei o le faautugatagi a Tumua. O le Maota o lo o vevete ai Upufai o Samoa; e liuliu ai la outou tofa paia ma outou tootooau aua le atunuu. Ou te faatulou atu i lau Afioga i le Fofoga Fetalai faapea le afio o le Palemia ma Minisita o le Kapeneta, afio le Taitai o le Itu Agai ma Sui Usufono o le Fono Aoaofaitulafono.

O paia lava ia e faasino i le tapuaiga a Le Ao Mamalu o le Malo le Susuga i le Tapaau Faasisina, Sui o le Fono a Sui Tofia ae tainane le Faamasino Sili ma alii Faamasino.

Ou te faatulou atu foi i le tapuaiga i Agia ma a latou Tama o lo o puipui e tulatoa ma faleupolu tofia, o le fatuaiga tausii a le usoga ia Tumua ma Pule. E faamalo foi i le aufai tatalo i fata faitaulaga e fia o lo o tauasuina le ipuvai o le soifua faale Agaga o le atunuu.

Ua tea atu lo outou matupalapala aua le puniloa, ona ou faapai ai lea aua le punimatatogo i le tapuaiga a lou itumalo o Aana Alofi Nu.3. I le afio o Toalepaialii le Saoalii faapea aiga Satuala; lau fetalaiiga Vaili ma le Faleaana; afio Galumalemana ma lau Afioga Letelemaana; le alaatai o le Toafa ma lau Fetalaiiga Peipeigamalie; afio foi Feiloivao o le Maopu o le Tuiaana, lau Afioga Tagaloasa faapea lau Afioga

Letelemaana; alaatai lau Fetalaiiga Talimatasi ma le Faleaana.

Afio foi le Aiga Taulagi, Toleafoa ma Vaafusuaga, afio Afamasaga o le Matua o Usoalii na matematemalo. Lau Afioga i le Maopu o le Tuiaana lau Afioga Tuigamala ma upu ia te oe le Falefitu. O mamalu ma paia na o lou itumalo pele o Aana Alofi Nu. O la outou faaaloalo ua outou tusiaa ai ina ia ou nofoia le Nofoa faa-Upufai o le Itumalo, o lea ua ou paleina ma teu i lou fatu ma o le a ou galue foi i se mea e gata ai lou malosii.

Lau Afioga i le Fofoga Fetalai, ou te faafetai tele i le agaga autu o le Tala Autu o le Tupe e faataua ai atinae o nuu. O lou lava itumalo matou te fia atiae; ae paga lea e fitoitonu i lo matou itumalo le upu faalumaluma; o le nuu e papateaina, e lumafale i le moana ae tuafale i le papa. O le a le papa lea? O lo o i le Malo le silafia ma le fofu matou te toomaga i ai.

Ou te faafetai ona ua tefa le taula ua amata faagasolo galuega a le Komiti o Eleele ma tagofia faasolosolo talosaga o lo o taoto i le Laulau a Fono a le Komiti Faatonu e aofia ai talosaga a si ou itumalo ona o eleele e pei ona outou silafia ma malamalama i ai, faapea ma o matou auala galue.

O Aana Alofi Nu.3 o le faitotoa ulufafo ma le ulufale o le atunuu ma Malo fai mai. O le uluai toaiga ae o le toe nofoaga foi e toe silasila ma toe tepa taulai faaii i ai le tagata e asiasi maimoa mai. E manatua ai pea ma mafaufau i foliga aulelei po o le auleaga foi o o tatou laufanua aua e taugologolo le pule a alii.

O se alagatupe tele lea a Samoa e faalagolago pea i ai le lumanai manuia e atiae ai le atunuu, nuu ma aiga. E ao ai ona matua teuteu faaulelei atili aualatele mai Faleolo e agai mai i le taulaga. O se isi lea auala e saga uunaia ai pea lenei atiina ae taua o tagata tafafao maimoa mai fafo.

E moomia ai foi le faaleleia o auala ma moli o lo matou itumalo. Ua tala i tua ma uta aai ma nuu uma ona ua tupu le faitau aofai o tagata.

O se tasi o galuega ua uma lava foi ona ou maitauina ua aiaia i la outou anavatau e faatino i le Paeaiga lenei. E le o se talosaga e ono matuia i lau Afioga i le Palemia. Ua maitauina foi le tele o galuega ua faia ma toe faalelei ai le Malae Vaalele. Ae afai e faapoopo tagata tafafao maimoa mai e moomia ni faletalimalo fou se tele aemaise o se faletalimalo e fausia tulata i le Malae Vaalele. Aua latou te afea Samoa mo se malologa puupuu ma toe pue ai le vaalele mo le malaga faaauau, ae o se auala foi lea e faatupulaia ai galuega mo tupulaga i lenei itumalo.

E faamalo i le vaalele fou ua fuafua e lele mai ia Setema i lenei tausaga. Peitai e maitau atu ua i ai se fuafuaga e faamatuu atu ai i tua atu o le Malo sea faavae o le vaalele. O se auala lea e faaitiitia ai le lamatia pea o le atunuu i mea tau tupe i taimi e tutupu ae ai ni faaletonu o le tamaoiga o le lalolagi, o se auala ou te maitau ua leva ona faia i Niu Sila, Ausetalia ma nisi Malo.

O lau fautuaga, se i tagai totoa le Malo ia i latou ua talafeagai mo lea faamoemoe. Ia filifili na o e ono maua mai ai le fesoasoani i taimi e moomia ai se laveai aemaise i latou ua lava le agavaa i le itu tau tupe ma le

pulega o le pisinisi tau vaalele, ma i latou o le aafia i ni tauvaga faapisinisi i alavaa o lo o lele ai le Polenisia. O le tatou ave fua o lo o faalagolago i ai le lumanai o le toatele o le au fai atiina ae e faamoemoe i le lauina mai o tagata tafafao maimoa mai. E faapea faletalimalo, faleaiga, o le au fai taavale laiti laupasese ma taavale e faaoga e tofogi po o rentals. O e fai mea taulima ma latou e ta faatagata; o le aufaifaiva, o le au faifaatoaga; o le au fai lafu manu e faalagolago i ai faleaiga ma faletalimalo i taumafa. O kamupani Vaa ma Ofisa eseese e femalagaai ai ma isi. E silia i le 30,000 i latou e le o aafia ai le atunuu e femalagaai i fafo ma le toe ulufale mai, e matua pagatia uma pe a valetuulima fuafuaga au i luma e faafoeina le ave fua o le atunuu.

O au o se tagata e atiina ae lou olaga ma e ou te malamalama lelei i mafatiaga e oo i atiina ae a i latou e fai a latou taumafaiga o faletalimalo pe a leai ni tagata tafafao maimoa mai.

O lo o faaletonu nei le Malo o Niue, ua le toe sologa lelei foi le faigamalaga i le Malo o Toga aua ua toe faafoi lo latou vaa tele na i ai ona ua le gafatia le tofogi. O lo o feooloo tatou ona o fuafuaga mamao o le a lua ai vaa tetele o le fausaga fou. E tataua ona matua mataalia le pulega; e vave tele ona liua foliga lelei i le tulaga faaletonu ona e anoanoai le mau faafitauli e tutupu ae e aafia vave ai gaioiga tau valele, pe afai tatou te maua atoatoa le aoga o le sao o tagata asiiasi maimoa mai. Ae fai ni faiga faatosina ma mea faafiafia e taofi ai tagata tafafao maimoa mai ina ia umi taimi e nonofo ai i Samoa. O le taimi foi lea e tele ai foi le tamaoiaiga e tuu i Samoa. E ao ai ona fausia e le Malo le Malae taalo lelei faava o Malo ma ni malae tapolo.

I lou itumalo, o mea ia e fiafia ai tele tagata tafafao maimoa mai e faaalu ai a latou tupe ma toe faaalu ai foi ma o latou taimi e tafafao ai. Ou te le toe tau faamanatu atu i tama fanau a lenei itumalo ua tautaua ai Samoa i le lalolagi i le taaloga lakapi, aemaise tama fanau o lo latou itumalo o lo o tautaua i fusuaga a le lalolagi ma isi foi faagatama. E le o lava le seleni o fuafua i le Tala Faataatau Autu o le Tupe.

Lau Afioga i le Minisita o Tupe, e faapea foi le Afioga i le Minisita o Taaloga, e ao ona toe silasila le Malo i le pulega o taaloga a le atunuu o lo o faaletonu pea mea tau tupe. O le fesili – e le tataua ea ona ave nisi e faasikolasipi e aoao lelei le pulega lelei o taaloga, ia siitia atili ai tulaga tau taaloga mo a tatou tama fanau ina ia tele ai ni a tatou pine auro i tauvaga ma taaloga faava o Malo e pei o le Olimipeka? E aoao lelei ai ma le agavaa, o le faamaoni i teugatupe; ia aua ne i tago i tupe lenei o lo o pisi a ai so o se Faalapotopotoga o le pule le uma i teugatupe. E tasi lava le fofu, ia faasikolasipi uma i le kolisi e aoao ai le amio lelei.

Faamalo i le Komisi Suesue o Faiga Palota. Ua tataua ona matua soloia uma avanoa e toe faia ai ni moliaga e faasaga i se Sui Usufono ua fulisia ai le lagolago a le itumalo. O se matua luma le toe soloia o tofi faaSui Usufono i nai aso ae toe aveese faafuasei. O alii Faamasino e le o malamalama atoatoa i taga o Faiga Palota; na tatou faia uma lava ma le amiotonu atoatoa.

A o tatou i ai i le Faiga Palota, e toe talosagaina semeamanu o lo o galulue le Komisi Suesue, se i afea ane ai ma le matou talosaga mo se isi tofi faaopoopo o lo matou itumalo. A maitau i le toatele o le au palota a isi itumalo ma itumalo tetele nei e pei o matou, ua le fetau. Ou te faitauina pea i tuu faatasi pea le itumalo o Lotofaga ma Lepa aua e le atoa se iva selau o a latou palota i le Faiga Palota lautele talu ai, ae aumai le isi tofi mo matou. Ua na o sina faataitaiga lava, ou te faamalulu atu i lau Afioga i le Palemia faapea le tamaitai Minisita o Aoga. O le agaga moni lava, afai e mafai ona toe faaopoopo fuainumera o le Maota e aunoa ma se faaitiitia o tofi ua i ai nei, o le aano moni lena o le taofi o lenei itumalo.

Faamalo i le atiina ae o le Suavai lea o le a faaleleia atoa ai vai taumafa o afioaga uma mai Apia e oo atu i Samatau ma Falelatai. O la matou fautuaga i le pulega, se i vaai totoa ane i le faaogaina. E lua lava mafuaaga ogaoga e motu ai le suava; o le soona faaoga le taofiofi o le suavai e i latou e taulalata i le taulaga i Apia, ma le mamate o punavai ona o le soona ta o lauu tetele o le vao. A iloa le mafuaaga o se faafitauli, e vave silafia foi le auala e tataua ona fai. Aua tatou te fefefe gofie e fai le auala ua tataua ma talafeagai ina ia tautua lelei ai le atunuu. E i ai lava i latou e tete ma o uiga masani o le soifua e tofotofo ai le Taitai o aso louloua. A leai se tete i le tatou soifuaga e le malie ma le felanulanuai le lalolagi matagofie ua tatou i ai.

E faapena foi se lagona i le itu tau telefoni. E muta i lou itumalo le malosi o le telefoni feaveai. O le naunautaiga ia matua soo le atunuu i telefoni, e lualuagia ai ma telefoni masani e mafai ona faaoga telefoni feaveai e faafesootai atu ai i Niu Sila, Ausetalia ma Apia nei. E mafai ona telefoni atu i se tasi i telefoni feaveai nei pe afai e moni o lo o galulue ai le kamupani telefoni. Ia alolofa ia vave ona faataunuu ae le i aulia le 2006.

Ou te faamalulu atu i le Malo pe afai ua i ai se upu ua sala. E le avea lava foi le naunau e tupu ai ma le sese a ia avea ia o matou manatu e faatupu manatu i le Malo. Ia avea o se luitau aua le agai atu i le lumanai. Faafetai mo galuega lelei uma ua outou faia; faamalo le tauatai, faafetai le galulue. Ua na o le Atua na te faia le tau lelei e malie ai le lotu o le auauna faamaoni.

O le a faaiu atu lau faamatalaga i se faaaliga faapitoa e faapenei. Ua uma ona agiga i le Maota lenei ni manatu e fesiligia ai le talitonuga o lou Sui Usufono o le itumalo o Aana Alofi Nu.3.

Sa ou le tali i le taeao na uluai laga ai lenei mataupu ona sa ou maitau pe aisea ua faataua tele ai lou Sui Usufono fou i le saofaiga mamalu lenei i lena teao. Ae peitai, ua ao nei loa ona motu le pa ae ua iloa. Ou te le i ulufale gugu i Tiafau nei.

Sa manino le faaupuga o au nei o le Sui Usufono Tutoatasi. O lea tonu le uiga moni o le upu tutoatasi? O lona uiga o le Sui Usufono e tu faamauga lava ia i ana faiga filifiliga. O le Sui Usufono e pule lava ia i ona manatu faaaliga. O le Sui Usufono e le tuu gofie i se sii lava foi malosi e uiga ese. O le Sui Usufono e le taitaia fua faaia matau e se isi lava Sui Usufono. O le Sui Usufono na te filifilia saoloto mataupu e manuia ai lona

itumalo na mafua ai ona oo mai i le Maota. O le tulaga lena o Sui Usufono Tutoatasi; e pule saoloto lava le Sui Usufono ia i ana faiga filifiliga.

O le mea lea ou te faasilasila aloaia atu ai, o itu ia ua ou filifili ai e ave lau lagolago e uunai ai polokalame o atinae taua a le Malo e manuia ai lava lou itumalo ma le atunuu atoa. Ua aoga tele foi le mafutaga ma Sui Usufono Tutoatasi i ni nai masina ua tea atu ua maua ai se lesona aoga ia te au. E tataua ona ou matua vaai i ai mo le agai atu i le lumanai.

Ona faatai lea o se manatu po o so matou leo, o le a le faamatafauloaina pe faamanuateleina lau Afioga i le Fofoga Fetalai, ia maua le tofamamao i lau Afioga i le Palemia ma le Kapeneta faapea le Taitai o le Itu Agai ma Sui Usufono o le Palemene o Samoa. Aua nei to le timu pe tafea le tauofe i le tapuaiga i Le Ao Mamalu o le Malo; mamao ni ao lelea aua le Sui o le Fono a Sui Tofia faapea le Faamasino Sili.

Ia mama le lagi ia mamao ma ni fue lafo aua le tapuaiga a Samoa, o Aiga faapea le Usoga a Tumua ma Pule faapea auauna o le Talalelei. Ia manuteleina lou itumalo o Aana Alofi Nu.3, ae ou ola i le alofa o le Atua. Soifua.

### **Afioga Hon FAUMUINA LIUGA**



#### **Itumalo Faaalalafaga:**

*Palauli le Falefa*

#### **Filifilia:**

*12 Mati 2001*

#### **Faatauto:**

*15 Mati 2001*

#### **Lauga Faataupou:**

*21 Iuni 2001*

E muamua ona ou momoli atu le faafetai tele i lau Afioga i le Fofoga Fetalai o le Maota. Le paia i le Afioga i le Palemia, Sui Palemia ma le Kapeneta, le Taitai o le Itu Agai ma le mamalu i Afioga i Sui Usufono mai Itumalo taitasi o Samoa.

Ou te momoli foi le faafetai i le galuega o lo o gapatia ai le Ofisa o le Fono Aoao o Samoa ae tainane foi le lagolago mai o le mamalu i tupu ma ee o Faauluuluga o Matagaluega a le Malo. Ae tainane foi le mamalu i le au fai nusipepa o lo o latou tauina atu po o le fofoga o Samoa o lo o faafofoga mai Samoa i lo tatou soalaupuleina o mea e manuia ai le atunuu.

E muamua foi ona ou manatua le tapuaiga a Samoa i Le Ao Mamalu o le Malo le Susuga i le Malietaoa Tanumafili II. Ee ia i lou fala talaloa ma lou nofoa vaeaeloloa, o lau Susuga i le Malietoa e faafofoga i ai Samoa. Afioga i le Sui o le Fono a Sui Tofia lau Afioga i le Tama a le Fale lau Afioga Mataia Visesio Europa II. Afioga i le Sui o le Fono a Sui Tofia lau Afioga i le Tama a le Fale lau Afioga Mataia Visesio Europa II. Afioga i le Sui o le Fono a Sui Tofia lau Afioga i le Tama a le Fale lau Afioga Mataia Visesio Europa II. Afioga i le Sui o le Fono a Sui Tofia lau Afioga i le Tama a le Fale lau Afioga Mataia Visesio Europa II.

Faafetai i le tapuaiga i Ulu o Ekalesia e fia i totonu o Samoa, ae tainane foi le auauna a le Itumalo, o le auauna foi a le atunuu. Faafetai i la outou galuega i le

tauasuina o le vai o le ola ma talosaga aua se manuia o Samoa ma ona tagata.

Ou te faapai atu foi i le motu i Sasae ma lana Faigamalo. Afioga i le Kovana Sili faapea foi lau Afioga i le Kovana Lutena, lau Afioga i le Peresetene o le Maota, faapea Maota e lua ma Sui Usufono o au Upu fai Tutuila ma Manua.

Avea foi lenei itula ou te faatalofa atu ai i lou Itumalo pele o Palauli le Falefa. Afioga i le Laausa, eetai ou paia Aiga Salevalasi, alaalatai Togiai ma Faalaa ma lau Fetalai Taitia ae tainane foi le mamalu ia Salemuliaga. Afioga i le Tagaloa, o le paia lava lea ia Amituanai ma le Gafa, e faapea foi le mamalu ia Safune ma Taulauniu. Afioga i le Taulauniu, o le paia lava lea ia Amituanai ma le Gafa, e faapea foi le mamalu ia Salemuliaga. Afioga i le Tagaloa, o le paia lava lea ia Amituanai ma le Gafa, e faapea foi le mamalu ia Safune ma Taulauniu. Afioga i le Taulauniu, o le paia lava lea ia Amituanai ma le Gafa, e faapea foi le mamalu ia Salemuliaga. Afioga i le Tagaloa, o le paia lava lea ia Amituanai ma le Gafa, e faapea foi le mamalu ia Safune ma Taulauniu.

Ou te faapai atu foi i le motu i Sasae ma lana Faigamalo. Afioga i le Kovana Sili faapea foi lau Afioga i le Kovana Lutena, lau Afioga i le Peresetene o le Maota, faapea Maota e lua ma Sui Usufono o au Upu fai Tutuila ma Manua. Avea foi lenei itula ou te faatalofa atu ai i lou Itumalo pele o Palauli le Falefa. Afioga i le Laausa, eetai ou paia Aiga Salevalasi, alaalatai Togiai ma Faalaa ma lau Fetalai Taitia ae tainane foi le mamalu ia Salemuliaga. Afioga i le Tagaloa, o le paia lava lea ia Amituanai ma le Gafa, e faapea foi le mamalu ia Safune ma Taulauniu. Afioga i le Taulauniu, o le paia lava lea ia Amituanai ma le Gafa, e faapea foi le mamalu ia Safune ma Taulauniu.

O lona lua, ou te fia faafetai ona o le faaloalo maua ua outou tusi aao ai ma tuuina mai le faatuatuaaga ou te tauavea ai le tofi Sui Usufono o le Itumalo. O se faaeaea maua, o se faaloalo e muta ai faaloalo. Ou te faafetai atu i le Itumalo atoa aua o lea lava faaloalo o le a teuina i lou fatu seia oo i le taimi e valaau ai le Atua ia te au.

Ou te faafetai foi ona o lo outou amanaia o sau faatalaaua atu i le Itumalo, aua o lou tiute lea o le Sui Usufono, ia nofo fealaofani ma ia nofo lelei le Itumalo. Faafetai atu i lo outou amanaia o se faatuatuaaga a lo ouotu Sui Usufono o le auauna a le Itumalo, o le auauna foi a le atunuu.

E le o po se lilo i lo ouotu silafia o lo o ou feagai nei ma Faamasinoga. O lea ou te mautinoa lo outou alofola ma lo outou le fiafia i lenei faaiuga po o lenei foi faafitauli. E tasi le mea ou te fia tau atu lou Itumalo, o le finagalo o le Atua e ao na faataunuuna. O lo o ou i ai nei i se faleaoga ou te aoaoina ai mea e tataua ona ou fai. O lenei Faamasinoga o lo o feagai ma au, ou te mautinoa ma ou talitonu o le avanoa ua aumai e le Atua ia te au, ia ou faateete ai ma ou mautinoa ai o Tulafono e faia e lenei Maota, o Tulafono alofa, o Tulafono e manino, o Tulafono e talafeagai ma lona Faavae.

I lenei tolu vaiaso o ou feagai ma le Faamasinoga, e tele ni mea aoga ua ou maua mai ai. O le mea muamua, ou te le iloina seia oo i le taimi na ou i ai i le

Faamasinoga, o Tulafono a le Malo o lo o faa-Peretaniaina. O le a avea foi lea avanoa ma mea e tatau ai ona ou lagolagoina le faaSamoaia o ia Tulafono. Na ou maua ai foi i totonu o lenei Faamasinoga lou Faavae Samoa e le i faaliliuina. A o ia lava mea Samoa e, na ou faalogo foi i se siuleo o alii Faamasinoga po o alii Loia, fai mai a feteenai le gagana Samoa ma le gagana faaPeretania, e ave le faamuamua i le gagana faaPeretania. Ua 39 tausaga o Tutoatasi le Malo. O lou manao ia tutoatasi atoatoa, e aofia ai ma lana ia lava gagana e faaoga. Ou te iloa le gagana faaPeretania o le gagana o fefaatauaiga i le tele o atunuu o le lalolagi ae faapena foi i le taupulega. Ae ou te iloa o le a avea lou i ai i totonu o lenei Maota ma o le a fai ai sou sao ina ia faatinoina ia faamoemoe.

Lau Afioga i le Fofoga Fetalai, o le a faapena ona ou faasolosolo atu ma e faapea atu lou taofi e ala atu i le Nofoa. Ou te talosaga atu i le Afioga i Sui Usufono e alolofa mai aua ne i faauilavea i le taimi ou te lauina atu ai mea sa outou talosaga mai ai. Aua o le lisi ua ou faamaumauina o lo o faasolo i Itumalo. E le gata i lea, o lenei lisi o le lisi o le 5 tausaga.

O le Tala Faatatau o le Tupe o lo o talanoaina nei, o le Tala Faatatau o le Tupe i le 12 masina o lumanai nei. O le a mafai foi ona maua avanoa o lou ofisa e faamalalamalamaina ai pe faamautu atili ai. O lau talsoaga i le Maota e ala atu i le Nofoa, ia tuuina mai se avanoa mo au ina ia mafai ai ona ou faasolo ina ia faigofie ai le tatou galuega pe a talafeagai ai ma lou finagalo.

I le amataga o le Vaimauga Sisifo. Sa talosagaina e Sui Usufono mo Vaimauga Sisifo taligalu o Moataa ma Vaiala ma auala fia faataina.

O taligalu, o lo o ave i ai le faamuamua o taligalu ia e aafia ai alatetele o le Malo. O taligalu e le o aafia ai aseta a le Malo, o taligalu ia e i lalo o le vaega o le Siosiomaga faatasi ai ma alaafaga po o tagata o lo o aafia ai a latou aseta. E le mafai e le Matagaluega o Galuega ona fesoasoani atu i mea e le mafai ona matou avea ai ni faamaoniga i le Ofisa o Tupe e faamatuu mai ni seleni e fai ai lea vaega.

O auala e fia faataina i totonu o le Vaimauga e aofia ai Vaimauga Sasae ma Vaimauga Sisifo, o le taulaga e aofia ai foi ma Faleata Sasae. O le tele o ia auala o lo o lavea ia matou polokalame e tau o maintenance, ae fuafua lava i le lava o le seleni.

Vaa o Fonoti. E pei ona taua e le Afioga i le Sui Usufono le pagatia o lea Itumalo. Sa ou molimauina i le asiasiga e pei ona ma oo atu ai ona sa tuatuagia le Afioga i le Palemia o lea foi na finagalo matou te o e asiiasi i lea Itumalo. O tulaga i auala ou te faamaonia le faaletonu o i ai. O le ala foi lea na ave ai i ai le vaega o masini a le Ofisa o Galuega ina ia faapena ona fesoasoani ai i le faaleleia o auala. Ou te faafetai foi i le Afioga i le Sui Usufono ma alaafaga o e na fesoasoani i le aufaigaluega mo le faanatinati o ia galuega. O lo o i ai se fuafuaga matou te fia sailiili atili ai i se fesoasoani e faataunuuna ai lenei faamoemoe pe a talafeagai ai ma tupe faasoa a le atunuu.

O taligalu i Faleapuna. A faapea o aafia ai le alatele o le Malo, o le a fai i ai se fuafuaga. Afai e le o aafia ai alatele o le Malo po o nisi aseta a le Malo, ou te faamalie atu ia faafesootai le Siosiomaga faatasi ai ma nuu latou te faatinoina lea faamoemoe.

Vai mama mo Fagalao. O vai mama mo Fagalao o le tele o alaafaga i Fagalao o lo o vaai lava e latou o latou vai, a o lo o i ai le faamoemoe e fia faatinoina ni galuega mo lea vaega o le atunuu, ina ia mafai ai lava ona maua mai Fagalao sa leiloa. Atonu sa leiloa a o lea ua maua. O le mea la lea o lea na ma o ai. Sa taua e le Afioga i le Sui Usufono, e le iloa pe na maligi ou loimata po o le tetele o timuga o mea e lua. O le mea na sili ai ona ootia lou loto ona ua ma maua faatasi Fagalao, e le o toe leiloa Fagalao. O lea foi ua uma ona tuu i ai e le Afioga a le Palemia le matupalapala, o telefoni. Ou te iloa foi a oo telefoni i lea vaega ua fai atu ai ma se antennae ia mafai ona matamata le Itumalo i le manaia o ata o le TV.

O le manogi lea e taua i Afulilo, ua lipotia mai ia te au ua leai se manogi i lenei vaitaimi ae o lo o fai pea suesuega ina ia mafai ai lava ona fai se fuafuaga lelei mo le foia o lea faafitauli.

Na talosaga le Afioga i le Sui Usufono ina ia faia ni paipa tetele e oo i le sami. E le augata le Malosiaga faaEletise e fai lea vaega, ae manaomia foi se fautuaga mai le Siosiomaga pe le ono afaina ai ia o lo o tataa i lea vaimea o lo o faalagolago foi i ai le Itumalo.

O lo o taumafai foi alii Leoleo ma le Ofisa o le Soifua Maloloina e saili pe ono aafia le soifua maloloina o tagata ona o le manogi o lo o lipotia mai.

Lau Afioga i le Fofoga Fetalai, faafetai ile toe tali mai ma le soifua lelei ma le soifua manuia i lau Afioga aemaise le Palemia, le Kapeneta, le Taitai o le Itu Agai, le mamalu o Afioga i Sui Usufono ae tainane le mamalu i faauluuluga o Matagaluega. Lau Afioga i le Fofoga Fetalai, e uma le taimi o gata lau faalaulau atu i le Vaa o Fonoti ma mea na tuuina mai e fai atu i ai se faamatalaga.

Lau Afioga i le Fofoga Fetalai, o mea o lo o totoe o le talosaga ia mu fua moli o Fagalao. I le faaaloalo ma le ava e tatau ai ou te faaalua atu ai o se mea matua faigata po o le le mafai foi ona faia ona o tulaga o lo o i ai foi isi a tatou polokalame faapea i isi vaega o le atunuu. Afai o le a fai lea vaega, e tatau foi ona sii pili o moli ina ia taumafai ai a tatou galuega. I le ava ma le faaaloalo lava e tatau ai, o rates o lo o i ai nei o ni rates ua leva. E ui lava i lea leva, o lo o faaogaina foi discounts e tau faaitiitia ai ina ia faafaigofie ai ona maua se toomaga po o se faamama avega i le atunuu i totogiina o latou pili.

Ou te momoli atu le faafetai i le alaafaga i Taelefaiga ona o le fesoasoani mai ma le faaogaina o meaalofa a le Atua ua tuuina mai i lenei alaafaga, o se sao foi o lenei Itumalo i taumafaiga ma le lima vaivai o le Malo i mea tau tupe.

Ona ou o o mai lea i le tasi o mataupu sa laga, o le trust fund. Ou te iloa le mea lea lau Afioga, talu ai ona o le taua o le trust fund e sau i le sene e tasi mai iunite po o se mea faapena, ou te iloa e tatau foi ona tali i ai le Afioga i le Minisita o Tupe. Talu ai ona o lea sa saunoa le Afioga i le Sui Usufono o le Itumalo o le Vaa o

Fonoti , ma sa ou vaai foi i lea vaega, e fai le faamavaega e fai foi le feiloaiga, o ia tupe o le a faasaoina pe afai o le a faaleleia o latou ala e pei ona taumafai nei i ai le Matagaluega o Galeuga. O ia tupe faasaoina mai ia faamavaega ma feiloaiga, o le a mafai ona fesoasoani i le Itumalo po o lea foi Sui Usufono e faaitiitia ai le tupe faaalu ona o ia fuafuaga. O le fuafuaga la mo le Itumalo o le Vaa o Fonoti, o lo o fuafua foi pe toe asia i se taimi latalata i le Lotu Tamaiti po o se mea faapena, ina ia fesootai pea mo le faaleleia o mea o lo o fuafua nei.

Ona ou see ifo lea i le Itumalo o Faasaleleaga Nu.1. O lo o i ai i totonu o le Tala o le Tupe le aualatele i Iva, o auala na o lea e fuafua mo le Tala o le Tupe i le tausaga a sau nei.

O auala galue, o lea o lo o taatia ai pea i le tulaga o lo o i ai nei, ae ou te iloa e i ai se taimi o muamua o le a vaavaai ai foi le Malo i se isi auala e sui ai i se taimi e le o mamao. O le faiga o i ai nei, o lo o taatia atu lava lea i le Matagaluega o le Lotoifale latou te faagaioia lea matafaioi.

O le vai oona i Salelavalu, ua uma ona fai i ai le suesuega a le Matagaluega o le Soifua Maloloina, ma e le ono afaina ai le soifua o tagata ae le o toe umi foi ona faaoga lea vai aua o lo o silafia e le Afioga i le Sui Usufono o lo o faagaioi nei ma ua amataina le galuega o le polokalame a le EU mai Vailoa. O lea galuega e faamoemoe ina ia faaumaina ia Aokuso po o Setema i le tausaga a sau, pe o o atu la i le faaiuga o le tausaga fou ua suia atoa le vaitaumafa i totonu o Palauli, Faasaleleaga...

Lau Afioga i le Fofoga Fetalai sa fai atu lau talosaga, a i ai le Sui Usufono e faauilavea o mea a lona Itumalo e faamulimuli lava i ai. O le tulaga lea ou te faamalamalamaina atu ai lou taofi, o lea e alu i le faasologa o Sui Usufono na saunoa mai i le amataga seia oo i le tootoo mulimuli. O mea lava na faaauau mai, o le Sui Usufono lava na muamua saunoa, o le Sui Usufono foi lena o lea e alu ai lava seia o o lava i le tulaga, ae le o faasoloa i le sequence o Itumalo e pe ona i ai i le faasologa masani.

Lau Afioga i le Fofoga Fetalai pe a tusa ai ma lou finagalo, ou te iloa o lea e silafia e Afioga i Sui Usufono o lea e faauma lau faamalamalamaga o a latou mataupu. Afai e taua o latou fiangalo e pei ona faaalua mai, e faapena foi ona auai mai ma afifio mai Sui Usufono e pei ona ou taua, e le o se faafitauli lena a le Matagaluega lenei ma e faaalua mai ai i ina le le taua o ia mataupu i o latou finagalo.

O lo o silafia lelei e Sui Usufono uma o le Palemene o lo o faaauau lau tali atu i mataupu sa laga mai e faatatau i o latou Itumalo.

Faafetai. O le polokalame lea e pei ona taua e faapea na aveeseina mai tanevai i totonu o Lalomalava, e sao le saunoaga. Peitai o ia tanevai o le a suia i tanevai o le polokalame a le EU o lo o faagasolo nei. E pei ona taua, o ia polokalame o le vaitaumafa mai Palauli seia o o i Puapua, o le a faamaeaina i le faaiuga o le tausaga a sau.

O moli auala i le va o Salelavalutai ma Salelavaluuta. O moli uma e le o lelei ua uma ona faatonuina le

Malosiaga faaEletise ina ia siaki ma faaola i se taimi vave.

Ona ou see mai lea i Sagaga le Falefa. Na taua e le Afioga i le Sui Usufono auala galue e fia faata. E le o i ai i lalo o le matafaioi a le Matagaluega o Galuega le faataina o auala galue, o le polokalame lea o le polokalame o lo o i lalo nei o le Matagaluega o le Lotoifale. O auala na o lo o lavea i lalo o le matafaioi a le Matagaluega o le Lotoifale. O auala o lo o lavea i lalo o le matafaioi a le Matagaluega o Galuega, o auala ia ua tau o public roads ua uma ona fuaina ma ua tuuina mai i le Malo. O auala ia o lo o ua faamauina i le Matagaluega o Eleele, Fuagafanua ma le Siosiomaga ma ua faamauina foi e le Matagaluega o Galuega. Afai lava o lo o afifio ai le mamalu o le atunuu i ia auala, e i ai foi auala e uia ina ia mafai ona taua ai nei auala o ni auala ua aumai i le Malo. E tatau foi ona afio mai pea le Sui Usufono matou te talatalanoa i ai faatasi ma le Matagaluega o Eleele, Fuagafanua ma Siosiomaga ia malamalama atili ai lea mataupu.

O le taligalu o le Itumalo e pei ona taua foi e nisi Itumalo, afai o aafia ai alatetele o le Malo, e faia e le Matagaluega o Galuega. Afai e le o aafia ai aseta a le Malo, o le matafaioi lava lea a alaafaga faatasi ai ma se fautauga mai le Matagaluega o Eleele, Fuagafanua ma Siosiomaga.

O oneone; ua aveeseina nei pemita o le oneone mai le Public Works ma tuuina atu i le Matagaluega o Eleele, Fuagafanua ma le Siosiomaga.

Lau Afioga ile Fofoga Fetalai, e le i lauga le Sui Usufono i le mataupu lea ma e le mafai foi ona ou tali atu i ai e pei o a tatou Tulafono Tumau. Ae a faapea e finagalo ai le Afioga i le Sui Usufono mo Aana Alofi, o lea e lavea i le lisi a lau Afioga i le Fofoga Fetalai na aumai ia te au, ma e le i o o foi i le Itumalo o le Sui Usufono.

Faafetai mo le faamanatu mai, faafetai foi mole faauilavea. Ou te iloa se i fai atu lau faamatalaga lea o lea ua saunoa atu le Afioga i le Palemia. O le vai lea e alu atu i Fuluasou e tau i Falelatai, o lo o i ai le fuafuaga e faauma le tosoina o le paipa e tau i Falelatai i le faaiuga o le tausaga nei. O lona uiga, o fuafuaga o isi galuega o lo o tele le taimi i ona tala atu mo le faaauina. O fesili uma lava ma finagalo na faaalua e Afioga i Sui Usufono e amata atu i Faleata e tau i Falelatai, o le tali o outou moomooga, e faatinoina i totonu o le tausaga a sau nei.

Ua saunoa le Palemia o fuafuaga uma ia, ia i ai le onosai ma e pei ona ou tuuina atu, o le lisi na tuuina mai e a outou Afioga e le o le lisi o le sefululua masina a o le lisi o le lima tausaga. E fuafua ai ina ia ave le faamuamua e pei ona aliali atu i le Itulau 9 ma le Itulau 10 o le Tala Faatatau o le Tupe. O mea na o lo o faatupeina e le Tala o le Tupe i lalo o le Matagaluega o Galuega i le faatinoga i le sefululua masia e amata atu ia Iulai.

Ou te fia tali i le saunoaga a le Afioga i le Sui Usufono mo Falealupo i le tuaga o le aai i tai. E pei o le tulaga lea ua i ai nei le faamoemoe, o le Matagaluega o Eleele, Fuagafanua ma Siosiomaga ma matou e galulue

soosootauau ina ia mafai ona fesoasoani i le faasaoina o auala. O le Matagaluega la o Eleele, Fuagafanua ma le Siosiomaga e gafa lea ma taligalu ae e le aafia ai auala, ae matou te galulue faatasi.

Na e saunoa foi e faapea ua faaleagaina tulaga o le vavau ma mea taua mo le atunuu. E pei ona ou tualalo atu i lau Afioga i le Sui Usufono, o lo o ai Faalapotopotoga faavaomalo e lavea ai i a latou mandates ia vaega na e pei o le UNESCO. O le UNESCO latou te preserve ina mea ia. E mafai foi ona faauu atu i le Malo se faatalosaga i lea Faalapotopotoga e fesoasoani mai pe afai o le tualga lea o mea e tatau ona faasaoina i tala faasolopito o le atunuu.

Ona ou o o mai lea i le aoaotelega o le...

Lau Afioga i le Fofoga Fetalai, e i ai lou manatu e tatau ona amata sau inventory o mea o lo o finagalo ai le Palemene. A ou toe alu foi e saili ni faamaumauga i mea ua i ai, o le tulaga la e ou te vaai i ai i faila, taatia mai; o le taatia mai lena o la e taatia ai lava. A o le tulaga lea ua i ai, e tatau lava ona fai sau lisi i mea o i ai i le taimi nei aua a ou alu i tua e tatau ona toe siaki po o ua fai na mea pe leai. Afai lava la e le saunoa mai le Sui Usufono nei, e mafai e pei lava ona ou taua, afio atu i lou Ofisa e faamaumau ai lau Afioga. O le ala na ou tatalo atu ai aua ne i faauilavea se isi aua o le a umi ai lou taimi a o lo o i ai nisi avanoa e mafai ona faamaumauina ai finagalo o Sui Usufono.

O lea ua fai le lisi lea e iinei, lea ua o o mai i Sagaga le Falefa. Ua uma ona e fesiligia le pemitia oneone; na e taua e le agavaa le Ofisa o Galuega. E leai ou te suia le upu lena, e le o se matafaioi a le Ofisa o Galuega. E agavaa tagata faigaluega i le Taitai o le Matagaluega ma le aufaigaluega a o lalo o le Tulafono e le mafai ai - e le o se matafaioi lea a le Ofisa o Galuega. Ua uma ona ma fesootai ma le Minisita o Eleele, Fuagafanua ma Siosiomaga ma ua uma ona tuuina atu i le Matagaluega o Eleele, Fuagafanua ma Siosiomaga lea matafaioi. E leai la se mea o le a toe atugalua ai lau Afioga i le Sui Usufono mo Sagaga le Falefa.

O Palauli e leai se mea o i ai. O Aana Alofi Nu.3, o le auala galue o lo o nofoia e tagata. Ou te iloa afai o le auala galue, o lena ua tau atu. Ae afai o le auala na ou asiasia, ua uma ona faatonuina le Matagaluega o Galuega e teu le auala.

Faafetai lava. O le a faapena ona ta fesootai mo le faaleleia o tulaga o lou Itumalo.

O Faasaleleaga Nu.3, o taligalu o lo o aafia ai alatetele o le Malo o le a faapena foi ona fuafuaina i se taimi talafeagai i le faamoemoe i le lava o le seleni.

O le Itumalo o Aleipata Itupa i Lalo, o auala i Tiaveatai. O le a faapena foi ona fuafuaina pe a talafeagai ma le Tala o le Tupe. O taligalu i Saleaamua, o Satitua, e faapena foi ona tatou vaavaai atu i ai. O vaipaipa i Tiavea ma Satitua, o le a amata galuega mo ia vaipaipa i le tausaga e 2002.

O Aiga i le Tai, o le taligalu o le a faatinoina i le talafeagai ai o seleni maua. O vaipaipa i Manonotai, e pei lava foi ona tau atu, o le a faaleleia lena vaega i se tulaga pe a o o atu le paipa lea a le EU i Falelatai.

O le eletise mo Manono, o le a vaavaai i ai le Matagaluega ina ia faaleleia lea vaega ina ia mu faasolotoa ai le 24 itula pe a maua mai le fesoasoani o lo o talosagaina nei.

O Aana Alofi Nu.1, talu ai o lea sa laga e lau Afioga i le Fofoga Fetalai ma se tasi o Sui Usufono mo Aana Alofi Nu.1 auala faalava ma moli eletise, o vaipaipa foi e pei ona taua, o lo o i ai nei le faamoemoe mo le tosoina o nai laina o pou moli i uta i le mea na ta asia i le asiasiga talu ai lau Afioga i le Fofoga Fetalai.

O le Sui Usufono mo Alataua Sisifo na taua le auala galue o Neiafu, o le tulaga lea o lo o i le Lotoifale. O le suavai mo Neiafu ma Falelima, o lo o fuafua ina ia mafai ona faatino ni galuega e faaleleia ai lea vaega faatasi ai ma Vaisigano Nu.2. O le suavai foi mo Papa o lo o fuafua i le tausaga 2002 ae o le a toe faamaoti atu se taimi.

O Vaisigano Nu.1 sa taua e le Afioga i le Sui Usufono le auala i Utulua ma le auala e tau i le malae vaalele. O lo o ua faatonuina foi le Matagaluega o Galuega e vaavaai ma fai se fuafuaga mo lea galuega. O le suavai mo Asau, Auala ma Vaisala, o le a vaavaai i ai le Matagaluega.

O le sualua o le vai, o se mea faigata ona fai i ai se fuafuaga. O le saunoaga e faapea e tatau ona faaoga atu le vai i Aopo, sa matou asia foi ma le Afioga i le Sui Usufono o lena Itumalo, o lo o faalelelei foi le alu atu o le suavai mai Letui i Aopo. O lona uiga e faigata mo le taimi nei.

O Gagaifomauga Nu.3, o le vaitaumafai e pei ona asia foi lena Itumalo faatasi ai ma le Afioga i le Sui Usufono mo Gagaifomauga Nu.2 e pei lava ona taua i taligalu, o auala galue, ua uma foi ona faamatala atu faiga faavae o lo o i ai nei. O lo o i ai le auala i Ologogo ma o lo o taua i totonu o le Tala o leTupe, o le auala lea e faatino i le tausaga faaletupe o loma nei.

O auala ia na taua i Upolu nei faapea e nonofo ai le mamalu, ua uma ona aveatu le tali lena i lau faamatalaga ina ia laga e Vaimauga Sisifo le vaega lea o auala i totonu o le taulaga.

O Salega, o le vai i Fogasavaii o lo o moomia ai se pamu. O le taimi nei, o lo o vaavaai i ai le Pulega o le Vai ina ia faatino ai lea vaega. O moli auala e pei ona faaali atu, o le a asiasia e le EPC ma suia ni moli ua faaleagaina po ua le ola i totonu o le auala.

O Palauli Sisifo, o le auala i Siutu ma le auala i Salailua, o lo o suesue nei i ai le Matagaluega ma o le a saili foi se seleni i se taimi talafeagai i totonu o le lima tausaga ina ia faaleleia auala e pei ona talosaga mai. O tulaga foi i totonu o le taulaga, e faapena ona vaavaai atu i ai i se taimi lata mai.

O le fesili e pei ona fesiligia ai po o fea e faaoga i ai le \$1.8 miliona lea mo auala i Savaii, o lo o taatia atu i le Itulau 10 o le Tala o le Tupe ia auala o Savaii e fa pe lima o i ai e faaoga i ai le seleni lea.

Ua uma ona ou tali atu ai le Afioga i le Sui Usufono mo Falealupo ae o le auala i Falealupo ua faatino le tele o vaega o le auala lea. E toe asiasia i sau asiasiga e le o mamao po o le masina fou po o ona tua atu ona logo atu lea o lau Afioga pe a avanoa.

O Gagaemauga Nu.2, na talosaga le Sui Usufono e tatau ona faamagalō aitalafu. Ua uma ona logoina au e le Pulega o le Suavai ua uma ona faamagalō aitalafu e oo mai ia Iuni 1998. O le tulaga o i ai aitalafu e oo mai i le taimi nei, ou te talosaga atu ai i le Afioga i le Sui Usufono, ia logoina lau au palota po o lou Itumalo ia alolofa mai e leai ni tupe e fai ai galuega a le Matagaluega. Afai o le tulaga lea, e afaina ai foi tupe e faagaioi ai galuega mo le lumanai, e le gata i lou Itumalo a o isi foi Itumalo.

Lau Afioga i le Fofoga Fetalai, o le a faaoo i le Sui Usufono le faaiuga a le Komiti Fatonu o le Pulega o le Vai ina ia lausilafia ai e le Itumalo o le Afioga i le Sui Usufono.

Ona ou oo mai lea i Faleata Sasae. E tele vaega sa laga ma e pei ona taua e le Afioga i le Sui Usufono, o mea e faaleleia ai le Itumalo. O mea sa ta talanoa ai lau Afioga i le Sui Usufono e pei o le auala i Papasea, ou te iloa ua e silasila i ai ua uma ona faatinoina lena vaega.

O le auala foi i Tapatapao ma Laloanea, ua faapena foi ona fai. O le tulaga o auala ia na e taua, o le auala i le aoga faaItumalo o Faleata o lo o i lalo o le polokalame o auala o aoga. O le a ta talanoa i ai i se taimi pe afai e talafeagai ai ma lou finagalo, i isi vaega o le ta Itumalo.

O Safata, o lea ou te vaai atu o lo o talosaga mai foi mo taligalu i Fausaga ma Nuusuatia ma o le a faapena ona vaavaai i ai.

O lo o i ai foi le talosaga na auala mai i le Afioga i le Minisita i auala i uta i Sataoa ma Lotofaga, o le a asiasia ma faia i ai se fuafuaga ma e tatau foi ona fai i totonu o lenei 5 tausaga o le a amataina.

O Aana Alofi Nu.2, o lea ou te vaavaai atu i ai o auala e fia faataina ma taligalu o Nofolii, suavai taumafa i Leulumoega ma moli o auala. O le tulaga e pei ona ou taua i le aoatetele, o le a faatinoina moli o auala pe afai o ni moli ua pepe.

O le suavai taumafa, o le EU Programme o le a fai ai le fuafuaga, ae faafetai foi mo le talia o le tane tele e tu i lou Itumalo ina ia mafai ai ona faamalosia le alu atu o le vai.

Lau Afioga i le Fofoga Fetalai faafetai mo le saunoaga a le Afioga i le Sui Usufono po o le Sui Fofoga Fetalai.

O moli ia e i le auala e taugata lona faaogaina, o lea e totogi le afa miliona e le Matagaluega mo moli ia. O le tele o moli o le tele foi lena o le pili. Afai o se mea o i ai se falemai po o se mea o i ai se fale e o i ai tagaa o le public e faatau ai po o mea faapena, o mea na e ono fai ai moli ina ia mafai ona faaogaina.

Afai o moli o le auala e eva ai tagata, ona o le utiuti o le seleni, ae manava o maile, vaeane lau Afioga i le Fofoga Fetalai, e fia fai ni mea lelei mo le atunuu ae fai fuafua mo le seleni. Afai o le tulaga e aoga mo le Itumalo lau Afioga, se i oo le ma asiasiga lea e fuafua i le vaiaso fou ona vaai lea i ai po o se mea e tatau ma talafeagai.

Faafetai i lau Afioga i le Fofoga Fetalai, taatia mai lou finagalo se i oo i ai le ta asiasiga ona fuafua lea o sou matupalapala.

O Faasaleleaga Nu.2, faafetai atu i le Afioga i le Sui Usufono. Ou te iloa o polokalame ia e uiga i faafitauli o le vai, o le vai o lo o sau i Vailoa e tau i Puapua, e

faauma lona fausiaina o le paipa tele i le faaiuga o le tausaga 2002. O lona uiga, o le faaletonu o lo o i ai le vaitaumafa o le a maua se fofo lelei mo mea o lo o finagalo i ai le Itumalo po o Itumalo uma lava i lena vaega o le atunuu.

O le auala laupapa, ua uma ona faatonuina le Matagaluega o Galuega ina ia faia ni paipa tetele i lalo ifo o le auala laupapa o i ai nei ina ia aua ne i toe oso le vai i luga e afaina ai meatotino a le atunuu o lo o i ai i lea vaega.

O Falealili. Faafetai i le agaga faafetai o le Afioga i le Sui Usufono. E faapena foi ona aveatu la matou faamalo ona o le lagolago mai o lou Itumalo i galuega taumafai a le Matagaluega o Galuega ma konekarae o lo o fai nei. O le vai foi o lo o tanumia i galuega a le aufaigaluega, o le a faapena ona toe faaolaina ma toe faatonuina le konekarate e fai ni faafitauli o i ai.

O taligalu, e faapena foi e pei ona faaali atu i isi fesili faapena o i ai.

E le i taua e le Afioga i le Taitai o le Itu Agai ae tatau ona ou faapea atu, o le auala i le va o Lefaga ma Falelatai o le a faaumaina po o Setema po o Oketopa i lenei tausaga. O lea auala o le a aoga tele mo le faasaoina o le taimi e faimalaga mai ai lena vaega o le atunuu po o na Itumalo ma alaafaga o lo o i ai i le malae vaalele ma le uafu i se taimi puupuu. O le a faasaoina ai le taimi, faasaoina ai le penisini ma faaititia ai le faaogaina o taavale afi. O lona uiga, o le a tele foi nisi tupe e maua mai ai.

Ou te iloa o le Itumalo o Satupaitea ma Siumu o le a faaoo mai ni mea ia te au i se taimi o i luma pe afai o i ai ni mea o i ai.

Lau Afioga i le Fofoga Fetalai, o vaega ia na faaoo mai ia te au.

Lau Afioga i le Fofoga Fetalai e sao sa saunoa le Sui Usufono mo Vaisigano Nu.1 i moli o le auala, ma o le a vaai i ai le EPC i Savaii i lenei vaiaso po o le vaiaso fou ina ia faaleleia moli ua faaleagaina mo nofoaga faitele.

Ou te iloa lau Afioga i le Sui Usufono mo Vaisigano Nu.2 o lo o i ai le polokalame mo le faaleleia o le suavai mo Falelima, Neifau ma faasolo atu ai i Falealupo, Papa, Sataua ma le itu Asau i nuu uma lava ia o lo o i le Pulega o le Suavai. O na fuafuaga o lo o faataatitia mo se taimi i totonu o lenei 5 tausaga. A maua se tupe ua tatau foi ona fai. O le tulaga lena e i ai ae mafai ona ou faatonuina le Pulega o le Suavai e faailoa atu i Afioga aemaise lava le Itu lea.

Ou te malamalama lelei lau Afioga i le Fofoga Fetalai i le utiuti o le vai i le itu Asau ma le faasolo mai lea i le Alataua, leaga sa ou vaai le polokalame o tane vai a Malo Aufaatasi i le 1981, 1982 i le vaitaimi lea. Ou te matua malamalama lelei i le faaletonu o le suavai i le itu lea o le atunuu.

E faauma atu ai lau faamatalaga lau Afioga i le Fofoga Fetalai, ou te aveatu le faamalo i le Palemia, Aiga Kapeneta faapea le Taitai o le Itu Agai ma le mamalu o lenei Maota, i le afifio o Sui Usufono mai Itumalo taitasi o le atunuu. E momoli atu le faafetai tele ona o lo outou lagolago mai ma lo outou alolofa foi i le taumafai atu o le Matagaluega, e le gata i le Matagaluega o Galuega, o



le Malosiaga faa-Eletise ae faapea foi i le Pulega o le Suavai.

Ou te faamalo atu ai i lou onosai ma lou faapalepale i lo matou tautatala umi i lenei Maota. O se fiafiaga foi ia matou le omai e lagolago atu i la tatou galuega fai faatasi.

E avea foi lenei taimi ou te faafetai ai i lou Itumalo mo le tapuaiga aemaise o faafegaiga o Ekalesia eseese i totonu o lou Itumalo. Faamalo tapuai.

Ou te faamalo foi i lau Afioga i le Palemia ona o le tofia o le Sui Usufono mo Palauli le Falefa e fai ma tagata o lana Vaega i luma. Ou te fiafia lava e tau mo le Vaega i luma aua ou te mafuta atu ai i tagata.

O le isi mea ou te faamatala atu ua galo ia te au, o lo o ua saunia nei lou Ofisa i Salelologa e vaelua i ai lou taimi, ou te fia galue mo le atunuu – o lona uiga, o le taimi i inei ma le taimi i Savaii. Ia mafai lava ona ou tilotilo e fai ma sui o tatou i Savaii. E faaoga foi e le aiga Kapeneta po o Sui Usufono pe a afifio atu ina ia mafai ai ona soalaupule mo le manuia o le atunuu.

Ma le faaaloalo lava, ia manuia le Fonotaga ma lau Afioga i le Fofoga Fetalai.

## Tofa FONOTOE NUAFESILI PIERRE LAUOFO



### **Itumalo Faaalalafaga:**

*Anoamaa Sisifo*

### **Filifilia:**

*19 Mati 2005*

### **Faatauto:**

*5 Aperila 2005*

### **Lauga Faataupou:**

*15 Iuni 2005*

Faafetai i lau Afioga i le Fofoga Fetalai mo le avanoa o lo'u nei sui usufono e taumafai atu ai le lauga mua aua foi se sao o lo'u Itumalo o Anoamaa Sisifo i lenei Tala Faatautu Autu o le Tupe.

Ia mapu maia i Logoe le Taputoa o Aliiseu aua ua malu Tiasā paia faaifogatā o Samoa o le atunuu tofi. Ua taoto i fata ae a'e i lumafale, e afua mai i le Fatifatialuga ma le Fatifatialalo ma le Taisamasama na Alofisa ai Malietoa ma Tuimanua i le Mataisaua, se'ia paia le Taiulaula o Nafanua i Fuilimapuletuu na to ai manū o Malo, lea na tali ai i le lagi Le Ao o le Malo, le Susuga i le Malietoa.

Le paia i le afifio o Aiga ma a latou Tama, o Tama foi ma o latou Aiga, o Aiga o Tupu, Aiga o Nofo, Aiga o Pāpā ma Aiga o Tafaiā. Le mamalu i le Usoga a Tumua ma Pule, Ituau ma Alataua, Aiga i le Tai ma le Vaa o Fonoti. E faapea foi le paia i le Faleagafulu ia Sua ma le Vaifanua, Fofu ma Aitulagi, Ituau ma Alataua, Saole ma Saleaamua, le Nofo a Maopu ma upu i le Launiu Saelua. Le afio o le Laau na Amotasi, Faatui ma Tootoo o le Faleula ma le paia i le Motusa. Taoto foi faa-maene o tai loloto mamalu faa-Faigamalo, le afio o lau Afioga i le Ao Mamalu o le Malo Tutoatasi o Samoa, lau Afioga i le Tapaau Faasisina, Susuga i le Malietoa na Ee i lou Nofoa Vaevaeloloa, lou Talanaatoa ma lou Fala Folaloa e faalogo ia te oe Samoa.

Afifio Afioga i Sui o le Fono a Sui Tofia, afio lau Afioga i le Palemia o le Taitai o le Faigamalo faapea lau autaupulega o Minisita o le Kapeneta, afio lau Afioga i le Faamasino Sili, afio foi lau Afioga i le Peresetene o le Faamasinoga o Fanua ma Suafa ma le mamalu i le vasega o Faamasino. Afio lau Afioga i le Fofoga Fetalai ma sui usufono mamalu o le Palemene o Samoa.

E le faagaloina le tapuaiga a o tatou uso ma le latou Faigamalo i Amerika Samoa. Le afio o le Kovana Sili, afio le Lutena Kovana, afio lau Afioga i le Peresetene ma sui mamalu uma o le Senate, faapea foi le Afioga i le Fofoga Fetalai ma sui mamalu uma o le Maota o sui. E faapea foi le afifio o Faaluuluga o Matagaluega ma Faalapotopotoga Tumaoti, lo ta Malo na lua ma le mamalu i le maave eseese o le aufaigaluega o lo o galulue e tautua i ao ma po, po ma ao aemaise foi Pule o Kamupani ma Pisinisi ma e uma o lo o fitaituga e auauna ma punonouai aua se manuia auiluma o ta Malo e lua.

Aemaise lava le paia ma le mamalu o le Talalelei, susu o Taitai o Ekalesia Kerisiano uma o Samoa ma Aufaigaluega Paia a le Atua i tafa e fia i le aoao o Samoa ma atunuu i fafo o lo o latou nonomanu ma sema se manuia aua Samoa atoa.

Ia ee maia i feaoga ma tanugamutia outou Sa ma Faiga, tulouna ia, tulouna lava. O la'u faafetai e momoli tele atu faapitoa i lo'u Itumalo o Anoamaa Sisifo mo le tofiaina o lo'u nei tagata faatauvaa e fai ma outou sui e seei i le Nofoa o le Itumalo i totonu o le Maota o le atunuu, aua le faafaiileina o Upufai o le Malo o Samoa. Faafetai tele i Tupu ma Ee, Tamalii ma Faleupolu, Saoao, Faletua ma Tausi faapea le malosi o le nuu aemaise le loaloa o le Itumalo.

E le mafai ona faagaloina le tapuaiga a Susuga i Faafegaiga Taulagi uma o Fata Faitaulaga e fia o lo'u Itumalo, aemaise lava Auauna a le Atua i totonu o lo'u nuu. Lau Susuga i le Toeaina, Susuga Lauina ma le Faletua, Susuga Pala ma le Faletua, faapea a oulua Susuga Ielome ma Aila ma o oulua Faletua ma le Susuga i le Epikopo ma lou Faletua.

E momoli atu tele la'u faafetai ia i latou uma na lagolagoina lo'u faamoemoe lea ua mafua ai ona ou pale i le tofi o le Itumalo. E ui ina puupuu le taimi o lo'u tulai mai, ae o le a le faagaloina lenei faaeaea ma le faaaloalo maualuga. O lenei ua to la outou pule; faafetai mo le faatuatuaga ua lafo mai ia te a'u ou te tauaveina ai le Nofoa o le Itumalo mo nei masina o lo'o totoe o lenei Paeaiga.

E fia momoli atu foi le faafetai ma le faamalo i lau Susuga i le Ie, Afioga Tagaloa mo galuega lelei uma ua maea ona faatino i totonu o lo ta Itumalo a'o e seei i le Nofoa. Ia faamanuia le Atua i lou tofiga fou o le Peresetene o le Faamasinoga o Fanua ma Suafa. Ma e avea ai foi lenei avanoa e molimoli atu ai le faafetai tele i le Faigamalo mo le tofiaina o lea tamalii o lo'u Itumalo i lea tofiga.

Lau Afioga i le Fofoga Fetalai, ou te manatu o le a ou see mai i le Tala Faatautu Autu o le Tupe aua se sao o lenei Itumalo e pei ona taoto nei i luga o le Laulau a Fono. O le upu moni, e anoanoai ni mataupu ou te fia talanoa i ai, ae manatu tele i le faagasologa o la tatou

galuega. O lea ua ou manatu ai, o le a ootoo atu na o ni nai mataupu ou te manatu e sili ona taua. O le mea muamua, e momoli atu le faafetai tele i lau Afioga i le Minisita o Tupe faapea le Matagaluega o Tupe mo lenei galuega tele ma le maeaea sa outou fitaituga ai - malo faafetai. E taliaina foi e lo'u sui usufono ma lenei Itumalo lenei Tala Faatatau Autu o le Tupe.

E momoli atu le faafetai tele i lau Afioga i le Minisita o Galuega, Felauaiga ma Atinae Eeseese ona o lea ua maea le taligalu tele o le afioaga o Saoluafata. O se galuega matagofie tele lea galuega. E manatu e le'i faigofie ma e le'i taugofie foi lea galuega tele. E momoli atu foi le faafetai i Faalapotopotoga ma Kamupani sa latou faatinoina lenei galuega tele. Ua matauina lau Afioga i le Minisita o Galuega, Felauaiga ma Atinae Eeseese, o lo'o i ai ni vaegatupe mai le Faletupe o le Lalolagi mo le faaleleia atili o le fausiaina o nisi taligalu i totonu o le atunuu. Ia atonu e le tau faailoa atu le tulaga o lo'o i ai lo'u Itumalo i nisi afioaga uma i totonu o le Itumalo e amata mai i Fusi, Salelesi, Eva, faasolo mai ai i Solosolo, Luatuanuu ma Leusoalii - o lo'o manaomia lava ia tulaga o taligalu i afioaga ia. E tele le mafatia o i latou o lo'o nonofo lalata i le sami ona o le malosi o le galu.

E pei foi ona silafia e lau Afioga i le Fofoga Fetalai le tulaga o lo'o i ai le taligalu i le afioaga o Solosolo i le pito mai - o lo'o tele le faaletonu. E tele foi tupe a le Malo ua maea ona faaalua ai i le toe faaleleia, ae o lo'o fai lava ma leaga pea lea taligalu. O le tuualalo a lo'u sui usufono, pe a tusa ai ma lou finagalo, e pei e manaia pe a tuutuu teisi i tai le taligalu lea ona ua fai lava sina latalata mai tele i le auala, ma ua faapena ona aafia ai tele ma le auala. E manatu alofa foi i le saogalemu o le mamalu o le atunuu o lo'o autovaa atu i le la tafa o le atunuu i le Mata Aleipata faapea foi le Itumalo o Vaa o Fonoti, ina ia malutia o latou soifua.

O tupe faaagaaga mo auala: e tatalo atu i lau Afioga i le Minisita ona o lo'o i ai nai auala i totonu o lo'u Itumalo o lo'o moomia le faaleleia. E moni o lo'o i ai auala ua maea ona valitaina pe ua faataina i lenei foi Paeaiga. E momoli atu ai le faafetai tele i lea tulaga, ae manatua ifo le auala foi lea e agai i uta i Solosolo, o lo'o manaomia le toe faaleleia atili o le auala lena ona ua fai lava foi sina leaga ona o le tele o timuga.

E talosagaina foi lau Afioga i le Fofoga Fetalai, ona o lea e matau atu o lo'o i ai nai a tatou tupe faaagaaga mo le vaega lea o schools access roads - o lo'o moomia sina galuega e faataina ai le auala e agai i le faleaoga o le Itumalo, le faleaoga e pei ona e le'i leva ona umusa atu nei - faafetai tele i lea foi galuega tele - ae o lo'o moomia le faataina o le auala lea agai i le faleaoga, ona o lea e maitau atu o lo'o i ai nai a tatou tupe faaagaaga mo galuega ia.

Atonu o lo'o manatua foi e lau Afioga tulaga o lo'o i ai auala galue i totonu o lo'u Itumalo. Ia masalo o auala galue nei lau Afioga, ia pei lava ona silafia o le toatele o le mamalu foi o le Itumalo faapea foi i latou o lo'o papa-aao ma afifio i totonu o afioaga, ua tele ina see i uta isi tagata e faaoga ai auala ia.

I la'u vaavaai i ai, e moni lava e agai foi i uta i faatoaga, ae masalo ua le tataua ona toe taua ia auala o ni auala galue aua ua tele foi isi tagata ua see i uta ma fausia ai o latou fale tumau. O le mea lea e talosagaina ai le tulaga lea i auala ia o lo o taua o auala galue. E moni o lo o i ai tupe faaagaaga i lalo o le Matagaluega lea i le atiaaina o nuu ma afioaga - e pei o le vaega lea e i lalo o pulenuu - ia o lo o matauina, ia e le o mafai lava ona faatino e nuu le faaleleia o auala ia ona sa tele ina aafia tele i timuga foi o lologa ma tafega, aemaise a afa na se i mavae atu nei. Lau Afioga i le Minisita, o le vaega lea o lo o moomia nai tulaga foi ia i auala la ia o lo o moomia se masini foi lele e faaleleia ai auala ia. Ia atonu o lo o i ai ia tupe ia i lalo o le Matagaluega lea ae manaia foi pe a avanoa ia afioaga e talosagaina se fesoasoani mai lalo o vaegatupe ia, e togiina ai se masini e toe faaleleina ai ia auala ia e agai i uta, pe a faapea ua tuai ona o fuafuaga foi a lo tatou Matagaluega o Galuega, ona oo atu se masini e toe faaleleia ia tulaga ia.

Lau Afioga i le Minisita o Tupe, faafetai. Faafetai i lenei galuega taua ua maitauina o lo o i ai nai vaegatupe ia mai le Faletupe o Asia mo le faaleleia o pisinisi laiti. Faafetai atu i le Minisita o Tupe, o lenei fesoasoani o lo o matauina le tele ni galuega aoga o lo o faatinoina i lalo o lenei fesoasoani tau tupe, ia po o se nonogatupe foi e mai le Faletupe o Asia.

O lo o maua i nisi o faatalatalanoaga po o stakeholder consultations ia ni tulaga foi o sailiiliga, ia aemaise i le tulaga lea o le sailiiliga o ni auala e faaogaina ai a tatou fanua foi ia tau i le aganuu mo le nonoina o ni tupe, ia mo le atinaeina o pisinisi laiti, aemaise pisinisi tau tagata tafafao maimoa. E talitonu lau Afioga i le Minisita e le faigofie lea galuega ma lea mataupu e maitau atu e fai foi si maaleale o lea mataupu. Ia e talitonu lava au ma le fautuaga i lau Afioga, ia e tataua lava ona aumai i le atunuu le tali i le mataupu lea e ala atu lea i le Komiti o lo o faafoeina le galuega lea po o le atinae lea. E faapena lava, e tataua ona uluulumatafolau i maota ma laoa o le atunuu, e saili po o fea o i ai le tofa ma le moe i lea mataupu, aua e le o se mataupu faigofie.

Lau Afioga i le Minisita o le Faalapotopotoga o le Malosiaga Faa-Eletise, o lo o tulai mai pea lava talosaga a nisi foi o le Itumalo ma nisi, pe maua se faamamaavega i le tau o le eletise. Ia ona ala atu ai lea o se tuualalo ma se fautuaga e faapea, o le a sou finagalo, pe le tataua ona capitalise nisi o a tatou nonogatupe ia o lo o nono mai aua le faatinoina o atinae nei tau eletise, ia e faasee mai i lalo o la tatou Tala Faatatau o le Tupe, ia pe maua ai se pau o le tau o la tatou eletise. Ia aua e pei o lea e matau atu, ia atonu o le Tala Faatatau o le Tupe mulimuli lenei, o le a faapena ona faaagaaga ai ni tupe mo la tatou Kamupani o le Polenisia aua o lea ua see atu i le join venture lea.

Lau Afioga i le Minisita o Tupe po o le Minisita o le Polenisia, o le a ou oo atu i le tulaga lea o le Polenisia, ia aua o lo o maitauina i felafolafoaiga faapea foi tualumaga o lenei fonotaga, ia e pei e foliga mai a le afea ia le Kamupani o le Polenisia i se lauga, ia ua avea ma lape o le lauga. O le mea lea lau Afioga i le Minisita o le Polenisia ia e manatu o le a ou le toe aoaoina mai

finagalo faaalua foi o sui usufono mamalu o le Maota. Ia ma ou te le toe apaapa foi i finagalo faaalua o le atunuu ua faapena ona ala mai i lo latou tusitusi aao i totonu o nusipepa. Ae pau lava o lea, o lou manatu vaivai, atonu o se auala e faafilemu ai lea mataupu, o le tuuina mai lea o se tatou tala foi lea fuafua faatatau o tupe maua, po o le revenue projection po o le revenue forecast, o le tolu tausaga lea o muamua o la tatou joined venture fou lea. Ia atonu o ina o le a iloa ai se ata i le lelei o lea faamoemoe.

E tele galuega lelei e faatino e le Pulega o Tagata Tafafao Maimoa - malo faafetai. Ia ae talosagaina pea se fesoasoani pe toe faaopoopo ni fesoasoani ia tatou pisinisi ia po o a tatou faipisinisi laiti ia o tagata tafafao maimoa mo mea o beach fales. Aua o lo o maitauina, i le agai i luma o la tatou Faigamalo, pei o i lea o le a faamoemoe i ai lo tatou Malo i se tupe tele aua le atinaeina o le tamaoiga o le atunuu. O le tulaga lea ou te iloa o lo o i ai ni fesoasoani ae toe faatalosagaina nisi fesoasoani atili, faaopoopo i ai i fesoasoani o lo o i ai nei.

E lagolagoina foi le... e taua foi le lagolagoina o le fausiaina o faletalimalo tetele i le lagolagoina lea o foreign investors o lo o omai i totonu o le atunuu, aua o lo o maua ai foi le tupe tele. Ia ona pau lava o uiga faapisinisi, o le vaega foi lena e fai foi ma ave i fafo nisi o a latou seleni. Ia na o nai pisinisi laiti ia o tagata tafafao maimoa, o lo o alu sao lava le seleni, i aao o i latou o lo o faafoeina ia pisinisi e faapena foi ona manuia ai aiga ma afioaga – aemaise lava afioaga i nuu i tua.

Faafetai tele mo le siitaga o penisione mo tagata matutua lau Afioga i le Minisita o le NPF. Faafetai mo lea faamanuiaga – toatele lava na i tama ma tina matutua o lenei Itumalo o le a faamanuiaina i lea siitaga mai le \$100 i le \$125 lea o lea foi e pei e maitau atu o se siitaga e 25% - ae manaia tele foi pe a ogatasi ma le siitaga ua fuafuaina nei mo le Malo e 42% ia po o le siitaga lea o le minimum wages, pe sao lau maitau, e 50%. A mafai ona tuutuu teisi i luga i le 42% po o le 50% le siitaga lea ua manaia tele – o se fautuaga i le alofa i tagata matutua e mafua ai.

Ou te valualusia foi aa o le laau i lau Afioga i le Minisita o le NPF faapea foi le Komiti Faafae, atonu e le o se mataupu fou le mataupu ae manatu alofa i na i tagata o lo o maua i gasegase tumau ia po o i latou foi e soifua mai e le atoatoa le malosi o le tino – atonu o le a ou faaogaina lea upu o le penefiti aua ua masani foi ona faaoga i Fonotaga i totonu o le Maota - pe maua sina disability benefit mo i latou ia? O tagata ia ou te talanoa atu i ai ia o na i tagata foi ia e tauaso pe po le vaai faapea foi na i pipili, se i tulou, ma tagata uma faapena aua o le mea moni e ui lava i tagata matutua ua tali le penisione a o i latou ia ua toatele a isi o lo o maua pea le atoatoa o le malosi i le tino o lo o mafai ona faatino galuega a o nisi foi o lo o galulue i a latou pisinisi ae pei o na i tagata ia - ua faigata tele le tulaga o lo o i ai i lo latou foi taumafai mai i o latou soifua.

I le Minisita o Fefaatauaiga, e momoli atu le faafetai tele – tele galuega ua maea ona faatino – ae atonu o lea e

maitau atu o lo o faamalumalu mai pea le tulaga lea o le mataupu lea o le auai o Samoa i Faalapotopotoga foi lea o Fefaatauaiga i le Lalolagi po o le WTO po o le a se tulaga o i ai le tapenaga a le tatou Malo i le agai atu i lena faamoemoe. E pei o le tulaga lea e mafua ai ona ou tautala i le mataupu lea aua e pei o lo o maitau atu foi e le o toe mamao foi se taimi ona tatou see mai lea mai le tatou tulaga po o le status foi o le least developed country ae tatou see atu i le developed country po o le developing country – atonu pe i ai foi ni aafiaga o lenei Tala Faatatau o le Tupe i le tatou see atu i tulaga na.

Faafetai i lau Afioga i le Minisita o Faatoaga ma le Matagaluega o lea ua tatala mai le avanoa e auina atu ai le tatou ulu ma le esi i Niu Sila ma o lo o maitauina foi o lo o i ai se avanoa e auina atu ai le fualaau lea o le isaraelu, malo faafetai - malo tauatai ua maua foi ia avanoa e fesoasoani ai i le limavaivai foi o le atunuu ia ae o lo o maua na i ia faaeleeleaga ia e momoli atu i Niu Sila aua foi maketi i Niu Sila.

O se tupe maua foi lea mo i latou e fesoasoani ai i o latou aiga, ae faafesili atu pea po o le a se taumafaiga o le tatou talo po o taumafai e taufaaofi atu pea a o le a se taimi e tatala mai ai le faitotoa lea mo Niu Sila aua le tatou talo o le tasi lea o matai ai a le atunuu.

E taua tele i lou nei sui usufono le tulaga lea o aoaoga i le tatou atunuu ma e faafetai atu i lau Afioga i le Minisita o Aoga ma le Matagaluega ua tele galuega lelei ua maea. Faafetai mo faleaoga ua maea ona fausia i totonu o lo'u Itumalo – faleaoga o le Itumalo faapea foi le faleaoga Tulaga Lua i lou nuu o Luatuanuu malo faafetai i ia fuafuaga ma ia galuega ua maea ona faatino. A o lo o tulai mai pea lava le faafitauli masani i le tulaga lea o le lava o faiaoga ma atonu o lenei foi mataupu ua leva ona taumafai le tatou Matagaluega ma lau Afioga i le Minisita i se vaifofo mo lea mataupu. O lo o aumai pea le mafuaaga fai mai o totogi – ia ae faafetai i le Malo o lea ua maua se siitaga o totogi ia ae toe talosagaina pea pe i ai nisi fesoasoani e mafai ona toe maua po o ni siitaga po o le tulaga foi lea o le salary gradings e maua ai se fesoasoani i o latou totogi ia po o nisi faamanuiaga e ese mai i le totogi tau tupe i le faatinoina o lo latou tiute faa faiaoga e mafai ai ona taofiofi faiaoga i o latou galuega o lo o galulue ai aua e taua tele lenei galuega ma lenei tofiga ma lenei foi valaau? O se galuega foi e tatau ona ave i ai le faamuamua a le tatou Faigamalo – aua o lo maitauina foi i galuega ia o lo o faasalalau mai i le vaega lea mai Niu Sila ua faapena ona maitauina foi nisi o faiaoga ua talosaga i avanoa avepasi i Niu Sila, avanoa leoleo Falepuipui ae pei a ona silafia so o se isi lava e atoatoa le malosi o le tino e mafai ona faatino ia galuega a o le galuega faa faiaoga e le faigofie. E tele foi se taimi e aoga ai le faiaoga aua le faauuina o ia foi ituaiga galuega o le faiaoga.

Compulsory Education, ia atonu o le tasi lea mataupu o lo o faapena ona tagofia pea i le tele o taimi i totonu o le Maota Fono lenei. Faafetai i le faatofalaiga i le Matagaluega o lo o faapena ona taumafai pea e faamalosia ae ou te malamalama foi i le tulaga lea i le faamalosia o lenei Tulafono aua e le faigofie. O le upu

moni a e le faigofie le faamalosia o lenei Tulafono - e faigata tele.

Atonu o se tasi o mafuaaga o le utiuti o le faasoa a matua e le lava le seleni ae o se tuualalo o lou nei sui usufono – po o le a se finagalo i lau Afioga i le Minisita, le Matagaluega ma le Faigamalo pe maua se avanoa e aoga fua ai tamaiti aemaise le tausaga muamua ma le tausaga lua foi pe afai e gafatia ona faaaoga fua tamaiti ina ia soifua mai le tamaititi ma le teineititi Samoa ua i ai le avanoa lea e amata i le aoga? E taua tele le aoga ia au ma e taua le aoga i le tatou atunuu. O se atunuu e aoaoina lelei o se atunuu foi lena e lelei lona tamaoaiga – lelei foi le soifua maloloina.

Faafetai i le Afioga i le Minisita o Aoga, o le tulaga lea o lo o tulai mai pea o lo o maua i le saunoaga a lau Afioga i le Minisita o Aoga o lo o faapena ona talia tatou tusi pasi foi ia po o tulaga o tatou aoga i Samoa aemaise aoga ia Iunivesite ma Polytechnic o lo o talia e le Faalapotopotoga o Polytechnic i Niu Sila ae talosaga pea aua le fanau o lo o fai mai – e talosagaina pea pe maua se avanoa e faaofi atu ai ma talia ai a tatou faailoga ia i le Accreditation Council a Ausetalia ma isi atunuu ia ae po o le foi se fuafuaga i lau Afioga i le Minisita ma le Faigamalo ae taumafai e unaia le faavaeina o se Regional Accreditation Council i totonu o le tatou foi Itulagi o le Pasefika aua o lo o tele lava na i aoga faa Iunivesite o lo o i ai. O lo o i ai a tatou aoga Iunivesite i Samoa nei o lo o i ai foi le tatou Aoga Faa Fomai i Motootua faapea aoga Iunivesite i Fiti ma isi aoga uma i Fiti e pei a o la e foi e i ai aoga Iunivesite i Toga; atonu e maua ai se tatou faalapotopotoga faapea e faapena ona taliaina ai tatou faailoga mai tatou aoga maualuluga ia.

Faafetai i lau Afioga i le Minisita o Leoleo, o lea ua maitauina o lo o ua i ai le faamoemoe e faavaeina se Nofoga mo le toefuataina o soifua o tupulaga solitulafono. Atonu o le mataupu ua leva tausaga o taumafai mai a o lea foi e maitauina tasi lenei atinae o lo o i totonu o le menifeso a le tatou Vaega Faaupufai a le HRPP mo lenei Paeaiga. Tasi lenei atinae po o se project e sili ona taua i lau vaai. O le mea moni lava i galuega foi o lo o feagi ai i faamasinoga e matua le talafeagai le Toese i Tafaigata mo tupulaga laiti o lo o tuli ai o latou faasalaga e fai a si laiti tele o isi tamaiti ae o lo o ave i uta ona faapena lea ona fefiloi ai ma le au solitulafono matutua ma atili ai a ona leai se tulaga o le toe fuataina o o latou soifuaga. Ae fesili atu ai ma le faaloalo i lau Afioga i le Minisita o le Matagaluega o Leoleo - po o le a se fuafuaga i lea project po o lea foi atinae o lo tau fuafuaina e le tatou Malo?.

Faafetai i le Minisita mo Uafu - faafetai tele galuega lelei ua tino mai ae pau a lea e puupuu a lau mataupu e fia aveatu. O le a se fuafuaga i ai - e talitonu foi e le fou – o le a se fuafuaga i ai po o afea se aso fausia ai se tatou uafu mo vaa oloa i i le Vaiusu Bay ae faavanoa le tatou uafu i Matautu mo meli lau pasese aua le atinaeina o turisi i le tatou atunuu? Atonu o se fuafuaga lelei foi lea.

Lau Afioga i le Minisita o Faamasinoga - malo faafetai ua tele galuega lelei o lo o faapena foi ona faatino. Pau a lea o lo o vaavaai atu i totonu o le Tala Faatatau Autu o

le Tupe o lo o tuu mai ai le totogi o le Law Commissioner. O le mataupu lea atonu o le tasi lea mataupu ua leva ona tau faavae mai o au le isi tagata sa aafia ai i le tau faavaeina mai o lenei atinae i lenei foi vaega o le tatou atunuu o lo o maitauina o lo o faapena ona manaomia tele le faavaeina ma amataloa le tatou Law Reform Commission. E pei ona silafia, e tele a tatou Tulafono tuai – talu a ona faavae mai Samoa – ia o le tele o nei Tulafono na pasia i le 1960 faasolo mai i luma.

A fuafua foi i ai ua le o toe ogatasi nei Tulafono ma uiga o le soifuaga ua tatou i ai nei, o le mea la lea e fesili atu ai i lau Afioga i le Minisita o Faamasinoga, o le a se fuafuaga, o le a se tapenaga ua i ai i lea foi faamoemoe o le tatou Malo?

Lau Afioga i le Fofoga Fetalai, e pei o na i motugaafa na o lou nei sui usufono e fai ma sao o lou Itumalo o Anoamaa i Sisifo i lenei Tala Faatatau Autu o le Tupe 2005/2006. O le a foi se faafofoga a le Maota ma Samoa, a i ai se upu laavale po o se fati foi ua sala e manatu a o le a faapena ona vaatele i o outou finagalo le lauga mua a lenei sui usufono i totonu o le tatou Maota Fono.

E momoli atu le faafetai tele i lau Afioga i le Taitaifono o le Komiti o Faamatalaga o Tupe a le Malo - faafetai i le Lipoti maeaea ua folasia nei i luga o le Laulau a Fono, faafetai i sui mamalu uma o lau Komiti. Faafetai i le Minisita o Tupe mo lenei galuega tele – galuega maeaea. E momoli atu foi lau faafetai i le Afioga i le Ofisa Sili o Pulega o le Matagaluega o Tupe ma lau Aufaigaluega - malo malo le galue punouai. E momoli atu foi le faafetai tele i Faaululuga uma o Matagaluega ma ma Faalapotopotoga Tumaoti a le Malo i la outou foi sao i le tuufaatasia o lenei tala o le Tupe. Ia faamanuia le Atua ia outou galuega. Ia faamanuia le Atua i sui usufono mamalu uma o lenei Maota; ia faamanuia foi le Atua i lau Afioga i le Fofoga Fetalai ma ia faamanuia le Atua i le tapuaiga a Samoa. Ia manuia le Fono.

#### **Afioga FUIMAONO PULEIMANUFIU FAASOPO**



#### **Itumalo Faaalalafaga:**

*Falealili*

#### **Filifilia:**

*30 Mati 2002*

#### **Faatauto:**

*31 Me 2002*

#### **Lauga Faataupou:**

*20 Iuni 2002*

Faafetai i lau Afioga i le Fofoga Fetalai mo le avanoa ua tuuina mai i lenei Sui Usufono fou e taumafai atu ai se manatu o Falealili.

E muamua ona ou faatulou atu i le paia o le Maota o Samoa i le afio o lau Afioga i le Fofoga Fetalai, afio o lau Afioga i le Palemia ma le paia o le Kapeneta, a outou Afioga i Minisita aemaise o Sui Usufono mamalu o le Palemene o le Malo Tutoatasi o Samoa, lau Afioga i le Taitai o le Itu Agai.

Ou te faatulou atu foi i le faafofoga tapuai a Samoa i le afio o lau Afioga Mamalu i Le Ao o le Malo lau Susuga

i le Malietoa, e te susu i lou nofoa vaevaeloloa ma lou fala na folaloea e faafofoga ia te Oe Samoa.

Lau Afioga i le Faamasino Sili ma le Matagaluega o Faamasinoga aemaise i le tapuaiga i Faauluuluga o Matagaluega a le Malo ma Faalapotopotoga Tumaoti, le paia i le Afaigaluega a le Atua i le nofo a Ekalesia, le paia i Aiga ma latou Tama, o Tama foi ma o latou Aiga, aemaise le aleaga faafeagai a Tumua ma Pule, Ituaia ma Alataua, Aiga i le Tai ma le Vaa o Fonoti.

Ou te faatulou atu foi i le faafofoga tapuai a Tutuila ma Manua ma le Malo o Amerika Samoa.

Ou te faatulou atu foi i le paia o lou Itumalo o Falealili i le afioaga o i laua Alaalagafa ma le la nofo a Tulafale ma le Tauaga Eeseese ia Falealili, aemaise o le tapuaiga i lau Susuga i le Toeaina ma le Afaigaluega paia a le Atua i so o se fatafaitaulaga o lo o faafalelemalu i lou Itumalo aua se nonogamanu mo se manuia o lou Itumalo.

Lou Itumalo e Falealili, tapuai maia, tatalo ia logosaia se leo o lo outou Sui Usufono na filifilia e momoli so outou finagalo ma so tatou sao aua upufai o Malo. E pei o le fetalai ia Tumanuvao, o finagalo o le Maota o Samoa a o sauni folau le sa o tautai e folau i Salafai, na faamanatu ane i le autautai e faapea, ia tautuana ne i galo ofeloa, ia i lau o tauau. O ata ia o tofa na moe ma se faautautaga na saili e lou Itumalo ua ou ofu ai nei i le puleto ou te molia uega i le tai.

Ia tapuai maia; o lo o ua ou tu nei i lave i Fiti ae mataitu le aulalao, ma ua le gase foi le tai tafola ina ua toa le taitua ae noanoa le tai o Tumua ina ua faatauata nei le la ma le masina ina ua saveioloolo le fuasou o Utumalama ma ua tutonu nei le aniva mai saute i matu o le faailoga lena o le taeao mamalu.

Faafetai i le Atua ona o Lona agalelei ua taunuu manuia ai lenei faamoemoe o le atunuu e pei ona tatou i ai i lenei taeao fou. O lea ua iite le malama nai Saua ma ua gafoa foi le ata o le tai ulaula o Nafanua ma ua ae foi le faiva o manu o le Tuasivi ma ua mapue foi le ofeloa aua o lea ua afifio Sui Usufono mamalu o le Maota i le soifua laulelei ma le lagi e mama. E talitonu le manatu o lea ua ae i auomanu a ua tafea auomala, ma le talitonuga ua tali le Atua i lau tatalo Samoa ua mafua ai ona taunuu manuia mea uma. O lea foi ua mafua ai ona faafoi le viiga i le Atua i Lona agalelei ua taunuu ai lenei faamoemoe.

Lau Afioga i le Fofoga Fetalai, ma lou faaloalo e tatau ai o le a taumafai atu ai se manatu faaloalo o lenei Itumalo o Falealili.

Muamua, lau Afioga i le Minisita o le Soifua Maloloina. O le talosaga a Falealili e moomia ni nai vailaau mo lona falemai ma ia faaleleia. O nai vaega itiiti lea e talosaga atu ai i lau Afioga ia e fesoasoani atu mo le falemai i Falealili mo ni vailaau.

Lona lua, ona oo atu ai lea i le Minisita o Galuega. Lau Afioga i le Minisita, e pei ona silafia e lau Afioga o lo o i ai se vai i lo matou nuu po o le Itumalo, a faapea e alu le aso o timuga ae tafe ua le omai taavale a Falealili i Apia ma ua le aoga foi alo ma fanau a lo matou nuu po o lo matou Itumalo. O lea e moomia ai se fesoasoani lau Afioga e moomia e Falealili le fia fausia o sina ala laupapa mo lea vai lau Afioga i le Minisita o Galuega.

Ou te manatu foi o lo o i ai le vai i gauta i Salani e i ai se faamoemoe o le aoga sa i ai muamua, o la e i ai le faatanoa, a o le matou pito e le o suasua paipa i lea itu o le matou Itumalo, e manaomia se fesoasoani mo ni paipa e tau ina aumai ai i tai le vai i lo matou Itumalo. O le tatalo atu lea i lau Afioga i le Minisita.

O le Minisita o Autalavou, Taaloga ma Aganuu, o le talosaga a Falealili i lona malae i Falealili e fia faaleleia. O lea e talosaga atu ai i lau Afioga i le Minisita o Autalavou, Taaloga ma Aganuu, e le i faamaeaina lava le malae o si o matou Itumalo.

Ia na o le pau ia o Minisita ua ou talanoa atu i ai i lenei taimi, atonu po ua lasi la outou faafofoga i ia lava mea ua ou aveatu mo lou Itumalo, a outou Afioga i Minisita faapea le mamalu o le Malo, a o le tele o nisi o mea o atinae a le Malo mo le manuia o le atunuu e selau pasene le lagolago a Falealili i so o se mea e manuia ai le atunuu.

Lau Afioga i le Fofoga Fetalai ae ou te le i nofo i lalo, e momoli atu lau faafetai ma lau faamalo i le paia o le Itumalo o Falealili i le afifio o laua Alaalagafa ma le nofo a tulafale ma le Tauaga Eeseese ia Falealili. Le paia i le Afaigaluega a le Atua i le susu o lau susuga i le Toeaina Tunumoso, le nofo a Faafegaiga i so o se tapuaiga. Faafetai le faaeaea, faafetai le faatamalii, faafetai le faatupu, o la outou pule lea e ala i le tofi o le Itumalo - e manatua Pule ae le manatua Faalao.

Faafetai i lo outou lagolagoina o Au e ala i le palota. Ou te faafetai foi i ou uso sa matou taufetuli faatasi, e le mua uma ni vaa, e taaalo lava tama a o le uso. Faafetai taalo faatausala taalo faatamalii ma le faatupu; faafetai ua leai se mala e afe na o le viiga o le Atua ua tatou alagaina. O Au toe upu, ia tapuai mai ia ma a outou tatalo ia outou manatua Au i le viiga o le Atua.

Lau Afioga i le Fofoga Fetalai, faafetai mo le avanoa mo le Sui Usufono mo Falealii, ma lou Sui Usufono fou.

## Tofa LEAO TALALELEI



### **Itumalo Faaalalafaga:**

*Vaa o Fonoti*

### **Filifilia:**

*12 Mati 2001*

### **Faatauto:**

*15 Mati 2001*

### **Lauga Faataupou:**

*18 Iuni 2001*

Ua ou vave tulai atu semeamanu o la e mafanafana lou finagalo, ua faataga ai le itula i le Vaimauga. O le ala ou vave pipi atu lea, manu e le i toe suia lou finagalo e tusa ai ma lea tulaga, ne i sili atu se taimi faaogaina.

O le a mamalu pea ia le aitu o le aoa, i le eetai a lau Afioga i le Fofoga Fetalai; mapu ane foi feaoga i le eetai a le Afioga i le Palemia ma lana Kapeneta. O le a paelago foi le puapua ma ona la aua le mamalu tele i lenei Palemene, faapea le eetai a le Afioga i le Taitai o lenei Itu ma le Sui Taitai. E muamua ona ou faatulou atu i le faafofoga tapuai mai a le Afioga i le Ao Mamalu o le Malo, le Afioga Malietoa Tanumafili II, faapea le

mamalu o Sui o le Fono a Sui Tofia. Le paia i Tama ma o latou Aiga, Aiga ma a latou Tama. Aiga o Tupu, Aiga o Nofa, Aiga o Papa ma Aiga na Tafai. Le mamalu i le usoga a Tumua ma Pule, Ituau ma Alataua, Aiga i le Tai ma le Vaa o Fonoti.

O le a sagai tonu lau o le fo ma agi faasulu le siuamouli aua le faafofoga tapuai mai a le mamalu o lou itumalo. Le paia i lau afioga Leualofaiga, lau tofa Talamaivao le matua o le Toafa aua upu ia Leao, Laumea ma o la aiga. Le mamalu tele i le paia i aiga e lua. Aiga Sa Fenunuivao, Aiga Salevalasi, le mamalu i Usoalii, tainane le paia tele i lo outu toafa, e na taiao ma le mamalu ia Atualefauono. E faapea foi i lea itu o lou itumalo, le mamalu tele ia i laua gafa, le too o le fua i lau Tofa Molioo ma le Aiga Sa Molioo. Le mamalu i Alosina ma le Ailaoa.

E lagona le agaga faafetai ma le faamaualalo ona o la outou faaaloalo ua outou tofia ai au i leni Paeiga a le Palemene. Ua tino la lo tatou soifua aua ua tuanai Apolima, ua moe malu foi le ata na moe faogalefasa, ina ua tini pao le uto e pei o le fetalaiga i vai. Ua taunuu ai upu o le Tusi; "O le faamoemoe ua taunuu o le laau o le soifua lea."

O lea ua manatu o le a uluulumatafolau se leo, e molimoli atu le agaga faafetai i le mamalu tele o lou itumalo ona o lau pule ma lau faaeaea ua ou nofoia ai le Nofa o le Vaa o Fonoti i totonu o le Palemene XIII leni o le Malo o Samoa.

Lau Afioga Ulualofaiga Talamaivao Niko, faamalo faafetai ona o lau lagolago ma lou finagalo faaalua i luma o le itumalo, aua lava le tapueina o le faamoemoe a o alo atu le itumalo ma le atunuu i lana faiga filifiliga mo Sui Usufono o le Palemene o Samoa.

Ou te faafetai tele i lou nuu o Maasina, le afio o le Valasi, fetalaiga i le Tulafale, le mamalu i lo lua toalu Togia ma Leausa, ia ae faapea foi le matua o Maiava ma le Tauaga Esee, le mamalu i le Tauso ma Sauaava ma lou nuu uma i Maasina. E lagona lou agaga faamaualalo ma le faatauvaa i la outou pule ma la outou faaeaea i lou nei tagata.

I le amata mai Uafato i le paia i le Aiga Sa Fenunuivao, le mamalu i le Ituala, ua faamalo faafetai. Faafetai Tuimalatu Saili, o oe o le toe ulutaia o le tatou itumalo. Faafetai Tuimalatu Viliata, Tuimalatu Lolua, ma le mamalu i lo ouotu aiga Sa Tuimalatu.

Ou te faafetai foi le mamalu tele ia Leituala, lau fetalaiga Alaifueliisale, ia faapea foi Ataiti Pepe, aemaise foi Fuatau Eteuati Tautai Neemia ma le mamalu uma o le afioaga i Uafato.

E momoli atu foi lau faafetai i le mamalu i Samamea, le mamalu i Usoalii, Tui ma Salaivao, le susu o Maupu, le afio o le Ao o Mavaega faapea le Aloalii. Le fetalaiga ia Ofe ma Mauu faapea upu i le Faleatua, faamalo faafetai Puepuemai Tauinaola, faafetai i lau Afioga Tui. Faafetai tele i lau Tofa Utaileofe Faoa. E faapea foi lau Fealaiga Mauu Kalauna ma le mamalu uma o le afioaga i Samamea.

Ou te faafetai foi i le faaaloalo a Lona ma Atoi, le paia i le Aiga Salevalasi ma Gafa, tainane le fetalaiga i lau lua toalu Laumea ma o la aiga, faapea upu ia Pule e fia.

Faafetai i lau afioga i le Saofetalai, lau Afioga Maeataanoa Kaisala, le fetalaiga i lau Tofa le Tuua Laumea Sonatuu, aemaise foi o i latou uma sa lagolago ma fesoasoani i leni faamoemoe - Mulipola Keli, Fepuleai Tuasili, Sagapolu ma le mamalu uma o le afioaga i Lona.

Ou te faafetai foi i le afioaga i Taelefaga. Le afio o Aiga Salevalasi, le afio a Fuiavailili, Sua ma Pauli, le Tuiatua ma le Aigaga. Faafetai tele ia lua Afioga Atiifale Fiso, Atiifale Valoaga, Atiifale Ulisesa ma le faletua ia Sieni. Faapea foi le tapuaiga a le tama matua o Fialele; faafetai i le fetalaiga i lau Tofa Leuta Saifoloi, Leuta Sialafau, Taluaana Iseli ma le mamalu uma i le afioaga i Taelefaga.

E momoli atu foi lau faamalo ma lau faafetai ia Salimu, le afio o lau Afioga Ulualofaiga e faalupega ese ia Atualefauono. Tainane le mamalu i le Tauso ma Alosina, faapea le mamalu ia Atualefauono. Faafetai Limu Filifilia, e faapea foi ona ou fia faafetai atu i le Afioga ia Tauiliili Sini, Leilua Likisone ma le mamalu uma i le afioaga i Salimu.

E faapea foi ona oo oo atu se leo o le faafetai i le mamalu tele o le afioaga i Musumusua. Le mamalu i le Aiga Salevalasi, lo outou toafia faapea Pule ma Taulauniu, Tainane foi Aumua ma Oloatua. Ua faamalo faafetai i lau Afioga Lemasonuu Pailegutua, lau fetalaiga Ifopo Aumua Lio ma lau fetalaiga Fea ma le mamalu uma o le afioaga i Musumusua. E momoli atu foi lau faafetai tele i lau Afioga Uafau, faapea Utugia Iakopo ma le mamalu tele o i latou i Saletele sa fesoasoani ma faamalosiua mo leni faamoemoe. I le afio o Usoalii, le afio o Sefaatauemaga, tama a le Paepae, ma le mamalu ia Alalamaota. Faamalo faafetai. E le atoa lau faafetai pe a le faasopolia tuaoi uma o lou itumalo faa-Sui Usufono. O lea e le faaitiitia le agaga faafetai i le lagolago mai ma le fesoasoani mai o le mamalu ia i laua Gafa, le too o le fua i lau fetalaiga Molioo ma le Aiga Sa Molioo. Mamalu i Alosina ma le Ailaoa ma le afioaga i Faleapuna.

Ou te talitonu e le i faigofie la outou filifiliga, ona o lea, o lo outou silasila i le taumafaiga a le Tofa ia Molioo. Ae ui lava ina o lea, tatou faatuatua i le Atua, ma ia tatou talia lona finagalo e pei ona tofia ai lou nei Sui Usufono, tatou te galulue faatsi aua se manuia o lo tatou itumalo mo le agai i luma.

Momoli faapitoa lau faafetai mo ou uso sa matou tauva, aemaise o lau Tofa Molioo Teofilo. O le sa nofoia le Nofa o le tatou itumalo i le 5 tusaga ua tuanai atu. Ou te faamalo i le faatinoina o ou tiute faa-Sui Usufono i le itumalo. O a ni galuga lelei ua mafai ona faatino i le taimi o lou tulai mai, ou te talitonu o lo tatou sao faatasi lea aua le manuia o le Malo o Samoa. Ou te faafetai mo le finau i le tofi sa finauina i le agaga tauivi ae faaiuina i le agaga faatamalii. Ia aumaia lau faamanuiaga mo sau taumafaiga aua lo tatou itumalo mo leni 5 tausaga.

Ou te fia faafetai foi i le Tofa Vaipua sa tauva mo le tofi. E leai, o outou lava o lo o i ai le faamoemoe aua se manuia o le itumalo ma le atunuu mo le agai i luma. Faafetai mo le lototele, faafetai mo le finau mo mea lelei aua lava se manuia o lo tatou itumalo. O Iesu lava ia na

fetalai; “A i ai se mea tou te mananao ai, ia outou ole atu i le Atua e ala atu i lona Suafa.”

E ao ai ia te au ona ou faafetaia ou tama faale-Agaga i auauna a le Auta ma le aufai tatalo sa tatalo ina ia taunuu ma le manuia ma le filemu le faamoemoe o le atunuu. Lau susuga i le toeaina, lau Susuga Asotasi ma le faletua, le mamalu i le Aufaigaluega uma a le Atua o le Ekalesia Faapotopotoga Kerisiano i Samoa, lau Afioga Patele, lau Afioga i le Faipule, ma faifeau uma o le Ekalesia Katoliko. Lau Afioga i le Peresitene ma le mamalu i Epikopo o le Ekalesia Mamona ma o outou faletua. E faapea foi le mamalu o le Aufaigaluega a le Auta i fata faitaulaga uma i totonu o Fagaloa ma Faleapuna, ua faamalo faafetai mo talosaga molia, ua iu ai ma le manuia le filifiliga a lo tatou itumalo faapea le atunuu.

Ne i galo Afia i lona vao, nei galo foi le Mulivaiele na goto ai le fetu o Leapai. O lea ou te momoli atu ai le faafetai tele i o ma aiga uma ma Lanuola sa fesoasoani mo le faatinoina o lenei faamoemoe. E iloga lava aiga moni e tulai mai i taimi faapenei, aua e moni lava o le uo mo aso uma, ao le uso mo aso vale. Faafetai i lo outou alolofa ma lo outou agalelei. Faafetai Niua ma le aiga uma i Vaimoso. Faafetai Seve, faafetai Lei, faafetai Tina. E le mafai ona taotaomia le agaga faafetai i uo ma e sa fesoasoani mai i le taumafaiga o lenei faamoemoe.

E le mafai ona ou tolaulauina o ouotu suafa, ae ua silafia e le Atua le mauuluga o le agaga faafetai ona o la outou lagolago mai. O upu a le Tusi; “E le sili le manuia o le na te talia nai lo le na te foi.”

Lau Afioga i le Fofoga Fetalai, e lagona le agaga mauuluga ma le faatauavaa ou te nofoia ai le Nofoa o lou itumalo sa nofoia e nisi o taitai iloga o lou itumalo i taimi ua mavae, ma o le a nofoia foi e le toatele o nisi o le a mulimuli mai ia te au. Ina ua faatoa ou ulufale mai i le Maota lenei o se Sui Usufono o le Palemene, sa lagona i ou tino le pau ma le mamalu e foliga mai o lo o mafuta ai pea agaga o o tatou tuua sa tauasaina le gasu o le taeao; i upufai o le Malo o Samoa.

E le gata i lea, sa ou faalogoina le mafuta mai o se malosiaga e sili atu nai lo tatou, le malosiaga sa fausia ai i tatou ia tutusa ma ia foliga ia te Ia. Le malosiaga, o loo faavae ai le Malo o Samoa. Na soo le fau ma le fau, ina ua ou faalogo i upu tomua o le Nofoa ma le Laulau, tolaulauina Tulafono laiti. O amio taualoa faa-Palemene. O upu nei na ou taofia. aua sa logomalie ia te au.

Muamua, e tatau i Sui Usufono uma ona faaaloalo i isi Sui Usufono. Lona lua, ia galue i tulaga mamalu, faamaoni, le faaituau ma ia amiotonu i taimi uma. Lau Afioga i le Fofoga Fetalai, sa matua lagona le mafanafana i lou loto i ia upu.

Lau Afioga i le Fofoga Fetalai, ou te tautala ma le ava tele ma le faaaloalo aua le faafofogaaga a le Afioga i le Palemia ma le mamalu i lana Kapeneta o lo o faafoeina le tatou Malo i lenei Paeaiga. O lo o tumu au ma lou itumalo i le lagona o le faanoanoa tele ma le mafatia, ona ua matou talitonu ua sili ona tuulafoaiina i matou nai lo isi itumalo uma o Samoa. Talu mai le tele o Faigamalo ua tuanai atu, e foliga mai ua matua tavavae ese lenei

itumalo mai fuafuaga fai tau atinae o le Malo mai le tele o tausaga ua mavae. Ua peiseai o Fagaloa, e le o se vaega o Samoa, ao se vaega o se atunuu ua le o toe mananao i ai. O lea foi ua ou vaai atu ma le faanoanoa i le Tala o le Tupe amata o lenei Paeaiga, e lagona lava le faanoanoa tele. E le o taua ai foi le auala o Fagaloa i fuafuaga a le Malo mo galuega faatino o lenei tausaga. Ua leva ona ola pologa tagata Fagaloa ona o le leaga o ona auala. E lamatia le soifua i aso uma ona auala. E le gata i e lauleaga, aua i le taimi o taitolu tausaga o Paeaiga, na o le taitasi teuga i le tai tolu tausaga. Ua oo mai nei ina ua 5 tuasaga, ua taitasi teuga i le tai 5 tausaga. Ae e aeae i mauga, e ifoifo i vanu.

Mai Uafato lava ia, na o le faatolu ona sau le pasi i Apia i le vaiaso. E le ona le le fia omai o lenei itumalo i Apia, ae ona o le manumanu foi o le fai pasi ia i lana pasi, aua e feololo le manuanua o le pasese e malaga mai i le pasi i le fetogia i totonu o le pasi, nai lo le manuanua o le pasi foi ia. Atonu ona toe pau lenei o le itumalo i totonu o Samoa, a oo i le taimi e malaga mai ai se tagata i Apia, e matua fai le faamavaega. Ao o foi ina toe foi atu, e matua fai le fiafia. Aua foi sa le mautinoa pe toe faaolatia atu pe le toe foi atu? E le gata i le lamatia o le soifua o tagata Fagaloa ona o le leaga o auala, ae ua faigata ai fuafuaga mo isi atiina ae tau faatoaga, faletalimalo, tagata tafafao maimoa mai fafo ma faigafaiva o lo o tele se manuia ma se tamaoaiga e ono maua mai ai i totonu o le Vaifagaloa.

Faafetai i nai o matou tuua sa latou fofoina lenei auala i o latou lima. O lima; o laau ma lima o tuua o Fagaloa sa fofoa ai le auala lenei. A na le seanoa lo latou tautiga atonu e fapenei lava o lo o omai pea Fagaloa i fautasi ma paopao i Apia. Ae a na o lea foi le tulaga, atonu e faapenei, e le o taitai lava ona pai Apolima i se mua i tuuga fautasi.

Lau Afioga i le Palemia e ala atu i le Fofoga Fetalai, o le Anavatau o lo o taitaiina ai lau Faigamalo e pei ona e saunoa pea i ai i le atunuu i le tele o aso, o le mea e lelei mo e i le talafatai o Apia ma le taulaga nei, e lelei foi lea mo e o lo o nonofo i nuu i tua. A tuu foi i le faaupuga o lo o aumai i le Tala o le Tupe, o mea uma faaleolaga nei e fiafia i ai e aumau i le taulaga nei, e ao ona tuamafai ina ia mafai foi ona selesese e e o lo o aumau ma alala ma papa aao i nuu i tua ma alalafaga i tua o Savaii, Manono, Apolima ma Upolu.

Lau Afioga i le Fofoga Fetalai, o le taliotnuga o lenei itumalo, ua lelei atoatoa auala o Savaii ma le alatele o Upolu; ua oo lava i auala e afea ai lea nuu ma lea nuu, ua faata uma lava. O la matou talosaga, o le mea e lelei mo e o alala ma papaaao i Savaii, e lelei foi lea mo e o lo o nonofo i Fagaloa, o lo o i Upolu nei. O lea o le a sili atu i le 20 tausaga o le Faigamalo a le HRPP. E oo mai i le taimi nei, e le o soo lava auala o Upolu. Talu ai, ona o le le i lotea lava o le auala lea i Fagaloa. Ae sa tautua foi lenei itumalo i le Faigamalo a le HRPP i tausaga ua mavae.

O lea faatoa mavae atu nei le Tofa Molioo Teofilo sa tulai mai i le tulaga Minisita ma tautua faamaoni i le Malo. E faapea foi fatia ua alu i le Afioga ia Atiifale Fiso sa tautua foi mo le Faigamalo.

Lau Afioga i le Fofoga Fetalai, o le talosaga a lenei itumalo i le Afioga i le Palemia ma lana Faigamalo e ala atu i lau Afioga, ia faatino lou faamaoni i lau Anavatau. Ua fia ola lenei itumalo i le soifuaga o lo o soifua ai nisi o nuu i tua o Upolu ma Savaii. I le ava tele ma le faaaloalo ou te talosaga atu ai, ia e alofa ave le faamuamua e faata ai le auala o Fagaloa. A e faia le mea lena, talitonu mai oe e sau aso e galo ai ou aso i le Tofi Palemia ma le Palemene o Samoa, ae le mafai ona galo i tupulaga fai mai o Fagaloa lou alofa ma lou agalelei.

Ou te manatua lava upu tomua o le tatalo a le Susuga ia Fepai Kolia i le Eleele Fou i le Aso Tofi, 31 Me, i le faamanatuina o le 39 tausaga o le Tutoatasi o Samoa. Fai mai upu amata o le tatalo a Fepai Kolia: “Le Alii e, e le tafe mai Lou Nofoalii se vai palapala.” Ua faapea se lagona o lenei itumalo. Ua leva ona galala i le fia inu i se vai mama.

Lau Afioga i le Palemia ma lau Faigamalo e ala atu i le Fofoga Fetalai, o le talosaga a lenei itumalo, ina faatafe maia sina suavai mama se i o matou feinu ai. I le sauniga lava lea i le Aso Tofi, 31 Me i le tausaga nei i le faamanatuina o le 39 tausaga o le Tutoatasi o le Malo o Samoa sa faia i le Eleele fou, sa ou faalogologo ma le ootia o lou loto i le lauga matagofie a le Susuga Oka Fauolo, na ia taua ai faataoto e tolu a Iesu i mea leiloa.

Sa saunoa ai le Susuga Oka Fauolo i lana lauga i mea leiloa e tolu; o le mamoe, o le tupe, o le atalii. Na ou faapea lemu i lou loto, toe tasi le isi mea leiloa lea e le o taua e le Tusi Paia, toe o Fagaloa. Fai mai le Failauga: “Na tuua le 99 mamoe ae alu le leoleo mamoe lelei e saili mai le mamoe e tasi ua leiloa.” Ae fai mai ina ua maua, sa matua lagona lona olioli. Lau Afioga i le Palemia, a e aapa mai ma aveatu lenei mamoe leiloa, ou te talitonu e matua olioli le Tama i le Lagi. Ua fia i ai faatasi Fagaloa ma isi mamoe e 99 o lo o i totonu o le lotoa o faamanuiaga. Lau Afioga i le Fofoga Fetalai, o le a lafo atu ia le talosaga vaivai a lenei itumalo i le Palemia ma le Aiga Minisita aemaise le Afioga ile Minisita o Galuega o lo o gafa ma lea matafaioi. Afai lava e talitonuina o Fagaloa ma e nonofo ai o se vaega o Samoa, atonu o le a to se matupalapala ma talia le talosaga a lenei itumalo.

E fia faamauiina lau faafetai i le Afioga i le Minisita o Galuega, le Afioga Hon Faumuina Liuga; e lagona le agaga faafetai i lou sulufai atu ile mafatiaga sa feagai ai nei lou itumalo ona o timuga ma lologa sa i ai, ua le mafai ona feoi lo matou itumalo. Sa vave ona tali mai ma tulai mai le fesoasoani, ma auina atu masini o lo o galulue ai nei e amata mai i Uafato mo le faaleleia o le matou auala i Fagaloa.

Faamalo faafetai i lana Afioga i le Minisita o Galuega. E ui lava ona e le o se fuafuaga tumau o lo o faia nei ae faafetai ua mafai ona feoi mai tagata o lou itumalo i Apia i lenei vaitaimi.

Ou te faafetai foi ona o le mafai ona ma asiasia ma le Afioga i le Minisita o Galuega auala o Fagaloa. Sa le mautinoa leaga o le aso lea sa fai si faatimutimu, a o le taimi a o faagasolo le ma asiasiga, sa ou vaaia ou te le iloa po o ni loimata po o ni matua o le timu i fofoga o le Afioga i le Minisita o Galuega. Sa lagona lava foi le

fiafia tele ina ua saunoa mai le Afioga i le Minisita o Galuega matou te malaga faatasi ma le Palemia. Ae ona ua tuatuagia i nisi o faafitauli le maalofia na ala ai ona le taunuu ona matou malaga. E ui lava i lea, e le i alotamala lou itumalo ina ua logotala o le a afio atu le Palemia e asiasi o matou auala. O le ata lena o le naunautaiga o le loto ua fia maua se vai faaola. E faamoemoe lava o le a faaauau pea le teuteuina mai o auala o lenei itumalo tau ina talitali ai lenei vaitaimi seia o o mai se taimi lata mai e o o atu ai fuafuaga a le Malo e faata auala o Fagaloa.

Lau Afioga i le Fofoga Fetalai, ou te fia tautala i le tautua a Fagaloa ne i faapea mai nisi, maimau tupe e fai ai auala o Fagaloa ae leai se mea a le Malo o maua mai ai. O le tautua aupito sili ona ogaoga ma le tiga o lo o faia nei e Fagaloa, o le tautua lea e ala i le eletise. O le malosiaga faaeletise aupito tele lea o lo o i ai nei i totonu o Samoa, lea o lo o soifua lelei ai, e faasolo mai i Fagaloa e tau i le taulaga ma faasolo atu i le taualga e tau i le malae vaalele; i le itu i Saute o le motu i Aleipata, Falealii, Lotofaga ma Lepa, e oo atu i Lefaga, o lo o soifua lelei i le eletise o lo o maua mai i lenei auaunaga a Fagaloa.

Muamua, ou te fia tautala i le tulaga lea i le auaunaga. E le faia fua se faamatalaga, o le auaunaga e faia ma le tiga, e faia ma le oi, ona e muamua, i le faatoa afuafua mai o lenei faamoemoe, sa saili po o ai e ona le eleele i Afulilo. Sa faia faamasinoga, sa matou i ai faatasi ma le Afioga i le Palemia, o lea e molimauina.

Ua iu le faamasinoga, o Fagaloa e ona eleele, ae vaevae le tupe, e vaevae i itumalo e ono o Atua. O Falefa, o Falealili, Lepa, Lotofaga, Aleipata ma Fagaloa. O le isi lea tiga o lo o feagai pea ma lenei itumalo.

O lona lua, ina ua faamama le faatanoa, sa tuu mai ia Fagaloa o i latou e taina ma aveese le lauu mai totonu o le faatanoa; aua foi, a le maea ona aveese, o Fagaloa lava o le a mafatia ai i ona iu ma lona taunuuga, aua a totoe se lauu i totonu o le faatanoa, o le a tafe mai le sua oona o le lauu lea ma faaleaga ai le gataifale o Fagaloa. Peitai ane, ua utiuti le seleni, ua manatu le Malo e faanatinati le galuega, ona faasua lea o le faatanoa ae le i taitai uma ese le ogalaau. O le mea la o lo o tupu nei, ou te iloa e paia le isi tolusefulu i le limasefulu tausaga o le a tafetafe atu pea le oona lenei ma le suavai oona lenei mai Afulilo i le gataifale o Fagaloa ma faaleaga ai ona amu, o figota ma ia o lo o soifua ma faalagolago i ai le soifuaga o lenei itumalo. O le fesili, e i ai se tau i maua e Fagaloa ona o lea tautua? O le tali, e leai.

O lona tolu, o Taelefa le afioaga o Salevalasi Tuiatua ma le Ailaoa, o lo o tu ai le Power Station po o le fale e fau ai le eletise, e taunuu atu i ai le suavai mai luga i Afulilo ona vili ai lea o le eletise ma toe faaalu ese atu ai e alu i le sami. Mai le taimi na tatala ai le fale eletise e o o mai i le aso, ua valu nei tausaga o feagai pea lenei afioaga ma le mafatiaga tele ona o le manogi leaga e sau mai le suavai o lea o lo o faatafe atu i le sami.

A manatu i le soifua pologa i aso uma e feagai ai ma lenei faafitauli, ou te le iloa aua e leai se fua faale mafaufau e mafai ona fua i ai le pologa o le mafaufau po o le mental stress.



E oo mai foi i le taimi nei, e le o mailoa lelei po o le a se aafiaga o le tino po o se mai e ono tupu mai ai i lea manogi o lo o manavaina pea e lenei afioaga i aso faifaipea, o le latou physical health.

Ua o atu faafia foi le mamalu o le Malosiaga FaaEletise e asiase, e leai se togafiti e mafai ona foia ai. Ona lelei mo Samoa. O lea, e leai se manatu o Fagaloa ina ia faamutaina, a o le talosaga e fia tuuina atu, ia alofagia e le Malo.

Muamua, e a pe a mumu fua Fagaloa mo se taimi e le faatapulaaina? Aua o le umi pea o i ai o lenei atiina ae, o le agaigai foi lea ina faatupulaia o lea faafitauli aemaise o le a afaina atoa ai le gataifale o Fagaloa atoa i figota ma ia.

O lona lua, e talosagaina le Malo ia fuafuaina se faasao e faaagaaga mo tupulaga fai mai o Fagaloa. Ou te manatu, o le sene e tasi mai le iunite o le eletise e maua mai le paoa lea e le o se mea tele. E teu faatupe faavaitaimi i lalo o se teugatupe e taua o le Fagaloa Trust Fund mo alo ma fanau a Fagaloa mo le lumanai, e tua i ai nei alo o le itumalo aua e le iloa pe sau se taimi ua le aoga atoa ua toe sifi ese Fagaloa i se isi mea e nonofo ai ona ua faaleagaina e lea atiina ae lona gataifale.

O lona tolu, ua manatu ua i le taimi ua tataua ai ona fuafua le Malo i se lisi talafeagai mo le 800 eka a Fagaloa o lo o i ai nei le faatanoa i Afulilo. Na o sina mea e tau ina iloga ai le tautua a lenei itumalo o lo o faia pea i aso uma.

O lona fa, ia finagalo malie lau Afioga. Ia o le a faamaea atu le...

Faafetai ua palega aua le taliga o le sua i lau Afioga i le Fofoga Fetalai, ua sao i alo foi se taumafataga aua le Afioga i le Palemia ma le mamalu o le Kapeneta ma le Palemene nei.

Lau Afioga i le Fofofga Fetalai, e faia le malologa ua ou o o mai i le numera fa o le talosaga a lou itumalo e faatatau lava i le tulaga o le eletise. O lea e talosagaina ai le mamalu i le Afioga i le Palemia ma le Malo ina ia saunia e le Malo ni paipa telele e faapaipai atu ai le vai lea e aluese mai totonu o le fale eletise pe a uma ona faaaogaina mo le viliina o le eletise ma momoli sao atu ai lenei suavai i le vaega o lo o loloto ai le suasami ina ia foia ai le manogi lea o lo o mafatia ai le afioaga i Taelefaga.

Lau Afioga i le Fofoga Fetalai, ou te fia tautala i le taulaga o aoaoga i lou itumalo. Ua ou le aapa lava i le itu lautele, a ua tuliaupu lava se lagona ona o le fia faaoo atu i luma o lenei fonotaga mamalu mafatiaga o lo o feagai ma lou itumalo.

I le tulaga i aoaoga...

Malo faafetai. E usitaia pea lau Afioga i le Fofoga Fetalai, e ui lava ina o lo o tele pea se tapenaga aua foi le faamoemoe ma le manatu maualuga i le lauga faataupou, ae ui lava o lea, e le faia se loto; e alu i le ia a le tautai o le faalolo. Afai o lou finagalo lea, o le a tau ia ina oototo atu o nai mea pupuu ia ma faaiu atu ai loa se faamatalaga a lenei itumalo o Vaa o Fonoti.

E pei ona ou taua, na o se leo lava e faaoo atu ona o le tulaga lea i le isi mafatiaga tele o le tumalo o el tulaga i aoaoga. O lo o molimauna e le Ofisa o Aoga, o lo o

matou omai pea i le tele o aso ona o le mafatia tele o lenei itumalo i le tele o le faaletonu o lo o i ai aoga i totonu o le Vaifagalao. O ia faafitauli, e tulai mai lava ona o le tele o le faaletonu i faiaoga o loo autovaa atu i totonu o le itumalo. E tele le le faamaoni o le aufaigaluega o lo o aveatu, ma ua atili pau ai i lalo le tulaga o aoaoga a alo ma fanau o le Vaifagalao talu ai le le faamaoni. O lea foi ua ou faalogo ua o o lava i le Saunoa mai Samoa ua sulufai i ai nisi. Ou te manatu ma ou masalosalo, e le iloa po o se aoga i Fagaloa lea e ona le sulufaiga lea na o o i le Saunoa mai Samoa e uiga i le faaletonu o faiaoga.

Lau Afioga i le Fofoga Fetalai, o le itu maualuga ou te tilotilo i ai, o le tulaga i tupulaga i le faatumulia o aoga i Apia nei. Ou te iloa a fai se suesuega auiliili a le Afioga i le Miisita o Aoga ma le Ofisa o Aoga, masalo o se pasene maualuga o tamaiti e le omai na o i latou. A omai i Apia nei e aooga ai, e masii atoa mai ma le aiga atoa e sue lisi ma nofo lisi i totonu o Apia ma atili faatumulia ai le taulaga i tagata e le faigaluega. O lea mafuaaga, ona e le mafai ona tausavali mai tamaiti mai Fagaloa, e faaletonu auala. E mafai ona tausavali mai. O le isi lea agaga e uunai atu ai le atiaeina o auala aua e lata mai Fagaloa i lo Aleipata ma Falelatai, a o lea e tausavali mai tamaiti o Aleipata ma Falelatai i aoga i Apia ona o le lelei o auala. A o Fagaloa, a o o ina aoga le tamaitiiti i Apia, e le mafai ona tausavali mai Fagaloa, e masii atoa mai le aiaga e aumai e sue le lisi i inei i Apia e nonofo ai ma faaaoga tamaiti ia. Ua atili faatumulia ai totonu o faleaoga i Apia ma atili faatumulia ai le taulaga i tagata o lo o omai mai Fagaloa. Afai foi e le gafatia ni lisi e nonofo ai nei aiga, o le a tuuina mai nei fanau e nonofo i aiga ese.

O lea faafitauli, e tulai mai ai le tele o se faaletonu o le a i ai, aua o le a aafia gofie, ua motusia le mafutaga ma aiaga ma nuu ma matua a ua nonofo ese. O le toatele o ia tupulaga, ua aafia gofie i amioga le taupulea ua tele ina maua ai le vaega o tamaiti e motusia mai le mafutaga ma aiga ma matua.

O le talosaga la lau Afioga, se i silasila totoa i ai le Afioga i le Minisita o Aoga ma le Matagaluega o Aoga ia aveatu ni faiaoga. O le mea lea ou te maitauina nei, e pei e foliga mai, a faapea e faaletonu le faiaoga, e foliga o se faasalaga e ave ai le faiaoga i Fagaloa e nofo e faasala ai. Ua ou manatua le taimi o le Colonial System i le vaitaimi na faasala ai tagata mai Peretania i Ausetalia, e pei e faapena le uiga o le mea lea ua i ai nei faiaoga. A faaletonu le faiaoga po ua agasala ona ave lea e faanofo i Fagaloa. O le mea la lea e tupu mai, ua atili faaletonu ai; ae le o asiasea foi faiaoga.

O lea faatoa alu atu nei foi le Asiasiaoga lea faatoa tofia nei lea ua i ai le Afioga a Misa, sa i ai muamua ma tauaveina, sa manaia lona tauaveina ona te i lea ua faamatuu mai ua leai se Asiasiaoga. Ua tuusaoloto ai lava faiaoga ia, a momoe mai lava il e taeao e o o i le po, e leai ni aoga e faia, a o atu tamaiti usu pese. O isi tamaiti aoga, ua lipoti i matua, e omai i faleaoga e o e tui vae ma lomi vae o faiaoga, a uma usu le pese o i aiga.

O le agaga maualalo e talosaga atu ai, o le lumanai lenei o lenei itumalo. O le lumanai o Fagaloa lea e i

totonu o tupulaga ma alo aoaoina, se i silasila ane i ai ua fia maua se mapusaga, ua fia maua se faaolatotoga i tulaga o aoaoga i totonu o le Vaifagalao.

Lau Afioga i le Fofoga Fetalai, o le faatotogaina o nei faleaoga, o lo o tausaili i fafo. E faafetai i le Rotary Club i Apia ma le Rotary Club i Bendigo i Ausetalia, o lea na maua mai ai le fesoasoani mo le faatotogaina o nei faleaoga.

O maua ma le Afioga i le Palemia sa ma talosaga faatasi i le Rotary Club i Apia mo ni kesi ma nofoa a matou faleaoga. Ia atonu po ua faamanuiaina le talosaga a le Afioga i le Palemia i le Rotary Club. O lea foi ua maua le fesoasoani a le matou aoga, e auala mai i le Rotary Club i Ausetalia i Bendigo.

Lau Afioga i le Fofoga Fetalai, e faapea foi le tulaga i le soifua maloloina. Ua matua aloalosa i aufaigaluega a le Soifua Maloloina ona asiasi atu i Fagalao ona o le manumanuga, e mamao auala ma leaga auala, e le mafai ai ona faatino atoatoa. O falemai foi o lo o i ai nei i Fagalao, o falemai sa talosagaina i le fesoasoani a le EU. O lea e afio mai le Afioga i le Minisita sa avea ma Minisita o le Soifua Maloloina, Afioga Hon Misa Telefoni, sa ia tatalaina le falemai i totonu o Maasina e ala mai i le fesoasoani a le EU. E o o mai i le aso, e leai se isi o faigaluega ai, o lo o tu ai lava na o le falemai ia.

O le mea la lea, ou te talosaga atu ia malie, e faamalie atu ma talosaga i le Afioga i le Minisita o le Soifua Maloloina sina teine tausimai pasi e nofonofo ai i ina, aua o le falemai lea e i Maasina, o lea o lo o tausia Uafato, Samamea, Lona, Atoi, Maasina ma Taelefaga. E ono nuu o lo o tausia ae leai se fomai o i ai, sina fomai pasi tau ina talitali ai nai mea faigofie ae saili mai pea le fesoasoani i Apia nei ona o le faigata o auala.

Lau Afioga i le Fofoga Fetalai, o le a ou usitai i lau faatonuga. O le a taoto nisi vaega o fia o o atu i ai. O lea ou te le i o o mai i faafitauli o Faleapuna i le latou taligalu ma le auala e alu i tai i le aai ma o latou auala galue ma le anoanoai o nisi faafitauli o lo o feagai ma lou itumalo, ae faigata ona seu le manu ae tagai i le galu. O lea ua faalava foi le amoa i lau saunoaga, ne i manatu ua le usitaia lau poloaiga.

Ona faapea ai lea lau Afioga i le Fofoga Fetalai, se taimi ona o o atu lea o se manatu i le tulaga aoatotetele i le itu lautele o le Tala o le Tupe, faapea Samoa aoao. Ae ua fai lava le pou i Faleolo ae saili le ia a Leaosavaii ona o le talitonuga, ua mamao tele i tua le tulaga ua i ai si ou itumalo pe a faatusatusa atu i le tulaga siitia ma le tulaga atiae ua i ai isi itumalo ma isi vaega o le atunuu. E potu lava foi le tautai ae le atoa ia i lona sa.

E ui lava la ina o lo o i ai pea le tele o faafitauli o lo o feagai ma lou itumalo, a ua manatu o le a laolao se taimi ma maua se avanoa i lenei Paeaiga e faailoa atu ai lenei mafatiaga aua se fesoasoani ma le tali mai a le Afioga i le Palemia ma le mamalu i le faigamalo. O faafitauli ogaoga na lau Afioga ua faataatia atu i tafatafa o lau Afioga i le Palemia ma le mamalu o le Kapeneta e liliu i ai le tofa ma le faautaga. O le a matou tapuai ma talia lupe o mau, a taulu taulu to ni manu, ia viia le Atua.

Lau Afioga i le Fofoga Fetalai, o le a faaiu atu so matou leo. O so matou leo o le a foi; o se upu ua sala

ma se leo ua paopapa i le faafofogaaga a lau Afioga i le Fofoga Fetalai, le mamalu i le Afioga i le Palemia ma le Kapeneta ma le mamalu o lenei Palemene, aemaise le faafofoga tapuai mai a Samoa, ia ufiufi a manugase i sou finagalo faatupu faapea le alofa ma le agalelei o lo tatou Tama o i le Lagi.

Ia soifua ma ia manuia le Fono.

## Susuga LEE HANG, NIKO



### **Itumalo Faaalalafaga:**

*Palota Taitoatasi*

### **Filifilia:**

*29 Oketopa 2001*

### **Faatauto:**

*18 Tesema 2001*

### **Lauga Faataupou:**

*17 Ianuari 2002*

Faafetai i lau Afioga i le Fofoga Fetalai mo lenei avanoa taua ua e tuuina mai mo lau lauga faataupou.

Sa leai se manatu o le Sui Usufono o le a tulai i lenei taimi ae talitonu le Sui Usufono e malie foi le maimoa ma le faafofoga i se faafiafiaga umi pe a fai ma vavae foe. E pei foi ona saunoa lou uso a Sui Usufono o le Itumalo o Sagaga le Usoga i le aso ananafi, e fai ma vavae foe.

A ou te le i see atu la i lau folasaga faataupou, e muamua lava ona ou toe fia momoli lau faafetai i le Atua ma toe faafoi le viiga i le Matai Sili ona o Lona agalelei ma Lona agaalofa pea ia i te i tatou taitoatasi, ua mafai ai ona tatou aulia mai lenei Tausaga Fou i le manuia, aemaise lenei tofiga taua ua ou tulai ai nei o se tasi o Sui Usufono mai i le Itumalo o le Au Palota Taitoatasi, viia lava le Atua.

Lau Afioga i le Fofoga Fetalai faapea le mamalu lasilasi o le Palemene, o le a tafa i vanu ia lou tulaga ou te solituina ai sa ma tapu o le Maota nei.

Ae ou te le i asaina la le filifili o le vaosa o le Maota ma le tupualele o sasao nei, o le a muamua ia ona ou faapoipoi laau tumanu ma faatulou atu i le paia o le faafofoga tapuai o le paia lasilasi o le atunuu i le afio o Tama ma Aiga, Aiga foi ma a latou Tama, mamalu ia Pule ma Tumua, Ituau ma Alataua, Aiga i le Tai ma le Vaa o Fonoti. E faapea foi le tapuaiga ia Sua ma le Vaifanua, Ituau ma Alataua, Saole ma le Launiu na Saelua. Tainane le susu i le Laau na Amotasi, le afio o Faatui ma le mamalu i le Auvaa o Tootoo.

Ou te faatulou i le tapuaiga mamalu i le susu o lau Susuga i Le Tapaau Faasisina lau Susuga i le Malietoa e te ee i lou nofoa vaevaeloloa e faalogo ia oe Samoa, le afio o le Sui o le Fono a Sui Tofia lau Afioga i le Tama a le Fale lau Afioga Mataia Visiesio.

Ou te faatulou atu foi i le afio o lau Afioga i le Faamasino Sili ma le mamalu o le Ofisa o Faamasinoga, afifio le mamalu i Faaululuga o Matagaluega ma Faalapotopotoga Tumaoti a le Malo, ae tainane le afio o lau Afioga i le Failautusi o le Fono ma lou Ofisa mamalu - Tulou, tulouna lava.

A ou te le i sosofaina la le uluulu o le laau na i Pulotu, e ao ona ou faatulou atu i le paia i le tupua lenei o le Maota o le Faautugatagi a le atunuu lele e faamalumalu ai lau Afioga i le Fofoga Fetalai; afio ai lau Afioga i le Palemia; afio ai lau Afioga i le Sui Palemia. O lea foi e afio ai le paia lasilasi i Afioga i alii ma le tamaitai Minisita. Afio ai lau Afioga i le Taitai o le Itu e agaia le Malo, aemaise le paia tele i le afio i Afioga i alii ma tamaitai Sui Usufono o le Palemene o le Malo o Samoa. Tulou, tulouna lava.

E le mafai ona laaloa le tapuaiga paia i le susu o le Aufaigaluega a le Atua i so o se fata faitaulaga o lo faafalelemalu i afioaga ona o Lona finagalo - tulou. Ou te faafeiloai atu foi i faletua ma tausi, o saoa ma saotamaitai, le malosi o le atunuu, aemaise o le laumea toe nuti ma le talutalu fou o Samoa - talofa lava. O paia ia o le atunuu i le amata mai Faleulatautagata seia paia Fili ma Puletuu, na tauilo ai Malo.

O paia o le atunuu o le a nuunuu i Faleupolu o tofiga i le latou fatuaiga tausi aua paia o Samoa, ua o se fale e tulutulu i tao ua soo ona taiao, a o le aso o se pua e ula le alofa ma le agalelei o le Atua ina ua taitai mai lo outou soifua maua i le lagi e mama, aua e ui lava i se tofa i ina ma sou manatu, e ausaga le tuao o le alofa ma le agalelei o le Atua.

O lenei ua tinipao le uto e pei o le faiva i vai aua o lea ua aofia moli i le futiafu e tasi i Tiafau i le afio o Sui Usufono mamalu o le Palemene ma ua taunuu ai nei le upu a le Tusi: 'O se mea a lelei o uso ae nonofo faatasi, o le faamoemoe foi ua taunuu o le laau o le soifua lea'. O le alofa o le Atua o le a nuunuu ia i ana auauna aua se manuia o Samoa mo a taeao, a o le taeao lenei ma le aofia o le Palemene, e le o se lupemua e tau faailo, e le o se gafa foi o se fale e taulaga, o le filigatupetoa o le auaugamaa, o le filigaafa ma le mataigatila a le Maota e aoao manogi aua Samoa ma lona lumanai manuia. E ui lava ina punapuna a manufou le Sui Usufono ae o se motugaafa ma se motugamanatu e faaoo atu ai ni manaoga i le mamalu o le Au Palota Taitoatasi i le Laulau a Fono a le Palemene.

Lau Afioga i le Fofoga Fetalai faapea le mamalu o le Palemene, ae ou te le i tolaulauina atu manaoga o le Au Palota Taitoatasi, e muamua ona ou toe fia faamanatuina atu afioaga o lo o alaala ma papaaao ai le mamalu o le Au Palota Taitoatasi.

Muamua o le talafatai o Apia: Sogi, Talimatau, Elise Fou, Aelee, Aleisa, Savaii ma isi nuu i tua atu o le talafatai o Apia. Lau Afioga i le Fofoga Fetalai, e fai lava sina taapeape solo o nuu ma alaafaga o lo o afio ma papaaao ai le Au Palota Taitoatasi; e le pei o Itumalo o lau Afioga ma le mamalu o alii ma tamaitai Sui Usufono o le Maota.

O le a ou amata atu i totonu o le talafatai o Apia. Lau Afioga i le Fofoga Fetalai ma le mamalu o le Palemene, o le toatele lava o le mamalu o le Au Palota Taitoatasi o lo o papaaao ma alaala i totonu o le talafatai o Apia o ni tagata faipisinisi ma ni tagata faigaluega a le Malo ma ni kamupani i totonu lava o le taulaga i Apia. E talitonu lou Sui Usufono ua faamalieina le mamalu o le aufaipisinisi faapea le mamalu o tagata faigaluega ina ua uma ona toe

faapau i lalo lafoga mo kamupani aemaise lafoga mo tagata faigaluega i le tausaga 2000. E momoli atu ai lau faafetai i le Malo ona o ia faamamaavega e ala lea i le faapauina o lafoga mo le aufaipisinisi ma kamupani faapea ma tagata faigaluega lautele.

E maitauina foi e lou Sui Usufono le toe iloiloina e le Malo o tiute mo oloa mai fafo e fesoasoani atili ai pea i le mamalu o le aufaipisinisi aemaise o le atunuu lautele, malo faafetai. E lagona foi e lou nei Sui Usufono ua alagatatau ona toe iloiloina totogi o tagata faigaluega a le Malo ina ia talafeuga ma le siisi pea i luga o le tau o le soifua i lenei vaitau.

I le agaga faaloalo lava ou te tuuina atu nai manatu ia i lau Afioga i le Minisita o lo o fitoitonu ma lenei mataupu e auala atu i lau Afioga i le Fofoga Fetalai sei silasila ane i ai. O le mamalu o le Au Palota Taitoatasi o lo o alaala ma papaaao i totonu o Sogi e aafia tele lo latou nofoaga i le togatogo, tulou. Ua maitauina lava le aia o fanua e le sami ma e ono aafia ai maota ma laoa pe a le faia ni taligalu i se taimi vave lava. Ua logologoa foi le atunuu i le tomai o alo ma fanua o lenei afioaga i le taaloga lea o le soka – soccer - ae paga lea e leai se malae taalo i totonu o le afioaga.

Lau Afioga i le Fofoga Fetalai, o lo o i ai nei se fanua sa faaogaina e le pamu suauu o le Shell ma sa faaogaina mulimuli ane e le alii fai circus o Bruno e lokaina ai manu feai tulou mo ana faaaliga. O le talosaga a le Sui Usufono lenei, pe le mafai ona faaogaina e le afioaga lenei fanua mo se malae taalo e atinae ai tupulaga fai mai o lenei afioaga i lenei taaloga o le soccer faapea ma le lakapi. O le mamalu foi o le atunuu o lo o alaala ma papaaao i lenei afioaga o lo o fia maua ni fanua lisi mai le Malo mo ni a latou atinae. Ma le agaga faaloalo lava ou te tuuina atu ai nei manaoga mai le mamalu o le afioaga e auala atu i le Fofoga Fetalai ia outou Afioga i Minisita o lo o fitoitonu ma ia mataupu.

Talimatau: O le afioaga lenei ua tele ina faamalieina le mamalu o le Au Palota Taitoatasi i tulaga uma. Pau lava se manaoga o ni fanua mai le Malo e lisiina atu mo ni a latou atinae.

Elise Fou: O le mamalu o le Au Palota Taitoatasi o lo o alaala ma papaaao i totonu o Elise Fou o lo o manaomia tele ni fanua galue mo ni a latou atinae. I le taimi nei e leai se pulenuu mo Elise Fou lava ia ae o lo o pule mai e le pulenuu o Vaiusu.

Lau Afioga i le Fofoga Fetalai, o Vaiusu o se nuu i totonu o le Itumalo o Faleata Sisifo. A tufa faamanuiaga mo atinae e le oo le faasoa mo Elise Fou ona o Elise Fou o le talitonuga o se nuu palota mo le Au Palota Taitoatasi. Ma le agaga faaloalo lava ou te talosagaina ai a oulua Afioga i Minisita e auala atu i le Fofoga Fetalai, se i silasila ane i mataupu ua laga aua se fesoasoani mo le Au Palota Taitoatasi o lo o alaala ma papaaao i Elise Fou.

Aelee: Lau Afioga i le Fofoga Fetalai, o le afioaga lenei o Aelee o lo o mafatia tele i le le maua o se vai taumafa i le tele o taimi. O le mamalu foi o lenei afioaga o lo o alaala ma papaaao i fanua o le Ekalesia Metotisi. Ua maitauina foi e lou Sui Usufono le manaomia o ni fanua a le Malo e tuaoi ma Aelee mo le galueaina e le mamalu o

le Au Palota Taitoatasi o lo o alaala ma papaaao i totonu o Aele mo ni atinae.

O lo o manaomia foi ni telefoni aua fesootaiga ma aiga i nuu mamao aemaise o totonu lava o le atunuu. Ua ou maitauina foi le manaomia o ni fanua o le Malo e tuaoi ma fanua o le Ekalesia Metotisi mo se faleaoga mo alo ma fanua laiti i totonu lava o le afoioga faapea ma se malae taalo mo tupulaga talavou.

I le faaaloalo lava ou te tuuina atu ai nei manaoga i lau Afioga i le Minisita o Galuega mo le faaleleia o le suavai taumafa, faapea lau Afioga i le Minisita o Eleele mo ni fanua mo atinae, faleaoga ma se malae taalo. Aemaise o lau Afioga i le Minisita o Aoga mo se fesoasoani mo se faleaoga mo Aele.

Aleisa: O le suavai taumafa, ua maitauina e lou Sui Usufono le tulaga mafatia o nisi o le mamalu o le Au Paota Taitoatasi o lo o alaala ma papaaao i nofoaga mauululuga i totonu o Aleisa i le le maua o se suavai taumafa i taimi uma. O lo o i ai vaega o Aleisa e pei o nofoaga lalata i aualata o lo o lelei le suavai taumafa ae o lo o mafatia aiga i nofoaga mauululuga i le agai i uta.

O Telefoni: O Aleisa foi e leai ni telefoni mo fesootaiga faavave ma aiga i le taimi nei. E momoli atu lau faafetai i lou uso a Sui Usufono le Afioga i le Minisita, Susuga Hon Keil ona o lea ua ou mauaina le kopi o lana fax mai le Matagaluega o Fesootaiga e faailoa mai ai le faamuamua mo Aleisa pe a taunuu mai masini fai telefoni mai atunuu i fafo o lo o tataliina nei.

O Auala i Aleisa uta: E manaomia tele le teuina pea o auala nei pe a maea ni timuga tetele. Ona o le utiuti o le seleni mo le faatania o lenei auala o lea e faatalosagaina ai lau Afioga i le Minisita o Galuega e auala atu i le Fofoga Fetalai mo le teuina pea o nei auala pe a uma ona faaleagaina e timuga tetele aemaise o lenei vaitaimi.

Fanua: O le isi lenei mataupu sa laga mai e nisi o le Au Palota Taitoatasi o lo o alaala ma papaaao i lenei afoioga e faasino tonu lea i fanua o lo o lisiina atu e le Malo mo a latou atinae ma faatoaga. O le talosaga e tuuina atu i lau Afioga i le Minisita o Eleele, Fuagafanua ma le Siosiomaga e auala atu i le Fofoga Fetalai mo se fofo mo lenei mataupu ua loa ona faatalalanoaina e tusa ai mo le umia saoloto e le mamalu o le Au Palota Taitoatasi o lo o alaala ma papaaao i nei fanua o le Malo i totonu o Aleisa. Savaii ma alaalfaga i tua atu o le talafatai o Apia. E leai ni manaoga faapitoa mai le mamalu o le Au Palota Taitoatasi o lo o alaala ma papaaao i Salafai ma nuu ma alaalfaga i fafo atu o le talafatai o Apia.

E talitonu lou Sui Usufono e tasi lava se manaoga taua lava, ina ia maua atili pea ni faamamaavega i le tau o le soifuaga mai lea taimi i lea taimi.

Lau Afioga i le Fofoga Fetalai, i lou tulai manumalo mai i le Faiga Palota laitiiti, by-election, sa faia ia Oketopa i le tausaga na sei mavae atu nei, ua ou maitauina ai ma le popole le faatauaaina e le mamalu o le Au Palota Taitoatasi i e sa le faia a latou palota i le Faiga Palota a le atunuu. E fai lava sina toatele o le mamalu o le Au Palota Taitoatasi sa le i palota i lea Faiga Palota laitiiti.

Lau Afioga i le Fofoga Fetalai o lau fesili ma le agaga faaaloalo lava. E i ai ea se Tulafono e faamalosalia ai

tagata palota faamauina e faatino ai a latou palota? O le isi au fesili ma le agaga faaaloalo lava, e faamalosalia ea le tagatanuu ua atoa le 21 tausaga e faamauina mo Faiga Palota a le atunuu?

I lou faaaloalo tele lava ou te talosagaina ai lau Afioga i le Minisita e fitoitonu i ai lenei mataupu e auala atu i lau Afioga i le Fofoga Fetalai, se i silasila ane i ia tulaga aua se Tulafono ina ia faamalosalia ai tagatanuu uma ua atoa le tai 21 tausaga e faamauina ma palota i Faiga Palota a le atunuu.

Lau Afioga i le Fofoga Fetalai, o le a le faaumiumia se lauga ae o ni manatu e lafo atu i lumamea i le Laulau a Fono i lau Afioga i le Palemia ma le mamalu o le Kapeneta, sei alofagia le tagi a le pumate i manaoga o le mamalu o le Au Palota Taitoatasi.

E avea foi lenei avanoa ou te molimoli atu ai lau faafetai tele i le mamalu o le Au Palota Taitoatasi i la outou faaeaea ma la outou puleto, lea ua ou nofo ai nei i maa o malie e fai ai au ma ou leo i Upufai a Malo. Ou te talitonu e le o se faaiuga faigofie le tofa ua ae i lo outou mamalu, o lea ou te faafetai atu ai i lo outou talitonuina o lou nei tagata ma la outou faatuatua. Pau le upu ou te gagana atu ai, faafetai pule, faamalo le faaeaea. O le a ou taumafai i se malosi e oo atu i ai lou tagata e tauave lo ta Nofoa i totonu o le Palemene i le fesoasoani mai o le Agaga Paia o le Atua.

Lau Afioga i le Fofoga Fetalai, o le a faamuta mai i i sau tautalaga. Ou te faamalulu atu ai i lau Afioga ma le mamalu o le Maota Fono pe afai ua i ai se upu ua laavale i le Maota aemaise o le faafofoga tapuai mai a Samoa. Ia malu le vai ma ia vaatele i lou finagalo faatupu ae tau ina alofa le Atua ia tulimuliauina le Tauaofiaga i le aso. Ia aua nei oso le peau lagavale, aua foi nei matagitogaina lo tatou sa i le aso.

O se taimi o le aso tau i le Tauaofiaga ma fou tuua i aiga ma afoioga ia mamao ni tagutugutu o le ala ia outou Afioga.

Ia lagimaina le faasausauga ma le tapuaiga mamalu a le atunuu ae ou ola i le alofa o le Atua. Soifua ma ia manuia le Fono.

## Tofa LEPOU PETELO II



### **Itumalo Faaalalafaga:**

*Faleata Sasae*

#### **Filifilia:**

*2 Aokuso 2002*

#### **Faatauto:**

*6 Aokuso 2002*

#### **Lauga Faataupou:**

*17 Iuni 2003*

Faafetai i lau Afioga i le Fofoga Fetalai ona ua tuu mai foi i le Usugafono a lenei Itumalo.

E muamua ona momoli le faafetai tele i lenei foi itula afiafi ma o le a le toe paopaoina faatupe o lafoga le paia ma le mamalu o le Maota o Samoa. Leai, o lea ua ao uma lava paia o le Atunuu i totonu o le Maota lenei aua le afio o lau Afioga i le Palemia, Sui Palemia, afio foi a outou Afioga i Minisita o le Kapeneta faapea foi lea Itu

o le malu i le afio o le Taitai o le Itu Agai ma le Sui Taitai, Afio lau Afioga i le Tama Aiga aemaise o le mamalu o Sui Usufono o le Palemene o Samoa. E faapea foi ona oo atu le faafetai tele i lenei itula o le afiafi ua tu leva le po i le tapuaiga i Le Ao o le Malo, Susuga Malietoa Tanumafili II. E faapea foi ona faatulou atu i le Sui o le Fono a Sui Tofia, Faamasino Sili ma alii o le Faamasinoga, tainane le paia maualuga i le Aufaigaluega paia a le Atua o lo o latou tatalo i le ao ma le po aua se manuia o lenei Palemene.

O le a taoto ia paia aua Tumua ma Pule, Ituaau ma Alataua, Aiga i le Tai ma le Vaa o Fonoti, o le fatuaiga tausii lea ae o le a agai i se faamatalaga e tusa ai o le Tala Faatatau o Tupe i lenei afiafi.

E muamua ona momoli le agaga o le faafetai i Afioga i le Minisita o Tupe e ui lava ina fesouaina foi lenei aso ma le aso ananafi ae maitauina pea le toa pea o le tai i lau Afioga i le Palemia ma Afioga i Minisita. Fai mai foi le upu “a le sua uta, sua tai e le maua se mea lelei”, ae ia lava foi le onosai. E faafetai ai lenei Sui Usufono o lenei Itumalo i lau Afioga i le Minisita o Tupe e tusa ai o le Tala Faatatau o Tupe i lenei foi vai tau.

Faafetai foi i le Taitaifono o le Komiti o Faamatalaga o Tupe a le Malo ma le mamalu i le Komiti, tainae foi le Failautusi o le Matagaluega o Tupe ma le Matagaluega i le latou foi galuega maea e lagolagosua atu i le Tala Faatatau o Tupe. Ou te faafetai foi i le Kovana ma le Faletupe Tutotonu o Samoa i le tele foi o lo latou sao i le lipoti mai o le tamaoaiga aemaise o faaeleeleaga a le Atunuu i lea masina ma lea masina. E faapena lava, o taimi lava e lelei ai, ae e i ai foi taimi e leaga ai. O taimi foi e... ae tele lava i manū ae itiiti upu i mala e faapena lava le soifuuga. E pei lava ona maitauina i taiala aemaise foi le faamatalaga o le tamaoaiga o le Tala Faatatau o Tupe.

E i ai sina vaega o lo o maitauina ai le saunoaga a le Afioga i le Minisita o lo o faapea mai o le tausaga e 2000 ma le 2001, e faamalosi ai le faatupulaia o le tamaoaiga o le Atunuu.

Atonu lava o le Paeaiga ma le tausaga lava lenei o le Paeaiga o lenei foi Faigamalo ona faamauina ai lea o le siitaga e 6.9% mai le 6.2% o lo o faatulagaina. Ona agai mai ai lea i le pito i lalo i se faamatalaga i le ono masina muamua o le 2002/2003 e \$3.6miliona e sili atu ai le tupe maua nai lo o tupe ua faaalu. O se agaga lelei lea e ui lava e le o tele naua a o lea lava e solosolo lelei le tamaoaiga o le Atunuu. O lo o manino foi le saunoaga a le Taitaifono o le Komiti o Faamatalaga o Tupe o lea lava e i ai le faamatalaga lea e agai mai i Matagaluega ma le faasoaa aemaise le lufilufilima lelei a lau Afioga i le Minisita. O le a ou le faaaogaina lea upu “o le faasoaa faale-Atua” ona o le mea lena e gata lava i le Aufaigaluega latou foi fautuaga ia i tatou o le Palemene, a o le faaupuga lea e tataua ona aveatu i lau Afioga i le Minisita o le “faasoaa lima lelei” po o le “lufilufi lima lelei” e pei o upu e fai i le tamaloa o le Anoamaa, faasoaa lelei aua Matagaluega. Ia tofufufusia le Matagaluega ia, a o lo o agai mai ai ma se isi faamatalaga o lo o i ai tupe faaagaga, o le mea sili lea

ona taua i le vaavaai i ai i le Tala Faatatau o Tupe, e taua tele.

O le a agai atu se faamatalaga i finagalo ma talosaga a lou Itumalo. O le a lē agai se faamatalaga i le Polenisia ua tele foi saunoaga a lenei Maota ua tuanai i le Polenisia. Ia te au lava ia ou te lagolago tele i le Polenisia, e taua. Sa i ai le faamatalaga, o au foi sa usufono i fafo, o le tele o usugafono a isi foi motu o le Pasefika ae fesili mai pe i ai se tatou vaalele, o’u tali “i, e i ai le vaalele” o le Afioga i le Sui Usufono mo Vaimauga Sisifo sa saunoa i ai i lea foi Sui Usufono, ae tali mai e laitiiti o latou tamaoaiga nai lo Samoa. Sa saunoa i ai le Sui Usufono mo Vaimauga Sisifo o tatou e matua i le Pasefika o se mea lelei lea pei e ofofo foi ia Sui Usufono ae o se agaga foi lea e mitamita ai le taofi i le tatou vaalele. O le mea lea ia faaauu pea le tatou galuega lelei. O le a agai se talosaga a lenei Itumalo i lau Afioga i le Minisita mo Galuega. Ia atonu ua uma ona ou lauga i la’u lauga faataupou ae suamatamuli foi le taofi i le tele o saunoaga a Sui Usufono o lo o momoli le faafetai i lau Afioga i galuega lelei ua faia mo latou foi Itumalo. Ae na ona faamanatu atu faapena leaga ua ta feiloai a o lea lava ou te faatali i se taimi e avanoa ai, e mafai lava ona ta o se i ta asiasi. E silafia foi e le mamalu o le Palemene ma a outou Afioga, o Faleata ma le Vaimauga o lea lava e afio ma outou papaaa ai i Itumalo nei. E tataua lava ona ave i ai le faamuamua i mea o lo o faapena ona talosagaina. O auala, o le suavai, o le eletise, aua o lea lava e i ai seleni ia e faaagaaga mo ia foi vaega.

E i ai auala ia e faatagisia, atonu e le o sau i le Tala Faatatau o le Tupe, ae le uma ai le faiaso. O auala sima ia e i ai Vaimoso e fai ma auala alo o le Atunuu, a o’o lava ina tetele uaga ma timuga, ua fai ma alofaga o le mamalu o le Atunuu, se i silasila i ai pe le alagatatau ona fai ai se fuafuaga a lau Afioga. O le auala foi lea e i gauta atu i i e agai i le malae lea e tapuvaetasi i ai taaloga a le Atunuu, o le auala sima e fai si vaiti o le auala, aemaise foi o le auala laupapa o le feagaiga tuai i le taimi foi lea o Siamani.

Se i tau fuafua i ai lau Afioga i le Minisita ma le Faigamalo, ae moomia foi ni moli i le auala (street lights) aemaise o le agai atu lea i uta i Moamoa ma tua i le faleaoga lea o le Itumalo. O nei aso ua tele tupulaga foi ia o lo o nonofo solo i totonu o le Itumalo nei ae le o asa lava ma faalavelave. O le tatalo atu lea i lau Afioga i le Minisita, aemaise o lea foi e faatauaina e le Malo tagata tafafao maimoa mai fafo i lo’u auala lea, leaga o le nuu nei e fai le mataaga foi lea e faasee ai papalagi pe a agai mai fafo. E taua tele le mataaga a o le auala e le manuia. Na ona tuu atu i tafatafa o lau Afioga, aemaise o le faatanoa vai la e i ai, ua le toe faaaogaina. E tatalo atu i lau Afioga o lea pe toe lima pe ono ni nai paipa foi ia e faaoo atu ai i luga i le atinae le suavai faamolemole, na ona faataatia atu i tafatafa o lau Afioga.

A silasila foi i ai i le timuga ma uaga ia na uma atu, o le mea lea ua maitauina i le Itumalo lenei, o le alatele o le auala lea o le vai, ua le toe agai i tua i tafaala ma mea foi ia sa masani ai aso ia. Aua foi ua agai ae aiga ua aveifo maa ua fai ai o latou auala e agai atu ai i aiga taitasi, o le

ala lea o le sau o le vai ua agai mai luga o le alatele ua le toe agai i tua. E te silafia lava i le agai atu o lau Afioga i uta ma toe agai mai i tai pe afai e faaletonu le tau. Na ona tuu atu i tafatafa, ae a e fia maua foi se fesoasoani, o 'au e fai si malamalama i le vai lea e agai mai Tuaeifu, ona ou fesoasoani atu lea i se isi metotia lau Afioga, leaga o 'au ua leva ona ou faigaluega i galuega faapea ua lava foi le malamalama, ae tuu atu i ou tafatafa pe a fia maua le fesoasoani.

Ou te faafetaia lau Afioga i le Minisita mo le Soifua Maloloina i le galuega fita i le Faatonusili ma le Pulega o le Matagaluega i la outou galuega i le ao ma le po aemaise o le mamalu o le Atunuu. E lagolago tele e lenei foi usugafono le faaauau pea e le Malo o le tautua lelei aua le soifua o le atunuu o lo o auina atu i fafo mo a latou togafitiga, e lagolagoina tele lea vaega. Na pau lava le fautuaga i lau Afioga i le Minisita, o taimi foi lenei mo uta i le falemai, aemaise lava luga i le Ward 8 ma le Acute 8, e pei e le o malutia tele le puipuiga o i latou foi nei e vaavaaia le Maota Gasegase i le taimi o le vavao, e pei ua le toe mamalu tele lea vaega. E vaaia ai le tele o tamaiti, ailoga e o i ni aoga, e pisapisao i totonu o le falemai, a o'ona faapena ona taotoo gasegase, se i silasila ane i lea vaega o le falemai ma le malupuipua, aemaise foi o le po, ia lava tagata foi nei latou te leoleoina le falemai aemaise foi o totonu o potu o lo o faapena ona faataotolia ai le tele o gasegase i nuu i tua. A o mea uma lava ou te momoli atu le faafetai i lau Afioga i le Minisita.

E fautuaina lau Afioga, ua e silafia lava foi lea manu faalafua a le lava le aufaigaluega latou te faatinoina le galuega, ina ia vave ai ona foia le faafitauli, aua a silasila foi i ai a o'ona fofoa le manu fafine, toetiiti lava oo i le 100 mea e maua mai ai i le manu e tasi. E fai si vave tele o le faatupulaia o le aviivii. O le mea lea ou te tatalo atu ai i lau Afioga ma le fautuaga, a le lava le aufaigaluega ia faaopopo nisi leaga o le tamaoiga lea o le Atunuu o le popo aemaise o mea faapena i faatoaga.

Ou te tatalo atu foi mo le tele o nisi o le aufaifaatoaga, o le ala lea o le aumai o le Lipoti e faaletonu le tatou maketi i Savalalo. Ou te le iloa po o le Afioga i le Minisita mo le Soifua Maloloina e agai i ai le mataupu lea i le maketi. Sa ou faapea e le toe tatalaina le aufaisefe foi lea e i le maketi. Sa ou faapea e le toe tatalaina le aufaisefe ia e i le maketi, tasi ia tagata se i silasila i ai le Matagaluega. E i ai le vaitaimi sa ou agai mai ai i le maketi, e le mama lelei le mea o lo o gaosi ai taumafa a le atunuu, ae fetau lava ma le lologa lea sa i ai. E na ona tuu atu i tafatafa leaga ua pau ia te a'u a o lea ua toe faamanatu atu i lau Afioga.

I le Malo, se ua ou manao lava e fai se Tulafono i mea nei o Fale Piliati e fai i le maketi, leaga o i lea e agai mai ai le tele o alo ma fanau o la e tuu mai e matua o la e o i aoga ae le aoga. Na tupu foi i lo matou Itumalo i faleaoga, e lua vaiaso o la e tuu mai e matua o lea e o i le Aoga, a o lea e piliati i le maketi. Ia fai se Tulafono foi lea e tapu ai le piliati se i tatala i le 12.00 ae o uma le aufaavevela alofi lea e i ai i le maketi e o e toto se taamu ma se talo ma se fai, a iloa loa ua afa le aso ona sau lea i le maketi. E lelei ona tuu atu i tafatafa o le Malo e fuafua

lelei foi lea vaega i le maketi, aua o le ala lea o le pau i lalo o a tatou fua o faaeleeleaga ona o le mea lava lenei o lo o fai e le isi, e agai mai tua i le pasi ona sau lea nofonono i le maketi ae leai se mea o totoina i le aso atoa.

O le fautuaga lea i lau Afioga i le Minisita. Ou te talitonu e tele mea o lo o fia talanoa pea i ai ae ua utiuti le taimi ae āva foi i lau Afioga ma le faatonuga.

O le mea lea, ia faafoi manu le taimi o totoe o lenei afiafi, ia talosia ia i le agalelei o le Atua e taitai mai lo outou soifua ma so tatou ola i le aso fou. Ia manuteleina le Fono a le Palemene o Samoa ae matou ola.

## Tofa LEVAA SAUASO



### **Itumalo Faaalalafaga:**

*Aiga i le Tai*

### **Filifilia:**

*12 Mati 2001*

### **Faatauto:**

*15 Mati 2001*

### **Lauga Faataupou:**

*18 Iuni 2001*

Fai mai le siufofoga mai le lagi: "Mose, tatala ou seevae ua sa le eleele lenei."

Lau Afioga i le Fofoga Fetalai ma le mamalu o le Maota, a o le i faia se upu e tusa ma le avanoa ua aumai, e momoli atu le agaga faafetai tele. Faafetai i Sui Usufono mamalu uma sa saunoa i le aso analeila ma lenei foi faaletuaso. E faapena lava le gasologa o faigamea a le atunuu, a leai se lape o se lauga, e le manaia. O le mea lea e tau o lape o lauga. O le ala foi lea sa tuufesili ai lo'u sui usufono po o fea tonu lava le taimi e tatau ona ou ta ai? Aua a fua i ai i le Maota lenei, e tatau ona ou tamua, pe tatau foi ona ou faaiu mea, leaga o fea le mea e fai i ai le faalupega o le tamaloa lea e tu atu? O le Feagaiga e tasi a Samoa. Ae peitai la ua ou tu atu, ua tatau ona ou ta leaga o lea ua siisii le tai, leaga o upu e fai i le Faletuamasaga: "A sala Malie ma Vaitoelau ua too ao o le savili." O lea la o le a amata too le savili.

Lau Afioga i le Fofoga Fetalai ma le mamalu o le Maota, ua uma ona e malele i le taeao ua sola ma ua fati sisina ai nei peau o le taeao ma le aso ma le faaletuaso. Ua e fai foi le manu ae logo i le vateatea e pei o le fetalaiga ia Tuiatua Leoo. Ae ua femolimauai ai nei le la ma le masina ma fetu o le lagi, aua o lea ua fetalai ma ua lagifetalai ai lo outou soifua ma lo matou ola. Ia tau ia ina ia manogi ma sasala i le faafofogaaga a le Matai Sili le taulaga osi ua uma ona e tapena i le taeao ua sola, ma ia noanoa la i maea le taulaga ina ia oo i nifo o le Fata Faitaulaga, aua o lea ua paia ma mamalu ai Tiafau o le Maota o le faautugalagi a Samoa.

Lau Afioga i le Fofoga Fetalai, tau ia ina ou faapoipoi lili'a ma ou see tuafaina atu i i e pei o le fetalaiga i le alofisa o Malietoa ma Tuimanua, ne i alu loa le vaa o le tamaloa o Aiga i le Tai ae se i ou afea lape o le Maota Fono o Samoa, leaga e faigata o Samoa o le aomamala, o le ua e faalaofiegatea.

Ou te muai faatulou atu i le paia o le Maota. Lau Afioga i le Fofoga Fetalai, ou te faatulou atu i lau Afioga i le Palemia ma lau Kapeneta, a outou Afioga i Alii ma le Tamaitai Minisita, ou te faatulou atu i lau Afioga i le Sui Palemia. Ou te faatulou atu foi i le la Itu o le Maota i le la tala na atoa i lau Afioga i le Taitai o le Itu Agai ma lau Afioga i le Sui Taitai. Ou te faatulou atu i sui usufono mamalu uma o le Palemene o le Malo Tutoatasi o Samoa, a outou Afioga i Alii ma Tamaitai sui usufono, o lupe na fā'ia mai i le fuifuilupe a le atunuu tou te lufilufiina Upufai o Samoa ma lona Malo.

Ia ee ia i o outou seetaga malu ae se i liliu ane le sui usufono mo Aiga i le Tai aua e faigata le tapuaiga a Samoa. Ou te faatulou atu i Lana Afioga mamalu o le Ao o le Malo Tutoatasi o Samoa, lau Afioga i le Tapaau Faasisina, Susuga i le Malietoa, e te Afio i lou tala na atoa ma lou fala na folaloa, e te ee ai i lou nofoa vaeaeloloe ae faafofoga ia te oe Samoa.

Ou te faatulou atu i lau Afioga i le Sui o le Fono a Sui Tofia, lau Afioga i le Tama a le Fale, e faapea foi le Tupufia ma le Alo o le Malietoa ae puipui e lo latou toafa ma Faleata.

Tulouna ia lau Afioga i le Faamasino Sili, Patu Tiavaasue Falefatu Sapolu, aua le Afio o le Matua ia Tofaeono, Asi ma Patu, ae a i Laua na Tai ae puipui e Fuata ma le nofo a ituaiga. Ae a liliu i le la Itu o le vai, e tatau foi ona ou faapea atu, leaga e faigata le Alaalagafa ma le la Nofo, le Tauaga Eseeese ia Falealili. O paia na ma mamalu.

Ou te faatulou atu foi aua le afio o Aiga ma latou Tama, o Tama foi ma Aiga, Aiga o Tupu, Aiga o Nofo, Aiga o Papa, Aiga na tafaitoa ai Samoa, ae puipui e Tumua ma Pule, Itua ma Alataua, Aiga i le Tai ma le Vaa o Fonoti. A lea ua paia ma mamalu ai Maauga ma Nuausala e afio ai le Tuiaana ma ona tafai, o Umaga ma Paseese ae puipui e le Toaiva ma le Matuanatogi, ae a Aiga e fa ma Launafau, Leulumoega ma Saeseese ma upu ia te oe le Tumua. Ia tulouna ia Mulinuu ma Lalogafuafua ma Sepolataemo e afio ai le Tuiatua ma ona tafai, o Tupai ma Tainau, afio Seutatia i Mulinuu faapea Tapaulefano, Lufilufi ma le Saofaiga, ae a le Toaono, ae a Iu o Atua ma Ao o Atua ma Atualetonu ma Atua Auliuli. Ia tulouna ia Malie ma Vaitoelau e afio ai le Gatoaitale ma ona Tu'itu'i o Fata ma Maulolo, ae a Aiga, Tuisamau ma Auimatagi ma lo oulua Sa na tautailua.

Tulouna ia Tanumafili e afio ai Vaetamasoalii ma ona Tu'itu'i, o Fuga ma Mauava, ae a le Faauluuluga o Sa Tunumafono, ae a le paia o le Faleono ma le Atigaga ma le Itutolu o Sagaga, o Faleata ma lou gafa. Ia tulouna ia.

O lenei itumalo e paia, o le itumalo lea o Aiga i le Tai, leaga o le itumalo e susu ai le Feagaiga e tasi a Samoa, o le uluai pou o Malo, e susu ai lo outou Toafa, susu ai le Alo o le Malietoa ma le Tapunuu ma Aiga ae puipui e Auapaau ma Futi, o Sauma ma Lautolo.

Ou te faatulou foi aua le paia o Ulualofaiga ma Aiga e lua, o Salevalasi ma Sa Fenunuivao, o Usoalii ma le gafa ma Alosina, ae a le mamalu i lo outou Toafa ma lo outou Matua Talamaivao, lau fetalai Molioo ma e na taitai i Atua o le Fauono ma oe le Vaa o Fonoti.

Ou te faatulou foi i le paia o Puleono i Salafai. Ia tulouna ia Fuifatu e afio ai Tupu na tausii, afio ai Aiga, ae a i laua Tama Pule, Safotulafai ma lou Faasaleleaga. Ou te faatulou foi i Vaituutuu e afio ai Aiga ma Tootoo o Vaituutuu, ae a oe Saleaula ma lou Gagaemauga. Ia tulouna ia o Finao aua le paia i Aiga ma le Alii o le Itu, Safotu ma lou Gagaifomauga. Tulouna ia oe Matiamatiaitua e afio ai Aiga, le Falefia ma le Falesalafai, ae a lou Gagaifomauga. Tulouna ia Vailoa e afio ai le Faasisina ma Sa Lilomaiava, ae a le Levaleva ia Safaleletaua, Palauli ma lou Itu.

Tulouna ia o Faletoi aua le Aiga Samoeleoi, o le Vaiti ma le Vaimalae, o Satupaitea ma lou Itu.

Ou te faatulou foi aua le tapuaiga a o tatou uso ia Tutuila ma Manua. Afio ia lau Afioga i le Kovana Sili, afio lau Afioga i le Kovana Lutena, afio lau Afioga i le Peresetene o le Senate, lau Afioga i le Fofoga Fetalai ma le mamalu o Maota e lua.

O paia ia o lou Faleagafulu, aua Sua ma le Vaifanua, o Fofu ma Aitulagi, o Saole ma le Fagalao o Itua ma Nofo ma le Launiu na Saelua. Ou te faatulou foi aua le Laau Amotasi, afio Alii Faatuiolemotu, Afio Usoalii ma le Matua o Tootoo ma le Auvaa o Tootoo.

Ou te faatulou foi i le tapuaiga tatalo, le tapuaiga a lē o lo o tuleiama nei i le ao ma le po o le po ma le ao, o Taitai o Ekalesia Soofaatasi, o Taitai o Ekalesia Kerisiano uma o Samoa i Sasae ma Samoa i Sisifo nei. Malo faafetai i la outou tatalo. O le a le fitifiti, o le a le siisii, ua uma ona malele le Malietoa; 'Samoa, o le aso nei o le a ou fultua i au fili ma au tupua, o le a galulue faatasi Aiga, o Pule ma Tumua ma le galuega pele a le Atua. O outou mama na, ia outou manatua le Palemene o Samoa.' Fai mai upu a tuaa ua mavae; 'Sole, o le Maota o Samoa o le Maota e tulutuluitao ua soo ona taiao, e leai se isi e toliniu fitifiti i ai.' Leaga e a? E leaga e mamala. So o se sui usufono lava vaeatu lou gutu ma le afi ma le upu e to ia Manono e tapena mai i le Maota lenei, ua uma ona tapena, leaga o Samoa ua uma ona tuulaupua ana mea, ua tapena mea a le manaia, ua iloga mea a le tausala.

Lau Afioga i le Fofoga Fetalai, avea ia o lenei avanoa se i ou faafetai ai i lo'u itumalo na latou filifilia maia ita. Ia talofa ia lo'u itumalo, lo'u itumalo e paia ma mamalu, leaga o oe o le Feagaiga. Ia, le paia i lo outou Toafa, Susu Leiataualesa, o lau fetalai Futi o oe o le moanafanatau i auloe pe a sauni tau Manono. Le Matua ma Sa Mutimuti ma oe Sa Leiataua. Susu Leiataualetaua, le Falelima o Alo o Sapapa, le Matua ma le faletolu. Susu Taupau ma Mulipola ma le Tapunuu ae faafaiilele e le fetalai ia Auapaau o le moa na muamua vivini ia Manono, ae a Salua ma Satuulagi, Susu Tuilaepa - e leai e le o lau Afioga i le Palemia. Susu Tuilaepa o le Alo o Malietoa, le Matua ma Usoalii ae puipui e le Pologama.

Lo'u nuu e, sa outou manao ou te sau. Susu le Aiga o Sa-Sa'u ma la outou faaaloaloga. Susu lou seetaluma ma Usoalii, ae puipui e Sauma ma lau fetalai Levaa o le Tuua.

Ia, tulouna ia Faimata e Susu ai Alo o Malietoa, Susu Usoalii o Fuaolefau ma le Pouli, Susu le Faatei ma le

tama faalogogata lea o Taimalelagi, ae puipui e Ati ma Lautolo.

Ou te faafetai i lau Susuga i le Toeaina, le Sea ma lau Afioga Patele ma le Aufaigaluega Paia a le Atua i Fata Faitauga e fia i lo tatou itumalo; faafetai tatalo, faafetai tapuai. Pe sa outou palota uma ia te au pe leai, faafetai le galulue, ia faamanuia le Atua ia te outou, e faapena foi le lavaloa o le tatou itumalo. Faafetai i la outou faaeaea.

E le galo ia te au ona ou faafetai i le uso sa tulai mai lau fetalaiga Vaatiuola. Faafetai tele lava mo le tauaveina o le Nofoa o le ta itumalo i lea foi Paeaiga ua mavae atu. Malo le onosai, faafetai le faatoatoa. Ou te manatu o mea uma lava sa e avaavau i ai ma e fagota ai, o lea foi o le a ou fagota au, leaga o le ta itumalo e i ai le upu e fai i le tamaloa foi lea sa alu atu ma lana tili manini; 'e te au i le fagota, e te au i le tauola.'

Lou itumalo, o lea ua fagota le toeaina, ia tapuai mai la ma le ta ola ae o le a ou fagota. A ou tuumaulu, tuumaulu foi a'u ua ou le au i le alititai e maua ai se i'a o lau ola ma lau tapuaiga, e i ai le upu e fai i le uso tamaitai foi lea i Salafai; 'e uso a leai ma fīu e faatali mai.' Ia tapuai maia lo'u itumalo aua tou te popole. O le ala tonu lava lea na ou le faia ai se folafolaga i lo ta itumalo, e pei lava ona ou fai atu, e leai. E tasi lava le folafolaga e taua i lo'u loto, afai tou te faitau i lo'u taimi e pei ona ou fai atu, e tasi lava lo'u faamoemoega na o le Atua, aua foi o lea ua tulai mai le faigamalo lea, o le faigamalo lea e faavae i le Atua, ae vagana lava ona ua leai.

Lau Afioga i le Fofoga Fetalai, a o le i avatua la le anavatau a lenei itumalo, se i fai muamua lava se faafetai a lenei itumalo i le faigamalo na se i mavae atu nei. Faafetai i lau Afioga i le Palemia ma lau Kapeneta, faafetai i sui usufono mamalu uma o lenei Maota sa outou lagolago ma soosootauau i le faigamalo ua mavae atu. E ui lava i se faanoanoa o lenei itumalo, ae o le a utu lava i manava loimata o le fiafia. E mafua i se a? Ai lava o se tofi lea o le itumalo o Aiga i le Tai ia, sau lea tama ua mavae atu tutogi, tutogi le vai, e le uma, sau le isi tutogi, tutogi le moli, e le uma, sau foi le uso na alu atu nei, tutogi, tutogi; ia ai ni sui tutogi sui usufono o lenei itumalo.

O le mea la lea lau Afioga i le Palemia ma lau Kapeneta, faafetai. O le tali a le itumalo, e le i fauina Roma i se aso e tasi. O lea ua ou sau nei i le faigamalo, tasi lea mea lau Afioga i le Fofoga Fetalai, e ese lo'u musu i nei mea o upufai, o lota musu ai ia. Ae ou sau nei ua ou tilotilo ma ou tagotago i ai ma ua ou tofotofa i ai; se leaga le mea e manaia, o le lololo ia. Aua foi o lona lololo lea, e te lua faifaimea faatasi a i i ma le isi a o la e sauni mai ma le tamai agaese, tulou le atunuu e toe tofosi ai lou tua. O le mea lea ua ou talitonu ai, se e ese le manaia. Aua foi a saunoa mai lava le la foi Itu o le Maota o le a ma le a ma le a, o atu foi tōē ai lava i tua i o ma talotalo ai lava faama'ai le mea foi lea e tutui ai le papatua o le isi, lau Afioga ma lo'u faaaloalo.

O le mea lea, faafetai tele lava i le faigamalo aemaise o Ulu o Matagaluega ma le aufaigaluega uma a le Malo, o Kamupani ma Sosaiete, o Faalapotopotoga Tumaoti, aemaise lava i latou o lo o fita i le faatinoina o tiute ma

feau i lea foi Paeaiga ua mavae atu, aemaise foi o le aufaifaiva ma le aufaifaatoaga. Ia manatua, o le a le mea sa e taumafai i ai, pe lua au tauia pe tolu au ofulimu e faatau i le maketi, o lou sao lena i le Malo. Pe lua au aufai pe tasi lau ato taamu, o lou sao lena i le Malo ae le o le omai e nofonofo i le tanoa ava ma fai le mea foi lele; a mea faapa'ū le Malo, sui le Palemia. E leai e le manaia. Faafetai, faafetai o galuega lelei uma sa outou faia, ia viia le Atua. Mo a? Mo nei ae le mo taeao.

Lua, o le toe faafetai a le itumalo lenei i le faigamalo fou o lea ua afifio nei ma lau Afioga i le Fofoga Fetalai. Se faafetai i lau Afioga i le Palemia, ua to lo'u pulou i lau Afioga. E mafua i se a? A o tapena le faiga palota a le atunuu, ua ta le iloa po o fea le mea a ta alu i ai. E maua atu i lea tanoaava, asu asu le ava fai mai; sui le Malo, sui le Malo, Levaa, ua omai tama sasao ia e sui le Malo. Ia o le fesili; o fea o i ai tama sasao? O le tali a le sui usufono mo Aiga i le Tai, o la e ua pulou le ie ma le povi. E maua atu i le fale piliati, lulu, lulu maataisi togi maa fai mai; sui le Palemia. O fea se Palemia ua Palemia toe Minisita o Tupe? E lulu lulu maa fai mai; 'vaai oe Levaa, a e tu, ia e alu i le Itu le la.' A o le fesili; o le a le mea ua toe o faasulusulu ai ae le omai? O la'u tali i ai; sulu mea faipele ae oso i luga o le fua, sulu mea faipele.

O le mea lea, faafetai i lau Afioga i le Palemia. E ui lava ina ua ou le Minisita, a o lea o le a tau atu mafuaaga o lo'u fiafia. Ua matua talia atoatoa. O le a? Faafetai i lau tofiga, a! o se tofiga a manaia. Se ua ou manatua le tala i le Tuiaana i lona afafine ina o le a faamavae; 'E, ta fia titi i lou titi, ta fia pale i lou pale, ta fia ula i lau ula, ula ua ula, pale ua pale, titi ua titi.' E mafua i se a? E le vivii atua. Lau Afioga i le Fofoga Fetalai, ua lava ia faafetai i le faigamalo, ne i ova le faafetai i lalo nei ae o atu i luga, o la e pito i luga le toeaina.

Lau Afioga i le Fofoga Fetalai, e faapena foi i lau Afioga. E itiiti mea na fai i le Kapeneta i lo lau Afioga. O le fesili lea sa fesili ai; 'o se Nofoa o Fasitoo ma Faleasiu, o se Nofoa o Aana Alofi Nu.1?' E leai.

Ia manatua e lenei Maota ma le faafofoga tapuai a Samoa, ua agatonu le tofiga. Aua e a? Silasila i ou faalupega, o oe o le Tuiatua, o oe o le Tuiaana Aveaumalaga, e te fetai le matalii. E le vivii atua, leaga a vivii atu ona faapea lea; uma le isi Aana alu ifo le isi Aana, o lona uiga e uma nei le sui usufono mo Aana Alofi Nu.2 sosoo ma le sui usufono mo Aiga i le Tai. Ae leai o mea lava na ona avatu.

Lau Afioga i le Fofoga Fetalai, ona oo mai lea o se faamatalaga i le anavatau a lenei itumalo. Muamua, e le o se anavatau e avaavau, e le o se anavatau e tuuvalaau pe faatauana, o le anavatau e faaoololomaau. O le ala lea na ou fai atu ai ou te le lauga faataupou, ou te lauga faatautua. O lea la o le a avatu le tautua na aumai ai a'u e lo'u itumalo. O le anavatau a le itumalo o Aiga i le Tai.

Muamua, o lota vaipaipa: e pei lava ona ou fai atu, tutogi, tutogi e le isi sui usufono le matou paipa o la ua alu le ofe i tai i Manono-tai ae paga lea, ua fitu tausaga e leai se vai o alu atu ai ae ua fai ma auala o le sisi Aferika e ui atu ai mai Upolu i Manono-tai. Lau Afioga i le Fofoga Fetalai tuu ane i ou tafatafa, atonu o lea e



faafofoga mai le Minisita o Galuega o le a manatua ai taita ma si ota itumalo i lenei 5 tausaga.

Lua, o le eletise: tutogi, tutogi e le isi sui usufono, lau Afioga i le Fofoga Fetalai ou te le ma e tau atu e ta le 6.00 ola le afi i le afiafi, ae ta le 11.00 i le po pe, ae oti atoa pusaaisa a lenei itumalo, o masini ma isi mea uma.

Lau Afioga i le Fofoga Fetalai, se i silasila ane lau Afioga i le Minisita. Ona pau lava lenei o le itumalo e le tele ni tupe a le Malo e alu i ai. E leai ni auala, leai ni malae taalo, leai ni mea faapena. Ae ona pau lava lea o le faaoololomaau a lenei itumalo e tuu ane i ou tafatafa.

Tolu, o taligalu: lau Afioga i le Fofoga Fetalai, tuu ane i tafatafa po o ai le Minisita e ana lea matafaioi. Ua faanoanoa lava lo'u sui usufono. O le faanoanoa o lo'u sui usufono o upu tuusasa. Uma le 5 tausaga ota sau ota vaai ane, o la lava e tapeleni ma faalamolemole taligalu o Faleasiu ma Saleimoa, e oo mai lava i le taimi nei o la lava e feoi ai masini, ae silasila o la e nonofo mai i o le aualii la ae e le omai tatou te faifai mea faatasi?

Ia faafetai, faafetai i le sui usufono mo Palauli mo le faaopoopoina o le taimi. O la'u tatalo i lau Afioga i le Fofoga Fetalai, ae a pe a tuu i ai ma lata 15 minute foi lea i lea vaiaso? O le tatalo lea.

Lau Afioga i le Fofoga Fetalai, o lea faatoa oo mai i le numera lima. O lona uiga la aua e 10 mea o le anavatau a lenei itumalo. O lea la o le a faapuupuu atu.

Lima, o falemai: lau Afioga i le Fofoga Fetalai, e agi le Ofa o i ai le falemai i Apolima-tai ma le teine fomai. Na muamua afio faatamalii mai le falemai o la e nofo i le vainuu o Manono ma Apolima, o la e togafiti ai malau ma mea faapena ma e oo mai i le aso nei e le i toe foi atu le teine fomai.

Ono, o le eleele: lau Afioga i le Fofoga Fetalai, ua ta le iloa po o le a le isi tatalo a fai atu. Afai o le lima tausaga lenei o le a faasoia atu ai le 400 eka lea a lenei itumalo, ua matua to lo'u pulou. E matua faafetaia, e faafetai i le Atua ua tofi mai a'u ou te sau e avatu o matou eleele pe a tusa ai ma se tofa i lau Afioga i le Palemia ma lau Faigamalo.

O le ala foi lea afai e maitau ane, na o le pau lava lea o le atinae o la e ola ai Manono ma Apolima, na o le sami. Lua, o atiina ae foi ia ua outou silasila i ai lea e siamupini ai le tama aua foi e leai ni eleele e tua i ai matou e fai ai ni faatoaga ma mea faapena?

Ona pau le mea ou te faanoanoa ai, o le vaega lea ua vaaia i'a. E vaai ma le faanoanoa i le latou fua lea e feosofai ma latou i le maketi e pei o tama autu e toso le fua e fua ai le a ma le a ma le a. Ua oo i le atule fai mai e sa. Ia manatua lau Afioga i le Fofoga Fetalai ma le faafofoga mai a le atunuu ma lenei Maota, manatua e pei ona ou fai atu. O le atule e a'e i vai masina. O Apolima-tai e tasi le aega o le atule i le tausaga. A oo loa ina o le a a'e le atule e fili launiu le nuu ae tapena e faa'a'e le i'a. So o se ituaiga atule, pe 2 inisi pe 6 inisi pe 7 inisi, o mea uma lava na e ave. E le faapea a uma le masina lea ona faapea lea e toe o atule ia i o e toe foi mai ua lapopoa.

O lona fitu, o faleaoga: lau Afioga i le Fofoga Fetalai, o le agaga foi lea sa i ai le faleaoga. E agi le Ofa o i ai le faleaoga ma le faiaoga. O la e taotolua nei e pei o le upu

foi lea e fai i tua, e pei o le taotolua a Tupua. E taotolua le faleaoga ma le falemai i le vainuu, a e sau e vaai mai o la e aoga ai mala'i i le isi itu, ae o le vaega foi lea e mamai i le falemai. O lea la tuu ane i ou tafatafa; a alu, alu ae tau ane ai le tofa i lau Afioga i le Minisita o Aoga, ua tele na tupe ua i ai, se i aveane ni nai apa ma se teine faiaoga ma se teine tausimai.

Lau Afioga i le Fofoga Fetalai, ona ou oo mai lea i le.....

O lou finagalo lava a o lea o le a faapuupuu atu nai mea ia. Ona ou oo mai ai lea i le Minisita o Felauaiga. Ia e alofagia si o'u nuu i uafu. Toe lava o Apolima-tai ma Apolima-uta ma Salua e lei i ai ni uafu. Tuu ane laia i ou tafatafa lau Afioga i le Minisita.

Le Minisita mo Galuega, o lona ua ou fai atu. E le faatonuina a o nai fautuaga. Ae a pe a faapea i le eletise ae avatu nisi afi i Aana? O le faiga la lenei a pe le eletise i inei ua oti atoa atu ai ma tua. Ai se manaia pe ana faapea e avatu nisi afi eletise i le la pito ma faapena ai. O nai fautuaga na e tuu atu i luma o lau Afioga i le Minisita. E ui ina e le i maea ae ou te manatu o lea e totoe le isi taimi.

Ona faaiu atu ai lea o le lauga a le itumalo lenei, ou te tautala ma le faaaloalo. Lo'u itumalo e, e fai aso le Atua ae fai taimi foi le Afioga i le Fofoga Fetalai, e toe maua so tatou avanoa lelei i le iuga o lenei vaiaso.

Ia faamanuia le Atua i lau tapuaiga Samoa, Lana Afioga Mamalu O le Ao o le Malo, Sui o le Fono a Sui Tofia, lau Afioga i le Faamasino Sili faapea foi le tapuaiga a Aiga ma Tama, o Tama ma Aiga, o Tumua ma Pule, Itua'u ma Alataua, Aiga i le Tai ma le Vaa o Fonoti, ae a le paia ma le mamalu o le Auaigaluega Paia a le Atua. Ia manuia le alofaiva o lau Afioga i le Palemia ma le Kapeneta, o outou māmā na. Ia malie la outou ti'a.

Lau Afioga i le Fofoga Fetalai, na tofi e le Atua Mose. Na fai mai le Atua: "Mose, sau e alu e aumai lo'u nuu. Sau le tama le la o Arona, tago oe i le tootoo lea ae ave le laau ia Arona." Ae alofa lau Afioga, vaai i te i ua muamua e ta ai le toeaina i le tootoo. Ia faamanuia le Atua i le tapuaiga a Samoa uma aemaise o Ulu o Matagaluega. Soifua ae ola le toeaina.

## Tofa MOEFAAUO LUFILUFI



### **Itumalo Faalalafaga:**

*Anoamaa Sasae*

### **Filifilia:**

*12 Fepuari 2005*

### **Faatauto:**

*5 Aperila 2005*

### **Lauga Faataupou:**

*14 Iuni 2005*

Faafetai i lau Afioga i le Fofoga Fetalai mo le avanoa. O le a ee mai i fatalele lau Afioga i le Fofoga Fetalai o le Maota; o le a ee mai foi i fatalele lau Afioga i le Palemia, lau Afioga i le Sui Palemia, Minisita o le Kapeneta aemaise sui usufono mamalu filifilia o le Maota o Samoa. O le a ou tuu atu i fataloa e taumafai atu se upu a Aiga ma Lufilufi aemaise o le Itumalo. O le a

ou le seu tafitifiti pe ou te taele pisipisi aua e faigata lou Maota Samoa.

Ae ou te le i asaina le tai na iite ai le Tupu i Mulinuu ma Sepolataemo ma Lalogafuafua e muamua ona ou faatulou atu. O paia faatafafa o le Maota i le tapuaiga a Samoa tainane le tapuaiga a le Itumalo – afio lau Afioga i le Fofoga Fetalai o le Maota o Samoa lau Afioga i le Faasisina; afio lau Afioga i le Palemia o le Malo o Samoa lau Susuga i le Alo o Malietoa; afio lau Afioga i le Sui Palemia lau Afioga i le Laau na Fausia; afio lau Afioga i le Tamaitai Minisita lau Afioga i le alii Sa’o; afio alii Minisita o le Kapeneta; afio lau Afioga i le Taitai o lena Itu lau Susuga i le Tama Suafa ma lou fale na toese, alalatai ma papaaao sui usufono mamalu o le Maota o Samoa.

Tulouna lau tapuaiga aua le afio o le Afioga Mamalu; O Le Ao o le Malo o Samoa le Susuga i le Tapaau Faasisina; afio Sui Usufono o le Fono a Sui Tofia Afioga i Tama a Aiga faapea le Afioga i le Tupufia.

Susu le Aufaigaluega Paia a le Atua ma Taitai o Ekalesia aemaise o le aufaigaluega o lo o faafale le malu aua se manuia faale Atua o Samoa. O le paia lava lea aua Tama ma Aiga, Tumua ma Pule, Ituau ma Alataua, Aiga i le Tai ma le Vaa o Fonoti.

E faatulou atu i le tapuaiga a Tutuila ma Manua i le afio o le Afioga i le Kovana faapea le Afioga Kovana Lutena; afio le Peresetene ma le Fofoga Fetalai ma sui usufono mamalu o Maota e lua; ae a le tapuaiga i faafeagaiga taulagi o le paia lava lea aua Sua ma le Vaifanua, Fofu ma Aitulagi, Saole ma Saleaamua ma le Launiu na Saelua, Tama a le Manuatele ma Tootoo o le Faleula.

E faatulou atu i le tapuaiga a le Itumalo – Aiga ma Lufilufi, susu le aufaigaluega paia a le Atua lau Susuga i le Toeaina o le Pulega; afio lau Afioga Patele o le Taitai o le Matagaluega; susu lau Susuga i le Sea o le Faasinoti i Sasae, a o le mamalu o le Aufaigaluega o lo o nono manu aua se manuia o le Itumalo. O le paia lava lea aua le afio o Aiga ma Aloalii, alalatai oulua Matia, Iuli ma Moeonoono faapea le tofi faasolo i le aai o le Tupu, le putuputu o tagata o le Tuiatua.

Afioga Gagaeolo, Susu le Susuga Naioti faapea le Alo o Malietoa, le paia o le falelima o le siitaga fita.

Afio Aiga ma Aloalii lau afioga Limutau ma le mamalu i le Faletolu; tainane foi le afio o lau Afioga Seufaataulumaga, le Faletolu ma Usoalii tainane le paia i le putuputu o tagata o le Tuiatua.

Susu lau Susuga Lufilufi le paia i le taupaiga, susu Ti ma Tagata, afio Afoa ma Lefao ma le mamalu ia te oe Lufilufi. Susu Tai ma Fonoti, afio Tapunuu, Maugatai ma Lefau, mamalu le tala o le fale o le fuaifale o Salevalalsi ae tainane le paia i le tapuaiga.

Susu ia oe le Tumua lau Susuga Lufilufi, susu le saofaiga ma le toaono, susu Tupai ma Tainau, le Afioga ia Seutatia. Tulou, tulou, tulouna lava.

O le viiga o le Atua e le faaititia aua leni aso ua mafai ai ona tatou toe mafuta ma faatasi. E le faigofie le finagalo o le Atua aua o le mua e le fuatia, o le maa e togi faato o le tao e velo i le maninoa ma le u e fana i le vateatea, e leai lava se e seua; A! o le aso a ua ailao ua maua afua ua maua. O Lona alofa ma Lona agalelei ua

mafai ai ona tatou fesilafai i luma o le nuu ae le o tua o le nuu. Ia saga viia le alofa ma le agalelei o le Atua aua sa toesea se tasi o tama o le atunuu le Afioga i le Sui Palemia – sa tatalo Samoa e le oo i ai se leo o Lufilufi o mamalu ua uma ona tamau ua maea ona tofi ua taoto a o se ala oo.

Lau Afioga i le Fofoga Fetalai, ua i lumamea le Tulafono Tau Faaofi o le Faatatauina o Tupe 2005/2006 – o le a umi se matou leo i ai ae sau se taimi o muamua ona faalatele atu lea o sa matou fautuaga tainane foi ni mea o lo o moomia aua le fia faaleleia o le Itumalo. E momoli atu le faafetai tele i lau Afioga i le Minisita ae tainane lau Afioga i le Palemia, le mamalu o le Kapeneta ma le Malo i se tapenaga sauni. Faamalo galulue, faafetai tapena maeaea e le o se galuega faigofie, e faigofie ona saili mai tupe ae faigata ona faasoa. O le mea lea e momoli atu ai le faafetai tele, faafetai mo galuega o lo o faatomua mai i le Tulafono Tau Faaofi o le Faatatauina o Tupe.

O nisi galuega ua maea faatino ma ua maua ai le avanoa lau Afioga i le Fofoga Fetalai e momoli aloaia atu ai le faafetai i lau Afioga i le Minisita o Galuega, Felauaiga ma Atinae Esee – e le tau selu atu, o so matou paolo matou te malu ai, faafetai manatu ia Lufilufi. Ae tainane lau Afioga i le Minisita o Aoga, mo le faleaoga o le aoga maua i Anoamaa faafetai tele; e ui lava ina e le i atoatoa ae ou te talitonu o le a le mapu ai nisi o galuega e fia faaleleia. Faamatuainu, alofa tautua lelei le Minisita ina ia tele ni fesoasoani e oo atu i mea tau aoaoga. E pei ona matou fai atu o nisi o galuega o lo o fuafuaina e le Malo aua lava Samoa faafetai tele. O lo o ave pea le faamuamua aua le soifua maloloina, aua aoaoga, aua faatoaga ae tainane atinae tetele. O la matou tala tau ina ia alofagia e le Atua ma foai lo outou malosi.

Lau Afioga i le Palemia ma le mamalu o le Kapeneta faafetai aua le faatinoina o galuega – a vave ona faatino ou te talitonu o le lagolago foi lea o Samoa.

Ae ua maua leni avanoa taua lau Afioga i le Fofoga Fetalai se i fai atu sa matou upu i lau Afioga i le Palemia aemaise o le Malo i lau puleto ma lau faasoa faatamalii aua le Tama a Aiga le Afioga i le Tuiatua. E talitonu le Itumalo ma Samoa e le faigofie peitai sa le mapu ona e tuitui – o lea ua to le matupalapala aua le Tama a Aiga.

Faafetai tele i lau Afioga i le Palemia ma e le tau selu atu leaga o le ta tofi lena mai le Atua ta te lufilufiina lima lelei mea aua Samoa. Faafetai tele i lau Afioga ma ia saga faamanuia atu le Atua.

Ua maua foi le avanoa e momoli atu ai le faafetai tele i le Tama a Aiga, lau Afioga le Tuiatua – faafetai mo le tauaveina o le tofi o le Itumalo aua e molimau Samoa i tulaga maua sa e faaeaea i ai. E te le i manatu i le Itumalo ae sa muamua ona faamuamua lou alofa ia Samoa, o le mea lea ia alofagia e le Atua ia faafualoa lou soifua aua le tofiga ua tofiaina ai – ia manuia le nofoaiga.

Lau Afioga i le Fofoga Fetalai, o le a seu le sa i fanua se i fai se faamatalaga aua le tapuaiga i le Itumalo. Le paia e o le Itumalo i Aiga ma Lufilufi o le a se upu e mafai ona fai atu, le paia i Aiga ma Aloalii, mamalu i le

Falefitu o oe o le aai tofia, o oe o le Aiga e te taustitupu e tua atu ia te oe le susuga pau o Lufilufi, faafetai tele. Ia lau Susuga Lufilufi e le taustelu atu, e faapelepele oe atua. Faafetai, faafetai tele; o la outou pule ma la outou faaaloalo o le a le mafai ona galo aua o le a fai ma pale, o le a fai ma asoa, o le a teu i le fatu e manatua pea.

Faafetai mo e sa lagolagoina lou nei tagata le paia e o le Itumalo, ua leai se upu e ui lava ina faatauvaa ae faafetai i la outou faaaloalo maualuga. Ou te talitonu foi le Itumalo o lo o tuufesili pea nisi pe faapefea ona ou faaofiina seevae o le Tama a Aiga po o seevae foi o Faamatuainu. Ae fai mai le Atua ia Iosua – “Sau ina alu e taitai Isaraelu e ui lava ina e faatauvaa faitalia ona ou tautala mo oe, faitalia ona ou tau mo oe”. O lena le ta Itumalo, e ui lava ina faatauvaa la outou sui ma itiiti ae a ta o i le Atua ma lona finagalo e mafai so o se mea. E puupuu le taimi ua aumai ae ou te talitonu o le a lava lea taimi e mafai e so o se galuega pe afai tatou te faatuatua i le Atua. Le Itumalo faafetai tele mo la outou faaaloalo o la outou pule lea; a o le a se galuega, o le a se upu o le a mafai ona fai e lo outou sui, tau ia o vae ma lima tulou, aua le tautuaina o le Itumalo.

Atua e le faagaloina le tapuaiga leaga e faigata upu o Atua o le nuu. Sa sii le faiva o Anoomaa aua faiga palota ae sa e tatalo ma tapuai. Faafetai tele mo le tapuaiga o lea ua maua sui, o le a se matou leo e mafai ona fai, tau ina ia fesoasoani aua le Afioga i le alii Palemia, aua le Tamaitai Minisita, ae a sui usufono mamalu o Atua o lo o i le Maota lenei.

Lau Afioga i le Fofoga Fetalai, e momoli atu le faafetai tele i lau Afioga ua maua se avanoa taua e momoli atu ai le faafetai a lenei Itumalo aua le faatautaia o le Malo. E le o se galuega faigofie ae faamalo faatoatoa, faamalu faatautai, e le taustelu atu ta te musu foi e tele atu ni ou viiga i pea mai Samoa ua ou nofo lava au ma toe vivii au. Ia manuia lau Afioga.

E momoli foi le faafetai i le aufaigaluega o lo o gapatia aua le tautuaina o le Fono faamalo tautua, faafetai i la outou galuega. Faafetai i le Komesina o Leoleo ma le mamalu o le aufaigaluega i lo latou tautua faafetai tele; aemaise foi Faauluuluga o Matagaluega, Faauluuluga o Faalapotopotoga o lo o tautuaina le Malo faafetai i la outou galuega; ua pau le matou faafetai i le Malo aua a outou togi. O le mea sili faafetai ua afea e le Malo o le a sii a outou togi. O le mea sili faafetai ua afea e le Malo o le a sii a outou togi. Toaga laia e galulue faalelei ma tautua lo tatou Malo aua se manuia o Samoa. E i ai lava le upu e masani ona fai le auauna lelei – ulufale i le fiafia o lou Alii; a o le auauna le faamaoni, fai mai Petelo e fafo ma le maafala; manuia la outou tautua.

Ua uma le matou lauga lau Afioga i le Fofoga Fetalai, o a matou upu mulimuli – le Maota e o Samoa, le Maota sa saili i le tofa loloto ma le faautautaga potu. E tatalo atu e tuualalo atu Lufilufi ina ia tumau le mamalu o lou Maota. Ua lamalama faaii la tatou nofoaiga o lo o tapuai mai o tatou aiga, nuu ma Itumalo, a o le a se oso tatou te o atu ma tatou, a lea, ia tumau le mamalu o le Maota o Samoa. Ia manuia a outou Afioga.

O le upu faaii fai mai le fuaitau a se tasi o toa o taitai tautaua – Aua e te fesili ifo po o le a se mea e fai e lou Malo mo oe, ae ia e fesili ae o le a sau galuega, o le a sou sao, o le a sau maa e mafai ona togi aua le tautuaina o le Malo.

Ia manuia lau Afioga i le Fofoga Fetalai, manuia lau Afioga i le Palemia, lau Afioga i le sui Palemia ma le mamalu o le Kapeneta, manuia sui usufono mamalu o le Maota o Samoa, manuia lau tapuaiga Samoa, le Susuga i le Malietoa, tainane le loaloa o Samoa. Manuia le fono.

### **Afioga PATEA SATINI EPATI**



#### **Itumalo Faaalalafaga:**

*Sagaga le Falefa*

#### **Filifilia:**

*12 Mati 2001*

#### **Faatauto:**

*15 Mati 2001*

#### **Lauga Faataupou:**

*18 Iuni 2001*

Lau Afioga i le Fofoga Fetalai, ua ou tulai atu i lenei itula e faaali foi se sao o lenei itumalo.

O le masani a tupu o le atunuu, a taaseu le taaloga masani a tupu ona faapea lea o ana upu: “Ua liligo le fogatia, ua paū le tuavao aua e faigata ua ‘oa’oa i Faleseu le seugalii.” Ae afai foi e faatamasoalii le aiga o tautai o le atunuu, e ese foi ona upu, fai mai: “Ua penapena o le tai i’ a o Amitonu aua ua to le fale o tautai.” Ona faapea lea o se manatu, mapu ia i Niafane ma le taula i Malolo, ae ou taia foi le faasouga ma faapoi le vaiula e pei o le fetalaiga i le Falepunaoa i le paia ma le mamalu o le Maota nei o le atunuu. I le afio o lau Afioga i le Fofoga Fetalai, afio le Afioga i le Palemia ma le vasega o Minisita i lena tala na atoa, faapea lea vaega o sui usufono o le Palemene o Samoa. Afio foi le Taitai o le Itu Agai ma lenei Itu o le Palemene o le atunuu.

Ua uma ona e faafoi le viiga i le taeao ua mavae ma ua uma foi ona toto le niu o le tuaoi i le va tapuia ma le Atua. Ua uma foi ona e momoli lapalapa o malo, tatou tatalo ia i le Atua e fesoasoani mai i ni manatu ma ni mafaufauga aua ni o tatou sao i le atinae o le Malo Tutoatasi o Samoa.

Le tapuaiga a Lana Afioga Mamalu o le Ao o le Malo, le afio o le Fono o Sui Tofia, le afio o le Afioga i le Faamasino Sili ma le vaega o Faamasinoga, le afio o Tama Aiga, Aiga foi ma Tama, le Usoga a Pule ma Tumua, Itua ma Alataua, Aiga i le Tai ma le Vaa o Fonoti.

E le faagaloina foi le paia o le motu i Sasae, le afio o le Kovana Sili, le Kovana Lutena, le afio o le Peresetene o le Senate, Fofoga Fetalai ma Maota e lua. O le paia lava lea ia Sua ma le Vaifanua, Fofu ma Aitulagi, Saole ma Saleaamua ma le Launiu na Saelua. Le paia foi o Faatui o le Motu, Tama a le Manuatele ma Tootoo o le Faleula. O paia la o Samoa, o paia o Aiga e fia, Aiga o Tupu, Aiga o Ee, Aiga o Tafai, Aiga o Tausala, Aiga o Falealii e tausi e Faleupolu o Tofiga ua uma ona tofofi e

le atunuu. O paia atoatoa na o Samoa mai Saua seia paia le Lualoto.

E le faagaloina foi le fai talosaga a paia o Ekalesia e fia i totonu o le atunuu; o la outou fai tatalo o lea ua aulia mai ai e Samoa le 39 o tausaga ua tatou agai atu ai i le 40 tausaga talu ona tatou Tutoatasi. Faamalo tatalo, faamalo tapuai ma e talosagaina pea la outou tatalo i taimi uma mo lenei Maota ina ia maua manatu lelei ma mafaua e atiae ai Samoa mo le lumanai.

Ou te faapai atu foi i lenei itula lau Afioga i le Fofoga Fetalai ma le mamalu o le Palemene i lo'u itumalo o Sagaga le Falefa. Le susu o le Susuga i le Malietoa, susu foi Toetaufanua, le afio o Loau ma Telea; susu foi alo o Malietoa ia Seupule Taogaga ma Nuualii, faapea le susu o le Maopu o le Tui Aana, Tuimaugapo ma le Niulevaea. Malii mai oe Laupa ma le Tagata Fou ma upu ia te oe le Faletolu. E faapea foi ona ou soso atu i lo'u nuu o Saleimoa, i le afifio o Toetaufanua e fia a le Malietoa. O le paia i le afifio o aiga e tolu, Alosina ma alo o Malietoa, le afio o le Maoputasi ma le nofo a Maopu, lau fetalai le Aitutagata Lutua ma lou Gautaala faapea upu ia te oe le Faletolu.

E muamua ona avatu le faafetai ma le faamalo ina ua tusi o outou aao e avea au ma sui usufono o le itumalo i lenei foi Paeaiga ua fotu mai. E leai se malosi o i le sui usufono; e talitonu foi e leai se malosi o i le Palemene lenei; o le malosi o lenei e ia outou talosaga. Tatalo mai, faalototele mai, faufautua mai ona matou ave lea o le fautuaga i le Malo o lo o tulai mai aua so tatou sao mo le lumanai.

E le faagaloina foi lou uso sui usufono sa tulai mai i lenei itumalo i tausaga e tele ua mavae, Tofa Leatufale Roy Brunt. Malo le galue, malo le tautua i le itumalo ma le atunuu. O le a se sao ua mafai, tatou faafoi lea i le Atua; aumai manū mo le nofo fou mai ma le tilotilo atu i le agai atu i le isi lima tausaga o lumanai. E pei ona ou avatu se talosaga, e manaomia lava la outou tatalo mai, e le na o mo a'u ae mo le Palemene atoa. Se taimi ona avatu lea o se manatu i le Tala o le Tupe, a'o lo'u talitonuga, o tatou uma o sui usufono mai o tatou itumalo taitasi. O le taimi lenei tatou te lipoti ai i luma o le Malo ma le Palemene o Samoa ma Samoa atoa i mea o lo o manaomia po o mea o lo o fia faaleleia i o tatou itumalo. O mea ia e ao ona tatou o muamua i ai aua o le tele o itumalo ma le Malo, e tele ina latou le silafia mea o lo o manaomia e itumalo taitasi. O le mea lea o le a ou amata atu ai i mea o lo o manaomia e lo'u itumalo e amata ai se faamatalaga.

Lau Afioga i le Fofoga Fetalai ma le mamalu o le Maota, o le mataupu muamua ou te fia tautala i ai, o eleele o le itumalo; e le na o Saleimoa ae faapea foi i Faleula. Masalo ua le o toe po se lilo i la outou silasila i tuā maota o lenei itumalo; e le na o le itumalo foi lea, masalo o le talafatai uma i Apia nei i matu o lo o aafia i lea vaega. Na o le lua minute e alu atu ai le taavale i le auala galue i tua ona gata lea; e pei o le mea ua maua ai nei Faleula. Faafetai ia Faleula o lo o i ai le fesoasoani a le Malo lenei na ave i ai le court grant e 100 eka o lo o maua ai ni faamanuiaga mo le vaega lea o Faleula; a o le upu moni e lei taitai ona lava ia fesoasoani e pei ona

talosaga mai pea Faleula i tausaga ua mavae, sei faasafua atu nisi vaega eleele i tuā maota ma tuā laoa o Faleula sei fai i ai le faasoa, ua savali ina utiuti le vaega tau laueleele.

E faapea foi i le nuu lea o matou i Saleimoa i le sau mai uta i Tufulele seia paia le tuaoi ma Leauvaa. A outou silasila ma asiasi atu i ai, e le umi ona e alu atu i tua ae amata loa ona faalalava faatoaga a papalagi po o eleele umia saoloto. O nei eleele, o eleele na faatau e tuua ma matua i papalagi i aso ua mavae; peitai a silasila lelei i ai lau Afioga ma le mamalu o lenei Palemene, o le le fetai ia o faatauga sa fai i lea vaitau.

I le tausaga 1889, sa fai ai se Komisi i le fononua sa fai i Perelini i mataupu tau Samoa ma ona laueleele. Ona tofi lea o se Komisi e tolu; o le Peretania, Amerika ma le Siamani. Sa suesue i taimi ia le faatauga o fanua o le atunuu e papalagi, aua o le taimi lea afai o le Amerika e fai le la fefaatauaiga ma le Samoa, ona o lea o laua lesitala i le Konesula o Amerika. E faapena foi i le Siamani ma le Peretania, e lei i ai se vaitaimi na faatusatusa ai fefaatauaiga nei.

O le tausaga lea e 1889 na faia ai le fononua lea ma fai ai loa le Komisi e suesueing fefaatauaiga nei i lea vaitau. O le mea na tupu, e ova i le afa eleele na toe faafoi o le atunuu ina ua suesue atu e le Komisi lea le talafeagai o eleele na ave ma o latou tau. E pei lava ona outou faalogo i ai, o le eleele e lima selau eka ae ave i le apa tapaa, le paipa, sapelu, o lavalava; ona nofo lea o le Komisi lea ma fuafua, afai o mea ia sa faatau ai se fanua, afai e 500 eka sa ave i mea ia, ua ave ai na o le 100 eka ae toe faafoi i Samoa le 400 eka. E fuafua i mea ua alu ma fua foi i ai le mea ua toe foi mai.

Ua ou tautala i lea vaega ona o lo o i gauta nei o Saleimoa ni faatauga le talafeagai ma o se taimi ona oo mai lea o se talosaga aloaia a lenei nuu e uiga i ia laueleele. E i ai le faatauga o lo o fai nei i ina sa fai i lea vaitaimi e 950 eka ae faatau i le USD\$35. Na fai i ai le suesuega a le Komisi lea ae leai se suiga na faia i ai. Na fai i isi vaega ae ua le faia i isi vaega ia ma isi lava mau faatauga o le a ou avatu i se taimi se talosaga e auala mai i le Matagaluega o lo o maua ai le aafiaga e pei ona ou avatu ma le faaaloalo.

Lau Afioga i le Fofoga Fetalai ma le mamalu o le Maota, ona ou oo mai lea i Auala, Suavai ma le Eletise. O mea lava ia e tolu e ao lava ona i ai. O isi mea e faigofie ona tatou aumai i se taimi mulimuli; a o vaega ia e tolu o le soifuaga o le tagata, o mea autu lava ia e i ai auala, suavai ma le eletise.

O le eletise o le itumalo, ou te faafetai atu i le Malo ona ua mumū moli tagata uma, se i vagana lava le tagata e le fia mumu i le moli ona le mumu lea ona o le vaivai ma le mativa.

Ua ou tulai atu ma le agaga faaaloalo ona o le suavai i le nuu o matou i Saleimoa, ua ova ma le 20 tausaga e le o sao le vai i gauta atu; ua gata ia i latou o lo o tutu tonu o latou maota ma laoa i tafatafa o le paipa tele o lo o mafai ona sua. I le 20 ma ona tupu tausaga talu ai e le o sua; e feololo le nuu nei o lo o i ai nai vaieli ma vaipuna o lo o tau foia ai le faafitauli i vai. A o le upu moni, o le matua tulaga leaga lava. Faafetai i le paipa lea ua aumai

tala o le a alu atu e tau i Falelatai. O le tala foi i le paipa lea e tusa ai ma le fesoasoani lea ua faataatia ai le paipa, o le paipa e fai sina maouta ae e le o i ai se tala o aumai ai e faasau mai uta i tai. Ua na o le paipa tuusao e alu atu i Fuluasou e tau i Falelatai ma Samatau, ae a faapefea tagata ia o lo o i tai? O le a faatau le paipa ona alu a lea o paipa ia na o Falelatai ma Samatau e feinu ai, ae e le o i ai ni fuafuaga faataatitia i le sau i tai i le mea o lo o soifua ai tagata. O lo o fia maua i ai se faamatalaga. O le a le faiga, o le a le tologi, o afea e fai ai? Ia faataatia atu ma le faaaloalo tele i lau Afioga i le Minisita o Galuega, o lo o fia maua pea se malamalama o afioaga ma alalafaga po o fea o lo o agai i ai le vai lea ma le faaaloalo.

Ona ou oo mai lea i Punaoa Faalenatura ma le Siosiomaga. Lau Afioga i le Fofoga Fetalai ma le mamalu o le Palemene, i le siosiomaga, ne i ou tautala tele i ai ona uma ai lea o lo'u taimi. O le vao, ou te manatu ua tataua ona matua faatauaina e le Malo galuega fai mo le agai i luma, ia matua faatauaina le siosiomaga. O lea ua maua atu i polokalame ua i ai faasao i Safata ma le faagasolosolo mai i mea ia o taufusi, se'i tulou.

Ou te manatu foi ua tataua ona aumai aloaia i polokalame a le Malo i nuu uma o lo o i ai taufusi ina ia fai ni feutagaiga ma nuu, e mafai ai ona matua faasaoina togatogo aua o lo o silafia lelei le agai i luma o le siosiomaga. E ao ona matua faatauaina uma i lo'u talitonuga se polokalame faataatia lelei mai e feutagai ai ma nuu ina ia faigofie ona maua le faasao. O gatai i le sami, masalo ua silasila uma le mamalu o le atunuu i le auala taavale lea e alu i gatai i le nuu o Saleimoa.

O le nuu lea o Saleimoa i aso ua mavae, o le seeti ma le malae sa i ai sa fai ai tuuga solofanua a le nuu lenei. Ua eli, eli mai e le Malo i tausaga ua mavae, ua pala loaloa; ua sola le sea, le pipi, le gau, le fole ma ua leai ma se mea o maua i tai. Aisea? O le malamalama o lenei nuu; pau le mea sa ou faalogo ai i toeaiaina ua mavae e pule le Malo. E moni, a o le eliga o gatai, o le matua fai le mafaufau lava e ia Faigamalo sa i ai i le amataga. O lea ua tulai mai nei le siosiomaga o lenei nuu, ua mavae afa talu ai nei pei ua toe aumai ai le oneone i le nuu nei, o lea ua toe tau maua mai ai nai sea, e ui lava ina e savali i le 100 mita ae faatoa tasi le sea, 200 mita ua lua au sea, ae faafetai i le Atua o lea ua amata ona toe agai mai figota o le sami. A o lea foi ua toe tilotilo atu ua toe alu atu foi le eliga o le palapala. Ou te matua faatulai atu se mau ma le lafo e aveese ai le lauina o oneone e faaleaga ai le gataifale mai le Public Works; e le malamalama le Ofisa o Galuega i ia mea; na o le pau lava le latou mea na o le o e eli. Ou te manatu e ao ona tuuina atu i le Matagaluega o le Siosiomaga ona o lo o i ai tagata popoto faapitoa ma malamalama i aafiaga o le siosiomaga talu ai le fai le mafaufau, tulou le Maota ma le Palemene. Ona ou manatu lea, tuu i le Siosiomaga ua i ai i latou ua popoto faapitoa latou te maitauina, afai ua vaai ifo ua leai se figota po o se siosiomaga faalenatura o figota o le sami, o le a le mea e tuu ai? Se'i alolofa ane. O aso ia i le matou nuu a tuua le aoga ona ou alu lea i uta e fai popo; ona foi mai lea ua sue se fasi ulu po o se fasi fa'i; na ona e alu lava i gatai solisoli a le o le tugane, o le

pipi e to'a ai lava le moa. Talofa i tupulaga o lo o fai mai. E ui o lea, ua ou fautua atu ma le agaga faaaloalo ia silasila totoa ane i vaega ia o lo o avea ma toatuga o tupulaga fai mai o le atunuu po o lenei itumalo.

Ona ou oo mai lea lau Afioga i le tofi o le itumalo lenei.

Faafetai atu le manatu mai i manatu o lenei itumalo. O tagata uma lava e faapena. Faafetai i le Minisita mo le Fono Aoaofa Faitulafono, so o se taimi e te pasi atu ai i Saleimoa e fā'alo uma tagata ia te oe.

Lau Afioga i le Fofoga Fetalai ma le mamalu o le Maota, i lou manatu i tausaga ua mavae i le taimi o Nonumalo Sofara, na ou fesili ai ia Nonumalo Sofara, "O le a ea le tulaga ua i ai tatou i le talosaga mo le lua tofi?" E fua lea mea i lo'u talitonuga e le fua i tagata palota ae ao ona fua i le aofai o tagata o le itumalo aua o tagata o lo o nonofo i le itumalo e ao ona fua i ai. Ona fai mai lea o Nonumalo Sofara ia te au i le vaitaimi lea: "O lea e lona lima tatou i talosaga."

Ua sau, sau ai Paeaiga ou toe fesili atu i le isi taimi mulimuli ane, ae fai mai - ua lona tolu tatou i le faasologa. O le uiga o la'u tala, po o le a le mea e fua i ai le faasologa? E faape'i le faiga o le faasologa? E faasolo ea i le muamua, lua ma lona tolu? O le amiotonu, o le fua i tagata o lo o afifio ma nonofo ai i lenei itumalo. E le gata i lenei itumalo ae ou te talosaga ia faasafua i itumalo uma ua aulia se fuainumera e mafai ai ona faalua pe faatolu Tofi o lea itumalo ma lea itumalo. E pei lava ona talosaga atu le sui usufono mo Vaimauga Sisifo se meamanu o lea ua pau le isi sui usufono Tutoatasi, ia faamuta loa i ina ae see mai le isi vaega e faatumu ai pu ia pe afai e talafeagai ai ma lo outou finagalalo. O le a taatia atu pea.

O auala galue, ia o le a ou toe foi laitiiti atu i ai i tua, faamolemole lau Afioga i le Fofoga Fetalai ma le mamalu o le Maota. Silasila foi i le auala o lo o i Tufulele nei, e le te i te i alu le pasi i uta i Tufulele; ua alu i ai le pasi ona e toatele i latou o lo o afifio i uta i i. Ua alu i ai le pasi a o le auala, ou te faafetai atu lava i lē e ona le pasi; masalo o se atalii ea o se faifeau. Masalo o sona tama se isi faifeau ma sona tama se isi faifeau e fua ina alu le pasi lea i uta. A o lau vaai i le pasi ua amata ona sau ua sameme faapea, ae le i atoa se ono masina talu ona alu i uta e serve tagata o lo o soifua i uta i lea vaega o le nuu.

E faapena foi i le nuu tele lea i Levi Saleimoa. Ua manaomia le faaleleia o auala, aemaise o le ogaala o lo o toatele ai tagata. O le a le mea e le faata atu ai na o sina maila i uta foi lea? Tau o se mea e iloa ai e tagata ua i ai se tulaga amanaia. E le gata i lena o le aufaipisinisi o lo o faaoga a latou taavale i le o i uta. E pei o vaega ia e maua ai le musua o i latou o lo o fia atiae i le agai atu i le vaega e pei ona ou taua.

O le talosaga ma le faaaloalo i lau Afioga i le Minisita o Galuega, se o le atunuu o le atunuu e faamalie gofie. Na o sina afa maila i uta, faata atu le auala lea. O auala ia ua feoai ai pasi ina ia faigofie ma se i silasila totoa i ai i le tulaga e pei ona i ai o tatou auala.

Ona ou oo mai lea lau Afioga i le Fofoga Fetalai i mea ia o Taaloga. E le tele se vaega ae avatu le faafetai ma le

faamalo i le Malo i le Palemia ma le Kapeneta ma lena Itu ona o se vaegatupe tele ua mafai ona amanaia ai Taaloga. Faamalo faafetai. O se fautuaga i taaloga lau Afioga i le Fofoga Fetalai, o malae taalo. O tatou malae taalo ia faava-o-Malo na fausia, masalo lau Afioga i le Fofoga Fetalai na o le malae lea e i Iva o lo o mafai ona faagaioi mai. O le malae lea na fausia i Vaovai ma le malae lea na fausia i Avao, o tupe alu maimau ia mea na fai ai. A e vaai i le malae la e i Vaovai, e pei o le taufusi totonu ua le mafai ona toe fai ai se lakapi e oo mai i le taimi lenei. O le vao foi o lo o i ai nei i le malae la e i Avao, a o le tele ia o le seleni sa faamaape mo le fausia o ia malae.

O le talitonuga sa le tataua ona amata i i; ae ui i lea, o le agaga mama o le Malo sa taumafai ai e faatino, ua le mafai ona tino. A o le talosaga i ni malae taalo mo kalapu, mo nuu. E le faapea la o ni malae fou, ae alolofa e agai atu i tua, pe tasi le Aso Toonai, avatu uma masini, sua faalelei. E i ai malae lakapi la e faaoga e nuu i tua o lo o i ai niu ma ulu ma fa'i, ae le lava se malosi; na o le faaleleia atili lava. O malae lakapi aua o le mea foi lea ua i ai nei, o le malae e lakapi ai, ua volipolo ai, ua soka ai nuu maoutua o le atunuu. O le talosaga la i se polokalame e mafai ona asiasi atu ai i tua i malae o lo o faaoga e nuu i tua ina ia faaleleia, ia amata i kalapu ona tatou see mai ai lea i malae na faamuamua e le Faigamalo. O lena ua avatu le atugaluga, ua maimau ua le aoga le malosi sa fai ai ae taatia atu pea. Masalo e i ai se taimi, a aganoa se seleni, e ao lava ona toe faaleleia ia malae e pei ona avatu.

Lau Afioga i le Fofoga Fetalai, sa ou fia tautala i le siitaga o le aufaigaluega a le Malo. E tele lava se agaga sa fia tautala i ai ae ui o lea, o le a faataatia i sona taimi paganoa lelei e avatu ai lea vaega. E faapena foi i le Polonesia; sa fia maua lava se avanoa mo nai fesili e tele o lo o fia avatu, ae leaga e faigata e usitai tele i le saunoaga a lau Afioga i le Fofoga Fetalai ma le faafoeina o le Fono.

Ina ne i te i ua galo ia te a'u le mea lea a o le i fauma atu la'u lauga. Ou te faafetai i le Afioga i le Palemia ona o le valaaulia o le faifeau tautaua foi lea na sau nei o Benny Hinn. Faamalo faafetai. E ui lava ina tele tagata e faitio i le oo mai o Benny Hinn, a o le oo mai o Benny Hinn e pei lava o le lauga a le isi faifeau foi lea i le falesa. A e alu atu lava e te le fia faalogologo ai oe, ona pau lava e te le fia faalogologo ai oe. Ae a e alu atu e te fia faalogologo ai ma maua ai sau mea, faafetai foi o lena e maua ai se mea aoga mo oe aua e eseese o tatou faalogoga i lea taimi ma lea taimi i le aumaiga o le Agaga Paia.

E fai la'u tala ona o a'u sa ou nofo i le fale ogatotonu sa ou matamata mai ai i lalo. E tusa e sosoo le aufaipese ma le mea sa ou nofo ai. O le taimi la na talo atu ai faapea le tamaloa i luga, (*faataitai le talotalo o le aao o Benny Hinn*) se na palalasi uma ai tagata, na ou palasi ai foi ma a'u, ioe. Ua ou le iloa la i lo'u palasi pe o le ta'u o tagata ia na ta'u ia a'u ou palasi ai i lalo, ae na ou palasi; na ou palasi lava foi lele ae fai mai o le Agaga Paia lea. Ou te vaai atu i le Afioga i le Palemia, ua fiu lava le tamaloa e talo atu faapea, (*faataitai le talotalo o le aao o Benny*

*Hinn*) ae e le taitai lava ona ila le Palemia. E ui o lea, e pei lava ona ou avatu, e tofu lava tatou ma le taimi e lagona ai le o'o mai o le Agaga Paia.

Faatai ma so matou leo Samoa i lau faafofoga mai, afai e sala se upu pe ua le o o foi i ou paia, o ou Sa ma ou Faigata, ia faafoi mai. I lena itu o le Maota i lau Afioga i le Palemia ma le mamalu o le Kapeneta, o outou māmā na. Matou tapuai atu ma matou faufautua atu, ae alo i o outou faiva, ia manuia Samoa i le lumanai.

## Afioga PATU ATIVALU TOGI II



### Itumalo Faaalalafaga:

*Vaimauga Sisifo*

### Filifilia:

*12 Mati 2001*

### Faatauto:

*15 Mati 2001*

### Lauga Faataupou:

*18 Iuni 2001*

Lau Afioga i le Fofoga Fetalai, sa leai lava se manatu o le a fai se lauga a le Vaimauga aua ua uma ona lauga le isi Vaimauga i le taeao analeila. O lea e ao ai ona faaauau atu se manatu vaivai o lenei itumalo e faaopoopo i le ma lauga sa fetalai ai pe sa saunoa atu ai lo'u uso a sui usufono i le taimi ua alu i lenei aso. Afai e pao-papa se upu a le Vaimauga i lenei aso, leaga ua outou naunau mai foi ia matou lauga atu, a o lena foi e nonofo mai lena itu ae le lauga mai. O le agaga lea ua mafua ai ona ou tulai, ina ne i te i ua outou le faalaugaina i matou.

O le a ee ia i vaatapu le paia faatafafa o le Maota o le Palemene, o le malae o le faautugatagi a Samoa, i le afio o lau Afioga i le Fofoga Fetalai, afio lau Afioga i le Palemia ma le paia o le Kapeneta, lau Afioga i le Taitai o le Itu Agai faapea sui usufono mamalu o le Palemene - o sui usufono filifilia o itumalo taitasi o Samoa.

E le faagaloina foi e lou sui usufono le faafogafoga tapuai a Lana Afioga Mamalu, O le Ao o le Malo, Susuga Malietoa Tanumafili II, e te afio i lou talaga atoa, ma lou fala na folaloe, e faalogo ia te oe Samoa. Afio lau Afioga i le Sui o le Fono a Sui Tofia, afio lau Afioga i le Faamasino Sili ma le Vaega o Faamasinoga, le paia i Aiga o Tupu, Aiga o Nofo ma Aiga o Papa, le mamalu tele i le Usoga a Tumua ma Pule, Ituaui ma Alataua, Aiga i le Tai ma le Vaa o Fonoti; aemaise le tapuaiga i Taitai o Ekalesia e fia ma le Aufailotu i totonu o Samoa.

E le faagaloina foi e lenei sui usufono le tapuaiga a nai o tatou uso i le motu i Sasae, i le afio o lau Afioga i le Kovana Sili ma lau Aufono, o le paia lava lea ia Sua ma le Vaifanua, Fofu ma Aitulagi, Saole ma Saleaamua, Tama o le Tootoo ma le Launiu na Saelua, Tama o le Manuatele ma Tootoo o le Faleula. Malo afua malo ua maua lo outou soifua laulelei, ae lafo ane ia le taula i malolo ma mapu ane i Niafane se i alauta le upega lauga i lo'u maluapapa ma lo'u faasinomaga i le itumalo o Vaimauga Sisifo e pele i lo'u agaga.

Afio Afioga i Alosina, Seumanutafa ma Toomalatai; afifio le fuaifale o Salevalasi ia Tamaseu faapea Faualo,

Afifio le Matua ma Usoalii, Aiga Sa Malietoa, le mamalu ia te oe le Faletolu ma le Vainalepa, lo oulua toalua Samau ma Feagaimaalii faapea oe Tuisamau. Susu le Tapunuu Sooialo ma le Matua ia Feetau faapea le Lautinalaulelei. Pau ane i Fuaiupolu i lou nuu, afio lau Afioga i le Matua Tofaeono, afifio tama o Asi ma Patu; malii mai le na ta'i Tamapua ma Manogiamanu, afifio foi Usoalii ma Ataga.

E le faagaloina foi le tapuaiga a faletua ma tausi, saoa ma tamaitai, faapea le mamalu ia Laauli ma le aumaga o le itumalo lenei o Vaimauga Sisifo. I lenei taimi lo tatou itumalo, tapuai maia ae se i taumafai atu se manatu leaga e faapea upu o le Vaimauga i le ulugalii lea o Lanu ma Too. Tau lava o sina mea e iloga ai Mu ma Ve a faigamea.

Lau Afioga i le Fofoga Fetalai, o Faigamalo faaituau ma Faigamalo faivaega; o Faigamalo faaloloto ma mana faaletagata; o Faigamalo ia e le manuia ai Samoa.

O Faigamalo auau faatasi, e fealofani, fealolofaai, fetausiai, fegalegaleai, o Faigamalo ia e manuia ai Samoa. O Faigamalo foi ia e tu ai le sui usufono lenei o le Vaimauga Sisifo ma e fia galue foi agai i ai. O tatou o sui usufono, o sui o o tatou nuu, o sui o o tatou itumalo, o le tatou tofiga mautu i upufai o Malo o tatou o auauna; e le o tatou o ni sifi, e le o tatou foi tatou te faia mea tatou te loto i ai ae ao ona tatou vaavaai i le manuia o tagatanuu uma o le atunuu.

O le itumalo lenei, e le masani ona tagi pe sa'i i ni mea e fai e le Malo mo lona itumalo. A silasila foi le mamalu o lenei Fonotaga, o le luasefulu ma ona tupu o tausaga talu ai, e le i tagi mai lava le Vaimauga Sisifo a mea fai se atinae i fea. Ua leai ni fanua o le Vaimauga Sisifo, ua tumu mai i ma o o le atunuu, ua fale loaloa e amata atu i Apia i le taulaga seia o o atu i tumutumu mauga o le talafatai nei, i le amata mai i Palisi, Lalovaea, Taufusi faasolo ane ai i Togafuafua, sau i tai i le mea o i ai le Maketi fou i Savalalo, o o mai i Matafele, toe faasolo atu i uta i Motootua, alu atu i Magiagi faasolo atu i Papauta ma na nofoaga uma i Vailima, ua tumu loaloa i tagata. Ua leai se eleele o totoe o le Vaimauga Sisifo e atiae ai.

E le gata foi i lea, o totonu o le talafatai o Apia, na o mea lava o lo o tutu ai nai fale o lisi, o e fai mai tua ma tumutumu i lenei taulaga. E leai foi ni mea e tua i ai i ni faatoaga, e tua i le seleni.

E faamaonia la'u tala, o le itumalo lenei o le latou lava faatoaga o le maketi; e leai ni a matou faatoaga. E o o foi i le sui usufono lenei e tautala atu, e ai i le maketi i le aso Gafua e tau i le aso Sa. O itumalo uma, o la e maua nai mea aano o talo, fa'i, ulu, taamu ma mea faapea. A o le itumalo lenei, o lona ua ou tau atu; e ai i le maketi, e maumaga i le maketi, e faamoemoe la lona ola po o lona soifua i le tupe. A leai se tupe, ua leai se tatou, ua pe le mata. O le uiga lona o le itumalo lenei. Matou te le tagitui foi la ina ia fai nisi atinae aua ua leai ni eleele e fai ai ni atinae a le itumalo lenei.

E faamoemoe le itumalo lenei i tupe maua mai o latou aiga i fafo, lea e le o faatauaina e la outou Faigamalo tautua ia a o matou aiga ma o tatou aiga mai fafo. O le tupe lea e fesoasoani e faatau ai le ofu aoga, e faatau ai le meaai a le tamaitiiti aoga, e fai ai mea faalelotu, o mea

faamatai ma nai totogi o tagata pe taitoatasi pe taitoalua o lo o faigaluega i le Malo po o galuega a kamupani i lenei vaitau.

O le agaga o le itumalo lenei, ia alofagia ia faatele mai ni kamupani e aumai i totonu o le atunuu e maua ai galuega e ola ai le Vaimauga Sisifo.

O lau sailiiliga i lo'u itumalo e le gata i le Vaimauga Sisifo ae faapea foi le Vaimauga Sasae, e vaitafe lava mai Laulii seia o o mai i inei i Apia, e tele vai. O la'u vaavaai foi la i le polokalame a le Matagaluega o Faatoaga, o lo o ou vaai i ai i le i'a lea o le tilapia. Ia alofa lau Afioga i le Minisita o Faatoaga e le o oe o se isi o oe o lo'u uso, o le tatou itumalo. Ia matua la'u atu i'a ia e faatutumu uma ai vai ia e i tua o le Ala Kalapu e alu ane tau i Moataa, o Fagalii, tau i le sami, agai mai i Apia - o Fuipua, o vai uma na ia faaola ai i'a ia ma fai ai faatoaga i'a e ola ai le Vaimauga.

E le gata i lea o le ulavai ma le tuna - o mea o lo o maua i totonu o le tatou eleele. Ou te le iloa po o a mea o lo o o e aoao i aoga i fafo a alo ma fanau o le atunuu, ae le o e aooga e vaavaai mea o lo o maua i totonu o le atunuu aua e mafai ona latou faia ai atinae nei e tua i ai le tele o nuu po o alaalfaga uma o le atunuu.

O lea la ou te talosaga atu ai lau Afioga i le Minisita o Faatoaga, ia e alofagia ia fai ni atinae faatoaga tuna ma le ulavai i totonu o le Vaimauga aua e tele le vai, tele vaitafe, e leai se nuu e leai se vai. O Magiagi, o Vailima, e faasolo uma i nuu o le Vaimauga.

Ona ou o o mai lea i le Matagaluega o Aoga. Lau Afioga i le Minisita o Aoga, e momoli atu le faafetai aloaia a nai nuu laiti uma ia o matou o Matautu, Vaiala, Faatoia, Levili, Vini, faasolo atu i Leone ona o la ua fai le faleaoga o le Falefitu i le meaalofoa mai le EU. O a'u foi o le Taitaifono o le Komiti o lea aoga. A o le talosaga, ia alofagia e lau Afioga i le Minisita o Aoga, a lelei faiaoga o le popoto foi lona o lenei itumalo, e maua ai galuega ma maua ai seleni e tausi ai aiga aua ua leai ni eleele e galulue ai.

Ona faasolo ane lea i le Matagaluega o Galuega. Lau Afioga i le Minisita o Galuega faapea lau Afioga i le Palemia, o le gataifale lava. E pei lava o mea e masani ai lenei itumalo, o taligalu. Ua uma foi ona talanoa atu ai lou uso a sui usufono, ia alofagia ua taei uma taligalu i Vaiala ma Matautu. E toe faaopopo atu ai foi i le Afioga i le Minisita o Faatoaga. E manaia foi ae fai ni atinae o faisua i gatai i Vaiala i le mea o lo o i ai le palolo deep i Matautu, ae aua le faia na o Fagalii ae tuu lenei itu o le vai.

O la'u fesili faamolemole pe afai e sa'o so'u manatu i le mea lea e tau o le privatisation. Afai e alu aseta a le atunuu, faamata e taugofie ai le soifuaga? Aua o le talitonuga o lo'u tagata, afai e privatisa uma le tele o tatou aseta, e lelei i le isi itu ae ona pau lava le itu ta te vaai i ai, pe o le a alualu ai pea i luga le tau o le soifuaga aua o le a pule lava Sitafune ia i le la o lona vaa i lana tau e totogi mai i e o lo o afu ma taumafai le atinae o le atunuu.

Ona ou oo mai lea i le Tala o le Tupe. Faafetai atu i lau Afioga i le Minisita o Tupe i lenei galuega tele. Maimau pe ana mafai ona malamalama uma i matou i figures ma

nei mea o faaupuga eseese. Ua ta fiu e faitau ua soloatoa le mea.

O lo'u lava talitonuga, maimau pe ana faapea o le \$355miliona le tupe lea o le a....maimau pe ana taatia mai i totonu i nei i le Maota Fonu, se i tatou vaavaai i ai po o le a le tele o le mea e ta'u o le miliona, pe faapefea le fausasaga o le mea ae se i tatou fai i ai le pule lea; ave le \$41 miliona a le Ofisa o Aoga, e faapena, ioe. O le mea lena, ana fai faapena le Tala o le Tupe lena, se meamanu ua ou fai atu pasi le Tala o le Tupe i le taimi lena.

E lagolagoina tele e le sui usufono o le Vaimauga Sisifo lena fuafuaga lelei ua uma ona fai e le Malo. A lelei la outou faasoaso ina ia tutusa tagata uma, e ioe lava i ai sui usufono nei o le Vaimauga; ae afai e fai na o se manuia ai o se Vaega pe na o ni nai tagata, e leai foi la le sui usufono lena o Vaimauga Sisifo. Ia tuu atu i lau Afioga i le Palemia ma lena Itu o le Faigamalo, tatou saili fofō faatasi ina ia mafai ona faavavalalata le mativa ma le maumea, po o le faipisinisi faapea ma le Malo. O galuega ia e ao ona tatou vaavaai i ai ina ia faavaiti tulaga ia; ia close gaps.

O le isi itu ou te fia tautala i ai o totogi o tagata faigaluega. Lau Afioga i le Palemia ma le Kapeneta faapea le mamalu o lena Itu a le Malo, ia tatou taumafai e siisii i luga totogi o tagata faigaluega aua o lo o alualu pea i luga le tau o le soifuaga. O la'u vaai atu i le Lipoti a le ADB i le tausaga ua tea, o lo o faapea mai ai se upu, 'O Samoa le isi atunuu sili ona maualalo totogi o ona tagata faigaluega'. O le 41 lena o tausaga o ou galue i Ofisa o le Malo i galuega a le Malo ma tautua i le Malo. Na amata mai lava i nai totogi laiti; o lea ua tatou oo i le taimi ua sii i luga le tau o le soifuaga, ua maualuga ma saosaoa le atiaaina o atunuu uma o le lalolagi. E tatau foi la ona faavavevave i luga; o la e lelei le vaega i luga ma e le faapea e sese lena tala. O lo o lelei o latou totogi, a o le vaega lea e i lalo o lo o palasi i ai le mamafa o galuega fai a le atunuu. Ia alofa lau Afioga ia tuutuu ane i luga o latou totogi ina ia maua ai se faamama avega ia te i latou ia.

Ona ou oo mai lea i le Minisita mo Tagata Tafafao Maimoa. O le tausaga fou e atoa i ai le 40 tausaga talu ona Tutoatasi le Malo o Samoa; e atoa ai foi i ina le 40 tausaga e le i faafiafia lava le itumalo o le Vaimauga i faigamea a Samoa i lona Malo Tutoatasi. A o le itumalo lena, o lea lava e lata mai i le taulaga o lo o outou alaala ai ma outou afifio ai, tou feofeoi ane ai i a outou taavale mananaia, e tatau ona tuu mai se avanoa i le Vaimauga. Afai e tuu mai i le ituvai mai i Vaimauga Sisifo se isi siva ma se pese, tuu i le Vaimauga Sasae se isi siva ma se pese, po o ua lava foi le Vaimauga. Anusa o itumalo mai Salafai ma itumalo i tua e faafiafia lava i mea a le atunuu i lea tausaga ma lea tausaga, ae le i faafiafia lava le Vaimauga. O lea e avatu ai se talosaga ia alofagia, o le itumalo e ola i le seleni. A'o na foi mea o fesoasoani i le vaivai o lena itumalo ona e leai ni mea e galulue ai.

Ona ou oo mai lea i le Afioga i le Minisita o Aulavou, Taaloga ma Aganuu. O le mataupu e masani ona faalogo pea i ai o'u taliga i mea ou te fealuai ai e faapea; e le o lelei ona aoao taaloga a le atunuu e pei o lakapi, soka ma

a uma lava ituaiga taaloga e pei o athletics. E talosaga atu ai, ia aumai ni tatou faiaoga lelei. A le o lena, o lea ua lelei malae taalo i le Ala Kalapu, ia i ai se vaegatupe faapitoa ia malosi ai le faatinoina e pei o Ausetalia ua fai lava le latou Sports Academy; e aumai solo i le lalolagi coaches lelei ina ia malosi aua o lena vaitau, e tutusa lava le tamaitiiti aoga i le academy ma le tamaitiiti aoga e lelei i taaloga. A lelei i taaloga o ana seleni lava na ma o lona manuia foi lena ma lona lumanai.

Ia alofagia e lau Afioga i le Minisita mo Taaloga lea itu ina ia faamalosi ia itu aua le manuia o le atunuu i le agai i luma.

Faafetai atu i lau Afioga i le Fofoga Fetala faapea foi le sui usufono na faatuina mai le lima minute mo le toe faaopoopoina o lo'u taimi aua e oo mai lava i le taimi na ou tulai atu ai nei, o tau tusitusi lava ni mea e fai atu ai se lauga. O lea la e faapea ai se agaga o le itumalo lena, ia tatou galulue faatasi ma ia tatou taumafai tatou te fetufaai; aua tou te faasinoina lima mai i lena Itu.

O le itumalo foi lena pau lava le agaga i le Vaimauga Sisifo o le faamaopoopo ia maua se Malo e ola fiafia ona tagata uma; ia maua se Malo e manuia ona augatupulaga fai mai, ae aua nei fai mai augatupulaga o lo o lalovaoa tuuati tatou e faapea o tatou ua mafua ai ona tetele nei aitalafu. Aua o le vaavaai atu i a tatou aitalafu ma le agai pea i luga, ua tele naunau; o lea lava o le a tatou faasolo atu i piliona. O lea la e faufautua atu ai ma valuvalusia aa o le laau, ia alofagia ia tatou taumafai tatou te sacrifice faatasi i le faiga o ni auala e faamama-avega ai i le atunuu, e faamama-avega ai i a tatou aitalafu aua e le tele se atiae o le atunuu i le faatinoga o a tatou galuega fai.

E faaiu atu ai sa'u upu faapea i le Matagaluega o Leoleo. Lau Afioga i le Palemia, e le a'oa'ia e Laupua Tamafaiga. E i ai le agaga maumaututū o lau Afioga lava e toafilemu ai le Ofisa o Leoleo ma Falepuipui faapea ma Tinei Mu. E i ai ni faaletonu o lo o i ai i le Ofisa po o le Matagaluega lea, ae faamoemoe i lau Afioga i fautuaga lelei. E i ai foi i latou ua silia ma le 60 tausaga o lo o galulue pea i lea Ofisa. E le gata foi i lea, e le lava le manpower o lo o i ai i totonu o le Ofisa o Leoleo e faatinoina le Tulafono i totonu o le atunuu. O tagata lava la o lo o i ai o la e tumau lava, e le o siisii foi i luga le aofai o leoleo. E le gata foi i lea o lo o latou totogi.

Lau Afioga i le Palemia, ia e alofagia lena Matagaluega faapea le tatou faaili aua o a latou fuafuaga uma, e faamoemoe lava i mea e avatu e lau Afioga i le Palemia i faamanuiga ma mea uma e maua e le Ofisa o Leoleo.

O lea ou te tilotilo atu i le vaegatupe lea e \$200,000. O le tupe lea, na o tagata lava ua pasi suega; o le promotion e faaoga i ai lea seleni. A o tagata o la ua leva ona max, ua leva foi ona mau i lalo totogi, toe alu atu ma lea performance budgetting ua atili mau ai lava i ina. A ia alofagia ia toe fai se isi faaopoopoga i luga po o se isi sitepu ina ia siisii ai i luga totogi o alii malu o le Malo.

O le talosaga foi i lea lava Matagaluega i lau Afioga i le Palemia, se i tagatagai i le falepuipui i Tafaigata, e tele le faaletonu o lo o i ai i mea o lo o nonofo ai le toatele o tagata. E moni lava o tagata solitulafono, ae tatau foi ona tatou fuafua o tagata ola e pei o tatou. E tutusa foi mea e



mananao i ai latou ma mea o lo o tatou mananao i ai ina ia faalelei o latou nofoaga o lo o tuli ai o latou faasalaga. E ui lava e le tele se tupe maua a le Malo e maua mai lea Matagaluega, ae talitonu le agaga o la e lava e gaoioi foi i latou e fesoasoani i le Malo i nisi o galuega e pei o le faiga o a latou faatoaga e tausi ai latou ma faamama-avega ai foi i le Malo i a latou rations ma mea faapena.

E toe tasi le manatu lea e fia avatu lau Afioga i le Palemia faapea le mamalu o le Malo. Na ou tilotilo i seleni ia e faimea alofa ai le Malo i aoga a Ekalesia. O le mea o lo o tau maitau atu, na mafua ona ave ia seleni e fesoasoani ai i aoga a Ekalesia eseese, ina ia faamama-avega i matua o tamaiti aoga o lo o aoga i private schools po o aoga a Ekalesia. O le mea o lo o tau maitau atu, na mafua ona ave seleni e fesoasoani ai i aoga a Ekalesia eseese, ina ia faamama-avega i matua o tamaiti aoga o lo o aoga i aoga ia e tau o private schools po o aoga a Ekalesia e subsidise ai le taugata o pili.

O le manatu e tau avatu, po o tagatagai i ai le Malo po o faaoga i lea itu seleni ia e ave i Ekalesia nei ina ia faamama-avega i matua o lo o i ai a latou fanau i ia aoga? E le gata foi i le itu lea, e fia fesili atu foi i le Minisita o Aoga, po o faapefea le compulsory education? Po o faamalosi, ae pe o faapefea foi ona monitor ma vaaia lea itu, ina ia tagatagai i ai ina ia faaitiitia le tele o tamaiti e faatau ula ma feofeoai solo i le po ma aisi solo ai ona ua tele ai foi nisi solitulafono e aliai mai ai?

Ona faaiu atu ai lea o se manatu lau Afioga i le Fofoga Fetalai, faamalo i lau Afioga i le Fofoga Fetalai i lou faapalepale. Faamalo i le Palemia, le Kapeneta ma lena Itu o le Malu. Faamalo foi i le Taitai o le Itu Agai ma lenei Itu.

O lenei Fonotaga, ia avea ia lenei feiloaiga ma lenei faatasiga ia saga galulue ai pea mo le manuia o le atunuu atoa.

Ia manuia le Palemene.

## **Afioga SAFUNEITUUGA PAAGA NERI**



### **Itumalo Faaalalafaga:**

*Gagaifomauga Nu.2*

### **Filifilia:**

*12 Mati 2001*

### **Faatauto:**

*15 Mati 2001*

### **Lauga Faataupou:**

*19 Iuni 2001*

Ou te momoli atu le faafetai i le Fofoga Fetalai mo le avanoa ua ou maua e aveatu ai se manatu o le Sui Usufono o lenei itumalo o Gagaifomauga Nu.2. E auai foi lou Sui Usufono i le faafetai i le Atua ua maea ona molia i se taimi ua tea ona o Lona alofa ma Lana tausiga i lenei Palemene aemaise le atunuu o Samoa.

Ou te muamua ona ou faatulou i le nofo tapuai a le atunuu i le faafofoga mai a Le Ao Mamalu o le Malo, le Susuga i le Tapaau Faasisina, lau Susuga i le Malietoa Taunumafili II; tainane le faafofoga a le Sui o le Fono a

Sui Tofia, le mamalu i le Faamasino Sili ma le Ofisa o Faamasinoga.

Le paia i lau Afioga i le Palemia le Sui Palemia ma Minisita o le Kapeneta, lau Afioga i le Taiiai o le Itu Agai, faapea Sui Usufono uma o le Palemene.

O le paia lava lea i Aiga ma a latou Tama, o Tama foi ma o latou Aiga, le paia ia Pule ma Tumua, Ituau ma Alataua, Aiga i le Tai ma le Vaa o Fonoti. E le faagaloina foi le nofo tapuai mai o lau Afioga i le Kovana Sili, le Sui Kovana, le Peresetene o le Senate, le Fofoga Fetalai ma Sui Usufono o Maota e lua, faapea le paia o le Faigamalo a Amerika Samoa. O le paia lava lea aua Sua ma le Vaifanua, Fofu ma Aitulagi, Saole ma Saleaumua ma le Launiu Saelua, faapea Tootoo o le Faleula ma Tama a le Manuatele.

E le faagaloina foi le nofo tapuai o le aufaigaluega paia a le Atua i ona fatafaitaulaga e fia o lo o nonomanu aua se manuia o Samoa mo a taeao.

Ou te faafeiloai atu i lou itumalo o Gagaifomauga Nu.2 i le ee tapuai o Sao e fa, Aiga Sa Peseta ma le mamalu o le Falefa o Samauga. O le paia lava lea aua lau Fetalai a le Tuua ma le mamalu i lo outou Aiga Sa Sooalo, tainane foi le alaatai o oe le tama tane. O paia lava ia i le Mausautele ma le Atua Tuisavaii faapea lau Fetalai Mauai. O le tapuaiga foi ia te oe Safune i le paia o le Tagaloasusu, lau Fetalai a le Tuua, le toafia o tulafale ma lo oulua toalua, le mamalu ia te oe Sa Oloapu ma upu ia te oulua Safune. Le paia o le Toafa, Satoeti ma lau Fetalai Tuumatavai, e faapea foi le tapuai a Tapaau ma le mamalu o le Falefa o Sausi.

A o le i faia se manatu i lenei Fonotaga a le Palemene, aemaise ai le faataatia mai o le Tala Faatautu Autu o le Tupe, e aveatu lau faafetai i le tofamamao ma le faautautaga saili ua mafua ai ona tasi le finagalo i lo tatou nuu i lou nei tagata faatauvaa ma ua filifilia ai au e tauave le tofi o lo tatou itumalo mo lenei lima tausaga. E ui lava sa fetaii ma faafitauli ae na lagona pea le mafanafana o le faatasi mai o le Agaga o le Atua. E moni ai se tasi o upu; 'e malosi le mea moni ae le moni le mea e fai malosi.'

Faamalo i sui sa matou tauva i le faiga palota e pei ona sa feagai ai, i a outou Afioga Tuu Ioane Tuu, Lao Sofai faapea Feo Nemaia, ua faamalo le onosai, malo le tauivi. Ona e le mua uma ni vaa i ni tuuga, ia tapuai maia ma aumai la outou lagolago ina ia tatou galulue faatasi.

Faafetai mo galuega lelei mo le itumalo sa fesoasoani ai le Sui Usufono na mavae atu nei. Ou te faamalulu atu foi pe afai ua afaina lou finagalo, masalo ona sa e manatu e laitiiti pe maualalo lou ituvai. A le o lea foi, pe sa e manatu o le tamaitai, po o le ituvaivai lea sa outou tauva.

A silasila foi i le tele o atunuu o le lalolagi e aofia ai ma Samoa, ua maea ona sainia ma aloaia le feagaiga lea e taua nei o le CEDAW (Convention to Eliminate Discrimination Against Women). O lena ua matua aloaia ai le faataua o le sao o tamaitai.

E i ai a matou upu tauave e faapea; e mafai e tamaitai ona faatino so o se mea e o lava i nei mea o le saofai i Upufai o Malo. O le mea moni, i le afuafua mai o lenei tofi o le Sui Usufono, sa manino mai i le uluai feiloaiga

ma lou nuu, masalo po o se taimi o Oketopa i le taimi o le Lotu Tamaiti, sa ouotu saunoa manino mai ai, ia ou alofa i le nuu ma le itumalo ua fia maua se fesoasoani. E ui lava la i se agaga manumanu i lau galuega faafaiaoga sa ou galue ai i ni tausaga se tele, a ua ou manatu o le a le faia sou loto ae faatino le finagalo o lo tatou nuu. Atonu i lenei foi suiga i le tofi o le Sui Usufono, ua ou mautinoa, e eseese auala e faatino ai le tautua i le atunuu ma ona tagata, aemaise foi i lo tatou itumalo. O lea la ua tofia nei au e aveia ma Sui Usufono o le itumalo. E matua taua ona ou faamaoni ma ou lototele e fai faaiuga e lelei mole ta itumalo. E tatau foi ona ou faimeia falogo i taitai o le nuu ma le itumalo.

i lou faatoa tulai mai i le tofi o le Sui Usufono o le Palemene, sa ou tutoatasi. I lena lava vaiaso, sa ou foi atu ma fesili mo se finagalo o le tatou nuu, ma e na lagolagoina lou tulai mai i le tofi. Sa aumai lo outou finagalo o lea na mafua ai ona ou auai i le Faigamalo a le HRPP. Atonu sa ogatasi foi ia faaiuga ma le Vaega Faaupufai sa lagolagoina e Sui Usufono e pei o le Afioga Sifuiya Sione, o Feo Nemaia sa tulai mai i le tofi o le Sui Usufono o Gagaifomauga Nu.2 i tausaga ua tea.

Ou te faafetai tele i nai ou aiga uma sa galulue ma fesoasoani mo lenei tofi. O le mea moni o lo o ouou alolofa ma lo outou sailimalo ua iu ai i le manumalo. Ou te faafetai foi i nai aiga ma le paia o lou itumalo o lo o alaala i itu e fia o le kelope i Amerika, Niu Sila, Ausetalia ma Fiti.

O le tele o taimi sa outou telefoni mamao mai lava e faamalosi ma fautua mai ma faamalo mai i le tofi, aemaise i taimi sa ou feagai ai ma le faamasinoga. Ou te faafetai i le moni o la outou lagolago.

Lau Afioga i le Fofoga Fetalai, o le a aveatu loa se manatu i le Tala Faatatau Autu o le Tupe faatasi ai ma nisi o manao o lou itumalo e auala atu i lau Afioga i le Fofoga Fetalai. E tatau lava ona ou molimoli atu mo le silafia e le Malo i le Afioga i le Palemia ma le Kapeneta, ina ia alofagia se fesoasoani e faatino, pe logo mai foi nisi o auala e mafai ona matou faia e fesoasoani atu ai.

E muamua ona ou faamanino, o lou Sui Usufono e lagolago i le Tala Faatatau o le Tupe ua talanoa nei i le Maota. O le pine o lou manatu ona e maitau atu, o lo o ua mafai ona siitia tupe e faaagaaga e faatino ai polokalame a Matagaluega o le Malo. E matua moomia ia tupe e faatino ai galuega.

I le Tala o le Tupe ua tuuina mai, o lena ua siitia tupe faaagaaga mai le tausaga ua tuanai 1999/2000 i le tausaga nei 2000/2001. O le a fesoasoani tele e faagaioi ai polokalame a Matagaluega.

I le Ofisa o Faatoaga o lena ua siitia i le 8%; Matagaluega o Aoaoga ua siitia i le 6%; o le Matagaluega o le Soifua Maloloina o lena ua siitia i le 10%; e faapena foi le Matagaluega o Galuega o lo o ua siitia i le 27%.

Lau Afioga i le Minisita o Galuega. O nisi nei o mea o le a ou talosaga atu ai. O taligalu. E momoli atu le faafetai ona o le tulaga ua i ai le taligalu lena ua i ai i le nuu o Lefagaoalii. Peitai, e moomia pea le faaauau o lea taligalu ina ia sosoo atu ai i nuu o lo o totoe e pei o Faletagaloa seia o o i Fatuvalu.

O le mafuaaga o le talosaga, ona o le tele o tausaga ua mavae, e lamatia pea ia aai, aemaise i le alu atu i Faletagaloa seia tau i le Fatuvalu pe a o o ina tafe mai vai i uta i le tetele o timuga ona e tu maualalo ia nuu. E silafia pe a agai atu i lena itu o le atunuu, e agai atu i lalo i le aega lena e i Lefagaoalii ona alu atu loa lea i lalo ma faasolo atu i nuu ia ou te talanoa atu ai, e tu maualalo. E le gata i lea, o le tele foi o taimi, e siisii maualuga le tai aemaise pe a leaga aso.

O se isi manatu e mafua ai lau talosaga i taligalu ona e maitauina se tasi o vaega taua o lenei nuu, o le vaitaele sa i ai. Peitai ua leai nei se vaitaele ona ua sosoo atoa mai i ai le sami. O le matou talosaga, atonu e faatino lea taligalu ona mafai lea ona toe puipuia le vaitaele e pei ona faaaogaina ma taua i lea nuu i le tele o tausaga ua tea.

O se isi itu taua, o lea lava vaega o le aai ua soloatoa mai i ai le sami, a maea ona tanu ona faaaogaina lea mo nisi o atiina ae. Ou te maitauina i le tele o tausaga ua tea sa i ai i ina nisi o fale e faaoga e malolo i ai nisi o tagata tafafao maimoa mai; e pei o le vaai i aai ia i Manase ma Safotu; e faapena lou vaai i ai i lea vaega o le matou itumalo. Atonu o le a i ai ni atiina faatino e nisi o lea alaafalaga i lena eleele pe a maea ona tanu le taligalu, ona mafai ai foi lea ona faaoga tatau nisi o mataaga lea o lo o i ai i totonu o lea itumalo. Ou te talanoa i le mataaga lea e pei ona i ai le vai lea e i Matavai, le vai lea o Sina ma le tuna. E faapea foi i le ana o lo o i ai i Paia. E tele nisi o mataaga taua o lo o i ai i totonu o Safune, atonu a i ai se atiina ae faapea mo tagata tafafao, o le a faapea ona faaoga atili i ai nei atiina ae.

O lona lua lau Afioga i le Minisita o Galuega, o auala ia e taua nei o auala galue. Faafetai atu i le Malo ma le faatinoina o le auala lea i Safatou ona o o atu ai lea i Ologogo, ua matagofie aua e le gata i Ologogo, a ua faapena ona fesoasoani i le toatele o le mamalu o lenei itumalo o lo o alaala ai i lenei auala e alu i uta. A o le talosaga, a mafai ona faasosoo atu ia atiina ae o auala, aua o lo o taua pea o auala galue peitai lau Afioga, ua faaaogaina ona o le tele o le paia o lenei itumalo ua o i uta e nonofo ai ina ia mafai ona latalata i le mea e i ai faatoaga ma mea o lo o galulue ai.

Lau Afioga i le Minisita o Galuega, e faapea le talosaga; ona o lo o i ai auala na i Matavai, faapea i Faletagaloa faapea i Fatuvalu. Atonu sa maua i nisi o Sui Usufono ua tuanai, pe mafai ona faata na o se lima mita i le alu agai i uta atonu o i ina e gata tonu mai ai eleele ia o lo o nofoia e le mamalu o le itumalo, ona taatia loa lea i le Ofisa o le Pulenuu, o lo o i ai a latou fuafuaga e faamama atili auala seia o o i le mea o i ai a latou faatoaga.

Lau Afioga i le Minisita e faapea ona ou talosaga atu i le Faalapotopotoga o le Malosiaga Faeletise. E momoli atu le faafetai ona o lena ua matagofie o matou moli, ae na pau o lea, o lo o i ai pea nisi o moli i le auala pe mafai ona toe faaola e o o mai lava i le taimi nei, ua tele ni taimi ua tea, na ona i ai o matauila ae le ola. E faapena foi ona momoli atu le faafetai i le Faalapotopotoga o le Suavai aua ua tele ni suiga i le faaleleia o le suavai o lenei itumalo; ae atonu o i ai nisi mea o faaletonu ma ou

te le o maua i lenei taimi, o le a faapea lava ona ou fesootea atu pe afai e mautinoa i se taimi mulimuli ane. Faamalo i le tele o galuega ua faaleleia aua o suiga lava nei e maua ai pea e le Faigamalo o lo o tulai mai nei le lagolago a lou itumalo. Ou te mafaufau pea i aso ua tea, i le tele o tausaga ua tea i le pefu o auala sa i ai i le tele o tausaga. E le gata i lea, ou te manatua pea le taualo o paopao e agai atu ai ni vai o lo o i ai i Lefagaoalii ma Matavai e asuvai ai. E le gata foi i lea o le suiga o le soifuaga ua i ai nei talu ona maua atu le eletise.

Lau Afioga i le Minisita mo Galuega, atonu o le a alagatatau ai foi i i ona aveatu sau talosaga, aua e moni e le fitoitonu i lou itumalo o Gagaifomauga Nu.2 ae i ai nai tamalii o le matou itumalo o lo o alaala iinei i Upolu ona o galuega o lo o galulue ai i tofiga i le Malo. E i ai la le auala lena i Fagalii. Masalo e te silafia aua masalo o lau Afioga e te pasi soo atu foi i ina i le vaitafe. O le talosaga, pe i ai se fesoasoani e mafai ona lata mai ina ia foia le faafitauli o lo o vaaia pea pe a tafe lenei vai i Fagalii i le auala lea e agai atu i le Malae Vaalele. E faapena foi i nisi o tamalii o lo o alaala o lo o talosaga mai pea i le nofoaga lea i Palisi. Ua tele ina tafe mai le vai ma faapena ona tau afaina ai nofoaga o lo o latou nonofo ai.

Ou te talosaga atu foi, e moni lava o lo o i ai Sui Usufono o itumalo ae fesoasoani atu ona o le auala lena i Leone i le itu atu i Sasae o le auala laupapa lea e sosoo ma le faletalimalo o Aggies, pe i ai se fuafuaga lata mai ona tagai ane lea i ai o lau Afioga mo se fesoasoani.

Ona ou o o mai ai lea i le Afioga i le Minisita mo le Soifua Maloloina. Faafetai i lau Afioga aua o lena e pei ua foliga mai i lau saunoaga o le a maua atu se fomai mo le matou falemai i Safotu. Faafetai pe a o o i se taimi e mafai ona faatino. Faafetai mo le tautua a le mobile health services, le taavale lea ua mafai ona maua i lenei taimi aua o se tautua taua lea o lo o moomia I totonu o le matou nuu o lo o i ai nai toeaiina ma nai loomatutua o lo o nonofo i o latou fale, e malolosi o latou tino ae le mafai ona tausavali i le falemai e fai ai a latou siaki. E i ai aso e asiasi atu i ai tamaitai tausimai mai le falemai i Safotu, ae atonu tasi lea fesoasoani o le a faaleleia atili ai lea tautua.

Lau Afioga i le Minisita o Faatoaga, ua maitauina le siitia o le tau o le popo pe afai e mafai ona faatino fuafuaga e pei ona faataatia. Na pau lava lea o le fautuaga ina ia tautuana, po o ai lava o le a latou faatinoina lea fesuiaga, matou te talosaga ina ia pau tonu le manuia o ia faamanuiaga ia i latou e faatinoina le mamafa o le galuega.

Ou te talanoa tonu lava ia i latou o e e ona toganiu ma e o e faaputu popo ma faamago ma o e fua. O i latou tonu lava ia e alaala i totonu o nuu ma afai e lelei se faamanuiaga o le a tafe atu ia i latou e ala i lea faamanuiaga ona momoli atu lea o lau faafetai.

E faapena foi ona lelei le atiina ae o le ava; tasi lea atiina ae taua o lo o faatino e le toatele o lou itumalo, ma e talosaga atu e moomia lava nisi o faatosina po o ni maketi foi e faaleleia atili ai lea atiina ae.

Lau Afioga i le Minisita o le Tamaoaga, e taua le lagolago o lo o ave i pisinisi laiti. O nei atiina ae e aofia

ai le lagolago i le atiina ae o tagata tafafao maimoa mai, aemaise lava tagata o lo o tafafao atu i Savaii. Aua e le gata ina maua ai tupe mo i latou o lo o fai a latou faletalimalo laiti, a o nei foi faletalimalo laiti o lo o manuia ai le tele o tagata o lo o alaala i totonu o afioaga e auala lea i le faatau atu i ai o fua o a latou faatoaga e faaogaina i totonu o ia faletalimalo. E le gata foi i lea o lo o mafai ona maua ai ni a latou galuega, e faapea foi ona maua ai avanoa e siitia ai tulaga o faafiafiaga aua o le tele o taimi e moomia mai ai e ia faletalimalo ni aufaafiafia e o atu e latou te faafiafiaina ni malo e asiasi atu i la fale.

Lau Afioga i le Minisita mo Autalavou, Taaloga ma Aganuu, matou te fia maua ni avanoa e aoao ai tupulaga ua le maua ni a latou galuega. E pei lava ona silafia, o le tele lava o alo ma fanau e le o maua ni galuega. O i latou ia o lo o tautua nei i totonu o nuu, o nisi o i latou ua apo i le faakomiti, o le faaamaga. Aepeitai, atonu e i ai lava se fesoasoani e auala lea i ni aoaoga e fesoasoani lea i ai latou taleni. Ou te talanoa i taleni e tai pei o le faaogaina lea o le gaosia o meataulima po o le vaneina foi o faatagata.

Sa ou maitauina se tasi o aoaoga faapea sa faatino i le itumalo lea o Anoamaa i se taimi e le i leva tele atu, masalo o le nuu o Solosolo. Atonu a faatino ia ituaiga aoaoga i alii ma tamaitai talavou o lo o ua nonofo nei i nuu, o se avanoa lelei, o i lea e taumafai ai ina ia saili auala e maua ai ni a latou seleni pe a lelei foi maketi ma fesoasoani ai e faatino ni mea latou te mananao ai e fai.

Lau Afioga i le Minisita o Felauaiga, o feoiga lea i luga o uafu ma vaa. Ou te talosaga ina ia faapitoa se fesoasoani i nai tama ma nai tina matutua, e faapea nai tina failele, o pepe ma tamaiti. O le tele o taimi ou te vaai pea pe a ou malaga atu pe ou te foi mai, e feomai faatasi ai lava le autalavou, o le aulaiti ma le aumatutua. Atonu e i ai se faitotoa e faigofie ona ui atu ai i totonu o le vaa lea vaega ona le omia ai lea ma afaina aemaise lava pe a o o i aso tumutumu.

Lau Afioga i le Minisita o Felauaiga, ou te talanoa i fanau aoga lea o lo o feoai i luga o vaa, o lo o i ai le fuafuaga a le Matagaluega e faapea e totogi afa le pasese o tamaiti e i le va o le 6 tausaga i le 12 tausaga. E tatau foi i ia tamaiti ona ofu o latou toniga aoga ina ia mafai ai ona faigofie ona iloa ma faapena ona fuafua i ai le pasese e tatau ona latou totogiina.

O le talosaga a lou nei Sui Usufono, o nisi o fanau aoga e 13, 14 e o o i le taimi e uma ai a latou aoga ona o lea faigaluega. Ou te manatu e le tatau ona ofuina toniga aemaise lava i aso Sa aua o aso lava ia ou te maitauina ai le o atu o fanau nei e malolo i o latou aiga i Savaii ona foi mai lea. Aua o nei ofuaoga, e ofu mai i le aso Sa one toe o o lea i le aso Gafua toe ofu i le aoga. O le tele o taimi ou te maitauina e tutumu vaa ma e tele ina palapala ai ofu o nai nei fanau aoga o lo o i ai i totonu o vaa.

O lau talosaga atonu e mafai ona fai se isi faiga i le faia lea o ni students Ids po o se isi faiga e faaali i le autusi pasese ma faapea ona totogi afa ai pasese o so o se tama po o se teine o lo o aoga. I le faaiuga o le vaiaso nei sa ou malaga atu ai i Savaii ma ou foi mai i le aso Sa, sa ou

vaia foi le toatele o tamaiti na feoi ma toniga o ofuaoga i luga o le uafu.

Sa fesili mai ia te au se tasi tamaitai papalagi sa i ai i le uafu pe i ai ni aoga e faia i lea taimi o le vaiaso, ae pe i ai foi ni aoga o faia i luga o le uafu ona ou faape atu lea, masalo ona o lea e iai faiga e tatau ona ofu ofuaoga o tama ma teine aoga ona faigofie ai lea ona iloa ma totogi faaafa ai o latou pasese. Lau Afioga i le Minisita o Felauaiga faapea le pulega ma le Kamupani Vaa, atonu e tagai ane i ai pe faigofie ona fai se suiga i ia faiga ina ia foia ai ia faafitauli.

Lau Afioga i le Minisita o Aoga, ou te faafetai tele i le vaegatupe lea ua faamatu e faaatoatoa ai le salary review lea o faiaoga e pei ona amataina ma o lea ua matagofie o lea o le a faaatoatoaina.

Faafetai tele i le Sui Usufono mo Aiga i le Tai ma lau Afioga i le Fofoga Fetalai ona o le faaopoopoina o lou taimi. Ou te talanoa i le taua o le lagolago lea e tatau ona maua mai nuu ma itumalo i le atiina ae o Aoga.

O lo o faataatia manino i policies a le Matagaluga le itute o Komiti Aoga ma e tatau ona faatau. E tatau ona i ai le lagona i Komiti o Aoga, e i ai foi le latou vaega tele e tatau ona fai i le atiaeina o fanau a o latou nuu ma itumalo.

O le taua o le atiina ae o le Iunivesite o Samoa faapea le Matata Eseeese po o le Polytechnic aua o nisi ia o atiina ae taua o le atunuu, o lena ua ave i ai le \$5 miliona mo le NUS ma le \$2,500,000 mo le Polytechnic. Faafetai aua e taua tele ia atiina ae o a tatou Tertiary Institutions nei aua e i ai foi taimi ua le atoatoa mai ai le le saogalemu o aoga i isi atunuu e pei o Fiti ma Vanuatu.

O lau talosaga mulimuli ina ia alofagia se fesoasoani ina ia faamaea ona faaatoatoa o le faleaoga o lou itumalo o lo o i ai le Alofi o Taoga faapea le aoga tulagalua i Paia aemaise o le talosaga a Faletagaloa is e auala e fesoasoani ai mo se latou faleaoga tulagalua. Ou te talitonu o le a i ai lava se auala e fesoasoani ai le Malo i nei faamoemoe talu ai o lea ua ave le faamuamua i le Ofisa o Aoga faapea le Ofisa o le Soifua Maloloina.

Ia lou tiumalo o lena ua outou faafofoga i nisi o mea sa outou tau mai, pe ou te alu atu foi i Savaii ma ou maitauina. Peitai, o le vave ma le tuai ona faataunuu, o le a taatia mai o le a fai pea ma au faamanatu i Afioga i Minisita ma pulega o Matagaluga e fitoitonu i ai.

Lau Afioga i le Fofoga Fetalai, e faaiu atu ai lau lauga i lou otona o se vaega lea o le Saunoaga o le Tala Faatatau o le Tupe a le Afioga i le le atiina ae o le soifua laulelei, o le fatu lea o taiala ma faiga faavae a le Malo. O le a mataituina totoa le gasologa o nei taumafaiga uma ina ia mautinoa ai le manuia mo e lima vaivai e faavae lea i le galulue soosootauau o le malo ma le atunuu atoa ina ia mautinoa ai, o le ausia o taiala ma le faatinoina o polokalame o galuga o lenei tausaga.

O upu e tolu ia ou te faatauaina i lenei vaega o le Saunoaga a le Afioga i le Minisita o Tupe. Ia mautinoa le manuia mo e lima vaivai, ae galulue soosootauau ai le Malo ma le atunuu atoa. Ona ou manatu lea, ua ou lagolagoina ma ua lagolagoina e lenei tiumalo le Tala Faatatau o le Tupe e pei ona ua tuuina mai.

Lau Afioga i le Fofoga Fetalai aemaise le Malo le Palemia ma le Kapeneta, o lena ua tuuina atu e fuafua ane i ai ina ia maua pea se fesoasoani mo lou itumalo o Gagaifomauga Nu.2. Ia manuia le Fono. Soifua.

## Tofa SILILOTO TOLO



### **Itumalo Faaalalafaga:**

*Vaimauga Sisifo*

### **Filifilia:**

*12 Mati 2001*

### **Faatauto:**

*15 Mati 2001*

### **Lauga Faataupou**

*18 Iuni 2001*

Ee ia le paia maua o lenei Maota i le afio o lau Afioga i le Fofoga Fetalai, le afio o lau Afioga i le Palemia, le mamalu o le Kapeneta faapea foi le mamalu i Failautusi Faa-Palemene. E le gatai lea o le mamalu i lenei Itu i le afio atu o le Afioga i le Taitai o le Itu Agai.

Ua ou tulai atu ona e pei e faitauina foi se tasi o Sui Usufono mo Vaimauga i Sisifo ona ua vave ona tulai atu, a o le agaga lava o le Vaimauga ia, e leai e pola puipui i a outou afioga pe afai tou te afifio mai i totonu o le Maota Fono. O le mea lea, tapuai maia ma le manuia a o le a taumafai se tai o Sui Usufono mo le Vaimauga i Sisifo e fai se sao mo le Tala o le Tupe ua opea nei i lumamea. E le gata i lea o le mamalu o le atunuu, si ou itumalo pele o le Vaimauga i Sisifo, tapuai maia ma le manuia a o le a taumafai lo outou Sui Usufono e ave so tatou sao aua le Fonotaga a le Palemene ua tauaofia i lenei taeao.

O le a ou muai taia le tutafaitoa ae ta i Utumaau. O le a ou le vaisausauina foi ou paia sausaugata Samoa e amata mai i Analega seia paia le fafa o saualii; ae tainane foi le tolotolo na sao ai fofoga o le Tagaloga e pau mai le Lualoto. Le susu tapuai mai o lau Susuga i le Ao Mamalu o le Malo Tutoatasi o Samoa, lau Susuga i le Malietoa Tanumafili II ma lou fala na folaloga na faalogo ia te oe Samoa. Afio foi le Fono a Sui Tofia, le afifio o Tama ma Aiga, Aiga ma a latou Tama, le mamalu ia Tumua ma Pule, Ituau ma Alatuua le paia tele i Aiga i le Tai ma le Vaa o Fonoti.

Le faafofoga tapuai mai a le Afioga i le Faamasino Sili ma Afioga i Faamasino, le faafofoga tapuai mai a o tatou uso i Tutuila ma Manua. O le mea lea, le mamalu e o lenei taeao faapea le faafofoga tapuai mai a faafeagaiga taulagi i fata faitaulaga e fia i totonu o Samoa i la outou matafaioio o le tauasuina o le ipu o le ola ma nono manu aua se manuia o Samoa ma lona Malo Tutoatasi. Nuunuu atu ia la ia Tumua ma Pule faapea foi le mamalu ia Tuisamau, o la ouotu matafaioi lena aua o Samoa ua taatia a o se alaoo, ua uma foi ona faataotooto ou paia ma ou faiga Samoa e oo i le faavavau. O le mea lea le paia e o lenei taeao, ua paia foi Mulinuu nei i le malae i Tiafau nei, o le Malae o le faautugatagi a Samoa, o le Malae e utuvaitai i ai Sui Usufono uma o le Malo o Samoa aua le taumafaiga o ona upufai. O upufai faava o

Malo, le tofa loloto ma se faautaga oo i se paia ma se manuia o le Malo o Samoa.

O lea le mamalu e o lenei Maota Fono, lele ua alaalatai mai, ua afio lau Afioga i le Fofoga Fetalai ma e talitonu o lau Afioga i le Fofoga Fetalai o se tasi ua faafofoga i ai le atunuu i lou tulai mai ma le tauaveina o le Nofoa i ia fatia ua sola. Ua matou talitonu la matou faalogologo mai i tua ae matou te le i oo mai. Malo fai o le faiva, malo faatoatoa. Ua matou talitonu foi e leai se pati e sala, o lo o manuia taualumaga uma o Fonotaga i le faafogafoga mai a Samoa atoa. Ou te talitonu foi o lo o faapena ona manatu le atunuu i lau Afioga, o lau Afioga i le Fofoga Fetalai o se tasi o toeaina matua o le atunuu i ou tiute fai ma au galuega ua tino i totonu o le Maota lenei.

Eetai ia la le paia o le afio o lau Afioga i le Palemia, o lau afioga o le Tama o Samoa, e faatuatua ma aumai uma i ai manatu o le atunuu ma lo latou faatuatuaga o le a e tauaveina tiute fai o le atunuu i tulaga solo lelei ma le manuia.

Eetai pea ia lau Afioga i le Palemia faapea le Sui Palemia, o lea foi ua fofoga le Maota Fono i le Tala o le Tupe ua opea nei. O se Tala o le Tupe sili ona matagofie ma lelei.

Eetai foi lenei Itu faaupufai, lau Afioga i le Taitai o le Itu Agai. Ua malo le onosai mai i lenei taeao ua maua se mafutaga fialia. E le gata i lea o le mamalu tele o Afioga i Minisita, le paia i Failautusi Faa-Palemene ma le mamalu o Sui Usufono o le Palemene i lenei taeao, ua malo fai o le faiva, ua malo faafetai.

O lenei taeao, o le a ou le toe faaluaina le faafetai i luma o le Atua. O lele ua uma ona e toto le niu i le va o i tatou ma le Atua i lenei taeao. Ua tea foi le fetu tali matagi i le lagi ma ua faafofoga le Atua i lenei taeao. O se fuafuaga po o se faamoemoe sa tuu i luma o le Atua, peitai i lenei taeao ua tatou vaia le alofa ma le agalelei o le Atua, ua tatou feiloai i luma o le nuu ae le o tua o le nuu; ua feiloai foi i le lagima ae ua le o le matafi o le lagi; ua tatou fesagisagiai foi le fialia ma le olioli i lenei taeao ona o le alofa ma le agalelei o le Atua, ua mafai ai ona faataunuu le galuega i lenei taeao.

Ae ou te le i utufia le vai na moomoo i ai le Tuiatua na alaala i le Maota i Mulinuu ma Sepolataemo, ou te afea Afia i si ona vao ona o le manatu tele i le paia o si ou itumalo pele o Vaimauga i Sisifo. O le mea lea le mamalu e o Sauga, ia eetai maia le paia i Alosina, le afio o lau Afioga Seumanutafa, afio foi le Afioga Toomalatai, afio le Fuaifale o Salevalasi, lau Afioga Tamaseu ma Faualo, ae tainane foi lo oulua matua le Onofiatele ma le Fauono. Susu foi le Aloalii, le afio o Faumuina ma Siligatusa, le afio o Tupuola ma lo oulua matua o Leupolu. Susu le Alo o le Malietoa, le afio o lau Afioga Utuoka, le Afioga ia Utumalonenuu, afioga Fetoai ma Pata, Atoa ma le mamalu ia Fuaiupolu faapea le mamalu ia te oe Laamalefolasa.

E faapea foi le paia i le Faletolu i lau Fetalai Tuiletufuga, le Fetalai ia Letaa, le mamalu ia te oe Samau faapea foi Feagaimaalii ma le paia tele ia Tuisamau. Alaalatai foi le paia ia Fuaiupolu, le afio o lau Afioga Tofaeono ae tainane foi tama, o Asi ma le

Patu; aiga e tolu ma gafa, alaalatai lo oulua toalua o Tamapua ma Manogiamanu ma le nofo a ituaiga ia Fuata. Susu foi le Tuiataga, afio le afioga i le Usoalii, le Afioga ia Liufau faapea le Tuiono; afio lau Afioga ile Lupetaliaami aeamise le mamalu ia te oe Ataga o le Launiu na Saelua; le mamalu ia te oe Taga ma Salaitia, le Moanatatatau ma le mamalu ia Fuata. O paia na o si o tatou itumalo.

O lenei taimi, e fia momoli atu foi le faafetai tele i le itumalo. Mai le taele o lou loto e tuuina atu ai le agaga fialia ma le agaga faafetai i lenei ituaso e tusa o le faiga palota. Ua outou le vaai i lou faatauvaavaa ma lou le taualoa i totonu o le itumalo, ae ua outou seu silasila i le Atua ma Lona finagalo ua mafua ai ona ou tulai atu faapenei. O le mea lea, e talitonu le taofi i la outou faatamalii ma la outou faautautaga lea ua mafai ai ona ou tulai atu i outou luma i lenei taeao. Ou te talitonu, e le auro pe ario sau upu e mafai ai ona ou tau i outou agalelei ma lo outou alolofa ia te au e tusa o le faiga palota, ae ou te faamoemoe i le Atua pulepuletetele, o Ia o le a faapea ona faamanuia atu i le itumalo. Le paia i tupu ma ee, le mamalu i faletua ma tausii, saoa ma le malosii o le nuu e tusa o le faiga palota.

E talitonu foi i le tofa loloto ma le faautaga oo, o lea lava e vevesi nisi o itumalo i o latou Sui Usufono e tuuina atu i le Tulafono, ae peitai o lea lava ua faatamalii la outou tofa ma le faautaga oo, ua mafua ai ona solosolo lelei ma solosolo manuia taualumaga o le faiga palota.

Alo maia si ou itumalo o le a ou taumafai e fai so tatou sao aua le Fono usu a le Palemene e tusa o le Tala o le Tupe ua opea nei i le Maota Fono.

Le paia i lau Afioga i le Fofoga Fetalai, ou te talitonu o le tasi lenei o itumalo e tele ona faamanuiaga ma le Atua, o le itumalo lenei o Vaimauga. Aua a tatou tepa i ai i vaitafe, o vaituloto, o vaipuna o lea o lo o maua mai ai le tele o faamanuiaga a le Atua o lo o mafai ona gaosia mai ai le eletise mai le vaitaumafa mo le taulaga nei. E amata mai i le Sifua Maloloina, sau i le Ofisa o Aoga, o le mamalu o le atunuu o lo o alaala ma papaaao i le taulaga o lo o latou faaogaina ia faamanuiaga o le Vaimauga lea ua fai ma sao o le Vaimauga i totonu o le Faigamalo i ana sailiga Malo ma sailiga manuia aua se manuia o le atunuu. O le agaga lava o lenei itumalo, o le a lava le mea e finagalo i ai le Malo e faapea lava ona auauna i ai lenei itumalo, ae e maitau mai lava e le o ano atu lava i ai le Faigamalo nei se i faaleleia nisi o nai mea laiti ia o lo o moomia e lenei itumalo.

O taligalu. O lenei polokalame o se polokalame ua leva, ona alu atu lava lea o le taligalu i Matautu, tau atu ai i Vaiala, oo atu loa i Moataa ona gata ai lea i ina o le taligalu. Oso i Fagalii alu atu ai i o i Lailii ma le Anoamaa, a o lea lava e punopunou Moataa e le i oo i ai se taligalu. O le tele foi o taimi matou te savalia mai ai le Ofisa lenei, ae pau lava lea o le tali, "Lafu maia, lafu mai o le a i ai se aso."

E oo mai lava la i le taimi nei, o lo o faapena lava ona taatia le talosaga a lenei itumalo, ma nisi o nai vaega laiti e pei o auala e fia valitaina. O le auala i Leone, le auala i Maagao, Matautu-Uta, le Aai o Niue e tau i le falesa o le Ekalesia Faapotopotoga Kerisiano Samoa; o le auala i

Sogi tau i le falesa o le Ekalesia Metotisi, le auala i Vailima, le auala i Vaoala, Toomatagi, Vaivase-Uta, Moataa-Uta, le auala i Magiagi i lalo i le vanu faapea le auala ua leva ona mafatia ai lenei nuu, le auala lea i va o le Apia Park, i le pa uaea foi lea ile malae o taaloga. Ua leva ona tausasa mai ai se tasi o vaega o lenei nuu ina ia faaavanoa se auala.

A silasila i ai, ua na o se auala vaiti o lo o savavali ai le mamalu o lea nuu. A oo la ina gasegase pe maliu foi se isi, o le mea masani lava e tu le taavale i le auala o le Malo ae tausaesae agai itua i nai aiga ia. O ia auala, e le o ni auala tetele, o le tele o auala ia e pei ona ou faamalau atu, pe a ma le 50 mita. E i ai nai isi auala pe a ma le 100 mita le umi. Ou te talitonu a tuu faatasi le aofai o auala ia e i ai, pe a ma le va o le 300 ma le 400 mita se umi fuafuaina mo nei auala.

O le tatalo a lenei Itumalo, o le mamalu o le itumalo o lo o alaala i le nofoaga ua silia i le 30 i le 40 tausaga o alaala ai. O lea foi e faafofoga mai le Minisita o Galuega, ua i ai fale tapuai, ua i ai foi maota o faafeagaiga ma ua mautu mea uma. Ona pau lava lea o si ona faaletonu o le le valiaina se i vaeane le paia o le Fonotaga. O lea le mamalu i lau Afioga i le Minisita o Galuega, se i e alofa ane i nai auala ia o lenei itumalo.

E le gata i lea, o le eleele faasaoina a le Malo i Taumeasina. Faafetai i le Malo i le faamatuu mai o se tasi o vaega ua faaogaina e lenei itumalo mo le malae taaloga. O le mea moni lava e pei ona silasila le Fonotaga nei faapea le faafofoga mai a le atunuu, e tasi lenei nuu e tatau ona ave i ai le faamuamua aua o lea e maitauina le lelei o le au taaloga lakapi a lenei nuu o Moataa. Ona pau lava lea o le itu lea e talosaga atu ai le Sui Usufono o le Vaimauga, sina fasi eleele i le eleele faasaoina lea i Taumeasina se i fau ai se faleaoga o le nuu o Moataa.

O lo o i ai le faleaoga i le taimi nei, ae peitai e le malu puipuia ona ua lata tele i le auala. E tele foi nisi o alo ma fanau a lenei nuu ua afaina o latou soifua ona o le lata tele i le auala. O le ala lea e tatalo atu ai se tasi o Sui Usufono mo Vaimauga i Sisifo i lau Afioga i le Palemia faapea le Minisita o Eleele, Fuagafanua ma le Siosiomaga, se i taatia ane le talosaga a lenei nuu.

O le talosaga mulimuli a lenei itumalo, masalo ua silafia e le mamalu o le Palemene nei, faatoa maea atu nei le tatou Faiga Palota. O le lisi o le au palota a le Vaimauga Sisifo, e sili ona tele i le aofai o itumalo taitasi i lona faitau aofai o le toatele o Sui Usufono. E le gata i lea o lea o le alo atu nei le atunuu mo le tusiga igoa mo lenei tausaga. O i ina e faamaonia ai sau faamatalaga, ua matua tupu ma ola lenei itumalo.

E le gata i lea o le mamalu o le atunuu o lenei itu ma lea itu o le tatou – e le gata i Tumua nei a o Salafai foi, ua faapena ona autovaa mai i totonu o lenei itumalo ma latou nofoia. Ia ai ona o le malu ma le matagofie ma le lanu lauava o atumauga ma atuvanu o le Vaimauga, o le ala lea o le lolofi mai o le mamalu o le atunuu nei e papa aao ma afio mai i i aua le faaaoogaina o le fanau ma aumau ai nisi ona o galuega.

E tatalo atu ai lenei itumalo i se isi Sui Usufono faaopoopo o lenei itumalo e faatolu ai Sui Usufono. O le tele o nisi itumalo ia e tailua ai nei Sui Usufono, a

tuufaatasi o se faaitaitaiga o le Au Palota Taitoatasi. A faaopoopo faalua pe faatolu ona faatoa maua lea o le faitau aofai o le Vaimauga. O le ala foi lea o le taumafai atu o le Sui Usufono o le Vaimauga po o le a le tofa, sei mai se isi Sui Usufono o le Au Palota Taitoatasi i le Vaimauga ona tolu ai lea o Sui Usufono o le Vaimauga.

Ona ou oo mai lea i le Ofisa o le Soifua Maloloina. E momoli atu le faafetai tele a lenei Sui Usufono i le Minisita ma le Afioga i le Palemia ona ua ave le faamuamua i le Ofisa o le Soifua Maloloina. O le mea moni lava, e leai se isi o tatou e soifua i lenei soifuaaga tatou te fia ola ae mai. O tagata uma lava e ola ma soifua e fia maua le soifua maloloina lelei.

Pau ia o nai itu e fia fautua atu ai le Sui Usufono o Vaimauga e ao ona tulimatai e le mamalu o le Matagaluega faapea foi le faafogafoga mai a le Afioga i le Palemia ma le Minisita, ina ne i tatou matele i nisi vaega o le taumafaiga ae ao ona faaleleia le itu lea i alii ma tamaitai fomai, aemaise le mamalu o tamaitai tausimai ma alii tausimai.

Ua maitau i se taimi ua fano ma feiloai atu foi i le Matagaluega, o faafitauli ia e le o lava ona puipuia lelei. I le tulai mai o le fuainumera lea e \$29.55 miliona sa manatu lava o se fuainumera lea ua tele. Ae maitau atu ma le faasoasoina o galuega a le Ofisa o le Soifua Maloloina, e le taitai ona lava.

O le mea muamua e le lava le aufaigaluega, e le lava alii ma tamaitai fomai latou te tauaveina le galuega fai i totonu o le atunuu. O le ala foi lea o le faasea o le atunuu ma tumutumu i le Outpatient, ona e le lava fomai. E le lava foi tamaitai tausimai latou te faatinoina nisi o galuega. Ina ne i tatou matele i nisi vaega o le Matagaluega e i ai le faaleleia o maota gasegase i Motootua ma le lautele o nisi o maota gasegae i Upolu nei e faapea foi Salafai, ae galo ai le mea e tatau ona fai muamua, faaleleia muamua le mamalu lea. E le gata ina faaleleia, ae faaleleia foi o latou totagi. O le tasi lea Matagaluega tatou te maitauina e faaoga le ao atoa ma le po; e vaai foi ma le alofa i ai i lea Matagaluega a le Malo ae o le maitau i ai e le taitai ona lava tagata faigaluega.

Sa ou maitau i se taimi ua fano sa i ai le polokalame lea a le Ofisa o le Soifua Maloloina, e faigaluega ma aoga tagata. O se mea lea e faalauaitetele ai le silafia o le mamalu o le au tausimai i le faatinoga o le galuega. O le tasi lea itu o lo o faapea ona aafia ai. O lea foi ua maitau atu i le 5 tausaga ua mavae, ia te au lava ia ou te maitau atu, e leai lava se vaaiga foi lea e siisii i luga i le Matagaluega. Ua na o faaupuga tatou te faalogo atu i ai ua solosolo manuia le Matagaluega, ua agai i luga le tulaga o galuega fai. Ia a o le maitau lava a lenei Sui Usufono e le o taitai ona fetui le feagai ai ma galuega. O nisi pe alu atu lava i le ao ma le po toe alu atu ai ma le isi ao o faapena lava ona tauave le tiute.

O le mea lea e aveatu ai se fautuaga e tatau ona faaleleia le itu lea ma ia siisii foi i luga totagi o le aufaigaluega. O le mea lea pe e fomai fomai a i nei se fomai ua pasi i o, na ona tau mai lava o le totagi maualuga i o alu loa i o ae tuu i. Ave le faamuamua e matua faaleleia le totagi o alii ma tamaitai fomai ina ia

mafai ona aumai pea le agaga e fai lana tautua i totonu o si o tatou atunuu.

I le ma lea, i le maitau atu o lo o i ai nisi o faamai pipisi e toatele le mamalu o le atunuu o lo o aafia i ai. E pei o le toto maualuga, o le suka ma le mai fatu. O faamai ia e fuifui tolu lava i le tele o taimi ta te vaai i le toatle o le atunuu. O nisi taimi tatou te o atu i le falemai e toatele le mamalu o le atunuu e o atu e siaki ai latou. Ia ou te taofi au e le lava fomai, e laitiiti foi se vaega i i.

O lea ou te talitonu o lea foi ua i ai le taavale lea e faameaalofa mai i atunuu i fafo. Fai se polokalamea foi lea a le Soifua Maloloina ma fai e ese se vaega e vaai i inei i le taulaga, ese se vaega e vaai i lea itumalo ma lea itumalo e i ai le falemai ia i ai ni alii fomai faapitoa i lea foi matata ia vaai totoa i ina ma le tau o mai i Apia nei. O le mea moni o le tele o le mamalu e aafia i le gasegase lea o ni tagata ua matutua. Ia a tasi, lua itula pe ova atu ua toe alu i le fale ae le i vaaia le faamoemoe, ona ua faalogo atu ua ese foi le tulaga o le malosi ua i ai. E i ai foi ma nai isi mai laiti e pei o le puta papala, o le tane, o le utu, o le lafa, o nai mai laiti ia e tatau foi ona i ai ni nai fomai faapitoa. E tatau lava ona i ai ni nai fomai e alu foi se savaliga. O le mea lea e tupu e aveatu foi i le isi fomai e ese le matata e i ai ave tuu i le isi Matagaluega e le fetau. Ae a aumai tonu lava le fomai e fitoitonu i lea gasegase ou te talitonu o le a faapena ona solo lelei le tauaveina o le galuega.

O se tasi o vaega e fia moomia i le maitau i ai i le asiasiga talu ai, o lo o faaletonu le aoina o pili oe mamai. So o se Matagaluega a le Malo, e tatau lava ona maua ai se tupe e fesoasoani i le faaleleia o le Matagaluega i lea taimi.

I le maitau atu la ma le talanoa mai o nisi o lo o i ai, e pei a o le mea noa le vaega lea. A maitau atu foi la i se totogi faatauvaa lea e i ai nei le mamalu o le atunuu pe autovaa atu i le falemai, e na o le \$6.00 i le aso. E tausami faatolu i le aso, e vaai fua ia fualaa. O galuega uma lava e faapena ae o le totogi faatauvaa lenei e tatau lava ona fai se – pe faatauvaa lenei tupe, o se sao foi lea. E tatau i le Malo ona ave se sao mo se fesoasoani i le mamalu o le atunuu. Ae paga lea o le mea lea e tupu mai i le atunuu, pe laitiiti lava se seleni ae taumafai lava e aua le totogia. O le isi mea ae faapea mai la nisi o le mamalu o le aufaigaluega, fai mai se i o i tua ona maua mai lea o se tupe, ia e fiu e tatali, toe o i tua toe asi mai e tasi lava le tali e leai se tupe.

O le mea lea e fautua atu ai i le Afioga i le Minisita ma le mamalu o le Matagaluega, se i silasila ifo i le itu lea, afai lava o se feagaiga, aua o le mea sa i ai i aso ia, e le mafai ona tea i tua se gasegase pe a le uma ona totogi se pili. Po o le a foi se mativa o se aiga sei tulou, ae tatau lava ona maua se seleni e totogi ai le pili o se ua gasegase.

O le fautuaga la lea e tuu atu i luma o lau Afioga i le Minisita, silasila totoa i ai. Po o le a lava le laitiiti, a puepue lelei mai, ona tatou maua lea o se faamanuiaga mo le Matagaluega. A o le silasila i ai e le taitai lava le tupe ua fuafuaina mo le Soifua Maloloina.

Ona ou see mai lea i le Ofisa o Aoga. E momoli atu foi le faafetai lau Afioga i le Minisita o Tupe ona o lenei

vaegatupe tele ua faamatuu mo le Ofisa o Aoga. I le maitau atu ma le fia iloa ma talatalanoa i nisi o le mamalu o lo o faigaluega ai, ua tele lava se vaaiga. Sa fesiligia foi po o le a se suiga fou e tusa ma le faamoemoe o le Malo ua i ai nei, o lea o le a alu nei le sefulu tausaga o ave a le faamuamua i Matagaluega nei e lua.

I le matou foi silasila i ai ma vaai, e leai lava ma se suiga o i ai. Ua matele foi i nisi vaega ae tuu nisi vaega taua e mafai ona seu silasila i ai le Afioga i le alii Minisita ma lona faaleleia.

o le itu la lea e fai atu ai se fautuaga, e lagona foi le faafetai i le atunuu ona o le lagolgo mai o le atunuu i le amatalia o mea nei o Aoga Faataitai. O le tasi lea sao taua o le atunuu; o aso ia sa laitiiti ni aoga faapena na i ai. O le taimi lenei i le mamalu o le atunuu ua faapena ona faaosofia lo latou naunau ina ia faaleleia aoga a tamaiti. E amata mai la i le vaega laiti lena se i tau mai i le taimi lea e aoga ai i le 5 tausaga pe a, ona ulufale mai lea i le aoga, ua tele lava se sao. Ua iloa lelei e le tamaitiiti fai lona ofu aoga ma iloa ona tausii lana mea taumafa po o le a le tulaga o mea faapena. E oo mai la i i i vasega ia ua amata ai loa ona tupu ai le faalavelave; a o i i le amataga o le vaega lea, a lelei le tapue mai o le fanau i le amataga, e talitonu e faapena ona solosolo lelei.

O le faafitauli la e maitauina e le Sui Usufono lenei i le Ofisa o Aoga, o vasega e feagai ma faiaoga. E tasi le faiaoga ae pe 50 i le 60 le vasega. I le talitonuga o lenei Sui Usufono, o se vasega e mafai ona tausii lelei e se faiaoga, ia o le va lea o le 20+ i le 30. O lona uiga o lea fuainumera, e uma ifo le aso ua oo le faiaoga e vaai uma tamaiti ia e i totonu o le vasega. E silafia foi e le faiaoga o le tamitiiti lea e malosi, o le tamaitiiti lea e vaivai, ona fai lea o le galuega a le faiaoga o le ave le faamuamua i le tamaitiiti vaivai. O le mea lea e tupu nei, ua faateleina le aofai o vasega e uma le aso e le oo le faiaoga i i i le mea lea ona pesepese a lea o le tamaitiiti pau lava le mea ia vave ona tuua le aoga ae se i alu i le fale. O lea foi tatou te pisa nei ma faapea ua tele tamaititi le aoga. O i inaalea ou te maitau o lea e tuu atu ai. Na ona aoga, aoga lava o le tamaitiiti ua na le mafaia le aoga alu loa faatau tauaga i le maketi e pei ona molimau mai foi. E tele foi nisi o finagalo ua faaalii i lea tulaga po o le a se vaifofo. Ua le iloa, o le vaifofo ia faalelei le mea lea; po o le a le vaivai o le tamaitiiti ae a lelei ona milimili e le faiaoga, ou te talitonu foi o le mamalu o faiaoga lea e i a i nei i le Ofisa o Aoga, o tina ua matutua ua lava foi lo latou tomai ua leva ona feagai ma le galuega. E le gata i lea ua fai le fanau, fanau a latou fanau, po o le a lava le gaoioiga e faia e le tamaitiiti e lava faapalepale le tagata faiaoga matua. E iloa ma tele foi idea e mafai ona fai e le faiaoga mo le faaleleia o le tamaitiiti aoga ina ia mafai ona maua le agaga lea ia maua le atamai o le tamaitiiti.

E talitonu i le tele foi o nisi o aso i aso ua mavae, sa ou vaai o i ai se faiga faatosina po o se faiga foi lea e faafiafia ai i le Kolisi o Faiaoga i i i Malifa, sa maua o latou alauni i le tai lua vaiaso.

E le o se totogi i lena vaitaimi ae o se alauni, o le meaalofa e faatosina mai ai le tamaitiiti e sau i i i le

Aoga faa-Faiaoga. O le tasi lea o mea o lea e tupu nei o le lava foi o faiaoga. Na ona vaai atu lava o le tamaitiiti, oh, e laitiiti le totogi o le faiaoga, musu loa i i ae alu i le mea le la e tele le totogi.

O le mea lea o lea e tupu nei, ua tatou naunau e ave le faamuamua i le Ofisa o le Soifua Maloloina, ave i le Ofisa o Aoga ae tatou te le maua le itu lea e mafatia ai. Ona alu a lea ua alu i i, e le gata foi i lea ua vaai atu i le – alu e sue le mataupu lea aua o lea a oo ina maua le tikeri ona faapena lea ona Faatonusili o le Matagaluega. E tele vaega eseese a le Ofisa o Aoga; o le tupe foi lenei o lea e lavea ai ma le Iunivesite pe a. O ia lava mea o lea e maitau atu e le taitai ona gafatia e le tatou seleni lea ua faamatuu e le Malo mo mea ia.

Ona ou oo ifo lea i nai faamanuiaga lea e maua e Ekalesia. O lea ou te vaai atu e \$3 miliona mo Aoga a Ekalesia, \$1 miliona mo Aoga Tumaoti. O aoga ia, ou te manatu o Aoga a Ekalesia, o le la foi e tele tupe a Ekalesia latou. E le iloa po o aveatu le \$3miliona lea e faasoa atu e le Malo, ave i se isi vaegatupe mo atiina ae a Ekalesia ae taatia le Ofisa o Aoga. O le faamaoniga o sau faamatalaga, sii i luga pili, e sili atu ona taugata pili o Aoga a Ekalesia i le taimi lenei. O le ala foi lea i lau tau maitau atu se i silasila totoa le Malo po o faapefea, ae leai se agaga tetee.

E lagolagoina foi le ave o se fesoasoani a le Malo mo Aoga a Ekalesia ma Aoga Tumaoti, ae se i ave i se tulaga talafeagai, ia faaoga lelei seleni ua aveatu ae le o le aveatu ma faaoga i nisi vaega o le atiina ae a Ekalesia.

Ia see ifo lea i isi vaega lea e i i mo totogi o faiaoga. \$350,000 ua faaagaga mo totogi o faiaoga. O se tupe faatauva lenei tupe. Masalo a na faasoa e ulu o Aoga ma le vaega lea e ptio i luga ona uma ai lea ae o lea e mafatia lava le mamalu o le atunuu lea e galulue i le vaega lea e i lalo. E le oo mai i ai le faasoa lenei.

Aua a manatu foi i le siitaga lea sa fai nei i le 5% lea e i i po o le amataga ea o le tausaga nei. O le mea moni lava o le la e manuia na o e tetele totogi, na o le vaega lea e i luga a o lalo ifo e le taitai Ianulanu le 5% lea e faamoemoe i ai mo le siitaga.

Ia se i faauma atu pea le Ofisa lea. Ia ma lou faaloalo lava, ia atonu e i ai nisi mea ina ne i te i ua faauma mai e le Afioga i le Fofoga Fetalai lou taimi ae o lea ou te le i oo i i i le Aoga lea a le Iunivesite, ae taatia ia atonu e maua mai e nisi o Sui Usufono.

O le a ou soso mai i i le Ofisa o Faatoaga. O le tasi lenei Ofisa e pele ia te au, o le Ofisa o Faatoaga. O le mea lea le mamalu e o le atunuu, tapuai maia ae se i ou faia so tatou sao e tele mea ia tatou te moomia ai se fesoasoani a le Malo.

I aso ua mavae, o itu nei sa masani ona maua ai tupe maua a le atunuu e pei o le popo, koko, auina atu le talo i fafo faapea foi le fai. I le taimi nei, ua matua leai lava ma se mea o mea nei e toe maua mai ai se tupe maua a le Malo.

I le tele foi o tausaga ua mavae, a fai le Tala o le Tupe, e sili ona maua le tupe maua e le Ofisa o Faatoaga mai oloa ia e lau i fafo. I le taimi nei ua matua leai ma se oloa e tasi a le aufai faatoaga.

E peiseai o se mea malie i le faafogafoga mai a le aufai faatoaga le alu atu o le tala i le maketi, ua tele le tamaoiga o le maketi, ua tele fua o faatoaga. Ona fiafia lea o le mamalu o le au faatau a o le tagata fai faatoaga lava ia, o le la e afu lelea i le la, a timu e malili i le timu. E le o lava se faamanuiaga i i, aua a aumai lava ua tele fua o faaeleeleaga i le maketi, e pau ai lava i ina se seleni ua na maua ua leai lava se isi mea e mei i ai. Ua uma ai foi i ina lona faamoemoe.

O le mea lea e aveatu ai se lagona lau Afioga i le Palemia ma le Afioga i le Minisita o Faatoaga, ou te talitonu foi o lau Afioga i le Minisita o se tasi o Minisita talavou ma le lalelei i totonu o le Palemene. Ua loa foi ona e galue i totonu o le Ofisa o Faatoaga. Ua lava foi lou silafia o mea o lo o faaletonu ai le Ofisa o Faatoaga.

O lea ou te tatalo atu ai ma lou agaga faaloalo i lau Afioga, ia fai se fua lelei i le Ofisa e faamalie; ia ave se fesoasoani i le au faifaatoaga. O le mea lea e tulai mai nei, ua le iloa e le aufai faatoaga po o fea le mea o le a sulu i ai e maua ai se fesoasoani.

O se talosaga a lenei Sui Usufono, alofa ifo, afai ua leai se isi mea ua uma atu le 5 tausaga lea o taulagi lava le uta povi a le tatou Ofisa, e oo mai i le taimi nei e le i faataunuuna.

O le tasi lea o atiina ae e tataua ona ave i ai le faamuamua a le Malo, o le faaleleia o mea tau lafumanu. Aua a lelei mea tau lafumanu, e mafai e le au fai lafumanu ona faaleleia totonu o le atunuu, o le a faaitiitia ai le sau o le mamoe, ua mamoe, siusiu pipi ma isi oloa mai fafo, ae mafai lava ona tausi e le aufai faatoaga ma faamalie manao o le atunuu pe afai ae faaleleia lea vaega taua o le atiina ae i totonu o le Malo.

I le ma lea, afai la ua leai ni mea e tua i ai, leai se oloa e ave i fafo pe export ia fai se isi faiga. O le fautuaga la a lenei Sui Usufono, e tataua ona aumai le tolo lea e toto ai le suka; sa ou vaai o toto i le matou itumalo i aso ua mavae. Sa le ano i ai, e fai ma mea e ai tolo ai tagata o le matou itumalo, e le mafai la ona ola lelei. O lau fautuaga, o atunuu ia i fafo ua uma ona saili e Saienisi lea elele ma lea elele ma mea lelei e tataua ona ola ai; ia fua le faatoaga ma lelei ai.

Ou te fautuaga atu, aumai le vaega lea; ave se isi vaega e faataitai i Aleipata; ave se isi vaega i Falealili; alu ane se isi vaega i Tanumalala; ave se isi vaega i Savaii se i saili po o fea se ogaelele o totonu o le atunuu e ono manuia ai lea atiina ae. Aua a manuia i i, o le taimi nei i le atunuu po o le a lava le ituaiga matafaioi e ono maua mai ai se seleni, e matua sulu le ulu i ai. Aisea? O le fia maua o se seleni; ua matitiva le mamalu o le aufaifaatoaga.

E le gata i lea, aumai ma le araisa. O lau vaai i atunuu ia e ola ai le araisa, e pei foi o tatou nei i si mafanafana a lea ma le malulu i nisi o taimi. Aumai ma se araisa e faataitai; aumai ma ni pateta; o mea uma ia, tatou saili nisi auala fou aua o auala ia sa faaoga i ia fatia ua sola ua le o toe maua ai se fesoasoani mo le aufai faatoaga. Ua saisaitia uma i le mea lea. O lau fautuaga tatou saili o lea foi ou te vaai atu e leai se tupe faaagaga, ua matua vaai maua le Malo i lea foi vaega taua o le atunuu, o le aufaifaatoaga.



O le mea moni lava o lea e soifua maloloina, sau ma le potō i fea ae a le tausami e le maua le ola lelei. O le mea lea ua ave le faamuamua i ia vaega, a o lenei foi 5 tausaga. Afai ua leai se tupe i lea lima tausaga ua mavae, se i lolofa le Malo se i aumai se vaegatupe se i faaleleia e mafai ai ona faataunuu le vaega lea o le Ofisa o Faatoaga, ina ia atili ai ona faaleleia le Ofisa o Faatoaga.

Ona ou see mai ai lea i le Ofisa o Faiga Faiva lau Afioga. O le tasi lea vaega taua o lo o sulu nei i ai le atunuu. O lea ou te maitauina po o le 1976 po o le 1975, sa faasalalau mai ai le mafutaga faaleaoaoga sa faia i lea vaitaimi e le Malo. Sa aumai papalagi mai fafo ma nisi mai Tutuila i le Faleia foi lea o le Van-Camp ma le Star-Kist, ona omai lea fai le aoga. E pei sa faamalamalama i le atunuu o le tasi lea vaega e ono maua ai se faamanuiaga a le atunuu. Pe a ma le lua vaiaso o fai lea mafutaga, sa ou i ai foi. Sa i ai ma le fesoasoani a le Malo, afai ta te manao i le atiina ae lea, e tatala mai le Faletupe o Atiina Ae e fai ai la ta aitalafu ona faatino ai lea o mea ia ta te manao ai mo le atiina ae. Sa amata mai i le taimi lena sa solosolo manuia; ae lata mai nei lava ua faateia au i le vaiaso nei, o lea ua tele le faaletonu ua i ai. O le mea lea ua tulai mai nei, o papalagi ia latou te fuaina ia ma fai le pisinisi lea, se ua taitolu vaa tetele latou te faaogaina. O le la foi e fai mai le isi faamatalaga ua lata foi ona taunuu mai nisi vaa.

O le agaga i le maitau atu i le taimi nei, ua taumafai nei la fale faua ia nei, sei tulou le faafofoga mai a Samoa ma lau Afioga i le Fofoga Fetalai, e tuu ese vaa laiti ia. O le faaupuga lea o lo o i ai, o le a le toe faaogaina ni ia e maua mai i vaa alia, ae o le a tau lava o vaa lapopoa o le a mafai ona fua i Faleia nei. O lona uiga o lea mea, ua taumafai e titina le tasi foi lea o atiina ae taua o lo o mafai ona faalagolago i ai nisi o le mamalu o le atunuu.

E le natia foi le manuia o lo o i le mamalu o le Maota Fono i le solosolo manuia foi o lea atiina ae. O e sa fai le faatoaga, o e sa faigaluega, o nisi foi ua faatau meatotino a ua o lava i ina, ae paga lea o lea ua aumai i se auala e faamuta ai le fiafia o le mamalu o le atunuu latou te faaleleia lea atiina ae. O le mea lea ou te tatalo atu ai i lau Afioga i le Minisita o Faatoaga o lo o feagai tonu ma lea – se i feiloai ane i nai uso ia ma ave se fautuaga o le la e faafofoga mai le mamalu o le aufai faiva, ua le iloa le mea e sulu i ai. E le gata i lea po o fea le mea a totogi ai aitalafu lea na fai mai loan mai le Faletupe o Atiina Ae mo le faalelele o lenei atiina ae. O se vaaiga faanoa lēna ma le faaloalo tele i lau Afioga i le Fofoga Fetalai. Ona ou soso mai lea i le Matagaluga o Eleele, Fuagafanua ma le Siosiomaga. O le tasi lea Ofisa taua i lau maitau o le Ofisa o Eleele, Fuagafanua ma le Siosiomaga, aua foi o se ivitu lea o se Malo, o ona laufanua. Amuia lava tatou, o le tele o atunuu i fafo e pei o Toga, e pulea e le Tupu Toga eleele. E faapena foi i la atunuu. A o tatou e le gata i eleele faale aganuu, a o le tele o eleele a le aganuu e alu loa faapea mai o lea ua umia e le Malo. O se isi vaega, o eleele ua umia e le Esetete Tausi. Ona fememeai ai lava lea. O le faaletonu lea e i ai, i le mamalu i lena vaitaimi i e sa latou tauaveina mai, ua na o le faamatuu atu o lisi i

tagata nei e talosaga mai i ni lisi e fai ai ni atiina ae. O mea ia e maitau i ai i le feiloaiga ma nisi o le Ofisa lea, ua na ona faamatuu atu o lisi nei, le totogia le lisi, le faatoaina ma le fai fanua lea ae o le la e nofonofo. A o le tele o le mamalu o le atunuu o le la e naunau mai e talosaga mo se fasi fanua e faatino ai le faamoemoe lea. O le mea moni lava e toatele le mamalu o le atunuu o lo o faapena – o lo o fia galulue ma gagau le vao ae o le faalavelave o le lava o eleele e tuuina mai e le Malo mo atiina ae.

E faafetai foi i le maitau atu i futia ua sola i le lima tausaga lea, o le tele o nisi eleele ua faatau motu; ua fua tai kuata eka ma faapena ona faamatuu atu i le atunuu. O se faiga lelei lea, aua tatou te le mailoa po o le a le auala na maua ai e le Malo po o le Esetete Tausi eleele nei o le atunuu. O se faiga lelei lea e talitonu lou manatu e ao ona tatou faamatuu se vaega i le Malo; afai o le lisi, lelei; afai o le faatau, e faapena ona ave se fesoasoani mo le atunuu.

Ina ne i umi naua lau faamatalaga, ae se i ou see mai la i le vaega lea o le Tala Autu o le Tupe. Se i taumafai atu ni nai vaega laiti ia ina ne i umi naua ae ao pea ona ou folasia se manatu i nai vaega ia.

I le maitau mai i le Tala Faataata Autu o le Tupe i le 2000 seia tau mai i le 2001, o le aofai o aitalafu lea e i ai nei, e \$493.1 miliona. I le maitau atu la a oo i le tausaga lenei i le 2001 i le 2002, a tuu i ai aitalafu faatasi ma pasene ou te talitonu ua ova atu i le afa piliona tala le aitalafu. A o se mea e totogi ai, ou te maitau atu i nisi taimi ua faatau aseta a le Malo e pei o le Falemeli, Telecom ma le Faletupe o Samoa. Ua faatau atu; e oo i le Vailima (Breweries) ua faapena foi ona faamatuu atu.

O itu ia o lea e atugalū ai le taofi po o a la ni auala, po o ai ni mea a totogi ai aitalafu nei? O le maitau atu i le aitalafu e le agai i lalo e agai i luga. O so o se mea lava e moomia e le Malo, o le aitalafu lava e tua i ai. A o ni mea la e totogi ai aitalafu nei, po o aitalafu e mama tului ae talitonu le taofi e totogi nei aitalafu. E popoe foi le taofi ma alofa i le atunuu i le vaavaai atu i le tulaga lea e i ai. Afai la ua faatau nisi o meatotitno a le Malo, ua le iloa po o fea le mea a maua mai ai ni nai seleni.

Ou te maitauina sa ou faalogologo lelei mai ma sa taumafai atu foi nisi o Sui Usufono ina o lea a faatau le tatou Faletupe lea.

O lo o ou maitauina pea le saunoaga a le Afioga i le Palemia; “a vaai loa ua puta ma peti, faatau loa i se tau lelei.” E eseese ai la ma lou taofi. Afai ua puta ma peti, toe saili nisi fagafao e toe faapuputa ma faapepeti. Ia pe ave ane ni moa, tulou le faafofogaaga a le Maota, po o ni pato, aua o moa ma pato e tuufua i lea aso ma lea aso. A o o la ina faaputu mai nai fuamoa na ae faatau atu, e ono maua se seleni e foia ai le mea lea. Ae afai o le faatau atu, ua leiloa po o fea o le a tua i ai po o fea a sulu i ai le atunuu. E pau la le mea lea o le a tatou faia nei, toe la o le Ofisa o le Tiute lea e totoe nei, o i lea o le a tua nei i ai le Malo. Talofa i le atunuu. Ua tatou le iloa... aua e alu alu a le tele o mea ia, ae toe ifo lava i si o tatou atunuu ia le siusiu o le mea lenei ma le mafaitaga lea tatou te i ai.

O le mea lea ina nei umi naua le lauga a le Vaimauga. E le i taitai uma lau lauga, ae pei i ne i te i ua ou

faatufanua i le faafogafoga a le Fonotaga. O lea ua faapea atu ai se faamatalaga a le Sui Usufono o Vaimauga, e momoli atu le faafetai tele i lau Afioga i le Fofoga Fetalai e tusa mo lenei avanoa taua ua faavanoaina mo au.

E momoli tele atu foi lau faafetai tele i le Afioga i le Palemia, Afioga i Minisita, ma le mamalu o lena Itu. E fia momoli atu foi le faafetai tele i le Taitai o le Itu Agai, Afioga Le Mamea faapea foi le mamalu o lenei Itu faaupufai o Malo.

E momoli atu foi le faamalo i le atunuu pele, ae faapea foi le faafogafoga mai tapuai a si o matou itumalo. O le mea lea, ia faamanuia tele lava le Atua i la tatou fonotaga i lenei aso. Ia manuia le Fono.

## Tofa TAATITI ALOFA



### **Itumalo Faaalalafaga:**

*Alataua Sisifo*

### **Filifilia:**

*30 Novema 2002*

### **Faatauto:**

*9 Tesema 2002*

### **Lauga Faataupou:**

*16 Tesema 2003*

Malo faafetai i lau Susuga i le Fofoga Fetalai.

O le Maota lenei ua paia ma ua mamalu ona o Sui Usufono faitauina o le atunuu. Afio le Afioga i Le Ao o le Malo, le Susuga ia Malietoa Tanumafili II, afio i lou nofoa vaeveloloa ma lou fala na folaloea, e faalogo ia te oe Samoa. Afio foi le Afioga i le Tupufia, Afioga Faumuina Anapapa le Sui Usufono o le Fono a Sui Tofia. Afio le Afioga i le Palemia ma lana Kapeneta ma le mamalu o le Palemene; e le gata i lea, o Faauluuluga o Matagaluega o e o lo o tautuaina le Malo; o vae ma lima aua le tofa i le Palemia, le Kapeneta ma le Malo. E faamalo atu galulue; faafetai lava aua o outou o le malosi o le Malo, malo galue.

Ou te faamalo ia Tumua ma Pule, Itua ma Alataua Aiga i le Tai ma le Vaa o Fonoti. O le paia lava ia i Aiga ma a latou Tama, o Tama foi ma o latou Aiga, faleupolu o tofiga, faleupolu tausii papa o paia lava ia o Samoa.

E le faagaloina foi le motu i Sasae; i le Kovana ma Maota e lua faapea foi Sua ma le Vaifanua, Fofu ma Aitulagi, Saole ma Saleaamua. O le paia lava lea i le Laau na Amotasi, Faatui o le motu, le Tootoo o le Faleula ma le Manuatele. O paia lava ia e sau i Malaetele seia paia le ataata o le la goto nai le Alataua aua le lualoto o alii ma le ana o Vaatausili faapea le fafa o saualii, le ala o Upolu ma le ala o Savaii. O upu lava ia e taoto o le atunuu.

Faamalo i le Aufaigaluega o e sa talosiaina le Malo i le latou galuega fita sa fai i le po ma le ao e pei ona miti Iakopo i le afeai foi lea e pai lona iu i le lagi, o e aeae ma ifoifo i a latou taulaga aua se manuia o Samoa. O lenei ua laaloe mala ma puapuaga ae le gata i lea o le maliu ma le oti, tulou o le upu e to ia te au, ua laasia ai le atunuu i matagi vale o le soifuaga, ona o le a?

Ona o la latou taulaga momoli ma a latou tapuaiga i le puipuiga aua se manuia o le atunuu; ia faafetai. Faamalo i fata faitaulaga e fia o lo o i Samoa o lo o latou tapuaiga le Malo, faafetai.

Se i ave muamua lava sau faafetai i lo matou Itumalo; ou te faafetai i a outou Afioga Tapaau faapea foi le Matua o Tauiliili i lo outou Aiga Samoeleoi, i le toafa o Suafa ma Lenafaoga ma le mamalu ia i laua Igoa o le Alataua, faapea foi Gisa ma Aiolutepotea, Malolo ma Tauama, Fuiavailili ma alo o Tamalelagi Falefia Tanuvasamanaia, e faapea foi le Maopu Aiono ma Alaalamatuatala Taituave ma Tanuvasa, Afioga ia Toalepai.

O paia uma lava ia e nuunuu i siu o save i le mea o alaala ai Fofoga o Papa, fetalai ia Folasas ma i laua o Tamanafaiga o Lemalu o Falemoa ma Tagaloafanua. O le paia lea i Usoalii ma le latou Tama, le Afioga i le Taauso aua Gisa ma Tuifaiga ma Aiolutepotea, Seuula ma le Alaalamatuatala faapea alo o Lilomaiava. Ia faataalolo i Faatoatoa i le mea o lo o alaala ai le fetalai ia Momoemasu ma le Alataua. Faamalo atu le tapuai i le Itumalo, ae le gata i lea o Susuga i Faafeagaiga o le Itumalo; o lea ua uma le palota, e leai se manu e laga, e leai se galu e fati, ona o la outou tapuaiga ina a matagofie. Ia manuia, ae tuu maia se i tauave so tatou manatu i faalagamea a Samoa.

O le mea muamua, ou te faafetai i le Afioga i le Palemia; o lona lua, faafetai ia Palauli ina ua faamatuu mai lo latou vaitaumafa o lea sa alo atu i ai le Palemia ma le Kapeneta sa vaavaai atu i ai ma le Matagaluega; o le afa lea o Salafai ua faaolaina ma faasoifuaina i le vai.

Ou te matua momoli atu lau faafetai i le Faasisina faapea Sa Lilomaiava, le levaleva ia Safaleletaua na potopoto ma le Pule, ia ai ona o lou manatu o lou uso ia Safotulafai. Ou te viia i ina i le alu atu i Palauli seia paia Puapua, ua afa Savaii. E susu atu lau Afioga i le Palemia e te tagai ane ma e silasila i le alu atu i Gagaemauga seia paia Matautu e tofu lava ma le vai, sau i Gagaifomauga seia paia Aopo e faapena; sau i Asau seia paia Sataua se malo faafetai.

A liliu mai i le isi itu o le motu i le sau lea i le Falefa e manaia tele se i oo mai i Palauli Sisifo i le sau i Taga seia paia Foaalalo; ua manaia le suavai. E le gata i lea, i le alu atu i Salega seia paia Fagafau ona uma ai lea. Silasila ane lava lau Afioga i nai nuu lava ia e le i oo i ai le vai o Falelima, Neiafu, Falealupo ma le nuu lea o Papa i uta e le i oo atu i ai se vai i lena mea; ia outou alolofa o tagata Samoa foi o lo o i ina i lena ogamea. E ui lava ina faapea o le fanau a le fafine pologa ma le fanau a le fafine saoloto, ae tasi lava lo latou tama, o Aperamo. Ia outou alolofa i ai aua e tasi lava le ogapaipa e faataoto i ai uma na nuu i le sau i Papa i uta e taunuu i Falelima ona uma lea; ae a faigata foi ia aveatu ni kalone foi nei, tulou, e tofu le nuu ma le latou kalone e taumamafa ai ona manaia lea aua o matou a oo i aso la, ou te iloa o lea e molimau lava tofi ia o Salega.

E tumu lava nuu i a matou utugavai; ona inu lava lea o le e fai le taavale, ae alu atu le ua leai sana taavale e etoeto atu pau o le taavale a le aiga la sa...na o se

talosaga e aveatu ae a leai, se faitalia lava outou; e oti matou, oti lava tatou uma e le faapea...

Ia oo mai lea i le isi tulaga lea, se ou te faafetai lava i le mea lea o le Penisione. Se o matou na o le penisione lava e ola ai, faamalo. O le isi mea, se ua manaia foi lea ua molioo atu lava i o matou lima lena mataupu o le penisione e fai ai lava mea uma; fai ai mea faale aiga, fai ai mea faale lotu, fai ai mea faale nuu, ia ma faatau mai ai foi se eleni, e ui ina taugata matou eleni ae taugofie outou, ae faatau lava ona o le leai o se mea. E pei ua maoae tele le tau o eleni i o ae manaia lava lata sau i inei faatau atu e faigofie. O le siitaga ea lea talu ai ua maualuga ai le tau o mea? Tatou te alo i le upu lea faapea, o le fai lafoga; o le atunuu lenei o Samoa o le atunuu saili Malo, o le lafoga lava le mea lea ua outou toe faaopoopo atu. Se i ou tala mamao atu lava - o la e liu efuefu le tamaloa Safotulafai i atunuu ese ona o le sailiga o se Malo o Samoa, le Tofa Lauaki i ona po o Siamani. O le atunuu saili Malo, ua aumai i le vaitau tau lata mai; se sa tofafa o outou tuua ma o tatou matua i le vao, sa tuli e pei o le faiga o meaola, tulou o lou gutu ma le afi. Ua oo lava ina masoe Tama a Aiga ona o le a? O le sailiga Malo. E le foi, o le atunuu e le foi i se mea; o le saili Malo ia manuia. Sa ta maitau i le tala i le au penisione, fai mai talu ai e \$1miliona+ a o ona tagata e toaititi, aua o isi nuu e tali maua lava pe na o se toatolu ni tagata e penisione ai, ao le tele e leai. Ia tatou te alo e a i le lafoga? E pule lava outou aua o outou e fuafua maia; a selau, selau; a limasefulu, limasefulu a le tagata sei faataitai; e le faapea e faatonua ae na o lau fautuaga foi lele; faataitai ona fai tatou, se aua tatou te fefe i lea mea; aua foi tou te mamanu i se isi tulaga faapea o le a fai lafoga Samoa. Leai, ia ao le a le mea o le a fai o le Malo o le Malo o Samoa? Na ona Malo ma nofonofo, lea na o le omai i inei ona maua lea. E lelei outou e i ai tou failautusi foi nae ua tele ai foi le alu i luga o le tau, a o lea lava e leai ni a matou failautusi, o lea lava matou te nonofo i lalo nei. Ona i ai lea o se manatu, na ona taatia i ina, e le faatonua, ta te fefe e fai atu, e a pe a fai se tatou lafoga faapea, ae i ai se aso; aua le vavevave i lenei vaitau se i uma le palota lea ne i te i ua avea lena mea ma mea e poloka ai le palota. Fuafua mo se isi vaitaimi, ao lea ou te fai atu o Samoa o le atunuu saili Malo; na o le tau o le Malo o Samoa, a o le a le mea o fai. Leai e malo uma ai Sui Usufono ma aumai ai lava tupe ua ta le iloa po o fea e aumai ai na tupe; malo lava saili tupe mo le togiina o Sui Usufono, o lea e aveatu ai le faamalo tele.

Se faafetai lava i le matou ala ua manaia lava ua leva ona fai, e tau le faia, ae a pe a outou finagalo foi lea, aua o la e leaga lava matou aualagalua, ua tafea i le timu; pe tailua vaiaso o si nuu o matou, aemaise lava nuu e i ai Falelima, Neiafu, Tufutafoe, Falealupo, Papa-uta. Se o nuu lava na o le mea lea o le taamu niukini, a o lona faalavelave foi e leai se maketi e alu i ai.

A outou tofotofo, aveatu se container, pe taifa i le masina e aveatu ia matou e sau; a ua maua se maketi e alu atu taeao, e le mafai lava ona faafiti na mea. Ia outou alofagia la le tau o a outou vailaau, aua na o le i ai lava o le faleoloa ae faatonu atu e outou tau. Se i tau pau ia

vailaau ma mea faalelei elele, a o lena e tau atu i ina, o aualagalua ua faaletonu, ia outou alofagia.

Ia tailo po o ua galo ia te oe lau Afioga i le Palemia, se le ala foi i gatai ona agai nai toaina o le matou nuu talu ai; e le i faataina lava la ua toe leaga i le timu; ua lava foi faamaliega a na toaiina aua e le o omai e o atu i ina ia outou, ae o lea ou te sau au ou sau i inei, ae se i vagana la se isi e sau i ina ona e manatua lea o le ala lena e le i faataina. E a pe a faata mai lena sosoo ma Tufutafoe, le ala lena na fai ae ai ua toe leaga i le timu. Se malie ona pau lena o mea ua ou mafaufauina ae ia alofa mai le Atua i le maau o lau Susuga i le Palemia ma le Kapeneta aua le faafeagai ai ma le Malo; ia alofa le Atua ia fesoasoani mai; o Lona Suafa o Ieova o Au e au i mea uma. Ia faamanuia mai le Atua i o outou aao ma ia outou pulea tonu mea uma.

E leai lava se isi o tatou e tonu, ina ne i o matou faapea atu ia outou pulea ma le tonu a o lea foi e le o tonu matou. Ia alofa mai le Atua ma ia faafualoa lo outou soifua ma la outou Vaega aemaise o Matagaluega eseese o le Malo; ia alofa le Atua ma faamanuia aua o outou lena e maua ai le manuia; na ona nonofo o Sui Usufono ma fai atu tonu a o outou e galueaiina mea matagofie.

Ia manuia lau Susuga i le Tapaau Faasisina ma lou seei mai i le Nofoa, malo lava le faapalepale. E tetele lava vesiga ae ta te vaai atu lava e te paepae malie lava. E moni lava e i ai nisi mea e tutu lava le toaina o matou; e taofi soo loa te i lava ua faapea ua toe lua ou minute ae leai na amata lava i le tasi. Ia tuu nai na mea o lea ua amata le tausaga fou ia faafou na tulaga.

Ia manuia Samoa ma le tapuaiga a lo matou Itumalo.

### Tofa TALIAOA PITA



#### **Itumalo Faalalafaga:**

*Sagaga le Usoga*

#### **Filifilia:**

*29 Oketopa 2001*

#### **Faatauto:**

*18 Tesema 2001*

#### **Lauga Faataupou:**

*16 Ianuari 2002*

Faamalo faafetai i lau Afioga i le Fofoga Fetalai.

O faiga lava ia a le atunuu, a fai fai foi ni faiga mea ua vevela le fala ona faapea lea o toaiina, se i sui ia le saualuma ae se i sausaunoo se taupou. O lea ua i ai le manatu, o le a faia sau lauga faataupou se i vavae ai foe o lenei aso i le mamalu o le Fono.

Faafetai i lau Afioga i le Fofoga Fetalai, i le sa faalogo lava ma le totoa, sa tau fetuutuunai foi faatautai o matagi pe faapefea ona ta le lai pe a agi fetaumuliai, e i ai le aso. O lea la ua maua le tali, o le a ou ta ia i le ta fesilafai e pei o le laau a si tamaitai leaga e faigata le paia o le Maota, tainane Samoa ma lana tapuaiga - e leai se tasi na te toe gafa faamatua o faiva.

A ou te le i asaina la le galu na see lilia ai le tama foi lea na saili i le tai sona ai, e muamua ona ou faapoi o laau tuvanu ne i sipa lau foe pe lolo lou ama, e anagata le tautoga a Samoa ua uma ona tofofi.

E muamua ona ou faatulou i lau tapuaiga mamalu Samoa: le afio i lau Afioga i Le Ao Mamalu o le Malo, le Afioga i le Tapaau Faasisina, lau Susuga i le Malietoa Tanumafili II, e te afio i lou nofoa vaevaeloloa, i lou talaga atoa ma lou fala na folaloe e faafofoga ia te oe Samoa; le afio o lau Afioga i le Sui o le Fono a Sui Tofia ma lau masiofo, lau Afioga i le Tama a le Fale, lau Afioga Mataia Visiesio Europa II.

Le afio o lau Afioga i le Palemia lau Susuga Tuilaepa Sailele Malielegaoi o oe o le Alo o le Malietoa, a o oe foi o le toa na tofi mai le lagi e taitaia Samoa.

Le afio o lau Afioga i le Taitai o le Itu e Agaia le Malo, lau Afioga Le Mamea Ropati; afio lau Afioga i le Sui Palemia faapea le afifio o Minisita o le Kapeneta; i le afio o lau Afioga i le Fofoga Fetalai faapea Sui Usufono mamalu uma o le Palemene o Samoa.

Le afio o lau Afioga i le Faamasino Sili ma le Ofisa o Faamasinoga, le afifio o le Aufaigaluega paia a le Atua, i sui faafeagaiga i fata faitaulaga e fia o le atunuu e ao i ai faalupega o Samoa; Susu foi Faauluuluga o Matagaluga ma Faalapotopotoga Tumaoti o le Malo ma le aufaipisinisi.

Le paia i le tapuaiga i le Usoga ia Tumua ma Pule, o Ituau ma Alataua, Aiga i le Tai ma le Vaa o Fonoti; le afifio o Aiga ma Tama, o Tama ma Aiga: Aiga o Nofo, Aiga o Ee, o Aiga o Papa ma Aiga na Tafai.

Tulouna le tapuaiga i le Motu i Sasae i le paia ia Sua ma le Vaifanua, Fofu ma Aitulagi, Saole ma Saleaamua ma le Launiu na Saelua; le paia o le Faleagafulu ma Tootoo o le Faleula ae tainane Tama a le Manuatele.

O paia na o Samoa na lua, o paia e le popo, o sa e le ave, e le toe vaea le falaoto.

Lau Afioga i le Fofoga Fetalai, o le a se i tepa ia i ata ae mapu i too le paia o lenei Maota, ae avea ia lenei laolao lelei se i ou faatalofa ai i si ou Itumalo, na ala mai ai le finagalo o le Atua e filifilia au e avea ma Sui Usufono ma tofi aua le Maota o le Palemene.

Talofa si ou Itumalo - le Itumalo e sili ona pele i le agaga, Sagaga le Usoga. A galo oe i lou lima taumatau, ia pipii ae lou laulaifaiva, vaeane le Maota. E faigata le afio o le Afioga i le Tapaau Faasisina lau Susuga i le Malietoa i lou nofoa vaevaeloloa e faafofoga ia te oe Samoa. Afio Maualaivao ma le Aiga Sa-Maualaivao, afio le matua ia Faamausili, susu le Foealii o lau Susuga Taito, susu oe le Seiuli, tainane lau fetalai Auimatagi ma Pou e fitu o le Fale Malietoa.

Afifio a oulua suafa Saena ma Saena ma le Aiga Sa-Saena; Susu oe Luafatasaga o le Alo o Fuatino, afio oe Tuitea o le na tofofi papa; Afio le Alalatama o Faavaoga ma Ututaaloga maliu mai oe le fale ma le afu o le Alataua ma lau Fetalai Tupailasa.

Le Afio o Aiga ma Tuisamau, o le Laumua o Tumua ou te tiu ai ia Samoa ma le lalolagi atoa: Le afifio o Aiga Sa-Gaufaleai, Aiga na mua i malae; Afio o Ulualaatama o Savea ma Ututaaloga, ia oe le matua ia Manuaifua; Afifio Usoalii e oo ia te oulua Laa ma Maposua, afio oe Leuluai, tainane oe Pualau o le Alo o tofiga a alii. Susu lo oulua toalua Fata ma Maulolo o taitai na tofia, o tuitui o le Natoaitale o lau

Susuga Tuisamau; Tu le vagana i tulafale Leu ma Vaitimu na au taele ai Alataua.

Le afifio o Faletua ma Tausi, saoa ma tamaitai o feagaiga ma see talatua o le itupa e malosi ai le Itumalo - talosia ia ia au pea la outou inailau e oo i le faavavau. E faapea foi Laauli ma le malosi o le Itumalo e oo lava i alo o lalovaoa mo a taeao.

Ou te faafetai faapitoa i le Aufaigaluega Paia a le Atua ma o latou faletua i so o se Ekalesia i totonu o si ou Itumalo, e le gafataulimaina e se upu o outou faiva alofilima. Faamalo le tapuai, faamalo le tatalo, o a outou talosaga lea ua ae ai i fanua le lauamanu ina ua tuu moe atu o le afiafi e aunoa ma se galu e fati. Ia faatutumu pea ia e le Atua a outou utu i le Agaga aua le tofilemu o si o ta Itumalo.

E le faagaloina foi i le agaga nai ou uso sa o matou tausinio faatasi i le taimi o le Faiga Palota. O le taimi ma lona tai, o le aso foi ma le mea e tupu ai, faamalo le taaalo faatamalii, faamalo la outou faatumua. Afai na i ai ni faafatiatamai i lena tausaga, ia faasola ia i se nuu e le o i ai ni tagata ae alo maia se i o tatou galulue faatasi. O le agaga, ia o tatou maua le nofo fealofani e pei ona saafi le Faaola a o le i afio i le Lagi.

Si ou Itumalo e ia tapuai maia, to maia sau faamanuiaga aua o faiva tapuaia o faiva na e manuia, ae se i taumafai la outou auauna se i momoli sou finagalo ma se i fai sou sao ia Manuvao aua Upufai o si o ta Malo.

Lau Afioga i le Fofoga Fetalai, o lea ua togo malama le ata o le Tapuitea i le paia o le Maota, ua mavae sa o uila i le tausaga muamua o lenei Paeaiga, a o lenei faatoa nofoia le nofoa o lenei Itumalo. Ona i ai lea o se agaga lau Afioga i le Fofoga Fetalai, avea lenei avanoa se i aveatu ai se anavatau a lenei Itumalo.

Lau Afioga i le Fofoga Fetalai: Muamua, o le Falemai o si ou Itumalo. O lo o ua matua maitauina pea le ave o le faamuamua a le Malo i le itu tau i aoaoga ma le soifua maloloina. E talosaga ai i lau Afioga i le Palemia ma le Minisita mo sina fesoasoani.

Silasila lau Afioga, e tasi pe lava le aso o le vaiaso e asi ai le foma i le falemai lenei, e tausavali foi tamaitai tausimai. A afa le fa ua manava foi ae a tulai mai ni faafitauli e pei o ni faalavelave faafuasei i le ala e pei ona silafia e le Maota, e fai lava si vavamamao o le maota lea e i Leulumoega agai mai i Motootua. Afai e nofomau se foma i Afega ma lava tapena le maota gasegase lea, o le a tele se sulufaiga o le atunuu. E le gata ina faaitiitia le itu tau i felauaiga ma feoaiga, a o le a faaitiitia foi le faatumulia o le Maota Gasegase i Motootua.

O le isi vaega lau Afioga i le Fofoga Fetalai e fia aveatu ma faatupu manatu i le Maota, o le falemai lea o le Itumalo i Afega sa faaigoa i le igoa 'Kapeneta.' Ona i ai lea o se manatu, o le falemai lenei sa fausia i se fesoasoani a ni Kapeneta ua mavae.

O le taimi nei, ua leai. Lea ua tulai mai le Afioga i le Palemia aemaise le Afioga i le Minisita, ou te talitonu i lau Afioga i le Minisita o lo o tulai mai i le foe i lenei vaitau o le Soifua Maloloina, o oe le isi Samaria Agalelei lea e i totonu o le Maota. Tele faamanuiaga a

nisi o Itumalo, ua leva foi ona galo atu le igoa lea o le Falemai Kapeneta, ae ou te talitonu o le a toe ala mai i i le aso aemaise lau Faigamalo lau Afioga i le Palemia ma le tulai mai o le Afioga i le Minisita.

A mafai ona toe foi le falemai lea i lona tulaga e pei ona sa i ai ma toe faaigoa i le Kapeneta lau Afioga i le Minisita, o lou ai lena, o lou sao lena, ou te talitonu e te le toe pau i le Faiga Palota.

Lau Afioga i le Fofoga Fetalai, o le isi itu, o le tulaga lea o le falemai faasolo atu i le faleaoga e matua afaina lava i le suasami - o le mea moni lava e lumafale i le auala ae tuafale i le moana. O lea e pei ona i ai le talosaga i lau Afioga i le Palemia ma le Afioga i le Minisita mo se taligalu ina ia puipuia ai lea faafitauli.

O lona lua lau Afioga i le Fofoga Fetalai, o ala galue ia i totonu o si ou Itumalo. E mafai ona ou tau atu i le paia o le Maota, o le toatele o le aufaifaatoaga ia e i le maketi lea e tele le au faatau meamata, ma manuia ai le atunuu, o i latou ia mai Sagaga Le Usoga a ua matua faavaatua lava o le leaga o auala galue. E mafai ona ou faapea atu, a faaleleia auala galue nei e oo atu i le isi lua tausaga lea e lumanai ua lau i talo le maketi fou lea e i ai nei.

O le isi itu lau Afioga i le Fofoga Fetalai, ua matua molimauina lava le tele o Ekalesia ua faavaeina i uta i i le lauuta o lenei afioaga aemaise lava o totonu o le Itumalo, o latou ia o lo o latou faaogaina ala nei. A lelei ma mautu, ou te talitonu ua atili ai ona toatele le aufaitatalo latou te talosia o outou faiva ma o outou tiute fai i le Malo.

O lona tolu lau Afioga i le Fofoga Fetalai, o le itu lea tau i le suavai. Faafetai i lau Afioga i le Minisita ma le Matagaluega, ua vaia le tele o faatinoga i mea faaleleia o lo o taumafai nei i ai le suavai ae paga lea lau Afioga i le Minisita, e fai lava si pagatia o lenei Itumalo i le tele o taimi. E tatalo ai i lau Afioga se i tagai ane po o le a se auala e vave ma se fesoasoani e foia ai lea faafitauli. A o tulaga i le auala e pei ona ou taua i le taimi ua sola, faafetai i lau Afioga i le Palemia aua o lea ua taoto mai le ata o Taulelei e pei o le talosaga na tuuina atu.

Lau Afioga i le Fofoga Fetalai, o nai faafitauli ogaoga ma matuia na o lo o moomia ai e lenei Itumalo se fesoasoani a o isi vaega e pei o le eletise ma le telefoni, o lea lava e molimauina lona faatinoina vagana ai nai itu laiti e toe faamaeaina ma toe faaleleia atili.

E avea foi lenei avanoa taua lau Afioga i le Fofoga Fetalai e momoli atu ai se faafetai ma se faamalo a lenei Itumalo i lau Afioga i le Palemia ma le Faigamalo i le tele o galuega aemaise fuafuaga tuutumamao ua maea ona faatinoina aua le manuia o si o tatou atunuu. O le mau a le Tusi, 'e tou te faia lava mea silisili ma outou manumalo ai lava'. Ou te tautino atu foi i lenei Maota, e matua lagolagoina e lenei Itumalo so o se fuafuaga ma so o se galuega fai a le Malo.

O lau toe tatalo i lau Afioga i le Palemia ma le talosaga a lenei Itumalo faatasi ma le Malo, o a ni manu o lenei Paeaiga, o a ni faamanuiaga, aua ne i outou faagalo Afia i si ona vao, ia outou manatua Sagaga le Usoga.

Ia manuia lau Afioga i le Palemia ma le Kapeneta, manuia lau Afioga i le Fofoga Fetalai ma le Palemene, manuia lau tapuaiga Samoa, manuia le Fono.

## Tofa TIATA SILI PULUFANA SAUNOA



### **Itumalo Faaalalafaga:**

*Faasaleleaga Nu.1*

### **Filifilia:**

*13 Aperila 2006*

### **Faatauto:**

*20 Aperila 2006*

### **Lauga Faataupou:**

*14 Iuni 2006*

Faafetai i lau Afioga i le Fofoga Fetalai o le Maota mo le avanoa i lenei itula o le aso.

Ae ou te le i soaia le loto nai Faleono o Leatigaga faapea foi le itu tolu o Sagaga, e muamua ona ou tapui le tapu a Tupu e pei o upu taotolima o Galumalemana. Ou te ta foi le vai afei ma ou vaisausauina le paia tele ma le mamalu maualuga o sa ma faiga o Samoa aua o le ao mamalu ma faasauga o le ao ma le atu folasa. Tulouna le faafogafoga tapuai a Lana Afioga Mamalu O le Ao o le Malo o Samoa, le Susuga i le Tapaau Faasisina Malietoa Tanumafili II, e te ee i lou Nofoa vaevelolua ma lou fala folalua ma lou tala na ato e faalogo ia te oe Samoa. Tulouna le afio o Sui Usufono o le Fono a Sui Tofia, lau Afioga Tupua Tamasese Efi ma lau Masiofo, faapea le Tuimalealiiifano ma lau Masiofo. Tulouna lau Afioga i le Faamasino Sili ma le mamalu o le Faamasinoga. Afio lau Afioga i le Palemia aemaise ai Minisita uma o lau Kapeneta ma o latou Faletua, lau Afioga i le Fofoga Fetalai ma sui usufono mamalu uma o le Palemene o Samoa.

Tulouna le paia tele aua Aiga ma a latou Tama, o Tama foi ma o latou Aiga. Tulouna le paia aua Pule ma Tumua, Ituau ma Alataua, Aiga i le Tai ma le Vaa o Fonoti, tainane Faleupolu tofia o Samoa. Tulouna le paia maualuga aua tapuaiga a le au Ositaulaga i fatafaitaulaga e fia, o i latou o Feoi o le Atua o lo o talosia se manuia o Samoa ma lona Malo. E le faagaloina foi le tapuaiga a o tatou uso i le motu o Salaia, le afio o lau Afioga i le Kovana Sili ma le Kovana Lutena, le Peresetene o le Setete ma le Fofoga Fetalai o le Maota, o sui mamalu o Maota e lua. O le paia lava lea ia Sua ma Vaifanua, Fofu ma Aitulagi, Saole ma Saleaamua, ma le Launiu na Saelua, Tama a le Manuatele ae tainane le Tootoo o le Faleula.

Ia taoto ia faagalua e le fati ou paia sausaugata Samoa, aua o le ia e iviivia, e le popo foi i sau upu aua o Samoa ua uma ona tofi. O le a se i fagatonu ia le malama ma vili tonu le ifi a maina, aua le tapuaiga a lou Itumalo o Faasaleleaga Nu.1.

Tulouna ia le paia aua le afio o Tia ma Luamanuvae, le Falefia ma le Falesalafai, le Logogapule ma le Faitoaga ma upu ia te oe Salelologa. Tulouna le susu o Sua ma le aumaga, le afio o Tusagi ma le aiga sa Tusagi, alaatai Lega ma Suafoa, le mamalu ia te oe Sasilafaiga. Tulouna le afio o le Tootoalii, le afio o le Aiga o Salevalasi, alaatai le fetalaiga ia Leauanae, le mamalu ia Sasulu ma le nofo a ituaiga.

Tulouna le susu o le Tapaau ma le Alo o Tagalooa, alalatai le mamalu ia Safune ma le Taulauniu. Tulouna le

afio o le alo o Tamaalelagi ma le Togaigafo, le mamalu ia Fuga ma Mauga ma Salemuliaga. Tulouna le susu o le tamaitai ia Gatoloaifaana ma le Aiga, afio Taito ma le usoalii, ma lo latou matua ia Tanuvasa Manaia, alaalatai Sa Afuamua ma le nofo a ituaiga. Tulouna le afio o lau Afioga i le Gafa, Sogai ma Patani, susu le usoalii a le Malietoa ma Aiga, le mamalu ia Tevaga ma le igoa ia Faleono. O upu taoto ia ma mamalu sausaugata o si ou Itumalo pele o Faasaleleaga Nu.1.

Atonu ua toa le savili ina ua ae faiva o Manusina. Ua sili ofe a tautai matapalapala o e sa feagai ma faiva o manaia, aua se tasi mo le Nofoa o le tatou Itumalo. O le mafuaaga lea ua laga ai se leo o le auaua aua e le galo lava Afia i si ona vao. Avea ia lenei avanoa ou te momoli atu ai le faafetai tele i le paia ma le mamalu o lo tatou Itumalo. O ai ea lenei tagata ua outou pule ai ma aumai la outou faaaloalo ua maualuga ai. O lenei ua pati taoto le Feepo aua ua manuia le toe aso nai Moamoa, ma ua faatietie ai au i le maasalafa. A o ai foi na manatu o le a sii le fale o Asomua i le mauga, ai lava o se faatofalaiga a tupu ma tamalii, le faautautaga a faleupolu a o se finagalo o faletua ma tausi, saoa ma saotamaitai, ma malosi o le nuu ma lo tatou Itumalo, i e ua aulia le 21 o tausaga. E ui ina le lanu i sau upu lo outou alofa, tau ia ina faafetai faalelava aua e pote lava le tautai ae sese lana atu i ama. Ia tuuina mai e le alofa o le Atua faafualoa le soifua o Lana Afioga Mamalu O le Ao o le Malo o Samoa, le Afioga i le Tapaau Faasisina Malietoa Tanumafili II. Ia faamanuia le Atua i le Afioga i le Palemia ma lana Faigamalo. Ia manuia tele le Itumalo tainane le tapuaiga a Samoa aoao.

Lau Afioga i le Fofoga Fetalai, ona ou oo lea i le Tala Faatatau Autu o le Tupe o le 2006/2007, ua opea nei i le Maota, e tusa lea ma le \$70miliona ua i ai nei. O se tupe tele lea tupe aua le fuafuaga a le Faigamalo.

Lau Afioga i le Minisita mo le Soifua Maloloina, faafetai i lenei itula, ua avatu se agaga faafetai i lou nei sui usufono, e tusa ai ma lou seei i le nofoa o le Minisita i le ta Itumalo. Faamalo fai o le faiva, o ou mama na. Lau Afioga i le Minisita mo le Soifua Maloloina faapea le Afioga i le Palemia, e tuutuu atu pea le tatalo a le sui usufono mo Faasaleleaga Nu.1, i le tatou falemai o lo o i Tuasivi. Ou te talitonu e le o lava fanua o lo o fausia ai le tatou falemai ae tuu mai i totonu o le taulaga i Salelologa aua lava le faaleleia o lea atinae.

E faapea foi le Minisita mo Leoleo, Falepuipui ma Tinei Mu faapea foi le Ofisa o Leoleo, na o se fautuaga lava e tuutuu atu pea aua lava le lelei o totonu o le taulaga i Salelologa. E fia faamauina foi le agaga faafetai i lau Afioga i le Minisita o Tupe, malo lava le fai o le faiva. O lo o manuia le fuafuaga o le Tala Faatatau o le Tupe i lenei tausaga, faafetai lava le galulue ma lau Matagaluega o le Tupe.

Ona ou oo mai lea i le taulaga o lo o fausia i totonu o Salelologa. E muamua ona ou avatu le agaga faafetai i lau Afioga i le Minisita mo Punaoa Faalenatura ma le Siosiomaga. Faamalo le tauivi foi i le tausaga ua mavae atu i le uafu faava o Malo i le matou motu tele i Salafai. Ou te talitonu ua 8 vaa lapopoa lau container ua afea Salafai, ua faamama avega foi i le matou motu i Salafai

aemaise le aufaipisinisi. E talitonu le faamoemoe, faafetai i le Faigamalo mo le alualu mamao o fuafuaga aua lava le faaleleia o lo matou motu i Salafai.

E talosagaina foi lau Afioga i le Minisita mo Galuega, Felauaiga ma Atinae Eseese, i le auala o lo o i totonu o le taulaga i Salelologa, le auala taamilo lea ua leva ona fuafua foi ua sosolo ai foi le vao i totonu o lea auala ma ua uma foi ona maea ona toe faaleleia e lo matou nuu i Salelologa lea auala, ma e ou te talosagaina lau susuga pe a fa au se i taumafai e faata lea auala aua le faamoemoe mo le taulaga i Salelologa.

Lau Afioga i le Minisita o le Maketi i Salelologa, o lau talosaga, o lenei fale ua le taitai ona toe talafeagai aua le faamoemoe mo le lautele o tamaoaiga o lo o faatauina i totonu o lenei maketi. O le fale ua faaletonu ae talosagaina le Faigamalo aua se fuafuaga o le maketi fou mo le alualu agai i luma o fuafuaga aua le taulaga i Salelologa.

Ona ou oo mai laia i tofi o faiga filifiliga. O matou i Faasaleleaga, e 2 tofi o lo o umia, ae talitonu faafetai i le taulagalaga foi o nisi o sui usufono i totonu o lo tatou Maota, i Itumalo ia e tailua o latou sui usufono. Ou te talitonu o lou nei sui usufono, ou te naunau foi au e vaelua le matou Itumalo i nofoa ia e 2, e fuafua foi aua le faamama avega i a te i matou ia o lo o tulai foi i le tofi aua mo le lumanai.

E faaiu atu ai se lagona, ia soifua lau Afioga i le Fofoga Fetalai o le Maota. Faafetai mo le taitaiina o la tatou Fonotaga i lenei aso. Soifua ma ia manuia foi le Afioga i le Palemia, le Sui Palemia faapea foi le mamalu o sui usufono uma o le Palemene o Samoa.

Soifua.

## Tofa TUAIAUFAI LATU



### **Itumalo Faaalalafaga:**

*Alataua Sisifo*

### **Filifilia:**

*2 Aokuso 2003*

### **Faatauto:**

*26 Aokuso 2003*

### **Lauga Faataupou:**

*15 Iuni 2005*

Faafetai lava mo le avanoa o le tootoo o lenei Itumalo. Ou te manatu ua leva ona fitaituga i se faafofoga a lou Itumalo se taimi ou te lauga ai, a o lea sa tau sue lava se masele e fai atu ai se upu a lo matou Itumalo.

O le mea muamua e momoli atu le faafetai tele e tusa ai ma le avanoa, aua e tele lava ina tuu avanoa lau Afioga i tootoo o le Palemene ua mafua ai ona toe maua le avanoa i lenei vaega o le aso. A o le i faia se tala po o se upu a lenei usugafono, e le mafai lava ona ou laaloa faamanu saili mafua e ao lava ona ou oo i le tapuaiga a le atunuu, i le paia o Samoa ma le latou tapuaiga, i le amata mai i le Matāfanua i le oneone le ufitia i Lalovi ma le Laulala seia paia le Siu o le Fanua i le mea o lo o i ai le Saena i le Fafa o Saualii i le ala o Upolu ma le ala o Savaii aemaise o le ana o Vaatausili o lo o i le Itumalo e pei ona ou oo mai ai. O ona paia faaleaganuu, o paia

faale Talalelei ma paia faale Malo, ou te talitonu o na paia ma na mamalu, o lea lava ua ao i le Maota lenei – o le Maota sili a Samoa o le Palemene. E mafua i se a lea manatu? Aua o lea ua potopoto Samoa, o lea ua afio lau Afioga i le Palemia o le taitai o le atunuu ma le taitai o le Malo, o lea ua afio lau Afioga i le Tamaitai Minisita faapea Minisita o lea Matagaluega ma lea Matagaluega. O lea e afio lau Afioga i le Fofoga Fetalai o le Maota faapea foi lena Itu o le vai, o lena e afio lau Afioga i le Taitai o lena Itu, e faapea le mamalu i sui usufono, o outou o lupe na faia mai le fuifui i lea Itumalo ma lea Itumalo latou te lufilufia upu o le atunuu aemaise manuia o Samoa nei ma a taeao.

Ou te talitonu o le paia lava lea aua le afio o Tama ma Aiga, Aiga ma latou Tama, Aiga o Tupu, Aiga o Nofo, Aiga o Ee ma Aiga o Papa, o Aiga na Tafai.

O le mamalu lava lea i le Usoga a Pule ma Tumua, Ituau ma Alataua, Aiga i le Tai ma le Vaa o Fonoti. O ou paia ma ou sa Samoa e le oo i ai - aua ou te talitonu pe ou te oo i ai pe ou te le oo, e le toese se iota po o se mamalu, e le popo foi i se upu a le Alataua ae nuunuu atu ia faatini o tausala. Ae o le a sunui tonu lau o le fō ma vili tonu le ifi a Maina i lenei vaega o le aso i lou Itumalo. O se taimi ou oo mai i le fatu o lenei aso ma le mafuaaga o lou tulai.

Lou Itumalo e pele i lou loto o le Alataua i Sisifo, i le afua mai Siuasave seia paia Faatoatoa, le afua mai le Manunu seia paia le Mulinuu, Falelima, Neiafu ma Tufutafoe. I le paia aua le afio o Tapaau, le nofoaga faalupea lau fetalai i le Fofoga o Papa lau fetalai Folasaa faapea le mamalu o lena itu o le tatou Alataua, aemaise foi le afio o Gisa ma le Usoalii, alaala lau fetalai Momoemausu ma le mamalu foi o lea itu o le Alataua. E faapea si ou nuu faapelepele o Neiafu, i le afio o Tapaau ma Samoeleoi, lau Susuga i le Matua ma lē na aifaoga Aliimalemanu ma le toafa o suafa, faapea oulua Tama Igoa Taatiti ma Tuaiafai ma le mamalu o le Alataua. Aemaise foi o le tapuaiga i le Afaigaluega Paia a le Atua i lea fatafaitaulaga ma lea fatafaitaulaga i le latou galuega o lo o timuia i le ao ma le po aua se manuia o le Itumalo aemaise Samoa aoao. Aemaise foi le mamalu o faletua ma tausii, saoa ma tamaitai o aualuma, le malosi o le Itumalo, o alo ma fanau aemaise lava o e ua aulia le 21 tausaga.

E pei lava ona ou fai atu ou te le alu loa, e le mafai foi ona faagaloina Afia i si ona vao, aua a ou toe tomanatu i tua, e leai, o i ina lava le faitotoa na mafua ai ona ou oo mai i le Maota nei. O le mea lea lou Itumalo e le Alataua Sisifo, e le mafai ona ou faagaloina lou Itumalo. Faafetai le faaeaea, faafetai i lo outou alofa molipo, faafetai i lo outou faatuatuga ua lafo mai i lou nei tagata faatauavaa e fai ma avefeau e fai ma avetanoa i lo tatou Itumalo aua upufai o Malo. Ia tapuai maia se i taumafai sa tatou tala.

Lau Afioga i le Fofoga Fetalai ma le mamalu o le Palemene, ua opea i le Maota nei le Tala Faatatau o le Tupe. Ou te talitonu ua tele sui usufono ua sausauna i le Tala Faatatau o le Tupe ua opea nei. Ua faapena se lagona o lenei tootoo e momoli atu ai le faafetai ma le faamalo i lau Afioga i le Minisita po o lau Afioga i le Sui Palemia ma le mamalu o le Matagaluega. Ou te

manatu e le faigofie la outou pitolaau, e le faigofie le faasoasoina ma le lufilufiina o tupe aua a ou manatu i ai e le o se tupe tele. Ae a fua faatatau ma tilotilo atu i ai, o lea ua faasopolia lava mulilaa, o lea lava ua faasopolia o lea Matagaluega ma lea Matagaluega, pe tata, pe lava pe le lava, a o le mea sili o lea ua tofu lava le Matagaluega ma le seleni e faatino ai a latou galuega. O le mea lea, faafetai i galuega lelei.

Lau Afioga i le Palemia ma le Kapeneta, Minisita uma o lo o fitoitonu i lea Matagaluega ma lea Matagaluega, e momoli atu le faafetai tele i galuega lelei ua molimauina, e le tau faafetaia, e le tau faaleoa se faafetai o lenei Itumalo aemaise Samoa aoao aua o lea ua feoi i sasae ma sisifo o matu ma sauté e molimauina galuega lelei, o galuega ua maea, o galuega o lo o fuafua ma galuega e le i maea.

O lea foi ua molimauina i le aso lenei, o le Aso Faraile nei e faatino ma tatala ai se tasi o galuega i le itu atu lea, ia o pine vaaia lena o le manuia o taumafaiga a le Malo. O le mea lea e momoli atu ai le faafetai tele i lau Afioga i le Palemia, faafetai i le tofa alualumamao, o le tofa ou te talitonu e taumafai e fausia Samoa ia malosi. E malosi i le a? E le malosi i le faafitafita ae malosi i ona atinae, e malosi aua se manuia o Samoa aemaise o ona tagata lautele.

O le mea lea, lau Afioga i le Palemia ma le mamalu o le Kapeneta, e faia pea e oe mea silisili ma e manumalo ai. Ae tau matamuli se manatu e aveatu i lenei Itumalo ne i faitau ane o lenei Itumalo o se Itumalo o Meto tagivale, o se Itumalo talosaga soo talosaga soo. A o le i fai atua la se manatu i le talosaga a lenei Itumalo, e muamua ona ou faafetaia galuega lelei, toetiiti lava pau ia te au. O galuega lelei ua uma ona faatinoina i lou Itumalo.

O le mea muamua o le auala i Tufutafoe, faafetai ua uma ona tatala ua faaogaina ua lelei ma atoatoa. E faapena foi i le auala i Neiafu e sau agai i Tufu, faafetai le faaeaea, aua o lenei ua tali le faautugatagi i lenei nuu o le talosaga na tuuina atu. E le gata i lea o le auala i le faleaoga ua uma ona faatino e momoli atu le faafetai tele faapea ma lou malae e ui lava ina e le i maea lelei ae ua faafetai o ai ea na iluilu ma talotalo e maua se malae i lenei nuu. E moni lava e le o se malae faava o malo a ua avea le ogaeeleele e taaalo ai tamaiti e fou le malae e fou foi le tulaga o lo o i ai le faleaoga faafetai e ui lava i lea e talosaga atu pea e le i maea lou malae. Aemasie lau Afioga i le Minisita o Galuega, Felauaiga ma Atinae Eese o lena le talosaga e le i maea lou malae.

E pei ona maua i le tootoo o se tasi o lo matou Itumalo i le Itu Asau o lo o i ai le faafitauli o lo o tupu nei, e tai tupu lava i po ma aso uma lava - le eletise. E le afaina lava pe ana faapea e pe soo i le leva o le po. O le mea lea e maitauina e pe mai i le prime time – tusa o le taimi lea e moomia ai tele le eletise; taimi o faigalotu ma le taimi o taligasua o le taimi lea e masani ona pe ai. E faalua lea talosaga – e talosagaina ai le mamalu o le Malo aemaise lau Afioga i le Palemia ma le mamalu o le Kapeneta aemaise o le Minisita o lo o fitoi tonu ma lea vaega.

Lau Afioga i le Fofoga Fetalai e manaia pe ana i ai se isi afi e tu i Asau ae mafai foi ona ou ofo atu e tu i le

matou nuu i Alataua Sisifo i Neiafu uta. E pei e lelei lena e fai ma centre faatasi ai ma Salega. Ou te talitonu e le o se galuega laitiiti o le matua galuega.

E ui ina ou iloa e le lava le faaso a le tatou Malo i seleni ae lelei ona lafo atu i le aai o finagalo i lau Afioga i le Palemia ma le mamalu o le Kapeneta e faitau ane ai i se taimi - e le faapea o nei po o taeao po o lenei Paeaiga - ae e lei fauina Roma i se aso se tasi. Lafo atu i lau Afioga i le Palemia ma le mamalu o le Kapeneta o se atinae lelei tele lena mo lenei Itumalo. E maitauina pea le faatauaina o tagata tafafao maimoa ona o mataaga ma mea faapena. Na mafua ona ou taua le itu lea ona e i ai lou auala tuai – o le auala sa faaoga i aso a la o lea ou te manatuaina malie le sui usufono mo Gagaemauga Nu.3 o le a ou taua le itu lea. O aso a o pule auala le tuua o le sui usufono mo Gagaemauga Nu.3 - ou taua – o le taimi tonu a lena o le auala lea sa faaoga le auala lea sa i le va o Falelima ma i matou. O le auala lena ou te talitonu ua matua i tau lelei ae talu ai ua faaoga le auala fou nei ua le o toe faaogaina ai le auala lena. E pei foi ona ou talosagaina lau Afioga i le Minisita i se tasi aso o le auala lava lea o lo o ou naunau ai e toe atinae le auala ina ia faafaigofie ai femalagaiga. A malaga atu i Falelima faaoga le auala lena a malaga mai i le Itu Asau e faaoga le auala e sau mai Tufu – a malaga atu i totonu o le matou nuu i Neiafu uta faaoga le auala i le ogatotonu. E pei lava o le auala lea e i i Satupaitea. E ala ona ou taua le faatauaina e tagata tafafao maimoa - o mataaga ma mea faapena. O i tonu lava i le auala lea o lo o ia se mataaga o lo tanumia ai i le taimi ma atonu e tele nisi o lo outou paia ma le mamalu o lo o silafia le mataaga lea e i ai. O lo o i ai le mataaga foi lea le one tai o le fetaiaina na i le tai le auala tonu lea. O i ina tonu lava na tu ai Sauaiga ma fai ana saafiafaga i le Tanoga i le Tuitoga e foi mai, foi mai ua ou masei ua ou masei lava. O le mea tonu lava lea e taua o Vaoto ma le Faautugasami le mea tonu lea e i ai le auala lea ua faatauaina e lou nei sui usufono.

Lau Afioga i le Palemia ma le mamalu o Kapeneta aemaise lau Afioga i le Minisita o Galuega, Felauaiga ma Atinae Eeseese ou te tuu atu lau talosaga i lou ava ma lou faaloalo pe afai lava e le faataina a o le mea e moomoo i ai lou taofi pe na o le sua ma tanu - pe le faataina lava ae amata lemu faapena. A silasila i ai e le pe i o le auala lea e i le ogatotonu e aega tele a o le auala lea sa faaoga muamua, o le manaia o le gatasi. O nisi foi o le matou nuu ua amata ona talatala mai i ina o nisi foi ua mananao e fia nofoia ona e tele fanua lelei e i ai i ina ae peitai e faigata tele femalagaiga. O aso nei ua faigata lava ua pei ua matanana tagata ua tele le au fai taavale ua faapena ona fai na o le oso lava i le taavale tietie i ai. Ia faafetai

Faafetai i lau Afioga faafetai e tusa ai ma le avanoa ua toe maua e toe faaauau ai le lauga a lenei Itumalo. A o le i amataina le faaumaina la le lauga, e le mafai lava ona ou alu loa e ao lava ona ou viia ma faafetaia le alofa o le Atua aua seanoa lana taitaiga i lenei vaega o le aso aemaise le malama ua sola ua toe taitaiina mai ai lo outou paia ma le mamalu i lenei itula afiafi mo le faataunuina o galuega e pei ona totofi ai tatou e galulue

ai - ia tumau pea ia te ia lona viiga e faavavau faavavau lava.

Lau Afioga i le Fofoga Fetalai ma le mamalu o le Maota, e tolopo le Fono analeila o lo o ou i ai pea i mea tau auala i lou Itumalo. Ou te muamua ona ou faamalulu atu i le Afioga i le Minisita o Galuega, Felauaiga ma Atinae Eeseese talu ai e matau atu e pei lava o lau Afioga lea e gasu atu i ai ma sulufai ai le mamalu o lea Itumalo ma lea Itumalo.

Ae ou te faaamua foi i lau Afioga, o lea e sulufai i ai le mamalu o le atunuu aua lava mea e fia faaleleia.

Pau lava ia o nai mea mo si ou nuu o Falelima, e le ni talosaga fou ae toe valuvalusia aa o le fau ma faamanatu atu i lau Afioga le faleaoga o si ou nuu lea o Falelima. O le auala lea e le o se auala umi, a fua i ai pe afa maila. E le faatonuina foi le tofa i lau Afioga ae manaia lava le fai faatasi ma le auala lea e pei ona ou talosagaina i le itula ua fano ona square lea ma le konekarate o le a latou faia lea auala. Ou te le faatonuina lau tofa ae tuu atu pea i ina i le tofa poto aua foi le tulaga i le talosaga a lenei nuu.

Ona ou oo mai lea i mea tau suavai. O le tupe lea e tilotilo atu ua faaagaaga mo le suavai toeitiiti \$2.5milion, peitai ua patino galuega o le a faaogaina i ai le tupe lea mo le faamaeaina o le suavai i Sapoe, Matatufu, e lavea ai Foalalo, Foaluga faapea ma Satuiatua. Ae o le atugaluga o lenei sui usufono, o lo o i ai le \$6milion lea o lo o taua mai ae peitai o lo o i ai se faaupuga faapea, o lo o faatali lea \$60milion mai le Iuni a Europa le EDF. E faapea e lavea ai Neiafu ma Falelima, pau lava le mea e faafetai ai, faafetai ua tau ane le tofa i nai nuu o lenei Itumalo faatasi ai ma Tufutafoe.

Peitai, o le atugaluga ona e le i patino mai. O lona uiga la, e tele mea e faaoga i ai, o sailiiliga, o suesuega ona faatoa faatino loa lea o fuafuaga i nuu ia e pei ona taua i le Lipoti. O atugaluga la o lenei sui usufono, e le iloa ni tausaga vaeane lava le paia ma le mamalu o le Maota. Ae o le suavai o se mea e taua tele i le soifua o se tagata soifua maloloina. O le suavai foi o se tasi lea o physical needs o so o se tagata soifua lava aua e pei ona...

I le vaega lea o Fesootaiga ma Faamatalaga Information Technology, e i ai le pou lea sa tatala i Falealupouta i le mauga lea e taua o le Anolava. Sa matou faatalitali ma le agaga fiafia o le a ola ai le area lea o matou faatasi ai ma Tufu ma Falelima. Peitai, o se faatalitaliga o le soi foi lea nai Fagafau le faataliga nei. O la ua ola le afioaga o Tufutafoe peitai o Neiafu uta ma tai ia matou ma Falelima e le o oo i ai le pou.

O lea la e talosagaina ai lau Afioga i le Minisita mo Fesootaiga ma Faamatalaga Tekonolosi, malie lau Afioga e tuu atu le talosaga a lenei nuu. Pe a pe a toe fuafua se isi pou i gauta o Neiafu uta e lelei i ina e maualuluga mauga e cover ai foi ma le itu lea mai Faiaai e oo mai i le matou Itumalo. O le va lea o Faiaai seia oo mai i Neiafu, pau lava lena o le va e le i cover ina i mea tau telefoni faapea le vaega foi le ituaiga telefoni lea o le WLL, le telefoni uaealesi foi e taua o le local lube po o le a, e tai faapena.

E talosagaina ai le mamalu i le Afioga i le Minisita, e tatau foi ona e silasila mai o taua lea ta te galulue faatasi



i le Samoa Tel - o le Kamupani e family first e faamuamua le aiga.

Lau Afioga i le Fofoga Fetalai, e momoli atu le faafetai tele i lenei aso mo le avanoa. Ou te faamalulu atu foi i le mamalu o le Maota nei ma le Palemene, a i ai se upu ua paopapa pe le tautamalii i la outou faafofoga, ia foi mai i le sui usufono ona o naunauga lava aua Samoa aemaise o matou Itumalo na tofofi matou matou e omai ai.

A o le i faaiuina le lauga a lenei Tootoo, e momoli atu le faafetai tele i le matou Itumalo le Alataua i Sisifo, lena ua uma atu so tatou sao aua upufai o Malo faatasi ma lenei, ae ou te le i nofo i lalo, ua matua talia e lenei Tootoo ma le Itumalo le Tala Faataata o le Tupe ua tulai mai.

Ia manuia le Fono, soifua.

### Afioga Hon TUALA AINIU IUSITINO



#### **Itumalo Faaalalafaga:**

*Gagaemauga Nu.1*

#### **Filifilia:**

*12 Mati 2011*

#### **Faatauto:**

*15 Mati 2001*

#### **Lauga Faataupou:**

*21 Iuni 2001*

Lau Afioga i le Fofoga Fetalai ma le mamalu o le Palemene i le afio o lau Afioga i le Palemia, faapea foi le aiga Kepeneta, le Afioga i le Taitai o le Itu Agai ma le mamalu o le Palemene. E le gata i lea o Faauluuluga o Matagaluega a le Malo ma Faauluuluga o Faalapotopotoga tumaoti a le Malo.

Faafetai i lau Afioga i le Fofoga Fetalai i le avanoa ua tuuina mai e tau aveatu ai se tali e tusa ai ma ni vaega sa aafia ai nei Matagaluega e lima o lo o i lalo o lau faamalumaluga e pei ona e saunoa i ai.

Ae ou te le i oo atu i mataupu na laga e sui usufono mamalu, sa ou maitauina e 30 le aofai o sui usufono mamalu sa saunoa i le Tala o le Tupe e amata mai ananafi seia oo mai i le po anapo. Mai lea 30 o sui usufono mamalu sa saunoa i le Tala o le Tupe, e 27 sui usufono e le i afea Matagaluega o lo o i lalo o la'u vaaiga, ae vagana ai sui usufono mamalu e toatolu sa afea Matagaluega o lo o i lalo o la'u vaavaaiga. Ou te fia avatua ai ni tali e tusa ai o faafesili na laga e nei sui usufono mamalu.

O le sui usufono muamua o le Afioga i le Tootoalii, se tasi o sui usufono mo Faasaleleaga Nu.1, Afioga Tofilau Tauvaga, sa ia laga le mataupu lea e uiga i auala galue. O le faamalamalamaga i lea vaega; o auala galue o lo o faapena ona tuuina i ai le \$2,000 i le tausaga aua le teuteuina ma le faamamaina ma faapena ona toto ai atinae.

O le fuafuaga la a le Matagaluega i le vaega lea, e alu le asiasiga. A maea le asiasiga ae maua o lo o galulue le nuu ma le Komiti e faatino galuega ia, ona faatoa mafai lea ona totogi i ai le tupe lea e tusa ai o a latou galuega i lea masina. O le aofai la o le tupe e tuuina atu i le Pulenuu ma le Komiti, e \$166 i le masina pe afai o

faatino o latou tiute. Ae afai e le faatinoina tiute, o lona uiga e taofi e le Matagaluega lea vaegatupe seiloga ua faatino le galuega ona faapea lea ona totogi i ai le vaegatupe lea. O le tali atu lea i le faafesili a se tasi o sui usufono mo Faasaleleaga Nu.1, Afioga Tofilau Tauvaga.

O le fesili lea na tuu mai e le sui usufono mo Falealupo e uiga i le \$1miliona lea e taua i lalo o le Matagaluega lea a le Lotoifale. Na ona ou faamalamalama atu e faapea, o le \$500,000 e faagaga lea mo auala galue. O le isi \$500,000 e faagaga lea mo togi o afioaga o lo o lelei ona tapena o latou auala galue. O le \$500,000 lea e le avea i tino i tupe, ae avatu i afioaga ia e lelei le faatinoga o a latou galuega ona ave lea o vouchers po o pepa e tala ai oloa e aoga i le atiaaina o faatoaga ma tulaga faapena, e i ai agaese se i vaeatu le mamalu o le Maota ma isi tulaga faapena. O le faamalamalamaga lea o lea itu e pei ona faafesili ai le sui usufono mo Falealupo.

O le faafesili mai a le sui usufono mo Faasaleleaga Nu.2 e uiga i ni fesoasoani a le Matagaluega o Tina ma Tamaitai i lo latou Itumalo ina ia o atu le aufaigaluega e faasino atu le faiga o galuega e agavaa mo tina, aemaise ai meataulima. O lea foi la ua talia e le Failautusi o le Matagaluega, o le a faapena ona agai atu i ai fuafuaga a le Matagaluega. E le gata i lea, o lo o i ai foi le lala o le Matagaluega i Salelologa o le a faigofie ai ona faafesootai ane e le mamalu o lea Itumalo ma lea Itumalo i le itupa o tina ma tamaitai ma faapena ona galulue faatasi ai aua ia fuafuaga e pei ona saunoa ai le sui usufono mamalu.

O le isi fesili a le sui usufono mo Falealupo e tusa ai ma le Matagaluega o Faasalalauga, sa sau a i le saunoaga a le sui usufono mamalu pe e le tatau ona tumaoti le Matagaluega o Faasalalauga. Lau Afioga i le Fofoga Fetalai ma le mamalu o le Palemene, e pei lava ona silafia o lea ua faagasolo fuafuaga a le Malo i le vaega lea ina ia tumaoti. O le tulaga lava la e i ai e mataitu pea e le Malo fuafuaga e i ai. A tagai atu lava le Malo ua talafeagai i lea taimi ua tatau ona faatumaoti lea Matagaluega, ua faapena foi ona i ai le fuafuaga a le Malo.

E pei ona pau ia o fesili sa laga mai e sui usufono. E pei ona ou taua, e 30 sui usufono sa saunoa, ae na o le toatolu lava sui usufono ia na aafia i a latou saunoaga nei Matagaluega.

E momoli atu ai lau faafetai i Matagaluega o i lalo o la'u faamalumaluga ona o le lelei o le faatinoga o a latou galuega ua ala ai ona le toatele ni sui usufono e fesiligia pe faitioina nei Matagaluega.

O le faamalamalamaga lea lau Afioga i le Fofoga Fetalai. Ia manuia le tapuiga a Samoa ma ia manuia foi lenei Maota.

## Tofa Hon TUILOMA LAMEKO



### **Itumalo Faaalalafaga:**

*Falealili*

### **Filifilia:**

*12 Mati 2001*

### **Faatauto:**

*15 Mati 2001*

### **Lauga Faataupou:**

*20 Iuni 2001*

Faafetai atu i lau Afioga i le Fofoga Fetalai. Ou te manatu lava e tatau ona ou lauga pea faataupou, leaga e taupou le Itumalo lea ou te sau ai i le taimi lenei, ae faafetai atu.

A ou vaai i le malumaunu o le malu lenei, e moni lava upu o le atunuu e masani ai; ua liligo le fogatia ua pau le tuuaumafuamalu, aua o le Maota lenei i Tiafau, o le Maota o le faautugatagi a Samoa, o le Maota ua aofaga uma i ai paia. O paia o Aiga, o paia maualuga i Aiga o Tupu, Aiga o Nofo, Aiga o Papa, Aiga o Tafaiifa. E faapea foi le tulatoa o Aiga, aua ua nofoia nei tiasa, aua o le mamalu o Sui Usufono o le Palemene, o lupe sa faia mai le fuifui, o lupe e le i faigofie ona ofi mai i le Maota lenei.

Afio mai le mamalu o Sui Usufono mamalu o le Palemene, aua le lipoiina o Upufai o le Malo. Ua mamalu la ma maualuga aua o lea ua afio lau Afioga i le Fofoga Fetalai, afio foi le mamalu i lau Afioga i le Palemia ma le mamalu o lau Kapeneta, o le mamalu foi i le Taitai o le Itu Agai faapea le Vaega Faaupufai o lo o agaia le Malo.

Ou te faatulou foi i le paia i le tapuaiga i le Ao Mamalu o le Malo, le Susuga i le Tapaau Faasisina ia Malietoa Tanumafili II, afio foi le Afioga i le Sui o le Fono a Sui Tofia lau Afioga Mataia Visiesio Europa II, afio lau Afioga i le Faamasino Sili lau Afioga Patu Tiavaasue Falefatu Sapolu. Susu Taitai o Ekalesia i fatafaitaulaga e fia i totonu o le atunuu.

O paia faale atunuu i le afio o Aiga ma Tama, Tama foi ma o latou Aiga, le Usoga a Tumua ma Pule, Aiga i le Tai ma le Vaa o Fonoti, le tapuaiga foi i o tatou uso i Sasae i le afio o le Kovana Sili faapea le Faigamalo a Tutuila ma Manua. O paia ia ma sa ma faiga o le atunuu aemaise le Maota nei i Tiafau.

A ou te le i faia se manatu e faatatau i le Tala Faatatau o le Tupe ua i luma nei o le Maota o le Palemene, o le a se i ou liliu ia se i molimoli se faafetai mai le taele o lou agaga i le Itumalo o Falealili i le amata mai i Saleilua ma Iliili seia paia Sapoe ma Utulaelae. O le paia maualuga i Alaalagafa ma le Nofo a Tulafale, Tauagaeseese ma upu ia Falealili. Ou te faafetai foi i Taitai o Ekalesia, le paia i fatafaitaulaga e fia i totonu o le tatou Itumalo i Falealili.

E momoli foi lau faafetai tele i si o matou nuu o Sapunaoa, le mamalu o lo outou Toafa, Maelopa ma Leavasa o e na lele o le Maota i Ituau ma Alataua, Tuiloma ma Taituuga, o manu o le Tuasivi e fagota i tai e lua, e faapea foi le Afioga a Patea o le alo o Tuatagaloa ma le mamalu o le lotoifale o le Manusamoa, aemaise foi lau Susuga i le Faafeagaiga lau Susuga Sula ma Lagi

faapea le mamalu o Ekalesia eseese o lo o i totonu o lo tatou nuu i Sapunaoa.

E avea lenei avanoa ou te faafetai ai i komiti filifilia i afioaga taitasi o le Itumalo o Falealili, aemaise i ou aiga, o le mamalu o le Itumalo na latou lagolagoina lou tagata. O le filifilia o au e avea ma Sui Usufono o Falealili, o se faaaloalo maualuga tele ou te le gafataulimaina, o se tofa faatupu ma se tofa faatamalii, o se faaeaea o le a manatua pea i lou loto i taimi uma. Ae ou te toe faapenei atu; le paia i Alaalagafa ma le la Nofo ma Tauagaeseese ma upu ia Falealili, o la outou faaeaea e pei ona ou fai atu, o le a le paleina i lou ulu vaeatu le mamalu o le Maota, pe ulaina foi i lou ua aua e ui i le manogi o le tiumasalasala po o se faasolo a le manaia ma lona felanulanuai, ae i ai le taimi e mamae ai ma lafoaiina. A o la outou faaaloalo, o le a teumau i lou fatu. Faafetai, faafetai i la outou faaaloalo. E avea lenei avanoa ou te faafetai atu ai o sui o le Itumalo o Falealili na matou tauva i le sailiga o tofi e lua o Falealili. Faafetai i lau Afioga i le Gafatasi, lau Afioga Fuimaono Mimio i le faatuatuaina pea o lau Afioga e le Itumalo o Falealili.

Ua tofia lau Afioga e avea ma Sui Taitai o le Itu Agai, faamalo i lea tofiga. Faafetai ma faamalo i lau Afioga i le tamaitai Leilua Punivalu mo galuega lelei na e faia mo le itumalo. O le upu moni, e leai se faiva e asa ma le maumau. Lau Afioga Fuimaono Faasopo, faamalo le faatamalii, ou te le selu atu. Faafetai i lau Afioga Fuimaono Esera mo le aga faatupu ma le aga faatamalii. Faafetai foi i lau Afioga Soi Lafi, faamalo le faatamalii.

I totonu o lo tatou Itumalo, e ui lava ina toatele e sa tauva i le palota, a ua faafofoga Samoa, e leai se pati e sala, e leai se faamasinoga, aisea? O le itumalo e masani i aga faatupu, e masani i aga faatamalii, e masani i le tausi mamalu. Faafetai ma faamalo. Ou te talitonu, o le avea ma tofi o le Sui Usufono, e le o se tofi e saili ai se mamalu o se tasi, e le o se tofi e saili ai ni mea a nisi, o le tofi e tautua, aua o ia o le a avea ma fofoga taumomoli o le paia ia Alaalagafa, o ia o le a momolia se faatofalaiga a la lua nofo a tulafale faapea le mamalu i le Tauagaeseese ma upu ia Falealili. Ou te talitonu o Falealili ua leva lona silafia o Upufai o Malo Faatemokarasi. O ai lava ua filifilia i le tofi o le Sui Usufono, pe sa e lagolagoina pe leai, o lou sui lava lea i totonu o Upufai o Malo. Faamalo faafetai.

O le a ou see atu i mea e fia faalelei i totonu o Falealili. O le autu o sou manatu e faapea; e aoga ona vaai i mea ua tuanai, e aoga e taiala mo le lumanai. O mea sa tutupu i le tuanai, e mafai ona avea ma mea e faatonutonu ai i le lumanai.

A o ou tuputupu ae i Falealili, na ou aoga i Poutasi, ae ou te le i sue mai i Avele ma le Kolisi o Samoa. Sa ou maitauina ai, o le Itumalo o Falealili, o se tasi o Itumalo na lotolotoi i le amataina o Upufai o le Malo o Samoa, a o avea le Afioga i le toosavili ia Tuatagaloa Simatele e fai ma Sui Usufono. Ou te talitonu o ia foi sa avea ma Minisita o le Kapeneta i le taimi a o tulai mai le Afioga Fiamataafa Faumuina Mulinu II e avea ma Palemia.

Sa ou vaai i ai i le tautua Malo a Falealili. Ma o mea nei e iloa ai galuega tele na faia e Falealili a o ou vaavaai i ai. Sa alu atu le auala taavale i na aso ona gata lea i

Siumu ma Safata. Ona talosaga loa lea o Falealili ina ia aveatu ni loli vaeatu le mamalu o le Maota. Na aveatu lea o loli, na pau na o mea na aveatu, na aveatu i luga o barge foi nei po o vaa i luga o le sami po o le lanisi. Ona aveatu ai lea tuu i o i Falealili, a o le mea na fai e Falealili, o le faaoga o suo vaeatu le mamalu i le va lea o Togitogiga ma le pupu sa momoe ai. Aisea? O le tautua. O le mea lena e mafua ai ona piopio le auala, o le faamaoniga lena o lau tala, ona sa fua i le mea e mafai e tagata, o le asuina o le oneone, o le veleina i lima e tuua ua mavae ma lagomau mai tiasa, o le ata manino e iloa ai le tautua Malo. O le a le vaai nei ia Falealili?

Lau Afioga i le Fofoga Fetalai faapea Sui Usufono mamalu o le Maota, o le falemai o le Itumalo i Poutasi, a silasila i ai i lena vaitaimi sa avea Poutasi o se falemai e fuafuaina mo le Itumalo atoa ma le vaega tele o Atua. E lima faletetele o lo o i ai nei ua amata ona le aoga. O totonu o le falemai na o moega malepelepe o i ai.

Le mamalu e i lau Afioga i le Minisita mo le Soifua Maloloina faapea lau Afioga i le Faatonusili, ia alofagia. Ou te talitonu o i tonu sa faamoemoe i ai ona e totonugalemu i ai, e le gata ia Falealili ae faapea se vaega tele o Atua. E manaomia lau Afioga i polokalame a le falemai o lo o i ai nei, ou te tatalo ina ia alofagia se i silasila ane i le falemai.

I le palota talu ai nei, toetiiti o o i le 5,000 le aupalota. O lona uiga o e o lo o nonofo i totonu o Falealili e i le va o le 7,000 i le 10,000 tagata. O lona uiga e manaomia tele le faaleleia o le falemai.

O le aoga a le Itumalo, sa ou asiasi foi i ai e pei ona ou asiasi i le falemai. E leai se potu tusi lau Afioga. O le library o le puna o le atamai ae ua faaalua e le tamaitai pule o le aoga; i le ma talanoaga, sa ia faailoa mai ai le manuia ma le lelei o suega o lo o sue mai ai ma results a le aoga i Poutasi i sui e aveatu i le Kolisi o Samoa ma le Kolisi i Avele. Na ou faalogo e i ai le fesoasoani a le World Bank mo le fetuunaiga o aoga mauululuga. Ou te manatu lau Afioga e, o Poutasi se isi aoga a le Itumalo e tatau ona ave i ai le faamuamua.

Lau Afioga i le Fofoga Fetalai, o le malae taalo faava o Malo i Vaovai. O lena malae ua uma ona pasia e le Kapeneta i lea foi vaitaimi. E tele se tupe a le Malo ua alu ai, o le matua tele lava. O le faamoemoe ina ia avea le malae lena ma malae e pei o le malae i Iva i Faasaleleaga. E tatau ona faalelei le malae lea ina ia taaalo ai tama o le Manusamoa, leaga o Falealili lea ua maua ai le anavatau o le Manusamoa, le aulakapi a Samoa. O le igoa o le toa o Falealili o Manu Samoa, lea na mafua ai ona malele Malietoa, 'se ua ta fia Falealili fua' ona o le toa lea. O lea ua faaigoa ai le tatou Au Lakapi, o le Au Lakapi a tagata totoa leaga e soo ia Manusamoa o le toa o Falealili.

Lau Afioga i le Fofoga Fetalai, o le faataina o auala i Salani e tau atu i le auala i Lotofaga, faafetai i lau Afioga i le Palemia ma le Minisita o Galuega, na ou vaai i ai ua amata ona faata le auala ma ua toetiiti maea. Malo faafetai. Sa ou taua i lau lauga a o matou feiloai ma Salani, a tu le HRPP e faata lo outou auala. O lea ua amata, a lea ua faata le auala. Faamalo. Na pau o le mea

i lau Afioga i le Minisita o Galuega, ua logo mai au e nisi i Salani, e i ai le vaipuna lena e i gauta o Salani e masani ona feinu ai e o lo o nonofo i le auala i uta. Ua manaia o le a faata le auala ae ua sua loa i ai ma palapala ua le toe aoga le vai. O le mea lea, se i e tagai ane i ai, fai i le konekarate lea e toe fai lelei le vaipuna.

Ou te faafetai atu i lau Afioga i le Fofoga Fetalai. O le eleele i Matautu Falealili, o le eleele e sosoo lelei ma le nuu lau Afioga e, a o le mea ua tulai mai, ua faapea atu le Esetete Tausi o lo latou eleele. Lau Afioga i le Palemia, se i e tagai ane i le Tulafono. Ou te talitonu e i ai le Tulafono na fuafua mo Aleisa aemaise eleele o nuu nei o lo o faaogaina, ina ia fai i ai se fuafuaga.

O le taligalu i Vaovai, Sapunaoa, Satalo, e talosaga atu lau Afioga i le Minisita mo Galuega mo le faia o lea galuega, e faapea foi ma le vaipaipa i Sapunaoa. E i ai le talitonuga se i e silasila i ai i le vaipaipa lea o lo o alu ane i totonu o o matou eleele, pe le tatau ona totogi se lisi o lo matou eleele.

O le vaipaipa i Saleilua lau Afioga i le Minisita o Galuega e vaivai tele, e manaomia se tane vai e faasoasoa ai. O se isi Sui Usufono mo Falealili, se isi Sui Usufono faaopoopo.

I le palota talu ai nei e pei ona ou faaalua, e tulua i le Vaimauga Sisifo le au palota lena, e 5,000 tagata na palota. O lou manatu, e tatau ona fai se fua, e le afaina Sui Usufono o lo o i ai nei ae tatau ona fai se fua i le aofai o tagata e nonofo i se Itumalo ma maua loa se isi o latou Sui Usufono faaopoopo.

O le a ou see ane loa i le Tala o le Tupe. I le aotelega lau Afioga o le Tala o le Tupe, o lo o faaalua ai e pei ona faaalua i le Lipoti, o se Tala o le Tupe ua fuafua lelei ma le faateete, ona o lo o fuafua e faatatau i manaoga o le taimi nei e Matagaluega taitasi. E \$35 miliona o lo o fuafua mo Faalapotopotoga ma Kamupani. E \$5 miliona o lena vaegatupe o lo o tuuina atu i le Iunivesite. Ou te manatu o se tupe ua alagata ma lelei lona faaogaina.

Ona o o mai ai lea o se manatu i le totogiina o nonogatupe a le Malo. Fai mai nisi ua o o i se \$450 miliona. Afai o le figure lea o le \$450 miliona o nonogatupe a le atunuu o i ai i le taimi lena, ua tatau ona totogi. E \$19.6 miliona le tupe o lo o aiaia e totogi ai nonogatupe. O le fua e fua ai mea ia o nonogatupe e fua talafeagai po o le le talafeagai, e fua i le gafatia po o le mafaia e se Malo ona totogi a latou aitalafu. E le fuaina pe fia le tele o aitalafu ae fua po o le a le gafatia. E i ai le faa-Peretania o le debts servicing ratio. O lona uiga o le fua faatatau, afai o tupe maua a le Malo e \$242,350,177, e \$19.6 miliona o lo o alu i le totogiina o nonogatupe ua due ua tatau ona totogi.

E tusa o le 8% o tupe maua a le Malo. O lona uiga o tala (\$) uma e earn pe maua e le Malo, na o le \$0.8sene lea e faaoga e totogi ai aitalafu. O le fua lena e fua ai aitalafu e le gata i Samoa nei ae faapea le lalolagi atoa. O lona uiga o lo o gafatia. I le fuafua atu i isi atunuu o le Pasefika o nisi ua sili atu i le 20%. O le mea lea o lo o talafeagai lelei nonogatupe a le Malo lau Afioga i le Fofoga Fetalai.

O le isi vaega, fai mai o le tamaoiga ua pau maua ma e mativa. O le mea lena o le tamaoiga, e le fuaina i

ni faaupuga malie, e le fuaina i ni faaupuga taufaifai, e leai. E i ai le mea e fua ai. O lea ua uma ona tau mai i le Tala Faatautu o le Tupe, o a mea e fua ai? O oloa e lau i fafo (exports), o a tatou oloa e aumai i totonu (imports), o tupe e aumai i totonu o le atunuu. O galuega uma ia o lo o faamaumau e le Faletupe Tutotonu, Faletupe Tumaoti. Fai mai le Lipotia a le Faletupe Tutotonu, o le alu i luga o le tatou tamaoaiga i le tausaga 2000 e 7.3%, ae sa fuafua i le 4.3%. E le mafai e se isi ona pepelo i ia figure. Ua i ai uma le au atamamai i le faagaioiga o le tamaoaiga.

Ua toe fai mai le Faletupe Tutotonu, o a tatou tupe faaagaga i fafo o lo o i ai nei e \$185.6 miliona, toe fai mai ua gafatia le 6 masina o import i totonu o le 6 masina. O lona uiga a tupu se faalavelave i le taimi nei po o a taeao, e mafai pea ona aumai a tatou oloa. E le gata i lea o le vaai lava i totonu o le atunuu. O le a le vaai i le taulaga o i ai nei? O le a le vaai i faleoloa i le competition ma mea o lo o fai ai? O le ata lena e iloa ai. E le o toe i ai Samoa i se laina maualalo, ua agai i luga le tamaoaiga.

Sa faapea mai nisi o le mativa ua i ai. E matua faanoanoa i lea faaupuga. O le fesili, o le mativa o le tagata ua leai se faaomoe; o le tagata e taatia i le auala e pei o Initia. O le tagata e taatia solo i le auala ua leai se meaai, leai ni lavalava vaeatu, leai se aiga. E maua i Samoa? E le o maua iinei se mativa, a o lo o maua ai le le tagolima. E mafua ona le tagolima, o le paie. E leai se galuega e faia. A fesili nei le mamalu o le Maota vaeatu o lou gutu ma le afi, e i ai se isi o tatou na ola mai e i ai ni mea? Fuimaono Mimio, le Afioga Vaai Kolone ma tatou uma lava. O le a le mea o i ai? E muamua le mea na faia e o tatou matua o le faaaoaga uma o tatou.

Lua, tago laia e fai se galuega, a le maua le galuega alu loa e tagofia le eleele. Ou te tatalo, afai tatou te faamalosi le upu lea o le mativa i le atunuu e ola mai lava e vaivai o le a sana faavaivai ai pea ae leai se galuega e faia. Ona ua uma le tami. O le tulaga i le Ofisa o Faatoaga, ou te manatu e i ai se mea e tatau ona fai. E le o lava le fesootaiga o le Matagaluega lea e faia le fefaatauaiga ma le Ofisa o Faatoaga. E mafua e a se manatu? E le malamalama nuu i tua. E tatau ona gaioi po o le 80% o tagata o le atunuu lea e ola i mea tau faatoaga. O lona uiga e tatau ona ave i ai le fuafuaga mo tagata ia aua o le la e ola i le popo, o le la e ola i fua o laau aina. E tatau la ona ave i ai. O le la foi e faapena i vaa fagota.

Ona ou see mai ai lea mulimuli lau Afioga, i le Polenisia.....

I le Polenisia, sa taua e le Afioga pe aisea na le sau ai le Pule o le Polenisia ona matou te le i feiloai. O lau faamatalaga lea le mamalu e o le Maota, e le tau sau se Pule o le Polenisia. O faamatalaga uma o le la ua i totonu o le Ofisa o Tupe ona aumai lea matou tilotilo i ai o le la e manaomia moni se tupe. E lua mea sa fuafua i ai le Komiti o Tupe. O le faaiuga e tatau ona fai, pe tape le Polenisia pe faaola?

O le lauga faataupou mai Falealili. O le a fai ni nai manatu i le Polenisia. E le i faigofie i le Komiti o Faamatalaga o Tupe a le Malo. O le Komiti o

Faamatalaga o Tupe a le Malo lea e i ai nei, o le matua lauila lava. Silasila mai i le Komiti lea e i ai nei: Taitaifono Tuiloma Lameko mai Falealili. O le matua Suetusi lava e le o sina tamai Suetusi. O le Tofa Tuuu Anasii Leota o le matua faipisinisi. O le Afioga Aeau Peniamina, o le matua fomai o fomai. Faasootauloa Pati o le isi lea faipisinisi, Fagafagamanualii Therese McCarthy, o le faipisinisi e owning hotel, o le Tofa Taua Kitiona Tavaga Seuala, o le matua faipisinisi. O le Tofa Letoa Sefo Pau Taumata o le matua – e le gata i le vaai i tagata soifua ma e ua feoti, a o le matua faipisinisi lava o hotel lea e i ai.

O le matua Komiti mamafa lava, o matua lauila lava ia e i ai. O le latou faaiuga e le i faigofie lau Afioga i le Fofoga Fetalai. Aisea? O mea ia sa vaai i ai. Ona pau le mea taua na fia vaai i ai pe moni o lo o manaomia e le Polenisia. Aumai le fuainumera, e manaomia moni lava.

E lua faaiuga e tatau ona fai e le Komiti o Faamatalaga o Tupe a le Malo aua i ai lana pule e tipi ai le \$15 miliona po o le \$20 miliona. E lua lava mea e tatau ona fai i ai.

Muamua, pe tatau ona faaola le Polenisia pe tape le Polenisia? Fuafua atu le Komiti a tape, o le a le mea tatou te oo i ai? O le a le mea o le a oo i o tatou faipisinisi lea e faalagolago i le vaalele? O le a le vaai agai i faletalimalo pe a tape le vaalele? \$133 miliona i le tausaga 2000 na maua mai i tagata tafafao maimoa mai. O le a le vaai a o tatou tagata i Niu Sila, Ausetalia pe a faapea e tape le Polenisia ae tau o le Air New Zealand?

O outou manatu le taimi na omai ai o tatou tagata ona tuu lea i Tutuila? E le iloa uma ai mea i Tutuila. E tau sue se vaa e faaauau mai ai le malaga iinei. O le a le vaai agai i le o i Tutuila? E tape loa le Polenisia na o le Air Samoa e alu i Tutuila. Ua tatou vaai i amio a Tutuila. O mea uma na na matua fuafua loloto i ai lauila ia e i totonu o le Komiti o Tupe na mafua ai ona ioe e ave le \$20 miliona. Ae le tau fai i le Pule o le Polenisia e oo mai i le Komiti.

E le faatonuina au e se isi. E le faatonuina au, po o le Ofisa o Tupe, po o Gates po o ai, e matua sa sa lava, ioe. E fai lava i le mea ou te iloa e tatau ona fai. O le tali atu lea, e tusa pe fautua mai, ae a ou le loto i ai e leai se mea e faia.

E le fautuaina au e se isi po o ai a, aua e pule lava le komiti o tupe. Ia lau afioga, e le tau fai ia Gates e sau aua ailoga e iloa e Gates ni accounts e pei o au? Lau Afioga i le Fofoga Fetalai ma le mamalu o le Maota, e pei ona ou fai atu i le mamalu o le Maota, e matautia le mamalu o le Maota leaga o lea e afifio uma ai tupu o le atunuu.

Ona ou faapenei lea, afai ua i ai se upu a Tuiloma ua sala i lo tatou faafeagai ai i lenei afiafi, fale i le Atua lo outou finagalo. Ia manuia lau Afioga i le Fofoga Fetalai, manuia le faafofogaaga a Samoa, manuia le Maota o le Palemene, ae ou ola i le alofa o le Atua. Soifua.

## Afioga Hon TUISUGALETAUA SOFARA AVEAU



### **Itumalo Faaalalafaga:**

*Vaimauga Sasae*

### **Filifilia:**

*12 Mati 2001*

### **Faatauto:**

*15 Mati 2001*

### **Lauga Faataupou:**

*20 & 21 Iuni 2001*

Faafetai mo le avanoa lau Afioga i le Fofoga Fetalai.

Lau Afioga i le Fofoga Fetalai, sa e molia le faasagi i le Atua i lenei aso i lo tatou Tapaau e tasi. O le Atua e Ona le malosi uma lava. E te laei i viiga, le mamalu ma le olioli e le gata nei ae faavavau lava. E vivii ia te Oe meaola uma e manava aua o Oe o le Silisili Ese. O Au galuega e molimau i ai sami loloto ma le uliuli o le moana; e fetalai ai manu felelei i le suamalie o fuga o laau ae fetagisi e e olioli; e vivii ai foi tagata i la latou tatalo faafetai ma le mautinoa o lo o e faatali mai e talia i latou i le Maota ua uma ona e saunia. Tau ia ina ia oo ae nanamu o la tatou taulaga osi i lana faafofoga i le mamana o Lona Nofaalii.

Mapu ane ia i Logoe le galugalu o le vaitoa, ae ou te muai faatulou atu i le mamalu o le Maota ma le Palemene o Samoa. Lau Afioga i le Fofoga Fetalai, lau Afioga Toleafoa ia po o lau fetalai foi Pulemagafa na e faialaga i le Tuamasaga. Le afio a lau Afioga i le Palemia le Alo o Malietoa, le Afioga i le Sui Palemia lau Afioga i le Laau na fausia ma le mamalu i Afioga i Minisita o le Kapeneta. Le afio a lau Afioga i le Taitai o le Itu Agai, lau Afioga Le Mamea, le afio a Sui Usufono mamalu uma a le Palemene o Samoa i lenei Paeaiga XIII. Ae ou te le i liliu ane e agai i se finagalo o le Palemene e pei ona sausaunoa i ai le Maota, ou te muai afea faatulou le paia o le tapuaiga mamalu a Samoa.

Lau Afioga i Le Ao Mamalu o le Malo o Samoa lau Afioga i le Tapaau Faasisina lau Susuga Malietoa Tanumafili II, e te afio i lou talaga atoa ma lou fala na folaloe e te afio ai i lou nofoa vaevaeloloa e faalogo ia te oe Samoa.

Afioga lau Afioga i le Sui o le Fono a Sui Tofia lau Afioga a le Tama le Fale, susu susuga i faafeagaiga taulagi i tafa e fia o Samoa o feoi o le Talalelei o lo o faaoge finagalo i le Atua e soifua e faavavau. Lau Susuga i le Taitaifono Aoao o le Ekalesia Faapotopotoga Kerisiano i Samoa, lau susuga i le Peresetene Aoao o le Ekalesia Metotisi. Lau Afioga i le Katinale o le Ekalesia Katoliko Roma i Samoa, le Laulau paia a le Mafutaga Soofaatasi a Ekalesia i Samoa. Aemaise foi paia maua o taitai ma le aufaigaluega uma a le Atua i so o se fata faitaulaga faalekalesia o lo o i totonu o le atunuu. O maa tulimanu na ma poutotoa na o le Faavae mautu ma le mausali o le Malo o Samoa tate Faavae i le Atua.

Le faafofoga tapuai mai a lau Afioga i le Faamasino Sili ma le vaega o Faamasinoga. Le afio o au paaga i tausaga e tele, le afio i Ulu o Matagaluega ma

Faalapotopotoga Tumaoti a le Malo, o outou tauau e amoina ai le mamafa o le tautuaina o tatou tagata.

Le paia tele o Samoa i le afio o Tama ma o latou Aiga, o Aiga ma a latou Tama, o aiga o tupu aiga o nofo aiga o Papa ma aiga o Falealii, o le paia lava lea aua Pule ma Tumua Ituau ma Alataua Aiga i le Tai ma le Vaa o Fonoti. O paia na o le fatu o le Polenisia e ulumatua ia te oe Samoa ia Temokarasi Tutoatasi o le vasa laolao o le Pasefika.

Lau Afioga i le Fofoga Fetalai, ou te faatulou atu foi aua le paia maua i le Faleagafulu i le Motu i Sasae, le Faigamalo a Tutuila ma Manua, aua le Tuitele ma le Tuimanua i le Falelima i Sasae ma le Falelima i Sisifo. Le afio a lau Afioga i le Kovana Sili faapea lau Afioga i le Lutena Kovana, lau Afioga i le Peresetene o le Senate aemaise o le faafofoga a le Fofoga Fetalai i Maota e lua. O le mamalu lava lea ia Sua ma le Vaifanua, Saole ma le launiu na saelua. Fofu ma Aitulagi ma le Afioga i le Maopotasi, faapea le mamalu tele i le alii o le Laau na Amotasi, Faatuiolemotu ma Auvaa o Tootoo ma upu i le Manuatele. O le fuifui lena o ou motu matagofie e sefulu ua soona lalelei i lenei vasa. O paia na o Samoa atoa i ona tafa e fia ma le sautuafefafa o ona mamalu.

Ua ofi nei i le ava vaauega o le tautai matapalapala. Ua fati sisina ai galu i pupu o Totolopapa ma ona aau le toa. Ua lafoia foi ata paolo i tumutumu mauga i ona tafa mauga o ona ao toa foi e le gasolo, o lo o nofo sauni i uatoto e faasusu ai ou laufanua Samoa. Amuia oe Samoa ma lou matagofie. Ua tatou seei nei i le fala e le see ma saga faamaupuepue le tiasa ma tatou mulumuluaufoe ma matimati o ta faivaalofilima aua o lele ua sasaa mai le ato a le faimeia i le felanui ai o le loloto o finagalo lea ua opea nei i le Laulau a Fono. Ia o manatu na o fefatuaiga, o manatu e fonofono ai ma manatu e faatupu fanau mo mea lelei aua Samoa ma ona tagata. Faafetai mo le tofa tatala ma faautautaga saili i le Maota e pei ona saunoa i ai.

Lau Afioga i le Fofoga Fetalai, e muliaina ou sagai atu e tali ma faamalalama mataupu sa laga mai ma saunoa i ai Sui Usufono o le Maota. A o sina avanoa faamolemole, se i ou faaagaina lou avanoa muamua lea ou te afea ai le paia i lou Itumalo, o le Itumalo e pele ia te au o Vaimauga i Sasae. Le susu i Ao o faalupega ma le aufaigaluega paia a le Atua i lou Itumalo. Le afio i le Sao Faapito Afioga ia Leniu ma ona alo, le Matua o Taliulu i paia o le aiga Salevalasi, le mamalu ia Tuisamau ma ituala e fia. Afio foi le fofoga o le Alataua o Tuliaupupu ma Tuliaupupu. Afio Le Oloa lau Afioga Samoa le paia tele i le Falefia o alii, Le Maopu ma le Gataiala, le paia ai le Matua le paia ia oulua tama nofoa faapea le nofo a ituaiga ia Saleupolu. Le susu i Faafeagaiga uma, le aufailotu paia a le Atua aemaise le paia i tamalii ma failauga, o faletua ma tausii, saoa ma tamaitai, le malosi i tupulaga ma talavou o lo o alaala ma papa aao i Maugafiafia ma Vailele-Uta.

Lou nuu, le afio i le Alaalatama, Tuisugaletaua ma Luamanuvae. Fetalai ia Pulemagafa ma le Faiga ma le nofo i ituaiga ia Saleupolu. O paia na o Fagalii. Le mamalu tele i faletua ma tausii, saoa ma tamaitai. Paia i

talavou uma ae tainane foi alo ma fanau aua o faapolo na o lo ta Itumalo mo le lumanai.

Lau Afioga i le Fofoga Fetalai, tau ia ina ou faatuaiato i talatua ma se i ou fati le laau magalo i le vai o mala ae tafe magalo le vai o Salemuliaga, ae lafo ia i le alo ma galo se leo o lo outou tofi i le Palemene.

Lou Itumalo e le Vaimauga i Sasae, e mai le taele o lou loto ou te molimoli atu lau faamalo ma lau faafetai i la ouotu tofa faatupu, la outou faautautaga faatamalii ma le faafaleupolu o lea ua vavae ai le uepa o le vai manino aua ua samatofa ma falegase lo outou finagalo paia. Ua to mai ai se matupalapala ma le avanoa o lo ta nofoa faaItumalo ou te tautua ai mo oe ma tagata uma o Samoa. O lea ua faitau lupe i le fau, ua maua lo ta ai. Faafetai faatupu. Ua tulima nei le segaula a le Tuimania ua to faaaloalo mai foi ma le asoa lau mea manogi e le mamae mai le Afioga i le Palemia mo lo ta Itumalo. Ua tatou futifuti manuula i le faaaloalo mauuluga a le Palemia. Ua amanaia ai so ta leo faatauvaa i le usugafono a Vaimauga i Sasae i le sailiga tofa i le Fono mamalu a le Kapeneta. Faafetai le faasoa faaaloalo i lau Afioga i le Palemia.

E faapitoa lau faafetai i le Afioga i le Sao Faapito ia Leniu Tofaeono sa tulai mai i le Nofoa o lou Itumalo. Faamalo le tautua, faamalo ona fai o le faiva. Sa e tulai mai i matagiolo i le va o Itumalo ma le Malo i lena Paeaiga, sa matila lau tia. Faafetai le tautua i le Vaimauga. Aumaia lenei avanoa ou te galue ai ma ou tautua i lo tatou nuu ma lo ta Itumalo, ae faamoemoe i le lagolago mai ma le tuu faatasi o o tatou tagata e pei o aga masani a Vaimauga.

Lou Itumalo e, o lou pale fugalau sasala lea ua suiina feuluai i le arasi manogi ma laumea felanuai, e tau mai le vao o ou mauga. Lea o le a ou paleina ma le agaga fiafia ma lou faaaloalo. E mafanafana le lagona o lo o outou Sui Usufono ona o lo o tatou faatasi ma au i le tapuaiga tatalo i le Atua e ala mai ai so tatou manatu faatauvaa e fai ma sao o lo ta Itumalo. Faafetai to pule. Ia sasaa faaua mai faamanuiaga a le Atua ia te oe Vaimauga Sasae i ou laufanua ma ou gataifale.

Lau Afioga i le Fofoga Fetalai, i le agaga faaaloalo tele ou te taumafai ai e tali fuaitau i manatu ma le anoano o fingalo taua e pei ona folasia i le Maota. Ae ou te le i laa atu e tali fuaitau i mea taitasi e pei ona tolaulauina, o le a ou le tolaulauina suafa ma Itumalo ma tootoo. Ae o le a taumafai ina ia faamatala lautele ma faaamalieina ai finagalo ma fesili e pei ona tuuina mai.

O le Matagaluega o Faatoaga, Vaomatua, Faigafaiva ma le Vaaitau, o le a ou le see tele atu i tua e amata mai i le 1998, ua faataatia mai ai le tomaaga o le ata faataatia o galuega. Ou te taumafai e faamalamalama atu i vaega e pei ona laga mai e Sui Usufono taitasi. E masani ona ou faalogo i finagalo pe a felafolaoai le Maota e faapea; ua le o toe i ai ni togafai, ua le o toe i ai ni faatoaga a le Matagaluega. E sao! I lalo o le tomatau a le Matagaluega e pei ona faataatia mai i le 1998 e faagata i le tausaga nei, o le Matagaluega o le latou m atafaioi latou te tautuaina tagata, ae latou te le o toe faatino se isi galuega e pei ona masani ona sau ai i taimi ua mavae.

O le eseese taua lena o lo o fai pea ma fesetai mai ai finagalo o nisi ma agai mai ai i lenei Matagaluega. O le Matagaluega o lo o faatautaia i lalo o Tulafono e 36. A faaopoopo i ai ma Tulafono faaopoopo, By-Laws, e toeitiiti lava oo i le 90. Ae manatu e le faataua tele ia vaega. O Tulafono la o lo o faagaioia ai le galuega ma taitaiina ai le faatinoina o galuega.

Vaega Muamua: Vaega o laau. O vaega o laau tetele. Ou te muamua atu i le vaega o niu ma koko e aofia ai ma ava ma fai ma talo, tulou le paia o le Maota. O fesoasoani a le Matagaluega o loo taumafai ina ia tuuina atu mo ia vaega, o le mea muamua lava o lo o latou faataunuina suesuega. O a lava suesuega o lo o fai aemaise lava faafitauli o faamai ma iniseti ma mea faalafua e faapena vailaau e mafai ona togafitia ai i latou. A faapea e maea, ia ona tufa lea i tua i le mamalu o le aufaifaatoaga ma le mamalu o le atunuu.

O le Vaega lona lua o le Matagaluega o lo o i ai a latou nofoaga e faafailele ai laau e aofia uma ai laau ia ou te tau atuina. E aofia ai le koko ma le niu, ona tufa atru lea i le mamalu o le atunuu o lo o latou manaomia. A o lo o i ai ia tatou faamiliga e tele. O lo o lava ma totoe a tatou faamiliga e le gata i Nafanua, ae faapena le nofoaga i Nuu i laau e pei ona ou tau talai atu.

O le ava ma le fai, e le o toe faia ni a tatou faamiliga faapitoa, ona e pei ona silafia o lo o lava le taape o ia laau i le atunuu ma e le tau faia ni faamailiga se i vagagan ua manaomia faapitoa e se isi se ituaiga fai i le paia o le atunuu.

O le vaega o le talo o loo faaauau pea saililiga a le Matagaluega e pei ona silafia mai lea taimi i lea taimi e tuuina atu ai ma faasoa atu i fafo i le mamalu o le atunuu ma le aufaifaatoaga ia ituaiga talo e mafai ona latou anagata ma tetee le faafitauli o le lega. Ma ua toeitiiti lava ato le 30 o ituaiga talo eseese ua tufaina atu i le mamalu ma le paia o le atunuu e latou te faaogaina. Ma e i ai le talitonuga o le a faasolo lava ina lelei le tatou tamaoiga i le talo i se taimi. Pau lava o le tatalo a le Matagaluega ina ia lava le onosai ma le faapalepale. Afai foi e i ai nisi e le o matua tagolima i ni tiapula tulou, e mafai lava ona fesoasoani atu le Matagaluega. A le aveatu ni nai mea o lo o i ai i le Matagaluega, e saili e le Matagaluega ia i latou e maua mai ai se fesoasoani.

O laau taumafa mata. E pei ona silafia o le isi vaega tele lea o le polokalame a le Matagaluega. O laau ia e i ai esi, mago, o moli ma e i ai le faatoaga faapitoa a le Matagaluega e pei ona silafia i Aele i le va o Aele ma Vaitele o lo o i ai ia laau e mafai ona maimoa i ai le atunuu o lo o fia agai i ai i lea tamaoiga. E faataitai i ai, a o lo o mafai ona faafaileleina e le Matagaluega ia ia laau uma e pei ona ou taua i le nofoaga i Atele ia po o Nuu, po o Nafanua. O lo o faaauau pea a latou suesuega. E i ai faafitauli ogaoga e le mafai ona foia i le taimi nei e pei ona masani ona tau mai o le pepe tuia.

E pei ona silafia, e tele naua le suesuega e le gata i totonu o le atunuu e leai ni suesuega tele ia tatou i le pepetua. Ae a outou tagatagai i le malosi o isi atunuu tetele e tele le tamaoiga o loo faaalu ai i i le sailiga ae oo mai i le taimi nei e le o mafai ona latou gafatia ni togafitiga. A o lo o mafai lava ona fesoasoani le

Matagaluega i nai auala e mafai ai ona puipuia le pepe tuia aemaise o le tauina o laau a o le i oo i le taimi e osofaia ai e ia faafitauli.

O le polokalame lea o lo o fesoasoani malosi i ai le UNDP ma le FAO e faapena le fesoasoani a Ausetalia. Ma o so o se ituaiga laau o le tele o ituaga laau ua mafai ona totoina nei e le Matagaluega i ia nofoaga e mafai ona faasoa atu o nisi e faataugofie a o nisi foi e fuafua lava le tau e faatau ai i le tau olo o faamili ai ma le tupe o lo o faatau ina ai.

O laau aina laiti po o vegetables, o lo o faapena; o fesoasoani e mafai ona agai i ai le Matagaluega, o le sailia lea o laau e togafitia ai faafitauli o lo o aliali mai ai . E faapena foi laau toto...

Lau Afioga i le Ffooga Fetalai, ua tea i lagi le tatou faasagi ma le faapolo, le faamanu ma le faafetai loloto e pei ona avea ai lau Afioga i le Fofoga Fetalai ma o tatou faaleo i le vatapuia ma le Atua Silisiliese.

Ua maleifua ae foi le Maota ma Samoa i le mavae o le toa o le po ma le gase o malolo i le faia malologa toafilemu, ae ua tatou toe feofoofotai i pue o manu ae le o pue o mala. Ua ula foi lenei taeao fou ua matalupe le seuga aua ua tatou toe fetapaai i le Maota mamalu o Samoa i le le fegasoloai o ao ae o ao totoa ma le manino – malo le soifua.

E tuua le nofoa i le sautia anapo o taumafai atu se faamatalaga e uiga i isi vaega o le Matagaluega e pei ona taua faamatalalaina le vaega o laau.

E i ai le fesili sa tulai mai i le taimi na motusia ai le Fonotaga. E pei ona ou faamatala atu i le amataga i lau folasaga amata, o le mea o lo o taumafai atu i ai ina ia ou fofola atu le Matagaluega atoa i ana matafaioi uma, na avea lea ma mea e tali ai nisi o finagalo.

O le a ou taumafai pea e tali atu ni finagalo e pei ona sa motusia mai ai anapo. O le tali atu e tusa o le faafesili po o i ai sa matou polokalame e tulituliloaina ai laau e tufaina atu. Ioe, o le tali o lo o faapena ona fai. A faapea e aveatu laau i tua aemasie laau ia e pei ona ou talanoa atu, e i ai esi, mago, moli ma isi laau e tele, faapea ma rambutan. Ona faamau lea e le Matagaluega ona tlutuliloaina lea.

E i ai foi le fesoasoani a le Matagaluega i le faatinoina ma le faasinoina o le totoina ina ia sao ma lelei i faatoaga a e o le a latou totoina. Se i vagana foi laau taitasi pe tailua, e le tau tulituliloaina lena vaega, aua e tasi lava pe lua foi laau a le tagata e mananomina.

O le vaega lena o laauaina laiti e pei ona ou faamatalaina atu, o le tasi o matafaioi a lea vaega latou te vaavaaia laau e tatau ona aumai i totonu o le atunuu e pei o fatulaau, ona fautuaina lea o le faleoloa i mea e tatau ona aumai ma le vailaau e fanaina ai le vao ina ia fesoasoani e...

Faafetai atu e pei ona saunoa lau Afioga i le Fofoga Fetalai, o le a ou agai atu i ai i vaega ia mulimuli se i tau faamaea atu le faamaninoga a le Matagaluega i nai mea faapitoa ia. Faafetai mo le faauilavea a le Sui Usufono.

E faapena foi ona faatauaina vailaau o lo o aumai i totonu o le Matagaluega ma le atunuu, e tasi lea galeuga a le vaega lea latou te faia, latou te susesueina vailaau talafeagai mo le faaogaina. E i ai vailaau talafeagai ma

taua e manaomia e le aufaifaatoaga i a latou tapenaga ma fesoasoani e toomaga i ai aua lo latou vaivai ma le oge tagata i nisi o taimi, e fesoasoani e tau foia ai nisi faafitauli. O fautuaga uma o lo o aveatu i ai mai le vaega lenei.

Ona sosoo mai lea ma le vaega mulimuli o mea tau laau; o laau tau maota e pei o oketi, antheriums ma mea faapena. O lo o i ai foi la latou vaega faapitoa latou te faafaileleina laau faapea.

O le polokalame a le Matagaluega e fesoasoani atu ia i latou e fia maua ni fesoasoani i lea vaega. E i ai nisi o le mamalu o le atunuu sa mafai ona auina atu e le Matagaluega i nisi o aoaga i le itu tau laau faapea, i atunuu e i ai Thailand ma Hawaii. O nisi na o lo o tulai mai i le taimi nei o lo o latou faataunuaina lea tamaoaiga lelei i se tualga o lo o tulaga lelei mai ai. O lea ua tausolomua ia i latou ona faatauina laau i totonu o le atunuu, ma faasoa atu lo latou tomai aua sa faataunuaina a latou aoaga e faasoa atu ai i isi uso a fai laau i le mamalu o le atunuu.

O le vaega e tolu, o lafumanu. Sa i ai ni fesili sa faatulai mai i le vaega lea. Ou te faamatala atu faapenei. I le vaega o lafumanu i manupapalagi.

Faafetai i le faauilavea a le Afioga i le Sui Usufono.

E pei ona ou fai atu o lea ou te tau faasolosolo atu i le vaega o le Quarantine ona ou talanoa lea i ai i le masini lea ae ona o lea ua laga mai, ou te tali atu faapenei. E pei ona outou tagai i le Tala o le Tupe a le Matagaluega, o lo o i ai le vaegatupe e \$779,000 o le tupe ua faatupe mai e Malo o Europa Tuufaatasi ina ia faatau mai ai se masini e togafiti ai fua o laau e auina atu mata i atunuu i fafo.

O lena ua i totonu o le Tala o le Tupe le vaega lena. E pei ona taumafai atu foi le malo i le tau sueina o se vaegatupe ua leva ona tausaili se vaegatupe, ma o lea ua tino mai ona e le faigofie ma le lē taugofie le masini. Na amata mai i le amataga o lenei fuafuaga o latalata i le \$2 miliona. O lea la ua pau mai i se tau mauualalo ma o lea la ua foliga ua gafatia. O le seleni lena o le a faatau ai le tatou masini e togafitia ai laau pe afai e auina atu i fafo.

Ona toe faaaauu atu lea o lau faamatalaga e tusa o le vaega o lafumanu. O le matafaioi lava a le Matagaluega latou te fautuaina le mamalu o le atunuu i lenei atinae. Sa faataaita atu muamua i le Faigamalo ua tuanai le polokalame o le faaleleiga o le atinae o lafumanu. O lena polokalame sa faataatia atu e tolu uta o manupapalagi sa fuafuaina.

Na aumai le isi uta i le 1993, e 1,367 manupapalagi sa aumai ai, ona faasoa atu lea i tua e latalata i le selau le aufaifaatoaga sa faamanuiaina ai. Ona toe aumai lea o le isi uta manupapalagi i le 1995 e 160 le aufaifaatoaga sa faamanuiaina ai i le tufaina atu o manupapalagi e 1,663. I le uta mulimuli lena e na o le 4 manupapalagi sa taofi e le Matagaluega ae o le uta atoa sa faasoa ma tufa atu i le mamalu o le atunuu.

I le tulai mai o atinae o lafumanu, i le faitauga o faatoaga faapitoa sa faia i le 1989, sa tulai mai ai le aofai o manupapalagi i totonu ole taunuu i le 24,000, o le afa o lena faitau o manupapalagi a le Malo.

Ina ua toe faia le faitauga o le aofai o lafumanu i le 1999, ona maua ai lea o se fuainumera e 29,000 le faitau aofai; o lona uiga ua 5,000 le faasiliga. O le aofai o tagata sa i ai i le amataga i le faitauga muamua sa latou tausia manu, e 4,236; a o le faitauga mulimuli i le 1999 ua oo atu i le 5,673 i latou e tausia manupapalagi. O lona aofai, e toatele lava o le mamalu o le atunuu.

Ona fuafua ai lea o se tatou uta manupapalagi i le taimi mulimuli ane e faaatoa ai le tolu o uta manupapalagi. Sa taumafai ona e faigata ona aumai ona o lo o tau faasoasoa pea manupapalagi sa aumai i le amataga ma faaoga le faaleleiga e pei ona aumai ai i le amataga. O la sa faasoasoa ai i le tulaga lea manupapalagi e pei ona auina mai.

Faafetai i lau Afioga i le Fofoga Fetalai.

Ona faaiu atu ai lea o lau faamatalaga i le vaega lea o lafumanu. O le faamoemoe e pei ona aveatu i le taimi ua mavae ina ia toe faaatoa pea se isi a tatou uta manu se tasi. O lo o sailiili pea le Matagaluega i se vaegatupe e talafeagai ai. O lo o faasoasoa atu i le taimi nei ma o lo o tele foi le manao o i latou o lo o mananao mai pea i manupapalagi, o lo o faasoasoa pea i manupapalagi a le Matagaluega o lo o maua.

E pei foi ona faafofoga i ai o lo o fesoasoani le Matagaluega i nisi o nuu po o tagata taitoatasi po o nisi o Faalapotopotoga ina ia faia ni faatautui ma faatau atu ai manu e tufa ma faasoa atu i nisi e faafetaiaiai le manao i manupapalagi e pei ona i ai nei.

O le tasi vaega taua o lenei atinae o manupapalagi e maua mai ai le susu. O le taimi tonu lava lea sa amata mai ai ona faagasolo foi lea o lea polokalame.

Sa faapea le manatu o tali faataupou nei, e le faalavelave tele, ae o le a taumafai atu pea.

E le ese se manatu ese le finagalo o le Sui Usufono. O lo o tutusa lelei lava o matou manatu ina ia toe saili mai nisi manu. E pei ona fai atu o lo o sailiili ma fai pea lea galuega a le Matagaluega e toe faataunuu ai pea le faamoemoe i se auala e faigofie ma gafatia ai ona faatino. Ae pei ona ou fai atu e tele le manao o le aufaifaatoaga i manupapalagi e le o gafatia. O lo o faasoasoa pea ma tausaili nisi auala e faasoasoa atu ai manu e tau faafetaiaiai le manao mai o le aufaifaatoaga i manupapalagi.

O le atinae o manupapalagi taususu, o le taimi tonu foi lea sa amata ai ona toe tau fafagu mai ai lea atinae, ma o le taimi nei ua faafiafiaina lava i le tulaga o lo o i ai ona o nisi o tamalii o le Atunuu iinei i Upolu ua i ai a latou pisinisi laiti e faatauina atu ai le susu, ma o lo o faatauina nei i le taulaga. E faapena foi nisi o meataumafa e gaosia mai le susu o lo o maua mai i a latou faatoaga. E le gata iinei ae faapena foi se isi polokalame faapea ua mautu i le Motu tele i Salafai.

O lo o fesoasoani pea le Matagaluega i isi atinae i mea tau lafumanu pei o meaituaolo faapena foi le vaega o moa. E fesoasoani i so o se faafitauli a o lo o talitonu le Matagaluega i lea vaega mo le atiaeina lava o le tausia faaSamoa o tatou meaituaolo ma mea faapena. O lo o lelei pe a tausia pea i le tatou lava aga masani e faigofie ma taugofie, ma e o lo o lava foi faalavelave i tua e

fetufaai ai ma fefaatauai ma maua seleni a i latou olo o naunau pea e faatino lea faamoemoe.

O le vaega fa o laau fai laupapa. E ui lava ina e le i fesiligia ae taua pea mo le silafia ona o lea taimi ma lea taimi o lo o agai mai ai nisi o finagalo o le mamalu o le atunuu. E le o toe po se lilo i le silafia o le Maota ma le atunuu, e le o toe tele tele se tatou laau Samoa o lo o totoe. O le fua a le Matagaluega i le va o le valu i le sefulu tausaga le tele o le laau o lo o totoe nei i lo tatou lava faatoaga o laau papalagi o laau sa toe totoina. O lo o i ai foi le fuafuaga sa i ai i le amataga e toe faamatuu atu lisi o fanua o le atunuu sa totoina e le Matagaluega. O lea o lo o faifai malie pea ma faaatoa lea mataupu se i tau fuafua aua o nisi o fesoasoani sa faatino ai lenei galuega, o vaegatupe tetele mai le Malo o Niu Sila. Peitai ane o le 4 tausaga talu ai sa faamuta ai lea fesoasoani. O le ala toe fesui ai foi lea o le finagalo o le Malo ona o le tau fuafua i se faiga e fai ai ma ia faafaigofie ma taugofie ai. O nisi o alaalfaga ma afioaga ua talitonu le Malo e gafatia e i latou ona tausia laau. Aua afai lava e tausia i lalo o le pule mamalu a alii ma faipule ona malu puipuia lea o ia vaega. O lo o i lalo foi o le latou filifiliga ae faufautua i ai le Matagaluega i le taimi e tatau ai ona latou sailia pe a oo i le taimi e ta ai laau. O le tiute lea o le Matagaluegam, o le faataatiaga lea o le finagalo e pei ona faataatia mai ai i le 1997/1998. Peitai ane e le i matua faatinoina atoata e pei ona ou taumafai atu. O lo o faatalatalanoa pea le faiga o lea mataupu ina ia toe tau tagai i nisi vaega e mafai ai ona faatino lelei lea faamoemoe. Ona o le mafuaaga sa amata ai ona ua le toe aumaia le fesoasani a Niu Sila ina ua maea le fesoasoani a Niu Sila sa faatino ai ma faatupe ai le tele o na polokalame. O le Matagaluega i le taimi nei ma le latou galuega o lo o fai, o lo latou faafaileleina laau e pei o poumuli ma isi laau faapena ma faasoa atu i tagata ma faufautua i le au faifaatoaga ma le mamalu o le atunuu e i ai foi tupe maua e tele e maua mai i laau failaupapa pe afai latou te faaogaina e toto i totonu o faatoaga faatasi ma laau e maua mai ai le fofoga taumafa.

O le galuega tele lona a le Matagaluega o lo o taumafai e talai atu lea faamoemoe i le mamalu o le atunuu ina ia o faatasi laau e lua, e fesoasoani e le gata i le fofoga taumafa ae maua foi le laau mo le fafie, maua ma le laau mo le laupapa.

Ona ou see mai ai lea i le vaega o Faigafaiva. Lau Afioga i le Fofoga Fetalai, e feololo fesili sa tulai mai i le vaega o Faigafaiva. O le polokalame o le Faigafaiva a le Malo ma le Matagaluega o lo o agai atu nei i ai, o lo o vavae ini vaega e tolu.

Muamua, o le toe faafoi lea o le tamaoiga o le gataifale i se tulaga e toe faaleleia ai mai le leaga o lo o i ai. O le tulaga o lo o i ai nei i le tele o le gataifale i le aloalo ua le toe lelei ma toe atoata ona ua le o toe maua le mea sa i ai ona ua tele ina seleseleina le tamaoiga o lo o i ai a ua tuai le toe ola mai o amu ma meaola ma le tamaoiga a ua vave tele le seleseleina ma le faaogaina e tagata.

E pei ona maimoaina e le lautele o le atunuu, o lea e i ai le polokalame e toe taumafai ai e faafoia lea faafitauli.



O lo o galulue ai le Matagaluega ma nuu taitasi i lea polokalame e pei ona outou maitauina i nisi o nuu ma afioaga. Ua i ai vaega o le aloalo ua faasaina. O lea faasaina ona o le agaga ina ia toe olaola ane le amu ma toe faatupu ia ma figota ilea ogasami. Afai e tutupu, ona mafai lea ona tataa atu i tua ae mafai ona selesele e le nuu ma afioaga i fafo atu o le vaega lea o lo o faasaoina ae faasao pea i ina ia faasolosolo ma toe lelei ai. O le molimau i nuu o lo ua faatino lea faamoemoe ua tele le suiga lelei e le gata i ia ua latou toe maua ae faapena i figota o le sami ua toe ola mai ma nisi lava mea o le sami ua faaletonu ua amata ona latou toe maua, ma o lo o tulimatai pea e le Matagaluega lea polokalame.

O le polokalame lona lua, o le toe tau foia lea o faafitauli i le fofoga taumafa i mea o le sami i le faaolaina o isi oloa e tai pei o ia e i totonu o ogavai i totonu o le laueleele. E pei o le faaolaina o le tilapia e pei ona saunua i ai nisi. O polokalame ia, e talosaga mai le nuu i le Matagaluega mo se fesoasoani ona alu atu lea o le savali a le Matagaluega ma latou tilotio pe talafeagai le vai ma talafeagai ona faaola lea vaega ona fesootai lea ma le nuu. E tele lava ina fautua Matagaluega i latou e ana ia ogaeleele ma ia ogavai latou te faia le pulega o ia faamoemoe, ina ia latou pulea pea mo le malupuipua ona fesoasoani lea o le Matagaluega i lea taimi i lea taimi pe tai tolu pe tai fa asiga i le masina e tasi. A i ai se mea e faafitauli ai ona fesoasoani ai lea.

E faapena foi ona faaola le faisua i nisi nuu o lo o talosaga mai i le tulaga lena. O le tausaga na tea nei na tatala ai le fale e faafailele ma faafofoa ai faisua i le nofoaga o le Matagaluega i Toloa. O lena fale o lo o ua faafofoaina ai faisua ma le faamoemoe ina ia tufaina atu i tua i nuu ma afioaga e faaola ai.

O le faamoemoe o lenei polokalame, e i ai nuu ua latou amataina le polokalame o le Faasao, le faasao lea e pei ona fai atu nei. E o faatasi polokalame ia ina ia mautinoa e le Matagaluega e silafia e le nuu ma latou faatauaina le faasaoina o mea ia ma oloa ia ona faatoa tuu atu lea i ai o se tulaga faapena.

O le taimi lenei ua feoloolo nuu ua i ai le faisua, o nisi nuu e molimau atu e le o lelei le latou tausiga o le faisua; ua latou faaaogaina ma selesele a o nisi nuu o lo o tausia pea ina ia avea ma tamaoaiga e lapopoa ma tele ai se tupe e maua ai.

O le fuafuaga lena a le Matagaluega o le la ua faafofoa nei faisua ina ia toe tuuina atu. O le faamoemoe ia mafai foi ona maua ai se alaga tupe a nuu i le faisua pe afai e lelei le tausiga. O le faamoemoe o le Matagaluega o lo o i ai, a uma ona faafofoa le faisua ona aveatu lea pe tai 500 pe tai 1,000 e fuafua i le malosi o le nuu. E tufa atu i ai ona latou tausia lea pe lua pe tolu tausaga ona toe faatau ai lea i le maketi i fafo. a maua a latou tupe ona toe faatau ai lea e latou a latou tamai faisua mai le Matagaluega ma le Malo ina ia faatupulaia pea le ola o le latou tamaoaiga lea ma le latou atinae. O le faamoemoe lena o lo o i ai mo le agai atu i luma.

O lea faatoa tulai mai le fale e faafofoa ai le faisua, a o tatou faisua o lo o i ai nei sa aumai i fafo i Amerika Samoa, Fiti ma isi atunuu. Peitai o lea lava ua gafatia nei e le Matagaluega ona faasoasoa lena vaega.

O le vaega tolu, o le vaega tau le fagotaina o le tuna i le mea lea o lo o i ai nei vaa fagota. O le vega lea o lea sa...

O le vaega lea o lo o i ai, o lo o ave le faamamafa i vaa fagota i le fagotaina o le tatou gataifale. E tusa o le 6 po o le 7 tausaga talu ai ua le o toe i ai se vaa a fafo o toe fagotaina le tatou gataifale po o ua tuuina i ai se laisene. I totonu lava o le atunuu e le o toe laiseneina se vaa mai fafo i totonu o le tatou gataifale. E pei ona silafia o le tatou ogasami saoloto mo le fagota e aupito sili ona laitiiti i totonu o le Pasefika.

O le faamoemoe lea sa faataatia mai ai ma ua maitauina e le Matagaluega o le faatuputupulaia o le atinae o le faiga faiva e ono tulai mai ai nisi vaega e faapopolegia ai le Matagaluega ma le Malo. O ia mea e pei ona fai atu e laitiiti le ogasami. Ona faavasega lea ma le faamoemoe ina ia aua ne i alu le atinae alu, alu gata. Pe alu alu muta faapea ua le maua ni ia po o ua le manuia foi le fagotaga a tautai.

O le popolega lea o le Matagaluega ma le Malo, ina ia fai fuafua ma faatatau ina ia o gatasi. O lo o taua tele i le malo ma le Matagaluega vaa laiti ia sa amata ai le atinae aua o alia sa amata mai ai a o lea lava ua faasolo ma oo atu i le tulaga o vaa lapopoa. E ala ona manaomia vaa lapopoa i le taimi lenei ona ua le gafatia e alia laiti le mamao lea o lo o maua ai nei le ia. O lona uiga a malaga le alia e uma le penisini fai si ana fagotaga ma toe foi mai e le maua se tupe mama ona ua mamao tele atu le taulaiga o faigafaiva o lo o i ai i le taimi lenei ma maua ai le ia. O le tulaga lea ua amata ona faasolo ina filifili e tagata o le aufai faiva vaa e lapopoa atu ina ia latou gafatia a alu e malaga i le tolu i le fa aso, ona toe taliu mai lea ona sikuea lea ma lava sina faasiliga o tupe e maua mai ia latou faigafaiva.

Ona faataatia lea e le Matagaluega se fuafuaga e tau o se Tuna Fisheries Management Plan. O lea faamoemoe ina ia tausia ai le tamaoaiga o le ia ina ia faaauau pea i le umi e tataua ona maua ai le ia, a ia maua foi e tagata le ia aemaise le vaega lea e pito i lalo se faamanuiaga. O le faamoemoe lea o le Matagaluega lea na amata ai loa ona fai le fuafuaga lea e faavasega ai. O le la ua vaevae ai i vaega, o vaa lapopoa, vaa feoloolo ma vaa tau laiti atu. O vaa laiti latou e le o faatapulaaaina, o lo o tatala pea vaa laiti (alia) e le o i ai se tapulaa; a o vaa lapopoa o lo o i ai le tapulaa. O ia tapulaa ina ia fuafua ai, e le tele tele ni vaa lapopoa aua e tele atu le latou fagotaga pe a fuafua i le tamai vaa laitiiti. Ia tofufusia le tagata ma sina ana faamanuiaga e maua mai ai.

Mo vaa laiti lava latou, e pei ona outou tagai i le Tala Faatatau o le Tupe, o lena ua i ai i totonu o le Tala Faatatau o le Tupe a le Matagaluega le \$50,000 ua faaagaga mo le toe faia o pole fagota ina ia agai pea i ai ma maua pea e vaa laiti le fesoasoani e aunoa ma le tau o mamao tele i tua. Aua o le mea e taula ai pole e le o ni mea mamao tele. E gafatia la ia mo alia ae tuu atu tua e fagotaga ai vaa lapopoa ae ia maua pea foi le fesoasoani mo vaa laiti. O le fuafuaga lena o lo o i ai nei.

Sa aumai nisi o molimau e pei ona i ai ni fesili na aumai e uiga i ia o lo o fagotaina faapea o lo o toe lafoai

e nisi o vaa lapopoa. O lo o fai nei i ai suesuega a le Matagaluega.

E le o i ai se faamaoniga ua tauimaina e le Matagaluega mo lea tulaga a o lo o sailiili e le Matagaluega lea faamoemoe pe faamaonia lea fuafuaga. Afai foi e faamaonia ona agai lea o le Matagaluega e foia lea faafitauli. Aua e le se alagatatau ona foia le tamaoaiga o lo o tau faasoaso. Ona gata mai ai lea o le vaega o Faigafaiva.

Faafetai i lau Afioga i le Fofoga Fetalai.

E pei lava ona taumafai atu i le amataga o lo o taumafai e vaevae atu le tatou galuega nei. A maea ai se faamatalaga ae outou maitau mai e le o faamalieina lo outou finagalo i le tali atu, ona toe agai mai lea o se faamanatu.

Masalo o nisi foi taimi o lo o galo i se tasi o Sui Usufono mo Aana Alofi Nu.1, le Tofa Apulu Pepe Metai, ma te le o faafesagai i le Ofisa, o lea ma te i inei i le Fono a le Palemene. Masalo la e tau galo foi ia te ia i nisi taimi ae ou te faaloalo pea i lou uso a Sui Usufono.

O le a ou agai atu e tali i le faamatalaga e pei ona tau aveatu i le vaega lea o faigafaiva e pei ona taumafai i ai. O la e ua ave le faatonuga i le Matagaluega ina ia fai mai se sailiiliga i le mataupu lea ma le molimau lea e pei ona aumai i le faaletonu o faigafaiva i ia e tiai. E pei lava ona ou fai atu o lea ua fai i ai le galuega a le Matagaluega i le taimi nei. O le mea lea o lo o faatauaina i lenei atinae, o le lelei talafeagai o le ia mo le faatauina atu i fafo, le quality. Aua o le taimi nei e le tutusa uma vaa.

O le faafitauli lea e aliali mai i le lua vaiaso talu ai, ua i ai ni ia ua teena mai i le maketi, ma e le faitau laitiiti le aofai o ia na teena mai. O lea la ua aliali mai e i ai faafitauli ia faapea. O faafitauli foi ia o lo o taumafai i ai le Matagaluega ina ia foia e ala ai ona manaomia le lelei o le vaa, ia lava le vaa ina ia ave le aisa, ia lava le avanoa e teu lelei ai le ia ma le aisa. O lea la ua aliali mai i le taimi nei, e feoloolo ia, e sefulu tane sa teena mai i le maketi talu ai nei. O lo o fai foi la i ai le galuega a le Matagaluega ia i latou o lo o fitoitonu i ai ma mataituina po o fea tonu vaa ia o lo o agai mai i ai ae po o le a tonu le faalavelave. O la ua aumai le faamatalaga, o vaa ia e le lava le latou avanoa mo le aisa, mo le space, ae umi le taimi e alu ai le latou vaa. Sa tatau ona vave ona toe foi mai aua e le lava le latou aisa. O lea foi la na tauave e le maketi latou a o lea la ua ave ma mea e faafitauli ai, aua o faafitauli la ia a o lo o ina tupu mai ona faaleagaina ai lea o le maketi atoa, o lea e taumafai ina ia faaleleia mo tagata uma. A tulai mai ia faafitauli ia ona o o atu ai lea i se tulaga faigata.

O tatou laisene e pei lava ona fai atu, so o se mea lava ua sui le olaga. Ua tatau foi ona tatou agai i le suiga ma le manao, ua sui foi le manao. E pei ona i ai nisi finagalo, o le mea lea ua i ai nei e pei ona i ai le Tulafono o Faigafaiva o le 1988 lea sa i ai nei, o lo o i ai teuteuga faapena. I le 1997, i le tausaga e tasi toetiiti lava o o atu i le 50 le aumaliliu i faigafaiva. O se fuainumera tele tele lea pe a fuafua i le tausaga e tasi. O le mea foi la lenei na ala ai ona faatauaina tele e le Matagaluega, ina ia faamalosia le Tulafono o Faigafaiva.

Muamua, ia faamalosia le telesi o le vaa. O lona lua, ia lelei ma lava le silafia e le tagata o lo o faatautaia le vaa. E pei lava o le mea foi lea o lo o ola nei, a faapea ona faalagolago lea i lona malosia ma lona atamai masani ae le talanoa i se isi ma le tau. Aua a tupu ifo le faalavelave, e le mafai lava ona nofonono le atunuu ma le Matagaluega ma le Malo, e saili lava se fesoasoani e ave i ai po o fea lava e tupu mai ai. O lona uiga, e le o le vaa, e taugata foi le vaa o le malo e ave, e sue mai. Pe afai foi e sou lenei taimi, o ola foi ma soifua o isi tagata ia e o e sue mai isi foi tagata. O le tulaga la lea o lea ua faatulafonoina ai ina ia lava le tomai e aaoaina lelei, e tatau ona latou silafia le mea e tatau ona fai i le taimi e tupu ai faalavelave. O le mea lea e ala ai ona manaomia e le Tulafono laisene ia faatulafonoina le security o vaa. O le isi faatoa manatua lava le leitio pe a fetaii ma puapuaga i luga o le sami, a ua leai se mea e mafai e le mafai ona toe fesoatai mai ona aliali mai loa lea o sisi faafitauli tatou te le mananao e tupu. O le mea lea e ala ai ona taumafai atu e faamalosia laisene ina ia ogatasi le faamoemoe i le naunau ia maua le ia ae ia faapena foi ona manuia le soifua o lo o tauaveina.

Ona ou o o mai lea i le vaega e sosoo ai, o le vaega lea e puipua oloa e lau mai i totonu ma oloa e lau atu i fafo ma fefaatauaiga po o le quarantine. I le taimi nei, tasi lea vaega o le Matagaluega o lo lo ave i ai le faamuamua ona o lo o tulai mai le tele o le manao ina ia faamalieina. O le manao o fua o faaeleleaga e aveina atu i fafo. Afai e ave i fafo, e i ai manao o maketi i fafo e tatau ona faamalieina e tatou.

O le tele la o ia manao, e le mafai ona faamalieina i le tatou malosia o lo o i ai nei. A faapea mai Niu Sila e tatau ona fana i le mea lea o le vailaau lea, e tatau ona fana ai i le lua i le tolu itula, e le o lava le malosia o tatou e fai ai i le taimi nei. O le mea la lea o lea ua i ai nei le tatou polokalame faapitoa e faamalosia ai. Ua aumai le fesoasoani i le Malo o Ausetalia ma o lea ua faatino nei, ia faamalosia le vaega lea o le Quarantine. E le gata ina aaoaina le afaigaluega ina ia lava le tomai e auina atu i fafo e aoga ai i Ausetalia ma nofoaga e fai ai, ae faapena foi ona faatauina mai nisi mea e faamalosia ai le tatou vaega o le Quarantine.

O le isi la faamalosiaga lea o lo o faamoemoe i ai e pei ona ou talai atu i le amataga, o le masini lea e togafitia ai laau e aveina atu i fafo. A maua mai le faamoemoe lea ona tele lea o se avanoa e auina atu ai nisi o oloa e pei o esi ma mago e ave mata aua o le puipuiga lava a maketi i fafo, ua uma ona faavasega uma mai. E le tatau ona aumaia pe afai e faapea le pula, e le tatau ona aumaia pe a faapea e maua ai le manu lea, se i vagana ua fai le togafitiga lea. O le mea la lea e ui ina anoanoai a tatou oloa ma fua o faatoaga o lo o pala i le atunuu, e le mafai ona matou faia se mea e aunoa ma le faamalieina o le maketi lea tatou te o e faamalie. O lona uiga, e tatau ona fai muamua auala e fai ai.

O auala sa manaomia mai e Niu Sila, ia faamalie mea ia e ala i suesuega. E fitu tausaga o faia e le Matagaluega suesuega i le olaga o le luga latou te aia. O le a le malosia o le vela e tape ai? O mea uma ia, o galuega ia sa fai e le mafai ona silafia lautele e le atunuu a o lo o faataunuu

mai. O lea ua maea ma o lea ua nofo sauni ma ua lava le taimi e faatino ai le togafitiga lea. O lea la ua i ai nei le vaegatupe e pei ona i ai le finagalo o le Malo ua faataatia mai e faatino ai lea faamoemoe.

Ia talosia ia i totonu lava o lenei tausaga faaletupe e faatino uma ai lenei faamoemoe ma fai ma auala e aveatu ai nisi o tatou fua o faatoaga i fafo.

O le isi vaega o le Matagaluega, o le vaega lea o le Vaaitau. O lenei e pei ona outou silafia, o le....

Faafetai i lau Afioga i le Fofoga Fetalai.

I le faauilavea agai i le atinae lenei o faigafaiva e pei ona faafesili mai. O le taimi nei e pei ona ou faamatala atu o lo o fai le galuega agai i isi oloa ia e i ai le faisua ma le tilapia. Ua i ai ma isi oloa e lua o lo o agai i ai ae le i amataina se galuega i le vaega lea e i ai tuna ma ula. A o mea uma ia o lo o i ai i totonu o le faamoemoe o le Matagaluega e agai i ai, ae o lo o ua faagasolo. E le mafai ona aveia atoa uma e le Matagaluega aua o le mea muamua e le lava le tupe, lua e le lava tagata, tolu e le lava le taimi. O lea matou te galulue faasolosolo atu e tali muamua mana'o ia, ae taua le mea e laga mai. O lea o le a taumafai po o le a se finagalo o le Sui Usufono mamalu ae o le a taumafai e tau faamuamua ae i luga le manaomia mo le tuna ma le ula pe afai o le tulaga lea o lo o naunau mai ai. E faamalulu atu, e le i faia se galeuga i ai i le tuna i le taimi nei ae i ai faamaumauga ua i ai, e i ai faamatalaga o lo o taatia e mafai ona amata ai galuega agai i lea vaega.

O le tatou aufaigaluega, o le toatele o i latou o lo o loteina nei le vaega lea, ua uma ona aoaoina. O isi e i ia avanoa i atunuu i fafo, e i ai Taiwan ma Saina i le poto faapitoa i mea ia. O lo o faasolo pea lo latou malamalama ae se i tau fai muamua se isi mea ia uma ona fai ai loa lea o se isi mea. O le agaga lenei i le taimi nei.

O le vaega mulimuli o le a sosoo ai, o le vaega lea o le Vaaitau. O le manatu lava latou o le Matagaluega, o fale o lo o faatino ai nei le tatou galuega i le Ofisa o le Vaaitau, ua leva ona faaleagaina e le afa, ma o lo o taumafai le Matagaluega e fai le mea e gata mai ai le mafai e vaai le tau ma outou faafofoga i ai i lea aso ma lea aso e le aunoa i le mafai o lo o i ai. A o le masini o lo o i ai nei i totonu ma le atamai o lo o ua i ai, ua gafatia lava le faasoasoina mai ma le tuuina mai o le tau mo nei ma taeao ma talaatu taeao. O le vaega lenei.

Ona ou soso mai ai lea e taumafai e tali faapitoa i nisi o finagalo sa faaalua. O le mataupu lea i le seleni e pei ona tuuina mai, e \$1.5 miliona e pei ona faaagaaga i lalo o le Matagaluega mo tatou fesoasoani i le tau o le popo. Ou te faamalamalama atu e pei ona aveatu i lalo o le saunoaga a le Afioga i le Minisita o Tupe, o le faamoemoe o lo o i ai nei, ua uma ona tofia se Komiti Faapitoa. O le Komiti Faapitoa, o le Afioga i le Failautusi o Tupe, o le Failautusi o Fefaatauaiga ma le Faatonusili o le Matagaluega o Faatoaga. O i latou ia e toatolu, e le toatele, latou te faafoea ma faataatia mai aiaiga e fai ai. O le faamoemoe sa i ai, ina ia se i silamio pea ma faafofoga i sausaunoaga i le Maota nei i lenei vaiaso e aumai ai finagalo e fatu ai le faamoemoe lea ina ia maua pea ma sasaa mai le fafao i o outou finagalo. O

lea ua maua i le vaiaso atoa lenei. E pei ona aumai nisi finagalo, e lelei le faaponesi. O isi finagalo e ave sao le tupe e fesoasoani ia i latou pe a faatau le popo. O mea uma la ia, o lea o le a agai atu i ai, ua faatasi ona latou fonofono. A faapea e maea le latou polokalame i se taimi vave ona aumai lea o se fuafuaga ona faagaioi ai lea. Ae ou te faapenei atu, o le faamuamua lava latou mo le tau o le popo, e le aveia i se isi mea. O le fuafuaga la lenei. Ona pau lava le aiaiga ona e i ai popolega i le vafealoai ma isi faalapotopotoga ina ne i maitau mai ua tatou toe see i tua i isi mea sa tatou taumafai e o ese mai ai e pei o subsidies ma mea faapena. O le agaga la lenei ina ia tatou aloalofaga mai vaega na, a ia palasi pea le faamanuiaga mo i latou e faatau le popo.

Ou te tatou atu, ia lavapapale mai ma tatou onosai i le Komiti lea latou te faatinoina ona faamalamalama atu lea i se auala faigofie ma vave i le mamalu o le atunuu le vaegatupe lea. O le mea taua ua i ai le finagalo o le Malo e fesoasoani i le faaleleia o le tau o le popo.

Faafetai i lau Afioga i le Fofoga Fetalai. O lea ua manino atoatoa le faamoemoe e pei ona i ai le vaegatupe lea ma le galuega a le Komiti. Ae taatia maia lou tou faatuatua ma a outou fautuaga e pei ona tuuina mai nei e aoga foi e faapoopo i sailiga manatu o i latou ua tuu atu i ai. O se taimi vave lava ona faailoa mai lea i le paia o le Maota nei faapena foi le atunuu.

O nai mea laiti ia sa fesiligia e nisi o Sui Usufono. O le vaega lea e pei ona saunoa i ai le Afioga i le Sui Usufono mo Satupaitea, o le mataupu lea tau i le maketi. O lea lava o lo o lagona e le Matagaluega ma le Malo le faatauina o le maketiina o le popo ma le koko ona o lo o malamalama lelei foi i le tulaga o faafitauli ia o lo o aliali mai i le taimi nei, i le tau o le popo o lo o i ai, ma fale o lo o ave i ai e faatau i ai le popo, ma faafitauli o lo o aliali mai ai. E faapena foi la i le koko. E le o atoatoa se tupe maua a i latou e maua mai i le koko pe a faatau atu i nisi o vaega o lo o faatau atu i ai, e faapena foi i le ava.

Ou te faapenei atu i le taimi nei, o le tele o faafitauli o vaega ia, ona muamua e pei ona outou silafia o le tau o le laau mai fafo. Ona sosoo mai ai lea ma i latou o gafa po o lo o matuu atu i ai le faamoemoe. E pei lava ona aveatu i le amataga, sa faamoemoe atu i tagata i private sector latou te faatauaia le maketi i le faiga o le maketi ona sa faitiopia foi le Malo muamua i le soona loteina e i latou o mea ia. O lea foi la na tuu atu ai i tua le maketi saoloto i tagata lava taitoatasi ma le au faipisinisi latou te faaolaolaina.

E pei lava o so o se faiva e le asa lava ma ni faaletonu ma ni maumau e maua ai. O lea foi la ua tatou iloa lelei ma maitauina, aemaise foi le Matagaluega nei, o lo o i ai foi faafitauli o lo o aliali mai ai ma e tataua ona agai i ai le Matagaluega i se auala e faafoia ai nisi o faafitauli ua aliali mai.

O le mea ou te faamalamalama atu o le maketi ma le fefaatauaiga e le o i le Matagaluega nei. E ese le Matagaluega o lo o i ai. Ou te manatu o le a tali foi le Afioga i le Minisita o Fefaatauaiga ma Alamanuia i lea vaega. Ae le mafai ona aveesea ai i le Matagaluega nei le faatauina o le maketiina o laau nei. E pei foi ona

malie foi i saunoaga, o nisi ia o faamoemoega ma poutu o le tamaoiga o lo o faalagolago i ai le toatele o tagata.

Ia aumaia lo outou faatuatuaga i nisi o auala o le a fesooteai ai i se fesooteaiga lelei ma le Afioga i le Minisita o Fefaatauaiga i nisi o auala e fai ai le faamoemoe lea e pei ona taatia mai nei le faafitauli e pei ona aliali mai, ona toe logo ai lea o le Maota.

Ae pei ona ou faamalamalama atu, o lea ua malamalama le Matagaluega nei ma le Kapeneta i nisi o faafitauli o lo o aliali mai i nisi o o tatou laau ia. O le a lava nisi o auala lelei o le a mafai ona fai i ai o lea o le a agai i ai i tatou nei e fesoasoani ai ina ia faaleleia.

Sa laga nisi o manatu i nisi o aoaoga i tua i Itumalo. Ou te faapea atu i le mamalu o le Maota i lenei aso, o le vaega lea a le Matagaluega o lo o faatauaina pea. O lo o faatauaina pea le faamaopoopoina o le logologo atu; lea foi sa laga mai e nisi o Sui Usufono. Matou te taumafai ina ia tau atu i o tatou tagata i so o se laau ua oo i ai lo latou malamalama. Ma o ia logologo atu, e tele a ina fai e tagata. O lena tulaga o lo o faatau ai le aufaigaluega a le Malo.

Sa laga mai foi faapea ua faaitiitia vaegatupe mo le vaega lea a le Matagaluega. Ou te taua manino atu, ua faateleina le vaega lea o vaegatupe o lo o i ai i totonu o le Matagaluega mo i latou ia, le vaega lea o lo o faia le fautua, advisory and extension. A tagai i ai o lo o i ai faasiliga o tupe a le vaega lena mai le tausaga talu ai i le tausaga lenei.

O lona uiga la, o lo o ave pea le faatauaina i lea vaega aua ua toe faateleina tagata. O lo o i ai le naunauga ina ia faaatoa pea le aufaigaluega sa latou faia. O nisi o faafitau sa saunoa ai nisi, o le faafitauli i le ponesi i aso ua mavae, ou te le toe fia asa lea vaega. Ua uma ona tele i ai faamatalaga ma saunoaga, ou te le manatu e toe fia asa lea vaega. Ua uma foi ona saunoa atu le Afioga i le Minisita o Tupe ma faamalamalama nisi o tulaga sa aumai ma molimoli mai e nisi o Sui Usufono. Ona ou faaiu atu lea e faapea. E i ai le mataupu sa laga mai i le laau o le tolo.

E faafetai atu mo le faauilavea. O lea ou te talanoa atu i mea sa laga mai i le Tala o le Tupe, o lea ou te aveatu tonu ai faamatalaga i le mea fai mai sa laitiiti ae e leai o lea e tele. O le faamalamalamaga lena i lea vaega.

E taua le saunoaga i totogi. E pei ona ou fai atu o totogi e le faapitoaugafa se faaletonu i lea vaega, o lo o faapena lava ona laugatasia uma le aufaigaluega i lea vaega. E le o se faafitauli tupito, ae e taua le galuega mo i latou o lo o faia le fautua i tua i le aufaifaatoaga.

O laau ia sa aumai i nisi o saunoaga, e pei lava ona silafia le lava o le tolo sa fai muamua foi. E le o se mea fou i le atunuu. E tele lava le gaogaosa e le mafai ona ou faia se faamatalaga e auiliili atu ai le gaogaosa e feagai ma ia laau. O le mea moni lava, e le o se laau talafeagai lea ma lo tatou atunuu i le taimi nei atonu e i ai se isi taimi.

O le mea muamua, e le taitai ona lava se fanua e faatino ai e vili ai se tolo ina ia lava mo le tamaoiga. O lona lua, o le tau. E pei ona silafia, o le tolo e manomia le la umi; ae e le maua se piliota la umi faapena ia tatou e loka ai le suka i totonu o le laau. Ae o le a tilotilo i isi

laau po o a nisi laau e pei ona malie i le saunoaga a le Sui Usufono mo Vaimauga Sisifo e mafai ona atinae. O lo o i ai uma laau na i totonu o taumafaiga a le Matagaluega.

Lau Afioga i le Fofoga Fetalai, afai ua pau ia te au se isi mea e faamalulu atu i Sui Usufono mamalu o le Maota. O le taumafai lava e faamalamalama atu. Ua umi se faamatalaga ona o lou naunau o lea o le a faagasolo galuega o le lima tausaga, e tataua ona malamalama ma silafia mea o le a agai i ai faiga faavae a le Matagaluega ma le Malo mo lenei lima tausaga, a o lea o le a ou taumafai atu i le mea e gata ai le mafai e le Matagaluega ma le Malo. O le ala umi lea o se faamatalaga, e faamalulu atu foi pe afai ua umi se faamatalaga.

E faamalulu atu foi lau Afioga i le Fofoga Fetalai. Ia faapena foi ona faamanuia le Atua i le faafofogaaga a lou Itumalo. Ia fesoasoani atu i so o se itu ma so o se vaega aemaise o tagata soifua ma le mamalu o lou Itumalo o lo o faafofoga mai. Le tapuaiga mamalu a Samoa aemaise foi ia faamanuia le Atua i le afifio o Ulu o Matagaluega ma Faalapotopotoga o lo o tatou mafuta pea i lenei vaitau ma ave i ai le faamuamua. Ia fesoasoani mai le Atua i le faamoemoe...

Faafetai tele i le Maota le lagolago ma finagalo e pei ona sasaa mai. Ia faamanuia foi le Atua i le tapuaiga mamalu a Samoa le faafofoga mai a le atunuu.

Ia faamanuia foi le Atua i le alo atu i le galuega ma le alo atu a tama fanau a lo tatou atunuu le Manu Samoa i le latou taaloga i le Aso Toonai. Ia manuia la outou taaloga i le Aso Toonai, ia fesoasoani atu le Atua. Faafetai i lau Afioga i le Fofoga Fetalai mo le avanoa. Soifua.

### **Afioga VAGANA PELEIUPU TAMATE**



#### **Itumalo Faaalalafaga:**

*Gagaifomauga Nu.3*

#### **Filifilia:**

*12 Mati 2001*

#### **Faatauto:**

*15 Mati 2001*

#### **Lauga Faataupou:**

*19 Iuni 2001*

Faafetai tele i lau Afioga i le Fofoga Fetalai mo le avanoa ua tuuina mai mo lou Sui Usufono ou te tulai atu ai i luma o le mamalu o lenei Palemene. E ui ina ua tuneva le aso ae le faatauvaa i lou manatu le alofa silisiliese o le Atua soifua ua tuao ai le Fonotaga a le Palemene i lenei vaega o le aso.

Ua maea ona fana le u i le lagi aua lo tatou vatapuia ma le Atua Siliisiliese o lo o faavae ai le Malo o Samoa, e pei ona avea ai lau Afioga i le Fofoga Fetalai ma ositaulaga i lenei Maota i le taeao ua sola.

Ua e fofogaina le faafetai i le Atua ona o Lana taitaiga saogalemu i le soifua o le Maota ma lou nei ola. Ua e fofogaina foi le faatoesega po o le faasifoga a le Palemene ma ua molimolioo foi o tatou manaoga. Ia togi ia pa tau i le ave ae faafofoga le Tapaau i le lagi i o

tatou manaoga lafovale, ia faaifo mai manu aua le faamoemoe o le atunuu ma lona Malo Tutoatasi. A aouliuli se ituaso aveatu se manatu o le Sui Usufono mo Gagaifomauga Nu.3 i le Tulafono Tau Faaofi o le Faatatauina o le Tupe ua faataoto nei i le Laulau a Fono.

E muamua ona ou ta le tavai ma too ma ou faatulou le paia o le Maota. Tulouna ia le afio o lau Afioga i le Palemia, lau Susuga Tuilaepa Sailele Malielegaoi. Afifio alii ma tamaitai Minisita o le Kapeneta. Tulouna foi lau Afioga i le Taitai o le Itu Agai, lau Afioga i le Fofoga Fetalai ma Sui Usufono o le Palemene, ae a le tapuai faafogafoga i Faauluuluga o Matagaluega Tumaoti a le Malo, sui o Faalapotopotoga Tumaoti a le Malo. Le tapuaiga i Faauluuluga o Matagaluega eseese, kamupani ma le aufaipisinisi, aemaise o tatou uso a malo mai fafo o lo o galulue faava o malo i totonu o Samoa. E le faagaloina i le mafaufau le tapuaiga i le aufueloloa o le atunuu o lo o tapuai faafogafoga mai i maota ma tupua tausi o le atunuu. Tapuaiga i Le Ao Mamalu o le Malo le Susuga i le Malietoa, e te afio i lou nofoa vaevaeloloa lou tala na atoa ma lou fala folaloe e faafogafoga ia te oe Samoa.

Tulouna le tapuaiga i le Sui o le Fono a Sui Tofia, le tapuaiga i le Afioga i le Faamasino Sili ma le Matagaluega o Faamasinoga. Le paia lava lea i Aiga o Tupu ma Aiga o Nofo ma Aiga o Papa aemaise o Tupu ma Tafaifa. O le mamalu lava lea ia Tumua ma Pule, Ituau ma Alataua Aiga i le Tai ma le Vaa o Fonoti.

O taitai o Ekalesia e fia ma le Aufaigaluega Paia a le Atua o lo o faatai timu i afioaga ma alaalfaga ma nonomanu aua Samoa ma lona Malo tau atinae. Ae a le malo o tatou uso i Samoa i Sasae le Afioga i le Kovana Sili ma le Lutena Kovana, le Peresetene o le Senate ma Maota e lua le Fofoga Fetalai; o le maualuga lava lea ia Sua ma le Vaifanua, Fofu ma Aitulagi, Saole ma Saleaamua ma le Launiu na Saelua. Le Faleagafulu, Tama a le Manuatele ma Tootoo o le Faleula ma le Laaunaamotasi. O paia sauoo ia o Samoa mai sau se i paia fili ma puletuu na valoia ai manu o Malo.

Ona afe atu lea o sau faamatalaga i lou itumalo o Gagaifomauga Nu.3 na latou aumaia au i totonu o le Maota o Samoa. O paia i aiga e lua ia Sa Tupua ma Sa Malietoa, le afio o lau Afioga i le Matua Leasi ma lo outou Aiga Sa Leasi ma lo outou Vaa Fetalai. Afifio Togoiu ma Polataivao ma Usoalii, alaatalai le mamalu ia te oe le Faletolu. E le maeaina i lou mafaufau le Aiga o Mavaega, le afio o lau Afioga i le Matua Eetau ma le Ati Eetau, Tauaanae ma Matofai ma le suafa o le Faaulusau, le Falelima o le Saeseese ma lau Fetalaiiga Filoitumua. Ae a o le tapuaiga i le itupa faimea mafai, faletua ma tausi ma tamaitai ma le malosi o le itumalo.

E maualuga ai i lou mafaufau le tapuaiga i le nofo a faafeagaiga i le afua atu i Malaetele se i paia Falefu ma Masinaafiafi. Malo tapuai. Faafetai i lo outou faaeaea i lou tagata faatauvaa na outou tuu maia ai la outou tofa faatupu ma le moe saili i le Atua le tofi o le tatou itumalo. E le o se tofi na ou finauina; po o se tofi na ou faatauina; pe faatosinaina pei ona masani ai. E leai o le tofi na tuumalu mai, o la outou tofa faatupu ma la outou faautautaga faa Faleupolu. Faafetai i la ouotu puleto.

E le faagaloina i lou mafaufau lau Afioga Polataivao Fosi sa e saofai i le Nofoa o lo tatou itumalo i le 36 tausaga ua tuanai. E le o se taimi laitiiti lea taimi. E aveatu ai lau faamalo ma lau faafetai. Faafetai i lau tautua itumalo ma lau tautua Malo. E le o po se lilo i le Palemia ma le Faigamalo, e le o sou augata po o sou musua, ona ua afaina lou soifua maloloina ona o ni faalavelave e le i ma silafia ma fuafuaina. Ia alofa ia le Atua faafoi sou soifua laulelei. E ui ina e le galue i le Maota o Samoa a o lo o e tatalo pea e leai se leo i le Atua ina ia faaifo mai manu aua sailiga manuia o le Maota o Samoa.

Ia tapuai maia lou itumalo, fai so tatou sao ia Manuvao aua le Tulafono Tau Faaofi o le Faatatauina o Tupe ua taoto nei i le Maota.

E momoli lau faafetai ma lau faamalo i lau Afioga i le Palemia talu ai ona ua ou vaavaai i le Tala Faatatau Autu o le Tupe po o le Saunoaga faaMinisita o Tupe a le Minisita o Tupe, o lo o taua mai ai le 18 tausaga o e tauaaina le Minisita o Tupe a le Malo o Samoa. E le o se taimi ititiiti lea taimi o le 18 tausaga o e tauaveina tupe a le Malo o Samoa.

A o ou nofonofo mai i tua ma ou faalogologo mai i taualumaga o Fonotaga a le Maota o le Palemene, sa tuufesili lou mafaufau; pe aisea lava ua saga tuu ai pea lenei tamalii o le atunuu i lenei tofi o le Minisita o Tupe, aemaise ina ua taunuu mai i le taimi na tuua ai e le Afioga i le Tootoalii le Malo, o Le sa tu i le foe o le sa o Samoa i le 13 tausaga ua tuanai. Ona suia lea o tofi ua tauaveina e lau Susuga Tuilaepa Sailele Malielegaoi le tofi Palemia o le Malo o Samoa. Sa manatu se vaega o le atunuu, ai o le a tuuese ma ou aao le Minisita o Tupe. Peitai, e le i mafai ona aveeseina le tofi Minisita mai lau Afioga.

Sa e nofo i le Nofoa o le Palemia faatasi ai ma lou umia o le tofi Minisita o Tupe a le Malo. Sa tuumumusu le atunuu sa taia i le faalogo pe asiea lava ua saga taofiofi mau ai e le Afioga i le Palemia le tofi Minisita o Tupe a o lo o toatele le au agavaa ma le au popoto latou te iloa foi e latou tausi tupe a le atunuu.

Sa i ai nisi fafatala faapea sa maua i le faalogo, e le mafai ona tofia e Tuilaepa Sailele Malielegaoi se Minisita o Tupe. Aisea? O upu e aveatu i le agaga mama. O upu sa maua i le faalogo, e le mafai e Tuilaepa ona tuuese le tofi Minisita leaga ai e tele se vaegatupe a le atunuu o lo o pupula i ai ma ona faaogaina faalilolilo. O lagona ia ma iuleo sa maua i le faalogo. E le o le atunuu atoa a o se vaega o le atunuu, sa tau avaga ai foi lou mafaufau i ia faaupuga.

Peitai ua oo nei ina ua tulai le Malo fou ma ua ae le tofa i lau Afioga i le Palemia ua e tofia aloaia le Minisita o Tupe, le Afioga i le Laau na Fausia o le Sui Usufono mo le itumalo o Falelatai ma Samatau o le Aiga Tauaana.

Ua oo nei ina ua faatulai mai le Tala o le Tupe le Saunoaga faaMinisita ma ua vaavaai i ai ma le loto faafetai ma ua le talitonuina ai le gagana ma iuleo sa maua i le faalogo i fatia ua mavae. E le moni ia tuuaiga ma ia mafaufauga. E aveatu ai le faafetai ma le faamalo i lau Afioga i le Palemia. O le faasoa sa faasoa ma le alofa, sa faasoa ma le faaeteete, faasoa ma le manumanu,

faasoa foi ma le alofa ia Samoa. Ua suia nei togi o aau ua lafo atu le avega i lau Afioga i le Laau na Fausia, ou te manatu o se tofiga ua tatau. Ou te manatu ua filifilia oe e le Atua e auala mai i le Afioga i le Palemia e te tausii tupe a le Malo o Samoa.

Ua ou vaavaai totoa i le faasoaina o le tupe i matata eseese a le Malo, ae ua le faapito manu ia tasi. Ua faatutusa lelei lau faasoa i le fanau e toa 7 pe toa 11. O lea ou te malamalama e i ai nisi o Matagaluega o lo o latou moomia le faaopoopoina o ni vaegatupe mo tupe faaalu mo galuega fia faaleleia a le atunuu. O le naunau lava ina ia faaleleia atili le auaunaga i manaoga o le atunuu. Ou te manatu, a tele se tupe e umia i ou aao e fai ai lau faasoa o le a i ai foi le soonafai; ae a utiuti lau faasoa i se tupe laitiiti, e faasoa ma le faaeteete aua foi ne i uma e le i maea ona tapena le mea o lo o manaomia.

O le mea lea e momoli ai lau faafetai ma lau faamalo i le faasoa lufilufi lima lelei o lau Afioga i le Minisita o Tupe. Ua le gata i le 2001 a o le 2002. E momoli ai lau faafetai ma lau faamalo. Ou te faapea atu ai, ua matua talia atoatoa e le Sui Usufono mo Gagaifomauga Nu.3 le Tala Faatatau Autu o le Tupe ua i luga nei o le Laulau a Fono. Tau ina ia alofagia e le Atua, ia ulimasao lau faautautaga ma lau tofa loloto e faafoe ai tupe o le Malo o le atunuu.

Ona toe liliu loa lea o lau faamatalaga agai i le taimi ua tuanai, i le masina o Fepuari a o lumanai ai le Faiga Palota Lautele a le atunuu, sa vaaia le vevesi o le atunuu aemaise le laueleele i Tiafau nei i le tapenaina o le Faiga Palota Lautele mo le filifilia o Sui Usufono mo le Maota o le Palemene.

O se vaaigna sa vaai i ai ma le loto faanoanoa ma le le maotonu; pe ua mafua i se a ia faiga ona ua o atu Sui Tauva o isi itumalo ua lau mai le au 21 tausaga o tama ma teine ua aulia le 21 tausaga, ua lau mai e fai Id ma tuu o latou suafa i le Lola Palota i le itumalo o le Sui Tauva lea, ae le o ni tagata e nonofo mau ai i lona itumalo. O se vaaiga faamomoloto ma le talafeagai tu ma aganuu mamalu a Samoa, ma o ni faiga foi e ono aafia ai le nofo lelei ma le nofo fealofani pe a mafaufau loloto i ai ma vaavaai i ai. Tuu atu ai i tafatafa o lau Afioga i le Fofoga Fetalai, ina ia toe faia se Tulafono e teuteu ai le Faiga Palota ina ia taofi ai lea faiga le manuia ma le le matagofie i le vaavaai.

O lona lua, e le mafai ona ou alo i le ata o le laau leaga o le vaega o lo o aafia ai au ma lou itumalo. Ua le o se mea e talafeagai ma tu ma aganuu mamalu o Samoa se tamalii ma se failauga e tea ma se nuu ae avea ma Sui Tauva o le Nofoa o le itumalo i le Maota o le Palemene.

Ua ou tautala i ai ona o lo o aafia ai au, e aafia ai lou Sui Usufono. A ou tea ma lou nuu, ua ou tea ma lou itumalo; a silafia e le atunu ua ou tea ma lou itumalo e le aloaia foi au e le atunuu. Po o au o se matai taualoa i lou nuu ma lou itumalo e le toe amanaia au e le atunuu. Ona ou tatalo ai lea ma le agaga faamaualalo i lau Afioga i le Fofoga Fetalai, pe a fa le taula a ia toe faia se tulafono e taofia ai le toe faaavanoaina o se matai e tea ma le nuu ae avea ma sui tauva o le nofoa o le Palemene. E tele ni ona mafuaaga e le talafeagai ai pe a auiliili. E fai o le tea ma osiganuu, le nofo i le nuu, le faaogaina e le itumalo,

ia ae o le a aveatu nei i ai le Sui Usufono manaoga o le itumalo, ua na o le nofonofo o le itumalo nofonofo au ma le tofi Sui Usufono i inei e aoga lava na o au ma lou aiga.

Ua alagatau ai ona faia se tulafono e taofia ai le toe faaavanoa o se matai e tea ma le nuu, e toe avea ma sui tauva i le nofoa o le Palemene. O lona tolu, i le tausaga e 1990 na fesiligai ai e le Malo se finagalo o le atunuu po o ua alagatau ona palota le teine ma le tama ua ausia le 21 tausaga e auala lea i le pelepesite.

O le tali na maua mai i le atunuu, fulisia finagalo o le atunuu ia faaavanoa tama ma le teine ua ausia le 21 tausaga e auai i le palota mo le filifilia o le Sui Usufono mo itumalo taitasi. E faamalulu atu i le Sui Usufono o le Palota Taitoatasi ona e le loto leaga le faaaliga pe eleelea. A tuu mai e i ai le puipuiga i le 21 tausaga o tagatanuu moni o Samoa ua ausia le 21 tausaga ua avanoa e palotaina le Sui Usufono mo le itumalo, ao o lo o i ai le puipuiga e faapea e le talia ona avea ma sui tauva o le nofoa o le Palemene ona e le umia se suafa matai.

I lou lagona toatasi, o se tulafono ua matua sao ma ua matua tatau. A tuu loa i le palota taitoatasi lau Afioga i le Fofoga Fetalai ma le mamalu o le Palemene, ua i ai i ina le feteenaiga ona ua le faaavanoaina le 21 tausaga a le Samoa auliuli e palota i le sui tauva i le nofoa o le Palemene ona o le leai o se suafa matai, ae avanoa Sui Usufono o le Palota Taitoatasi e saofafai i le nofoa o le Palemene ae latou te le o umia ni suafa matai.

E faamalulu atu i le Sui Usufono o le Palota Taitoatasi e le eleelea le faaaliga. O lo o ou tautala i le lagona o lo o ou talitonuina i lou mafaufau. Pe a na fai o au e i ai sou faaiu papalagi, ou te lagona lou le fiafia i lenei mea o lo o tupu pea. Ua 39 tausaga talu ona tutoatasi le Malo o Samoa, ao le a saga tusitusilima i nei o tatou uso ma eueu o tagata ese. Ou te le fiafia au pe a na i ai sou faaiu palagi, ou te le toe fia auai i se palota taitoatasi ou te fia Samoa auliuli.

Ae ia manatua foi lenei mea lau Afioga i le Fofoga Fetalai ma le mamalu o le Maota, ua usu gafa nai nei o tatou uso i augafaapae o tamalii o le atunuu, ua usu gafa i tamaitai o Samoa, ua maua ai o latou suli. Atonu e faigofie ona saili ai i ina ni o latou suafa matai e tauva ai i le Nofoa o le Palemene. E le gata foi i lea o o tatou uso nei ua latou umia saoloto ni eleele po o ni fanua o lo o nonofo ai, ua nonofo lava o latou o tagata Samoa moni. Ona i ai lea o lou lagona o le Sui Usufono, pe le i alagatau ona soloia loa o lea faaupuga o le Palota Taitoatasi, ae fai ni o latou suafa matai i aiga ua usu gafa i ai ona tauva ai lea i le nofoa o le Maota o Samoa.

O se tasi itu, i le tausaga e 1945 na ola ai le taua lona lua o le lalolagi, na maliliu ai nisi o tuua o o tatou uso nei. E lei sii o latou aao e o e tau i ni fitafita po o Amerika, Peretania po o Niu Sila. Leai na o lava e tau o tama fanau a Samoa a maliliu ai e maliliu lava o fanau a Samoa. O se tasi lea o itu ou te faaaliga atu e faamallosia ai lou manatu ma lau mau. O se mea ua le talafeagai le tatou tusitusilima pea i nei o tatou uso, ao latou nonofo ma le latou talitonuga o i latou o tagata Samoa moni. Ou te talitonu foi e le o i ai se latou mafaufau ma se

faamoemoe o se isi e toe foi e saili se nuu na tupuga mai ai ona tuua po o ona matua; leai ua nonofo lava iinei o Samoa moni. A oo mai le valaau a le Atua i le maliu ma le oti vaeatu le lagi ma le usugafono o lou gutu ma le afi, e feoti lava i Samoa; tautua ma le faamaoni o Samoa moni. O vaega ia e aveatu i tafatafa o lau Afioga i le Fofoga Fetalai.

O le vaega mulimuli o lau lauga e ui lava ina ou lagona e le faigofie, afai o se tulafono ua tamau i le tofa i le Malota o le Palemene, ao ai se Sui Usufono e taumafai e soloia ma faaleaoga, e taua lena tagata o le faasiliaupule po o le gaupule ia po o le faamaualuga foi. Ae na o le pau o le lagona e le mafai ona tuua i tua.

O le igoa o le vaega faaupufai o le HRPP, o le Vaega e Puipuia Aia Tatau a Tagata. Ou te tautala agai i le aia tatau. Faamalulu atu i lau Afioga i le Palemia, le aiga Kapeneta ma le Palemene. O le aia tatau lenei ua manunu ai le toau i le va o matua ma fanau, i le va o le matai ma lona auaga, i le va o le pule mamalu o tamalii ma failauga o afioaga taitasi ma e tautua. Ua oo lava i faifeau ma a latou aulotu ua i ai le feteenaiga talu lava le aia tatau lenei. Ua uma ai foi le soifua o alo ma fanau ona o le faaoga sese o le aia tatau; a ote atu le tama i le tama po o le teine ona le malie lea ona faaoga sese lea o le aia tatau i le pule ai i le ola vaeatu le paia o le Maota.

Ona i ai lea o se lagona toatasi lava i lou Sui Usufono, e a pea suia le aia tatau i se isi faaupuga? Aua o le aia tatau lenei ua manunu ai le toau; o le aia tatau lenei ua mafai ai e au o le matai e le fainuu ona ou tauva i le nofoa o lou itumalo ona o le malosi o lau aia tatau.

E a pea tuu ese ia lenei upu o le aia tatau i le tatou Vaega Faaupufai? Tuu ese ia lea faaupuga Vaega Faaupufai e Puipuia Aia Tatau a Tagata ae tuu i ai e faapea, Vaega Faaupufai e Puipuia le Saogalemu o Tagata aua e faapitoa sona malosi. A o le aia tatau e tuusaoloto, e matautia le malosi e amata mai lava i le tama ua selau ma ona tupu tausaga e oo i le lima tausaga o le tamaitiiti ua na iloa faaoga le aia tatau, ua fai lana aia tatau, a ua manunu ai le toau i itu eseese ma le manuia ai faiga faalenuu, faiga faaEkalesia ma ua oo mai lava i Faigamalo Na ona aveatu faatautaulagalemau i tafatafa o lau Afioga i le Fofoga Fetalai, liuliu malie i ai le tofa i le Afioga i le Palemia, le aiga Kapeneta ma Sui Usufono o le Palemene aemaise foi lau Afioga i le Taitai o le Itu Agai ma lena itu o le Maota.

Faatai lea ma se leo, tau ia ina alofa le Atua i faagasologa o le fonu a le Palemene i lenei vaiaso, ia muaau faalele le Tapaau i le lagi. Aumai lona filemu e faatoafilemuina ai le tofa ma le faautaga. O lo o molimau mai le Afioga a le Atua, o Malo fetuatuanai e le faatumauina; afai e fetuatuanai le tatou faiga Malo e faaalua i saunoaga ma fetalaiaga, ou te le vavalo e le faatumauina. E moni Afioga a le Atua e le pelogia i tatou e le Atua. Ao ni Malo e feoeoeai ma fealofani e faatumauina e le Atua e oo i le faavavau.

Faatai lea ma le leo ia foi maia, o le a se vaega ua sala pe paopapa pe taulaulu i le faafofogaaga a le Maota, foi mai i le tamaloa Gagaifomauga Nu.3

Ia manuia le Fono.